

全宋词

1

中国诗词大全
黄草集电子书图书馆系列

哀 长 吉

水调歌头 贺人新娶，集曲名

紫陌风光好，绣阁绮罗香。相将人月圆夜，早庆贺新郎。先自少年心意，为惜殢人娇态，久俟愿成双。此夕于飞乐，共学燕归梁。

索酒子，迎仙客，醉红妆。诉衷情处，些儿好语意难忘。但愿千秋岁里，结取万年欢会，恩爱应天长。行喜长春宅，兰玉满庭芳。

齐天乐 贺人入赘

青鸾海上传芳信。蓝田路入仙境。万卷书传，六奇计运，冰玉炯然清润。帷褰凤锦。□镜启鸾台，烟横鸳枕。一笑相迎，一双两好恰斯称。

风流人在仙隐。更一县、陶柳春近。梦想金桃，宴分玉果，指日送尝汤饼。粉榆接畛。管此去亲盟，镇长交聘。自古朱陈，一村惟两姓。

朝中措 贺生第三子

自从佳偶共黄姑。几见设门弧。方喜阶庭联玉，又闻老蚌生珠。

一门三秀，贾家虎子，薛氏鸾雏。从此公侯衮衮，看看百子成图。

西江月 贺人生日生孙

百和香凝宝络，长生酒满金尊。葱葱佳气蔼庭萱。同把椿龄祝愿。

玉树已生谢砌，孙枝复长于门。伫看百子共千孙。此去公侯衮衮。

瑞鹤仙 寿南康钱守 正月初六

天基佳节后。又诗咏嵩生，贤歌天佑。千龄运非偶。庆一堂风虎，云龙感召，相门华胄。盛少屈、一钱太守。听吏歌、一径棠阴，民颂两岐麦秀。

知否。海峰天柱，道骨仙风，总天所授。席虚机右。金瓯下，署名久。伫泥封飞下，沙堤归去，指日家声复旧。年年献、金鉴千秋，玉卮万寿。

又 寿萧通判 十月初一日

小春天未雪。见两蕊三花，放梅时节。昴宿孕人杰。对梅花雪片，平分风月。冰清玉洁。天赋与、仙风道骨。更等闲、来访刘

仙，觅取秘传真诀。

闻说。辉联台宿，瑞应文昌、世承阀阅。相门事业。有祖父、旧风烈。管泥封飞下，沙堤归来，光复青毡旧物。庆家传、八叶联芳，又添一叶。

巴谈

失调名 送穷鬼词

正月月尽夕。芭蕉船一双。灯盏两只明
辉辉，内里更有筵席。奉劝郎君小娘子。饱
吃莫形迹。每年只有今日日。愿我做来称意。
奉劝郎君小娘子。空去送穷鬼。空去送穷鬼。

巴州守

水调歌头

霁色满空碧，爽气正横秋。登高行乐，
□来只说古巴州。扫□尘埃来坐，携取烟云
杖屦，容□□清游。坐上尽佳客，一醉破千
忧。

倚虚壁，绝临□，上层楼。黄花赤叶，
鸟□啼断四山幽。醉里不知归去，空有乱云
衰草，落日几多愁。舞鹤在霄汉，宿鹭点汀
洲。

白君瑞

满江红 木芙蓉

木落林疏 ,秋渐冷、芙蓉新拆。傍碧水 ,晓
妆初鉴 ,露匀妖色。故向霜前呈艳态。想应青
女加怜惜。映朝阳、翠叶拥红苞 ,闲庭侧。

岩桂香 ,随飘泊。篱菊嫩 ,陪幽寂。笑春
红容易 ,被风吹落。满眼炯然宫锦烂 ,一身如
寄神仙宅。把绿尊、莫惜醉相酬 ,春工力。

水调歌头

凉吹拂衣袂 ,助我上高台。云檐风栋 ,窗
户绝纤埃。四绕江山雄丽 ,万古盘龙踞虎 ,壮
气锁崔嵬。二水中分远 ,艇子自归来。

望白云 ,迎碧汉 ,俯长淮。铎声到耳 ,亭亭
孤塔现林隈。烟惹宫城深树 ,日照酒楼帘幕 ,
物象眼前排。长啸下梯径 ,欲去更徘徊。

柳梢青 曹溪英墨梅(案大典原无调名 ,兹据律补)

玉骨冰姿 ,天然清楚 ,雪里曾看。物外幽
人 ,细窥天巧 ,收入毫端。

一枝影落云笺。便似觉、清风夜寒。试向松窗 ,等闲一展 ,俗虑都捐。

风入松 寄故人

一冬不见雪花飞。爱日荡晴晖。腊残未解寒塘冻 ,东风细、已露春期。正是年时策马 ,相随村落寻梅。

故人别久信音稀。排闷有新诗。雁声北去江城暖 ,暗舒展、花柳容仪。屈指烧灯不远 ,等闲休锁双眉。

念奴娇 寄临安友

江干蹭蹬 ,镇寻常、怀想京城春色。静倚山亭凝望处 ,惟见鸟飞云幂。拂面埃尘 ,跳□□□ ,老却风流格。年来却有 ,短蓑轻棹胸臆。

闻与俊逸嬉游 ,笙歌丛里 ,眷恋中华国。况是韶阳将近也 ,应办青骢金勒。丰乐阑干 ,西湖烟水 ,遍赏苏堤侧。举觞须酹 ,天隅犀渚孤客。

百兰

醉蓬莱

怪柳吟翻雪 ,梅笑冲寒 ,郁葱如彩还是瑶池 ,宴神仙俦侣。罗幕轻掀 ,绣帘低揭 ,按霓裳宫羽。宝炷熏浓 ,佩环声颤 ,凤飞鸾舞。

犹记年时 ,玉箫吹彻 ,并驾萧郎 ,共骖羸女。旋捧麒麟 ,种旧家前武。政了摘星天上 ,早约个、嫦娥住妆点华堂 ,双扶醉玉 ,黑颠如许。

满庭芳 贺晚生子

有分非难 ,是缘终合 ,采来还换须臾。少年培植 ,春意已敷腴。毕竟花多驻果 ,坚牢是、蚌老生珠。君知否 ,今番定也 ,颠不破璠玕。

遥知纷瑞霭 ,十分郎罢 ,黄溢眉须。便何妨燕喜 ,剩买欢娱。况侍北堂难老 ,庭阶映、玉树森如。金荷劝 ,从教酩酊 ,扶醉看孙株。

雨中花 贺欧文建楼与桥

钉斗云山 ,挨排烟水 ,六丁午夜文移。道

滁翁孙子 ,欲寄游嬉。高趁鹭霞舒啸 ,低群鸥鹭忘机。牢笼两下 ,楼乘汗漫 ,桥枕清漪。

 灞陵吟畅 ,岳阳登览 ,百色都副襟期。还好是、行天马渡 ,探月人归。倚柱荷香扑面 ,凭栏桂影侵衣。索梅无便 ,春风不碍 ,容我追随。

包 恢

水调歌头 三月初三

羽觞随曲水，佳气溢双清。真贤瑞世，
恰与真圣日同生。出侍红云一朵，出按皇华
六轡，特地福吾闽。底是长生篆，八郡咏歌
声。

奏天子，倾义廩，济饥民。南州指使，
青州公案一般仁。却恐紫泥有诏，社稷重臣
事业，非晚覲严宸。来岁这般书，宣劝玉堂
人。

包 荣 父

西江月 寿游侍郎

某恭审某官瑞纪门弧，辉增从橐。适逢八帙，共庆千秋。挂神虎之冠，未酬雅志；叶非熊之卜，会有好音。某受知最深，赞喜尤剧。康宁富寿，公其五福之具全；倬耆期颐，我则一忱而有祷。谩寄西江月调，以寿似山仙人，倘蒙薰慈，特赐采瞩，某下情宠耀之至。

雅意浯亭宽碧，何心禁路宽华。芝兰玉树侍臣家。一段洛滨图画。

庆事两年亲见，今年福寿堪夸。更从头、上人添些。却是八千岁也。

宝夫人

失调名

去时梅蕊全然少。

宝月

蓦山溪

清江平淡，疏雨和烟染。春在广寒宫，
付江梅、先开素艳。年年第一，相见越溪东，
云体态，雪精神，不把年华占。

山亭水榭，别恨多销黯。又是主人来，
更不辜、香心一点。题诗才思，清似玉壶冰，
轻回顾，落尊前，桃杏声华减。

鹊踏枝

斜日平山寒已薄。雪过松梢，犹有残英
落。晚色际天天似幕。一尊先与东风约。

邀得红梅同宴乐。酒面融春，春满纤纤
萼。客意为伊浑忘却。归船且傍花阴泊。

点绛唇 题雪中梅

春遇瑶池，长空飞下残英片。素光围练。
寒透笙歌院。

莫把寿阳，妆信传书箭。掩香面。汉宫
寻遍。月里还相见。

失调名

遥想天孙离别后，一宵欢会，暂停机杼。

柳梢青

脉脉春心，情人渐远，难托离愁。雨后寒轻，风前香软，春在梨花。

行人倚棹天涯。酒醒处、残阳乱鸦。门外秋千，墙头红粉，深院谁家。

惜双双

庾岭香前亲写得。子细看、粉匀无迹。月殿休寻觅。姑射人来，知是曾相识。

不要青春闲用力。也会寄、江南信息。著意应难摘。留与梨花，比并真颜色。

洞仙歌

广寒晓驾，姑射寻仙侣。偷被霜华送将去。过越岭、栖息南枝，匀妆面、凝酥轻聚。爱横管孤度陇头声，尽拚得幽香，为君分付。

水亭山驿，衰草斜阳，无限行人断肠处。尽为我、留得多情，何须待、春风相顾。任倒断深思向梨花，也无奈，寒食几番春雨。

碧虚

贺新郎 寿毕府判

袞袞登台阁。问诸公、谁讲谁明，诗书礼乐。前日毕星光焰里，有一濂渠伊洛。被翠玉、江山占却。天下国家多少事，好人才、半刺东南角。当路者，欠商确。

寿杯端拜深深酌。把寻常、祝颂芜词，一时删削。引饮莱公同鼎轴，共定澶渊一著。二百载、无人能学。文简毕公真事业，非先生之托谁之托。龟鹤舞，蛟龙跃。

毕良史

临江仙 席上赋

霜月穿帘乍白，苹风入坐偏凉。麝灯促席诧时光。桃花歌扇小，杨柳舞衫长。

别乘平分风月，词人剩引觥觞。莫将幽恨搅刚肠。尽添金掌露，频注玉猊香。

好事近 席上赋

高会罢飞觞。方锦再移珍席。雷鼎乍烹甘液，试问侯苍璧。

翠虬宝钏捧殷勤，明灭粲金碧。宾主忘怀谈笑，满华堂春色。

蔡 戡

点绛唇 百索

纤手工夫，采丝五色交相映。同心端正。
上有双鸳并。

皓腕轻缠，结就相思病。凭谁信。玉肌
宽尽。却系心儿紧。

水调歌头 南徐秋阅宴诸将，代老人作

肃霜靡衰草，骤雨洗寒空。刀弓斗力增
劲，万马骤西风。细看外围合阵，忽变横斜
曲直，妙在指麾中。号令肃诸将，谈笑听元
戎。

坐中客，休笑我，已衰翁。十年重到，
今日此会与谁同。差把龙钟鹤发，来对虎头
燕颔，年少总英雄。飞镞落金碗，酣醉吸长
虹。

前调 送赵帅镇成都

拥节出闽峤，易镇上岷山。东西险阻，
分陕初不在荣观。痛念两河未复，独作中流

砥柱，屹若障狂澜。极目神京远，百万虎貔闲。

趁良时，摅豹略，勇声欢。风飞雷厉，威行逆虏胆生寒。汉寝周原如旧，一扫腥膻丑类，谈笑定三关。识取投机会，莫作等闲看。

蔡 京

西江月

八十一年住世，四千里外无家。如今流
落向天涯。梦到瑶池阙下。

玉殿五回命相，彤庭几度宣麻。止因贪
此恋荣华。便有如今事也。

蔡楠

鹧鸪天

病酒厌厌与睡宜。珠帘罗幕卷银泥。风来绿树花含笑，恨入西楼月敛眉。

惊瘦尽，怨归迟。休将桐叶更题诗。不知桥下无情水，流到天涯是几时。

念奴娇 寄仙岩辛承旨

碧梧转影，正露冷天高，凉生襟袖。此夕清辉，谁信道、夜色居然如昼。玉斧重修，宝奁初启，万里寒光透。将军高会，翠鬟争劝尊酒。

遥想地近仙丘，碧山高处，引手攀星斗。醉姮娥，惟但愿、月与佳人长久。罗覆银鞍，雨抛金甲，赢得诗千首。掀髯一笑，此怀人解知否。

满庭芳

寓向仲德宿云轩几两月归南丰、道中寄

手染橙芡，杯摇烛影，夜阑人意醺酣。

故人惜别，却酒更清谈。只合相从老矣，知何事、还著征衫。流年晚，长途匹马，奔走亦何堪。

江潭。摇落后，云嘘绝壁，雪舞空岩。念行人归鬓，今已毵毵。往事真成梦里，十年恨、江北江南。休凝伫，霜风卷地，寒日又西衔。

摊破诉衷情 寄友

夕阳低户水当楼。风烟惨淡愁。乱云飞尽碧山留。寒沙卧海鸥。

浑似画，只供愁。相看空泪流。故人如欲问安不。病来今白头。

又 和

栏干十二绕层楼。珠帘卷素秋。当年尊酒屡迟留。识公惟白鸥。

才得趣，又成愁。情钟我辈流。买山同隐肯来不。遥怜笑点头。

凤栖梧 寄贺司户

狂滥生涯今几许。敕赐湖天，万顷烟波主。约我小舟同老去。要前一叶风掀舞。

邂逅同寻溪上路。淡墨题诗，正在云深处。别后作书频寄语。无忘林下萧萧雨。

蔡 薿

失调名

扇开仙掌。

全宋词 蔡 确

蔡 确

失调名 七夕词

骊山宫中看乞巧，太液池边收曝衣。

蔡伸

水调歌头 用卢赞元韵别彭城

醉击玉壶缺，恨写绿琴哀。悠悠往事谁问，离思渺难裁。绿野堂前桃李，燕子楼中歌吹，那忍首重回。唯有旧时月，远远逐人来。

小庭空，清夜永，独徘徊。伴人幽怨，一枝潇洒陇头梅。肠断云帆西去，目送烟波东注，千里接长淮。为我将双泪，好过楚王台。

又 时居莆田

亭皋木叶下，原隰菊花黄。凭高满眼秋意，时节近重阳。追想彭门往岁，千骑云屯平野，高宴古球场。吊古论兴废，看剑引杯长。

感流年，思往事，重凄凉。当时坐间英俊，强半已凋亡。慨念平生豪放，自笑如今露鬓，漂泊水云乡。已矣功名志，此意付清觞。

又

相逢非草草，分袂太匆匆。征裘泪痕浥

遍，眸子怯酸风。天际孤帆难驻，柳外香骎望断，云雨各西东。回首重城远，楼观暮烟中。

黯销魂，思陈事，已成空。东郊胜赏，归路骑马踏残红。月下一樽芳酒，凭阑几曲清歌，别后少人同。为问桃花脸，一笑为谁容。

满庭芳

烟锁长堤，云横孤屿，断桥流水溶溶。凭阑凝望，远目送征鸿。桃叶溪边旧事，如春梦、回首无踪。难忘处，紫薇花下，清夜一尊同。

东城，携手地，寻芳选胜，赏遍珍丛。念紫箫声阕，燕子楼空。好是卢郎未老，佳期在、端有相逢。重重恨，聊凭红叶，和泪寄西风。

又

风卷龙沙，云垂平野，晚来密雪交飞。坐看阑槛，琼蕊遍寒枝。妆点兰房景致，金铺掩、帘幕低垂。红炉畔，浅斟低唱，天色正相宜。

更阑，人半醉，香肌玉暖，宝髻云欹。又何须高会，梁苑瑶池。堪笑子猷访戴，清兴尽、忍冻空回。仍休羨，渔人江上，披得一蓑归。

又

鸛鵲洲边，芙蓉城下，迥然水秀山明。

小舟双桨，特地访云英。惊破兰衾好梦，开朱户、一笑相迎。良宵永，南窗皓月，依旧照娉婷。

别来，无限恨，持杯欲语，恍若魂惊。念霎时相见，又惨离情。还是匆匆去也，重携手、密语叮咛。佳期在，宝钗鸾镜，端不负平生。

又

秦洞花迷，巫阳梦断，夜来曾到蓝桥。洞房深处，重许见云翘。蕙帐残灯耿耿，纱窗外、疏雨萧萧。双心字，重衾小枕，玉困不胜娇。

寻常，愁夜永，今宵更漏，弹指明朝。叙深情幽怨，泪裊香绡。记取于飞厚约，丹山愿、别选安巢。骖鸾去，青霄路稳，明月共吹箫。

又

玉鼎翻香，红炉叠胜，绮窗疏雨潇潇。故人相过，情话款良宵。酒晕微红衬脸，横波浸、满眼春娇。云屏掩，鸳鸯被暖，欹枕听寒潮。

如今，成别恨，临风对月，总是无聊。念伤心南陌，执手河桥。还似一场春梦，离魂断、楚些难招。佳期在，踏青时候，花底听鸣镳。

苏武慢

雁落平沙，烟笼寒水，古垒鸣笳声断。

青山隐隐，败叶萧萧，天际暝鸦零乱。楼上黄昏，片帆千里归程，年华将晚。望碧云空暮，佳人何处，梦魂俱远。

忆旧游、邃馆朱扉，小园香径，尚想桃花人面。书盈锦轴，恨满金徽，难写寸心幽怨。两地离愁，一尊芳酒，凄凉危栏倚遍。尽迟留，凭仗西风，吹干泪眼。

飞雪满群山 又名扁舟寻旧约

冰结金壶，寒生罗幕，夜阑霜月侵门。翠筠敲竹，疏梅弄影，数声雁过南云。酒醒欹粲枕，怆犹有、残妆泪痕。绣衾孤拥，余香未减，犹是那时熏。

长记得、扁舟寻旧约，听小窗风雨，灯火昏昏。锦衾才展，琼签报曙，宝钗又是轻分。黯然携手处，倚朱箔、愁凝黛颦。梦回云散，山遥水远空断魂。

又

绝代佳人，幽居空谷，绮窗森玉猗猗。小舟双桨，重寻旧约，洞房宛是当时。夜阑红烛暗，黯相对、浑如梦里。旋烘鸳锦，尘生绣帐，香减缕金衣。

须信有、盟言同皎日，□利牵名役，事与君违。□君已许，今生来世，两情到此奚疑。彩鸾须凤友，算何日、丹山共归。未酬深愿，绵绵此恨无尽期。

水龙吟 重过旧隐

画桥流水桃溪路，别是壶中佳致。南楼

夜月，东窗疏雨，金莲共醉。人静回廊，并肩携手，玉芝香里。念紫箫声断，巫阳梦觉，人何在、花空委。

寂寞危栏独倚。望仙乡、水云无际。芸房花院，重来空锁，苍苔满地。物是人非，小池依旧，彩鸳双戏。念当时风月，如今怀抱，有盈襟泪。

蓦山溪 登历〔阳〕（易）城楼

孤城暮角，落日边声静。醉袖拂危阑，对天末、孤云愁凝。吴津楚望，表里抱江山，山隐隐，水迢迢，满目江南景。

羁怀易感，往事伤重省。罗袂浥残香，鬓星星、忍窥清镜。琼英好在，应念玉关遥，凝泪眼，下层楼，回首平林暝。

又

疏梅雪里，已报东君信。冷艳与清香，似一个、人人标韵。晚来特地，酌酒慰幽芳，携素手，摘纤枝，插向乌云鬓。

老来世事，百种皆消尽。荣利等浮云，谩汲汲、徒劳方寸。花前眼底，幸有赏心人，歌金缕，醉瑶卮，此外君休问。

又

书云今旦，雪霁严凝候。玉辇想回銮，正花覆、千官锦绣。周南留滞，清梦绕觚棱，心耿耿，路迢迢，此际空回首。

华堂荐寿。玉笋持椒酒。一曲啖春莺，更祝我、膺时纳祐。功名富贵，老去已灰心，

唯只愿，捧觞人，岁岁长依旧。

又

金风玉露，时节清秋候。散发步闲亭，
对茱萸、一天星斗。悲歌慷慨，念远复伤时，
心耿耿，发星星，倚杖空搔首。

区区恋豆。岂是甘牛后。时命未来间，
且只得、低眉袖手。男儿此志，肯向死前休，
无限事，几多愁，总付杯中酒。

念奴娇

凌空宝观，乍登临、多少伤离情味。淼
淼烟波吴会远，极目江淮无际。槛外长江，
楼中红袖，淡荡秋光里。一声横吹，半滩鸥
鹭惊起。

因念邃馆香闺，玉肌花貌，有盈盈仙子。
弄水题红传密意，宝墨银钩曾寄。泪粉香销，
碧云□杏，脉脉人千里。一弯新月，断肠危
栏独倚。

又

岁华晚晚，念羁怀多感，佳会难卜。草
草杯盘聊话旧，同剪西窗寒烛。翠袖笼香，
双蛾敛恨，低按新翻曲。无情风雨，断肠更
漏催促。

匆匆归骑难留，鸾屏鸳被，忍良宵孤宿。
回首幽欢成梦境，唯觉衣襟芬馥。海约山盟，
云情雨意，何日教心足。不如不见，为君一
味愁蹙。

又

画堂宴阁，望重帘不卷，轻哑朱户。悄悄回廊，惊渐闻、蟋蟀凌波微步。酒力融春，香风暗度，携手偎金缕。低低笑问，睡得真个稳否。

因念隔阔经年，除非魂梦里，有时相遇。天意怜人心在了，岂信关山遐阻。晓色朦胧，柔情眷恋，后约叮咛语。休教肠断，楚台朝暮云雨。

又

当年豪放，况朋侪俱是，一时英杰。逸气凌云，佳丽地、独占春花秋月。冶叶倡条，寻芳选胜，是处曾攀折。昔游如梦，镜中空叹华发。

邂逅萍梗相逢，十年往事，忍尊前重说。茂绿成阴春又晚，谁解丁香千结。宝瑟弹愁，玉壶敲怨，触目堪愁绝。酒阑人静，为君肠断时节。

又

轻雷骤雨，洗千岩浓翠，层峦森列。衣袂凉生，丛竹外、时有飞萤明灭。云浪鳞鳞，兰舟泛泛，共载一轮月。五湖当日，未应此段奇绝。

归路横玉惊鸾，叫云清似水，悠扬天末。玉宇琼林凝望处，依约广寒宫阙。老去情钟，此心仍在，未肯甘华发。清欢留作，异时嘉话重说。

雨中花慢

寓目伤怀，逢欢感旧，年来事事疏慵。叹身心业重，赋得情浓。况是离多会少，难忘雨迹云踪。断无锦字，双鳞杳杳，新雁雍雍。

良宵孤枕，人远天涯除非梦里相逢。相逢处，愁红叙黛，还又匆匆。回首绿窗朱户，可怜明月清风。断肠风月，关河有尽，此恨无穷。

喜迁莺

青娥呈瑞。正惨惨暮寒，同云千里。剪水飞花，渐渐瑶英，密洒翠筠声细。邃馆静深，金铺半掩，重帘垂地。明窗外。伴疏梅潇洒，玉肌香腻。

幽人当此际。醒魂照影，永漏愁无寐。强拊清尊，慵添宝鸭，谁会黯然情味。幸有赏心人，奈咫尺、重门深闭。今夜里。算忍教孤负，浓香鸳被。

忆瑶姬 南徐连沧观赏月

微雨初晴。洗瑶空万里，月挂冰轮。广寒宫阙近，望素娥缥缈，丹桂亭亭。金盘露冷，玉树风轻。倍觉秋思清。念去年，曾共吹箫侣，同赏蓬瀛。

奈此夜、旅泊江城。谩花光眩目，绿酒如渑。幽怀终有恨，恨绮窗清影，虚照娉婷。蓝桥□杳，楚馆云深。拟凭归梦去，强就枕，无奈孤衾梦易惊。

丑奴儿慢

明眸秀色，别是天真潇洒。更鬓发堆云，玉脸淡拂轻霞。醉里精神，众中标格谁能画。当时携手，花笼淡月，重门深亚。

巫峡梦回，已成陈事，岂堪重话。谩赢得、罗襟清泪，鬓边霜华。念□伤怀，凭阑烟水渺无涯。秦源目断，碧云暮合，难认仙家。

满江红

人倚金铺，颦翠黛、盈盈堕睫。话别处、留连无计，语娇声咽。十幅云帆风力满，一川烟暝波光阔。但回首、极目望高城，弹清血。

并兰舟，停画楫。曾共醉，津亭月。销魂处，今夜月圆人缺。楚岫云归空怅望，汉皋佩解成轻别。最苦是、拍塞满怀愁，无人说。

婆罗门引

再游仙潭薛氏园亭

素秋向晚，岁华分付木芙蓉。萧萧红蓼西风。记得当时撷翠，拥手绕芳丛。念吹箫人去，明月楼空。

遥山万重。望寸碧、想眉峰。翠钿琼珥谩好，谁适为容。凄凉怀抱，算此际、唯我与君同。凝泪际、目送征鸿。

青玉案 和贺方回韵

参差弱柳长堤路。柳外征帆去。皓齿明眸娇态度。回头一梦，断肠千里，不到相逢地。来时约略春将暮。幽恨空余锦中句。小院重门深几许。桃花依旧，出墙临水，乱落如红雨。

又

鸾凤本是和鸣友。奈无计、长相守。云雨匆匆分袂后。彩舟东去，橹声呕轧，目断长堤柳。

涓涓清泪轻绡透。残粉余香尚依旧。独上南楼空回首。夜来明月，怎知今夜，少个人携手。

浣溪沙 壬寅五月西湖

双佩雷文拂手香。青纱衫子淡梳妆。冰姿绰约自生凉。

虚掉玉钗惊翡翠，缓移兰棹趁鸳鸯。鬓鬟风乱绿云长。

又

玉趾弯弯一折弓。秋波剪碧滟双瞳。浅颦轻笑意无穷。

夜静拥炉熏督耨，月明飞棹采芙蓉。别来欢事少人同。

又 仙潭二首

苹末风轻入夜凉。飞桥画阁跨方塘。月移花影上回廊。

粲枕随钗云鬓乱，红绵扑粉玉肌香。起来携手看鸳鸯。

又

窗外疏篁对节金。画桥新绿一篙深。沈沈清夜对横参。

酒晕半消红玉脸，云鬟轻制小犀簪。梦回陈迹杳难寻。

又 昆山月华阁

沙上寒鸥接翼飞。潮生潮落水东西。征船鸣橹趁潮归。

望断碧云无锦字，谩题红叶有新诗。黄昏微雨倚阑时。

又

漠漠新田绿未齐。柳阴阴下水平堤。竹间时有乳鸦啼。

云敛屏山横枕畔，夜阑璧月转林西。玉芝香里彩鸳栖。

又

紫燕双双掠水飞。廉纤小雨未成泥。篱

边开尽野蔷薇。

会少离多终有恨，暂来还去益堪悲。后期重约采莲时。

又

窄窄霜绡稳称身。强临歌酒惨离魂。故人相遇益伤神。

断雨残云千里隔，琼枝璧月四时新。为君留取镜中春。

又

且斗尊前见在身。昔游如梦可销魂。玉容依约旧精神。

千里重来人事改，一杯相属意还新。韶华不减洞中春。

又

赋向伯恭芎苳林木犀二首

木似文犀感月华。寸根移种自仙家。春兰秋菊浪矜夸。

玉露初零秋夜永，幽香直入小窗纱。此时风月独输他。

又

叶剪玻璃蕊糝金。清香端不数琼沈。独将高韵冠芎苳林。

千里江山新梦后，一天风露小庭深。主人归兴已骀骀。

又

浅褐衫儿寿带藤。碾花如意枕冠轻。凤鞋弓小称娉婷。

约略梳妆随事好，出尘标韵出尘清。一枝梅映玉壶冰。

又

窗外桃花烂熳开。年时曾伴玉人来。一枝斜插凤皇钗。

今日重来人事改，花前无语独徘徊。凄凉怀抱可怜哉。

虞美人

瑶琴一弄清商怨。楼外桐阴转。月华澄淡露华浓。寂寞小池烟水、冷芙蓉。

攀花撷翠当时事。绿叶同心字。有情还解忆人无。过尽寒沙新雁、甚无书。

又

飞梁石径关山路。惨淡秋容暮。一行新雁破寒空。肠断碧云千里、水溶溶。

鸾衾欲展谁堪共。帘幕霜华重。鸭炉香尽锦屏中。幽梦今宵何许、与君同。

又

红尘匹马长安道。人与花俱老。缓垂鞭袖过平康。散尽高阳、零落少年场。

朱弦重理相思调。无奈知音少。十年如梦尽堪伤。乐事如今、回首做凄凉。

又 甲辰入燕

彩旗摇曳橈乌转。鹢首征帆展。高城楼观暮云平。叠鼓凝笳都在、断肠声。

绿窗朱户空回首。明月还依旧。乱山无数水茫茫。谁念塞垣风物、噉恹惶。

又

堆琼滴露冰壶莹。楼外天如镜。水晶双枕衬云鬟。卧看千山明月、听潺湲。

渡江桃叶分飞后。马上犹回首。邮亭今夜月空圆。不似当时携手、对婵娟。

又

碧溪曾寄流红字。忍话当时事。重来种种尽堪悲。有酒盈杯、聊为故人持。

夜闲剪烛西窗语。怀抱今如许。尊前莫讶两依依。绿鬓朱颜、不似少年时。

又

鸾屏绣被香云拥。平帖幽闺梦。觉来重试古龙涎。深炷玉炉、烧气不烧烟。

匆匆人去三更也。月到回廊下。出门无语送郎时。泪共一天风露、湿罗衣。

生查子

画堂初见伊，明月当窗满。今夜月如眉，话别河桥畔。

重见约中秋，莫负于飞愿。免使月圆时，两处空肠断。

又

霜寒月满窗，夜永人无寐。绛蜡有余情，偏照鸳鸯被。

看尽旧时书，洒尽今生泪。衙鼓已三更，
还是和衣睡。

又

金壶插玉芝，人面交相照。花影满方床，
翠叠屏山杳。

风月亦多情，特地今宵好。尽道夜初长，
弹指东窗晓。

又

几番花信风，数点笼丝雨。并辔踏香尘，
选胜东郊路。

韶华转首空，谁解留春住。幸到绿尊前，
且作莺花主。

又

银缸委坠红，碧锁朦胧晓。别泪洒金徽，
一曲情多少。

邮亭今夜长，明月香帏悄。纵使梦相逢，
何处寻蓬岛。

南歌子

萧寺疏钟断，虚堂夜气清。凉蟾偏向小
窗明。露井碧梧寒叶、颤秋声。

幽恨人谁问，孤衾泪独横。此时风月此
时情。拟倩蓝桥归梦、见云英。

又

远水澄明绿，孤云黯淡愁。白苹红蓼满
汀洲。肠断圆蟾空照、木兰舟。

节物伤羁旅，归程叹滞留。佳期已误小红楼。赖得今年犹有、闰中秋。

又

恨入眉峰翠，寒生酒晕红。临期凝泪洒西风。须信世间无物、似情浓。

玉蹬敲霜月，金钲伴晓钟。凄凉古驿乱山重。今夜拥衾无寐、与君同。

南乡子

天外雨初收。风紧云轻已变秋。邂逅故人同一笑，迟留。聚散人生宜自谋。

去路指南州。万顷云涛一叶舟。莫话太湖波浪险，归休。人在溪边正倚楼。

又

宣和壬寅，予与向伯恭俱为大漕属官，向有词云：“凭书续断肠。”因此词

木落雁南翔。锦鲤殷勤为渡江。泪墨银钩相忆字，成行。滴损云笺小凤皇。

陈事费思量。回首烟波卷夕阳。尽道凭书聊破恨，难忘。及至书来更断肠。

菩萨蛮 沐发

鸳鸯枕上云堆绿。兰膏微润知新沐。开帐对华灯。见郎双眼明。

锦衾香馥郁。槛竹敲寒玉。何物最无情。晓鸡咿喔声。

又

杏花零落清明雨。卷帘双燕来还去。枕上玉芙蓉。暖香堆锦红。

翠翘金钿雀。蝉鬓慵梳掠。心事一春闲。黛眉颦远山。

又

飞英不向枝头住。等闲又送春归去。云幄翠阴浮。长随日脚流。

玉箫吹凤怨。惊起楼中燕。飞去自双双。恼人空断肠。

又 广陵盛事

水光山影浮空碧。柳丝摇曳春无力。柳岸系行舟。吹箫忆旧游。

旧游堪更忆。望断迷南北。千古恨悠悠。长江空自流。

又

当时携手今千里。可堪重到相逢地。触目尽关心。流莺尚好音。

无人知我意。只有涓涓泪。寂寞到斜阳。罗衣裊旧香。

又

鸣笳叠鼓催双桨。扁舟稳泛桃花浪。别泪洒东风。前欢如梦中。

梦魂无定据。不到相逢处。纵使梦相逢。香闺岂解同。

又

金铺半掩银蟾满。个人应恨归来晚。轧

轧橹声迟。那知心已飞。

迎门一笑粲。娇困横波慢。偎倚绿窗前。
今宵人月圆。

又

双双紫燕来华屋。雨余芳草池塘绿。一
夜摆花风。莺花满树红。

杯深君莫诉。醉袖歌金缕。无奈惜花心。
老来情转深。

又

朝来一阵狂风雨。春光已作堂堂去。茂
绿满繁枝。青梅结子时。

攀枝惊畹晚。乐事孤心眼。正是惜春归。
那堪怨别离。

又

凝羞隔水抛红豆。嫩桃如脸腰如柳。心
事暗相期。阳台云雨迷。

玉楼花似雪。花上朦胧月。挥泪执柔荑。
匆匆话别时。

又

花冠鼓翼东方动。兰闺惊破辽阳梦。翠
被小屏山。晓窗灯影残。

并头双燕语。似诉横塘雨。风雨晓寒多。
征人可奈何。

忆秦娥 西湖

湖光碧。春花秋月无今昔。无今昔。十

年往事，尽成陈迹。

玉箫声断云屏隔。山遥水远长相忆。长相忆。一生怀抱，为君牵役。

又

花阴月。兰堂夜宴神仙客。神仙客。江梅标韵，海棠颜色。

良辰佳会诚难得。花前一醉君休惜。君休惜。楚台云雨，今夕何夕。

清平乐

彩舟双橹。六月临平路。小雨轻风消晚暑。绕岸荷花无数。

玉人璨枕方床。遥知待月西厢。昨夜有情风月，今宵特地凄凉。

又

南窗月满。绣被堆香暖。苦恨春宵更漏短。应讶郎归又晚。

征帆初落桥边。迎门一笑嫣然。今夜流霞共酌，何妨金盏垂莲。

又

明眸秀色。肌理凝香雪。罗绮丛中标韵别。捧酒歌声清越。

不辞醉脸潮红。却愁归骑匆匆。回首绿窗朱户，断肠明月清风。

谒金门

溪声咽。溪上有人离别。别语叮咛和泪

说。罗巾沾泪血。

尽做刚肠如铁。到此也应愁绝。回首断山帆影灭。画船空载月。

又

相思切。触目只供愁绝。好梦惊回清漏咽。烛残香穗结。

长恨南楼明月。只解照人离缺。同倚朱栏飞大白。今宵风月别。

忆王孙

凉生冰簟怯衣单。明月楼高空画栏。满院啼蛩人未眠。掩重关。乌鹊南飞风露寒。

阮郎归

烟笼寒水暝禽栖。满庭红叶飞。兰堂寂寂画帘垂。霜浓更漏迟。

鸳被冷，麝香微。强敲单枕时。西窗看尽月痕移。此情君怎知。

柳梢青

数声鶗鴂。可怜又是，春归时节。满院东风，海棠铺绣，梨花飘雪。

丁香露泣残枝，算未比、愁肠寸结。自是休文，多情多感，不干风月。

又

子规啼月。幽衾梦断，销魂时节。枕上

斑斑，枝头点点，染成清血。

凄凉断雨残云，算此恨、文君更切。老去情怀，春来况味，那禁离别。

又

联璧寻春，踏青尚忆，年时携手。此际重来，可怜还是，年时时候。

阴阴柳下人家，人面桃花似旧。但愿年年，春风有信，人心长久。

好事近

花露滴香红，花底漏声初歇。人似一枝梅瘦，照冰壶清彻。

翠蛾云鬓为谁容，虫丝宝奁结。可惜一春憔悴，负满怀风月。

又

十幅健帆风，天意巧催行客。极目五湖云浪，泛满空秋色。

玉人应怪误佳期，凝恨正脉脉。锦鳞为传尺素，报兰舟消息。

卜算子

风雨送春归，寂寞花空委。枝上红稀地上多，万点随流水。

翠黛敛春愁，照影临清泚。应念韶华惜蕣颜，洒遍胭脂泪。

又

小阁枕清流，一霎莲塘雨。风递幽香入

槛来，枕簟全无暑。

遐想似花人，阅岁音尘阻。物是人非空断肠，梦入芳洲路。

又 题扇

玉斧斫冰轮，中有乘鸾女。鬓乱钗横襟袖凉，只恐轻飞举。

青冥缥缈间，自有吹箫侣。不向巫山十二峰，朝暮为云雨。

又

前度月圆时，月下相携手。今夜天边月又圆，夜色如清昼。

风月浑依旧。水馆空回首。明夜归来试问伊，曾解思量否。

又

重重雪外山，渺渺烟中路。路转山横无尽愁，正是分携处。

望极锦中书，肠断鱼中素。锦素沈沈两未期，鱼雁空相误。

又

春事付莺花，曾是莺花主。醉拍春衫金缕衣，只向花间住。

密意君听取。莫逐风来去。若是真心待于飞，云里千条路。

小重山 吴松浮天阁送别

楼外江山展翠屏。沈沈虹影畔，彩舟横。

一尊别酒为君倾。留不住，风色太无情。

斜日半山明。画栏重倚处，独销凝。片帆回首在青冥。人不见，千里暮云平。

又

澹澹秋容烟水寒。楼高清夜永，倚阑干。玉人不见坐长叹。箫声远，明月满空山。

遐想绿云鬟。青冥风露冷，独乘鸾。别时容易见时难。凭孤枕，聊复梦婵娟。

又

宣和甲辰，余自彭城倅沿檄燕山，取道莫间。见所谓陈懿者于州治之筹边阁，诚不负所闻。明年归，则陈已入道矣。崔守呼之至，即席赠此

流水桃花小洞天。壶中春不老，胜尘寰。霞衣鹤氅并桃冠。新装好，风韵愈飘然。

功行满三千。婴儿并姹女，炼成丹。刘郎曾约共升仙。十个月，养个小金坛。

又

楼上风高翠袖寒。碧云笼淡日，照阑干。绿杨芳草恨绵绵。长亭路，何处认征鞍。

晓镜懒重看。鬓云堆凤髻，任阑珊。鸾衾鸳枕小屏山。人如玉，忍负一春闲。

踏莎行

佩解江皋，魂消南浦。人生惟有别离苦。别时容易见时难，算来却是无情语。百计留君，留君不住。留君不住君须去。望君频问梦中来，免教肠断巫山雨。

又

泰妓胡芳来常隶籍，以其端严如木偶，人因目之为佛，乃作是云

如是我闻，金仙出世。一超直入如来地。慈悲方便济群生，端严妙相谁能比。

四众归依，悉皆欢喜。有情同赴龙华会。无忧帐里结良缘，么诃修哩修修哩。

又

客里光阴，伤离情味。玉觞未举心先醉。临歧莫怪苦留连，樯乌转处人千里。

恨写新声，云笺密寄。短封难尽心中事。凭君看取纸痕斑，分明总是离人泪。

又 题团扇

落日归云，寒空断雁。吴波浅淡山平远。丹青写出在霜缣，佳人特地裁团扇。

渔艇孤烟，酒旗幽院。些儿景趣君休羨。五湖归去共扁舟，何如早早酬深愿。

又

水满青钱，烟滋翠葆。残英满地无人扫。先来羁思乱如云，无端更被春醒恼。

叠叠遥山，绵绵远道。凭阑满目唯芳草。莫惊青鬓点秋霜，卢郎已分愁中老。

又 赠光严道人

玉质孤高，天姿明慧。了无一点尘凡气。白莲空殿锁幽芳，亭亭独占秋光里。

一切见闻，不可思议。我今有分亲瞻礼。愿垂方便济众生，他时同赴龙华会。

定风波

一曲骊歌酒一钟。可怜分袂太匆匆。百计留君留不住。□去。满川烟暝满帆风。

目断魂销人不见。但见。青山隐隐水浮空。拟把一襟相忆泪。试□。云笺密洒付飞鸿。

又

丙寅四月吴门西楼之集

老去情钟不自持。簪花酌酒送春归。玉貌冰姿人窈窕。一笑。清狂岂减少年时。

欲上香车俱脉脉，半帘花影月平西。待得酒醒人已去。凝伫。断云残雨尽堪悲。

点绛唇 登历阳连云观

水绕孤城，乱山深锁横江路。帆归别浦。苒苒兰皋暮。

人在天涯，雁背南云去。空凝伫。凤楼何处。烟霭迷津渡。

又 和安行老韵

香雪飘零，暖风著柳笼丝雨。恼人情绪。春事还如许。

宝勒朱轮，共结寻芳侣。东郊路。乱红深处。醉拍黄金缕。

又

背壁灯残，卧听檐雨难成寐。井梧飘坠。

历历蛩声细。

数尽更筹，滴尽罗巾泪。如何睡。甫能得睡。梦到相思地。

又

月缺花残，世间乐事难双美。夜来相对。把酒弹清泪。

一点情钟，销尽英雄气。樊笼外。五湖烟水。好作扁舟计。

又

玉笋持杯，敛红颦翠歌金缕。彩鸳戢羽。未免群鸡妒。

我为情多，愁听多情语。君休诉。两心坚固。云里千条路。

又

人面桃花，去年今日津亭见。瑶琴锦荐。人弄清商怨。

今日重来，不见如花面。空肠断。乱红千片。流水天涯远。

又 丙寅

梅雨初晴，画栏开遍忘忧草。兰堂清窈。高柳新蝉噪。

枕上芙蓉，如梦还惊觉。匀妆了。背人微笑。风入玲珑罩。

又

帐外华灯，翠屏花影参差满。锦衣香暖。苦恨春宵短。

画角声中，云雨还轻散。河桥畔。月华

如练。回首成肠断。

又

绿萼冰花，数枝清影横疏牖。玉肌清瘦。
夜久轻寒透。

忍使孤芳，攀折他人手。人归后。断肠
回首。只有香盈袖。

又

送常守陈正同应之还朝

解绂朝天，满城桃李繁阴布。彩舟难驻。
忍听骊歌举。

协赞中兴，圣意方倾注。从今去。五云
深处。稳步沙堤路。

又

云雨匆匆，洞房当日曾相遇。暂来还去。
无计留春住。

宝瑟重调，静听鸾弦语。休轻负。绮窗
朱户。好做风光主。

昭君怨

一曲云和松响。多少离愁心上。寂寞掩
屏帷。泪沾衣。

最是销魂处。夜夜绮窗风雨。风雨伴愁
眠。夜如年。

醉落魄

波纹如縠。池塘雨后添新绿。海棠初绽

红生肉。双燕归来，还认旧巢宿。

凝情凭暖阑干曲。新愁无限伤心目。谁人月下吹横玉。惊起鸳鸯，飞去自相逐。

又

霜华摇落。亭亭皓月侵朱箔。梦回敲枕听残角。一片寒声，风送入寥廓。

眼前风月都如昨。独眠无奈情怀恶。凭肩携手于飞约。料想人人，终是赋情薄。

又

明眸秀色。双蛾巧画春山碧。盈盈标韵倾瑶席。一见尊前，宛是旧相识。

深期密语虽端的。良宵无奈成轻掷。忍教只恁空相忆。得入手来，无限好则剧。

又

阳关声咽。清歌响断云屏隔。溪山依旧连空碧。昨日主人，今日是行客。

绿窗朱户应如昔。回头往事成陈迹。后期总便无端的。月下风前，应也解相忆。

极相思

碧檐鸣玉玎珰。金锁小兰房。楼高夜永，飞霜满院，璧月沈缸。

云雨不成巫峡梦，望仙乡、烟水茫茫。风前月底，登高念远，无限凄凉。

又

相思情味堪伤。谁与话衷肠。明朝见也，

桃花人面，碧藓回廊。

别后相逢唯有梦，梦回时、展转思量。
不如早睡，今宵魂梦，先到伊行。

玉楼春

碧桃溪上蓝桥路。寂寞朱门闲院宇。粉
墙疏竹弄清蟾，玉砌红蕉宜夜雨。

个中人是吹箫侣。花底深盟曾共语。人
生乐在两知心，此意此生君记取。

又

星河风露经年别。月照离亭花似雪。宝
钗鸾镜会重逢，花里同眠今夜月。

月华依旧当时节。细把离肠和泪说。人
生只合镇长圆，休似月圆圆又缺。

长相思

我心坚。你心坚。各自心坚石也穿。谁
言相见难。

小窗前。月婵娟。玉困花柔并枕眠。今
宵人月圆。

又

锦衾香。玉枕双。昨夜深深小洞房。回
头已断肠。

背兰缸。梦仙乡。风撼梧桐雨洒窗。今
宵好夜长。

又

村姑儿。红袖衣。初发黄梅插稻时。双

双女伴随。

长歌诗。短歌诗。歌里真情恨别离。休言伊不知。

西地锦

寂寞悲秋怀抱。掩重门悄悄。清风皓月，朱阑画阁，双鸳池沼。

不忍今宵重到。惹离愁多少。蓬山路杳，蓝桥信阻，黄花空老。

归田乐

风生苹末莲香细。新浴晚凉天气。犹自倚朱阑，波面双双彩鸳戏。

鸾钗委坠云堆髻。谁会此时情意。冰簟玉琴横，还是月明人千里。

七娘子

天涯触目伤离绪。登临况值秋光暮。手捻黄花，凭谁分付。雍雍雁落蒹葭浦。凭高目断桃溪路。屏山楼外青无数。绿水红桥，锁窗朱户。如今总是销魂处。

感皇恩

酒晕衬横波，玉肌香透。轻袅腰肢妒垂柳。臂宽金钏，且是不干春瘦。捻金双合字，

无心绣。

鬓云半堕，金钗欲溜。罗袂残香忍重嗅。
渡江桃叶，肠断为谁招手。倚阑凝望久，眉
空斗。

又

膏雨晓来晴，海棠红透。碧草池塘袅金
柳。王孙何在，不念玉容消瘦。日长深院静，
帘垂绣。

璨枕堕钗，粉痕轻溜。玉鼎龙涎记同嗅。
钿筝重理，心事谩凭纤手。素弦弹不尽，眉
峰斗。

减字木兰花

癸亥元日，秀守刘卿任有词。时余适至秀，
因用其韵二首，时初用乐

彤庭龙尾。礼备天颜知有喜。九奏初传。
耳冷人间十七年。

盈成持守。仁德如春渐九有。三辅名州。
好整笙歌结胜游。

又

船回沙尾。几误红窗听鹊喜。尺素空传。
转首相逢又隔年。

寒灯独守。玉笋持杯宁复有。秀水南州。
徒使幽人作梦游。

又

多情多病。玉貌疲来愁览镜。门掩东风。
零落桃花满地红。

重帘不卷。愁睹杏梁双语燕。强拂瑶琴。
一曲幽兰泪满襟。

又 庚申七夕

金风玉露。喜鹊桥成牛女渡。天宇沈沈。
一夕佳期两意深。

琼签报曙。忍使飚轮容易去。明日如今。
想见君心似我心。

又

锦屏人醉。玉暖香融春有味。今日兰舟。
魂梦远随绿水流。

高城望断。无奈城中人不见。斜倚妆楼。
恨入眉峰两点愁。

渔家傲

烟锁池塘秋欲暮。细细前香，直到双栖处。
并枕东窗听夜雨。偎金缕。云深不见来时路。

晓色朦胧人去住。香覆重帘，密密闻私语。
目断征帆归别浦。空凝伫。苔痕绿印金莲步。

西楼子

楼前流水悠悠。驻行舟。满目寒云衰草、
使人愁。

多少恨，多少泪，谩迟留。何似蓦然拚舍、
去来休。

又

红靴玉带葳蕤。翠绡衣。并辔垂鞭妆影、
照清溪、

长亭路。停骑处。晚凉时。空有许多明
月、伴双栖。

御街行

东君不锁寻芳路。曾是莺花主。有情风
月可怜宵，犹记绿窗朱户。十年空想，春风
面杳，无计凭鳞羽。

凄凉怀抱今如许。天与重相遇。不应还
向楚峰前，朝暮为云为雨。算来各把，平生
分付，也不是、恶著处。

上阳春 柳

好在章台杨柳。不禁春瘦。淡烟微雨曲
尘丝，锁一点、眉头皱。

记自灞陵别后。青青依旧。万丝千缕太
多情，忍攀折、行人手。

临江仙

繁杏枝头蜂蝶乱，香风阖坐微闻。靓妆
浓艳任东君。无情风雨，春事已平分。珍重
主人留客意，夜阑秉烛开尊。何须歌韵遏行
云。羽觞交劝，挥麈细论文。

又

昨夜中秋今夕望，十分桂影团圆。玉人相对绿尊前。素娥有恨，应是妒婵娟。

人静小庭风露冷，歌声特地清圆。醉红醺脸髻鬟偏。翠裙轻皱，端的为留仙。

又

帘幕深深清昼永，玉人不耐春寒。镂牙棋子缕金圆。象盘雅戏，相对小窗前。

隔打直行尖曲路，教人费尽机关。局中胜负定谁偏。饶伊使幸，毕竟我赢先。

又

仙品不同桃李艳，移来月窟云乡。幽姿绰约道家妆。绿云堆髻，娇额半涂黄。可但乍凉风月下，饶伊独占秋光。雨中别有恼人香。错教萧史，肠断忆巫阳。

又

琪树鸾栖花露重，依稀兰洞风光。玉人相对自生凉。翠鬟琼佩，绰约蕊珠妆。宝瑟声沈清梦觉，夜阑明月幽窗。可堪襟袂惹馀香。断云残雨，何处认高唐。

又 中秋和沈文伯

记得南楼三五夜，曾听凤管昭华。尊前此际重兴嗟。素娥端有恨，烟霭等闲遮。

珍重主人留客意，厌厌缓引流霞。夜闲银汉淡天涯。亭亭丹桂现，耿耿玉绳斜。

又 藏春石

青润奇峰名韞玉，温其质并琼瑶。中分

瀑布泻云涛。双峦呈翠色，气象两相高。

珍重幽人诚好事，绿窗聊助风骚。寄言俗客莫相嘲。物轻人意重，千里赠鹅毛。

鹧鸪天

客有作北里选胜图，冠以曲子名，东风第一枝，裒然居首，因作此词

脉脉柔情不自持。浅颦轻笑百般宜。尊前唱歇黄金缕，一点春愁入翠眉。

流蕙盼，捧瑶卮。借君歌扇写新诗。浮花谩说惊郎目，不似东风第一枝。

惜奴娇

隔阔多时，算彼此、难存济。咫尺地、千山万水。眼眼相看，要说话、都无计。只是。唱曲儿、词中认意。

雪意垂垂，更刮地、寒风起。怎禁这几夜意。未散痴心，便指望、长偎倚。只替。那火桶儿、与奴暖被。

行香子

珠露初零。天宇澄明。正闲阶、皎月亭亭。更阑人静，烟敛风清。更井边桐，一叶叶，做秋声。

斗帐鸾屏。翠被华裯。梦回时、酒力初醒。绿云堆枕，红玉生春。且打叠起，龙牙簟，竹夫人。

一剪梅

堆枕乌云堕翠翘。午梦惊回，满眼春娇。
嬛嬛一袅楚宫腰。那更春来，玉减香消。

柳下朱门傍小桥。几度红窗，误认鸣镳。
断肠风月可怜宵。忍使恹恹，两处无聊。

又

高宴华堂夜向阑。急管飞霜，羯鼓声乾。
仙人掌上水晶盘。回按凌波，舞袖弓弯。

曲罢凝娇整翠鬟。玉笋持杯，巧笑嫣然。
为君一醉倒金船。只恐醒来，人隔云山。

又 甲辰除夜

夜永虚堂烛影寒。斗转春来，又是明年。
异乡怀抱只凄然。尊酒相逢且自宽。

天际孤云云外山。梦绕觚棱，日下长安。
功名已觉负初心，羞对菱花，绿鬓成斑。

六么令

梅英飘雪，弱柳弄新绿。泠泠画桥流水，
风静波如縠。长记扁舟共载，偶近旗亭宿。
渺云横玉。鸳鸯枕上，听彻新翻数般曲。

此际魂清梦冷，绣被香芬馥。因念多感
情怀，触处伤心目。自是今宵独寐，怎不添
愁蹙。如今心足。风前月下，赖有斯人慰幽
独。

镇西

秋风吹暗雨，重衾寒透。伤心听、晓钟残漏。凝情久。记红窗夜雪，促膝围炉，交杯劝酒。如今顿孤欢偶。

念别后。菱花清镜里。眉峰暗斗。想标容、怎禁销瘦。忍回首。但云笺妙墨，鸳锦啼妆，依然似旧。临风泪沾襟袖。

看花回 和赵智夫韵

夜久凉生，庭院漏声频促。念昔胜游旧地，对画阁层峦，雨馀烟簇。新诗暗藏小字，霜刀刊翠竹。携素手、细绕回塘，芰荷香里彩鸳宿。

别后想、香销腻玉。带围减、钏宽金粟。虽有鳞鸿锦素，奈事与心违，佳期难卜。拟解愁肠万结，唯凭尊酒绿。望天涯断魂处，醉拍阑干曲。

诉衷情

亭亭秋水玉芙蓉。天际水浮空。碧云望中空暮，人在广寒宫。

双缕枕，曲屏风。小房栊。可怜今夜，明月清风，无计君同。

浪淘沙

楼下水潺湲。楼外屏山。淡烟笼月晚凉天。曾共玉人携素手，同倚阑干。

云散梦难圆。幽恨绵绵。旧游重到忍重看。负你一生多少泪，月下花前。

如梦令

人静重门深亚。朱阁画帘高挂。人与月俱圆，月色波光相射。潇洒。潇洒。人月长长今夜。

又

今夜行云何处。还是月华当午。倚遍曲阑桥，望断锦屏归路。空去。空去。梦到绿窗朱户。

愁倚阑

伤春晚，送春归。步云溪。绿叶同心双小字，记曾题。

楼外红日平西。长亭路、烟草萋萋。春雨不成新梦后，倚阑时。

又

天如水，月如钩。正新秋。月影参差人窈窕，小红楼。

如今往事悠悠。楼前水、肠断东流。旧

物忍看金约腕，玉搔头。

又

一番雨，一番凉。夜初长。满院蛩吟人不寝，月侵廊。

木犀微绽幽芳。西风透、窈窕红窗。恰似个人鸳被里，玉肌香。

望江南 感事

花落尽，寂寞委残红。蝶帐梦回空晓月，凤楼人去谩东风。春事已成空。

闲伫立，□□水溶溶。云锁乱山横惨淡，烟笼绿树晚溟蒙。却在泪痕中。

春光好

鸾屏掩，翠衾香。小兰房。回首当时云雨梦，两难忘。

如今水远山长。凭鳞翼、难叙衷肠。况是教人无可恨，一味思量。

风流子

韶华惊晼晚，青春老、倦客惜年芳。庭樾荫浓，半藏莺语，畹兰花减，时有蜂忙。粉墙低，嫩岚滋翠葆，零露湿残妆。风暖昼长，柳绵吹尽，澹烟微雨，梅子初黄。

洛浦音容远，书空漫惆怅，往事悲凉。无奈锦鳞杳杳，不渡横塘。念蝴蝶梦回，子

规声里，半窗斜月，一枕馀香。拟待自宽，
除非铁做心肠。

朝中措

章台杨柳月依依。飞絮送春归。院宇日
长人静，园林绿暗红稀。

庭前花谢了，行云散后，物是人非。唯
有一襟清泪，凭阑洒遍残枝。

又

雨馀清镜湛秋容。屏展九华峰。万里闲
云散尽，半规凉月当空。

楼高夜永，凭阑笑语，此际谁同。端有
妙人携手，恹然归路凌风。

侍香金童

宝马行春，缓辔随油壁。念一瞬、韶光
堪重惜。还是去年同醉日。客里情怀，倍添
凄恻。

记南城、锦迳名园曾遍历。更柳下、人
家似织。此际凭阑愁脉脉。满目江山，暮云
空碧。

江城子 秋夜观牛女星作

碧厨文簟小窗前。乍更阑。□□□。乌
鹊南飞，秋意渐凄然。满院蛩吟风露下，人
窈窕，月婵娟。

双星旧约又经年。信谁传。恨绵绵。□
隔明河，长作断肠仙。争似秦楼萧史伴，瑶
台路，共乘鸾。

西江月

翡翠蒙金衫子，镂尘如意冠儿。持杯轻
按遏云词。别是出尘风味。

莫羨双星旧约，原谐明月佳期。凭肩密
语两心知。一棹五湖烟水。

苍梧谣

天。休使圆蟾照客眠。人何在，桂影自
婵娟。

采桑子

孙仲益集于西斋，题侍儿作第一流，因以词谢
之

奇花不比寻常艳，独步南州，往事悠悠。
辽鹤重来忆梦游。

仙翁不改青青眼，一醉迟留。妙墨银钩。
题作人间第一流。

洞仙歌

莺莺燕燕。本是于飞伴。风月佳时阻幽
愿。但人心坚固后，天也怜人，相逢处、依

旧桃花人面。

绿窗携手，帘幕重重，烛影摇红夜将半。
对尊前如梦，欲语魂惊，语未竟、已觉衣襟
泪满。我只为、相思特特来，这度更休推，
后回相见。

瑞鹤仙

玉猊香谩爇。叹瓶沈簪断，紫箫声绝。
丹青挂寒壁。细端详，宛是旧时标格。音容
望极。奈弱水、蓬山路隔。似瑶林琼树，韶
华正好，一枝先折。

凄切。相思情味，镜中绿鬓，看成华发。
临风对月。空罗袂，搵清血。待随群逐队，
开眉一笑，除你心肠是铁。看今生，为伊烦
恼，甚时是彻。

蔡士裕

金缕曲 罗帛翦梅缀枯枝，与真无异作

怪得梅开早。被何人、香罗剪就，天工奇巧。茅舍竹篱容不得，移向华堂深悄。别一样、风流格调。玉质冰姿依然在，算暗中、只欠香频到。著些子，更奇妙。

有时来伴金尊倒。几徘徊、认成真后，又还误了。费尽东君回护力，空把芳心萦绕。竟不解、索他一笑。夜月纱窗黄昏后，为爱花、翻被花情恼。个恩爱，负多少。

浦湘曲 为金坛教谕干寿道考满帐词

功名早。步武青云缭绕。斯文近有成效。绛纱拍拍春风满，香动一池芹藻。

瓜期到。便勇撤皋比，此去应光耀。立登枢要。向红药阶前紫薇阁，管不负年少。

蔡 挺

喜迁莺

霜天清晓。望紫塞古垒，寒云衰草。汗马嘶风，边鸿翻月，垄上铁衣寒早。剑歌骑曲悲壮，尽道君恩难报。塞垣乐，尽双鞬锦带，山西年少。

谈笑。刁斗静。烽火一把，常送平安耗。圣主忧边，威灵遐布，骄虏且宽天讨。岁华向晚愁思，谁念玉关人老。太平也，且欢娱，不惜金尊频倒。

蔡 襄

好事近

瑞雪满京都，宫殿尽成银阙。常对素光遥望，是江梅时节。

如今江上见寒梅，幽香自清绝。重看落英残艳，想飘零如雪。

蔡幼学

好事近 送春

日日惜春残，春去更无明日。拟把醉同春住，又醒来岑寂。

明年不怕不逢春，娇春怕无力。待向灯前休睡，与留连今夕。

蔡真人

望江南

阑干曲 ,红扬绣帘旌。花嫩不禁纤手捻 ,
被风吹去意还惊。眉黛蹙山青。铎铁板 ,闲引
步虚声。尘世无人知此曲 ,却骑黄鹤上瑶京。
风冷月华清。

曹冠

汉宫春 梅

一品天香。似蕊真仙质 ,宫额新妆。先春为传信息 ,压尽群芳。化工著意 ,赋阳和、欺雪凌霜。应自负 ,孤标介洁 ,岁寒独友松篁。

因念广平曾赋 ,爱浮香胧月 ,疏影横窗。真堪玉堂对赏 ,琼苑依光。江城塞管 ,任龙吟、吹彻何妨。君看取 ,和羹事在 ,收功不负东皇。

凤栖梧 牡丹

魏紫姚黄凝晓露。国艳天然 ,造物偏钟赋。独占风光三月暮。声名都压花无数。

蜂蝶寻香随杖履。睂睵莺声 ,似劝游人住。把酒留春春莫去。玉堂元是常春处。

又 兰溪

桂棹悠悠分浪稳。烟幕层峦 ,绿水连天远。赢得锦囊诗句满。兴来豪饮挥金碗。

飞絮撩人花照眼。天阔风微 ,燕外晴丝卷。翠竹谁家门可款。舫舟闲上斜阳岸。

又

会于秋香阁 ,适令丞有违言 ,赋此词劝之

昨夜西畴新足雨。玉露金飙 ,著意麈残暑。画阁登临凝望处。余霞晚照明烟浦。闲是闲非知几许。物换星移 ,风景都如故。耳听是非萦意绪。争如挥麈谈千古。

又

寻芳 ,饮于小园 元名蝶恋花

桃杏争妍韶景媚。雨霁烟轻 ,山色挼蓝翠。绿竹青松依涧水。了无一点尘埃气。忙里偷闲真得计。乘兴携壶 ,文饮欣同志。对景挥毫聊寓意。赏花对月拚深醉。

夏初临

琴拂虞薰 ,月裁班扇 ,麦秋槐夏清和。笋变琅干 ,绛榴细蹙香罗。绿云初展圆荷。见金鳞、戏跃清波。山丹舒艳 ,葵花映日 ,萱草成窠。

浮云富贵 ,出处无心 ,好天风月 ,如意偏多。功名事业 ,壮怀岂肯蹉跎。待拥雕戈。洗胡尘、须挽天河。醉挥毫 ,知音为我 ,发兴高歌。

又 婺州郡圃

水榭风台 ,竹轩梅径 ,双溪新创名园。极目遐观 ,碧岑敛散瑶烟。柳塘风皱清涟。烂红云、花岛争妍。艳妆佳丽 ,相携笑歌 ,学弄秋千。

遨头多暇 ,命友寻芳 ,赏心行乐 ,物态熙然。俛香拾翠 ,雅宜飞盖联翩。满劝金船。任玉山、频醉花前。且留连 ,赏月画阑 ,拟斗婵

娟。

又

淳熙戊戌四月既望 ,游涵碧 ,登生秋、冲霄二亭 ,
觴咏竟日。是日也 ,初夏恢台 ,园林茂密。瀑泉铿锵 ,
松韵笙箫。峦翠波光 ,上下相映。佳山句在 ,我思古
人 ,对景兴怀 ,视今犹昔 ,何异乎兰亭之感慨也。赋夏
初临一阕 ,以纪时日

翠入烟岚 ,绿铺槐幄 ,薰风初扇微和。茂
樾扶疏 ,绛榴花映庭柯。瀑泉飞下层坡。间新
篁、夹径青莎。良辰佳景 ,登临隼游 ,清兴何
多。

流觴高会 ,不减兰亭 ,感怀书事 ,聊寄吟
哦。升沈变化 ,任它造物如何。蹑磴攀萝。上
冲霄、满饮高歌。醉还醒 ,重宴画楼 ,赏玩金
波。

风入松 双溪阁观水

瑶烟敛散媚晴空。云淡奇峰。澄江金斗
平波面 ,扁舟载、蓑笠渔翁。仿佛辋川图上 ,依
稀苕霅溪中。

春锄掠水浪花重。飞傍芦丛。绮霞斜映
征鸿影 ,供吟毫、佳景无穷。顿起骑鲸游兴 ,泠
然欲御清风。

霜天晓角 清高堂看山

小雨蒙蒙。轻烟舞曳风。林樾高低疏密 ,
依浅濑、媚遥峰。

浴鹭水溶溶。晴霞映晚红。拟向玉堂举似 , 摹写入、画图中。

又

荷花令用欧阳公故事 , 歌霜天晓角词 , 擘荷花 , 遍分席上 , 各人一片 , 最后者饮

浦溆凝烟。谁家女采莲。手捻荷花微笑 , 传雅令、侑清欢。

擘叶劝金船。香风袭绮筵。最后殷勤一瓣 , 分付与、酒中仙。

又

水亭清绝。拥翠环林樾。湘簟宾筵乘兴 , 玉壶酒、漾冰雪。

宝兽沈烟爇。玉琴声韵彻。夜永风微烟淡 , 梧桐影、碎明月。

喜朝天 绮霞阁即踏莎行

绣水雕栏 , 绮霞邃宇。薰风飒至清无暑。花间休唱遏云歌 , 枝头且听娇莺语。景物撩人 , 悠然得句。深杯戏把纹楸赌。胸中邱壑自生凉 , 何须泉石寻佳趣。

又

翠老红稀 , 歌慵笑懒。溟蒙烟雨秋千院。芹泥带湿燕双飞 , 杜鹃啼诉芳心怨。座客分题 , 传觞迭劝。送春惜别情何限。不须惆怅怨春归 , 明年春色重妍暖。

浣溪沙 柳

翠带千条蘸碧流。多情不解系行舟。章台惜别恨悠悠。

湿雨伤春眉黛敛，倚风无力舞腰柔。丝丝烟缕织离愁。

又

槐柳风微轩槛凉。芙蕖绿叶映池光。几多飞盖拥红妆。

泉试云龙花乳泛，袖笼宝鼎水沈香。纹楸戏战赌霞觞。

又

雁字鳞差印碧空。淡云萦缕媚遥峰。悠扬舒卷逐西风。

烟锁绿杨深院静，花前寓意劝金钟。凤箫一曲月明中。

朝中措 茶

春芽北苑小方珪。碾畔玉尘飞。金箸春葱击拂，花瓷雪乳珍奇。

主人情重，留连佳客，不醉无归。邀住清风两腋，重斟上马金卮。

又 汤

更阑月影转瑶台。歌舞下香阶。洞府归云缥缈，主宾清兴徘徊。

汤斟崖蜜，香浮瑞露，风味方回。投辖高

情无厌 ,抱琴明日重来。

念奴娇

宋玉高唐赋述楚怀王遇神女事 ,后世信之。愚独以为不然 ,因赋念奴娇 ,洗千载之诬蔑 ,以祛流俗之惑

蜀川三峡 ,有高唐奇观 ,神仙幽处。巨石嶙峋临积水 ,波浪轰天声怒。十二灵峰 ,云阶月地 ,中有巫山女。须臾变化 ,阳台朝暮云雨。

堪笑楚国怀襄 ,分当严父子 ,胡然无度。幻梦俱迷 ,应感逢魑魅 ,虚言冥遇。仙女耻求媒 ,况神清直 ,岂可轻诬污。逢君之恶 ,鄙哉宋玉词赋。

又 县圃达观赏岩桂

金飏替暑 ,觉庭梧湘簟 ,凉生秋意。玉露宵零仙掌洁 ,云卷碧天如水。银汉波澄 ,蟾光练静 ,依约山横翠。清商佳景 ,笑它宋玉憔悴。

堪笑利锁名缰 ,向蜗牛角上 ,所争何事。四者难并人易老 ,惟有修真得计。荣悴循环 ,功名由命 ,达观明深旨。桂花同赏 ,莫辞通夕欢醉。

又

述怀和赵宰通甫韵

天津仙客 ,话平蔡、曾把龙钟调戏。

裴度未达 ,尝游天津桥。或言蔡州未平 ,一老父指度曰 :必待此人。度笑曰 :见我龙钟 ,故相调戏。

茅舍云林方隐迹 ,日日琴樽适意。鹏激天池 ,扶摇未便 ,尚敛摩云翅。经纶万卷 ,个中真负豪气。喜遇良友知心 ,登临酬唱 ,堪作词林

瑞。况是韶华将近也 ,待约连宵春醉。对客挥毫 ,如虹浩饮 ,争涌如泉思。同寅他日 ,誓坚忠义相济。

又 咏中秋月

碧天如水 ,湛银汉清浅 ,金波澄澈。疑是姮娥将宝鉴 ,高挂广寒宫阙。林叶吟秋 ,帘栊如画丹桂香风发。年年今夕 ,庾楼此兴清绝。

因念重折高枝 ,壮心犹郁 ,已觉生华发。好向林泉招隐处 ,时讲清游真率。乘兴歌欢 ,熙然朝野 ,何日非佳节。百杯千首 ,醉吟长对风月。

西江月 秋香阁

仙掌初零玉露 ,清商乍肃金飈。回环高阁桂香飘。元自广寒移到。

绛蜡银蟾辉映 ,纶巾鹤氅逍遥。赏心乐事醉良宵。赢取开怀吟啸。

又 示忠彦

秋霁姮娥二八 ,寒光逼散浮云。小山丛桂吐清芬。犹带蟾宫风韵。

因念两登仙籍 ,恩沾雨露方新。汝今妙岁已能文。早折高枝荣奋。

又 泛舟

一派弯溪曲港 ,两山松干桎萝。寻幽乘兴泛烟波。时见白鸥飞过。

炫日浪纹金影 ,连云岸草青莎。陶然一醉养天和。解意歌莺劝我。

水调歌头 游三洞

我本方壶客 ,飘逸离凡尘。胸中万卷 ,谈笑挥翰墨通神。不慕巢由隐迹 ,不羨皋夔功业 ,出处两无心。坦荡灵台净 ,屣隐胜云林。

念生平 ,喜旷达 ,事幽寻。登临舒啸 ,惟有风月是知音。雅爱金华仙洞 ,一派苍崖飞瀑 ,四序景常新。遐想赤松子 ,来为醒冲襟。

又 红梅

造物巧钟赋 ,新腊报花期。江梅清瘦 ,只是洁白逞芳姿。我欲超群绝类 ,故学仙家繁杏 ,秾艳映横枝。朱粉腻香脸 ,酒晕著冰肌。

玉堂里 ,山驿畔 ,最希奇。谁将绛蜡笼玉 ,香雪染胭脂。好向歌台舞榭 ,斗取红妆娇面 ,偎倚韵偏宜。羌管莫吹动 ,风月正相知。

又

游燕赏潭洞 ,舒啸对云峰。瀑泉飞下银汉 ,一水净涵空。前度刘郎诗句 ,只咏丹青摹写 ,佳境未亲逢。争似我吟赏 ,携酒屡从容。

濯尘缨 ,挥羽扇 ,快薰风。因思往古游者 ,清兴与今同。泉石因人轻重 ,岷首名传千古 ,登览赖羊公。陵谷有迁变 ,勋烈耀无穷。

鹧鸪天 梦仙

我昔蓬莱侍列仙。梦游方悟绊尘缘。青春放浪迷诗酒 ,黄卷优游对圣贤。嘲水石 ,咏

云烟。乘风欲往思泠然。要知昨夜方壶景 ,只在芸斋杖履前。

好事近 岩桂

蟾苑桂飘香 雅称姮娥珍惜。吹下一丛仙种 ,伴秋光岑寂。

金风玉露嫩凉天 ,造化有消息。醉赏绿云金粟 ,媚枝头月色。

又 己丑重阳游雷峰

商素肃金飚 ,吹帽又逢佳节。乘兴登临舒啸 ,玩云林清绝。

高歌横剑志平戎 ,酒量与天阔。更待醉归开宴 ,赏东篱明月。

又 灯花

良月戒微寒 ,清夜祥烟馥郁。来报天庭喜事 ,现灯花金粟。

艺书奎画下层霄 ,宣召想来促。它日玉堂挥翰 ,赐金莲花烛。

兰陵王 涵碧

晚云碧。松巘飞泉翠滴。双鱼畔、疑是永和 ,曲水流觞旧风物。波光映山色。时见轻鸥出没。壶天邃 ,修竹翠阴 ,虚籁吟风更幽寂。

登临兴何极。上烟际危亭 ,彩笔题石。山中猿鹤应相识。对远景舒箫 ,壮怀豪逸。刘郎何在玩石刻。感往事陈迹。

还忆。少年日。帅旗鼓文场 ,轩冕京国。
如今老大机心息。有陶令秫酒 ,谢公山屐。闲
来潭洞 ,醉皓月 ,弄横笛。

宴桃源 游湖

西湖避暑棹扁舟。忘机狎白鸥。荷香十里
供瀛洲。山光翠欲流。

歌浩浩 ,思悠悠。诗成兴未休。清风明月
解相留。琴声万籁幽。

又

廉纤小雨养花天。池光映远山。蕙兰风
暖正暄妍。归梁燕翼偏。

芳草碧 ,绿波涟。良辰近禁烟。酒酣午枕
兴怡然。莺声惊梦仙。

惜芳菲 述怀

寓意登临诗与酒。豪气直冲牛斗。挥翰
风雷吼。我生嗟在东坡后。

流水高山琴静奏。莫笑知音未偶。天意
君知否。穷通在道吾何有。

江神子 南园

雨余乾鹊报新晴。晓风清。听莺声。飞
盖南园 ,游赏赋闲情。麦垅黄云堆万顷 ,收刈
处 ,有人耕。

淙琤漱玉涧泉鸣。翠峰横。碧云凝。菴

画园林 , 缣素写难成。卢橘杨梅时正熟 , 随处赏 , 饮班荆。

蓦山溪 九日

年年九日 , 萸菊登高宴。今岁旅新丰 , 听征雁、吟蛩幽怨。行行游赏 , 邂逅得诗人 , 呼斗酒 , 发清吟 , 豪气凌霄汉。

穷通默定 , 志士那兴叹。寓意醉乡游 , 且赢得、开怀萧散。功名外物 , 何必累冲襟 , 炼丹井 , 叱羊山 , 寻个修真伴。

又 鉴湖

鉴湖千顷 , 四序风光好。拨棹皱涟漪 , 极目处、青山缭绕。微茫烟霭 , 鸥鹭点菰蒲 , 云帆过 , 钓舟横 , 俱被芳生扰。

知章请赐 , 独占心何小。风月本无私 , 同众乐、宁论多少。浮家泛宅 , 它日效陶朱 , 烹鲈鳊 , 酌松醪 , 吟笔千篇扫。

又 乾道戊子秋游涵碧

深秋澄霁 , 烟淡霜天晓。翠岫峻摩穹 , 有碧涧、清溪缭绕。鸣弦多暇 , 乘兴约登临 , 听水乐 , 玩丰碑 , 遐想东坡老。

当年叔子 , 何事伤怀抱。名与此山俱 , 叹无闻、真成可笑。吾侪勋业 , 要使列云台 , 擒颉利 , 斩楼兰 , 混一车书道。

又 渡江咏潮

潮生潮落 , 千古长如许。吴越旧争衡 , 览遗迹、英雄何处。胥神忠愤 , 贾勇助鲸波 , 湍砥

柱 ,驾鳌峰 ,万骑轰鼙鼓。

连天雪浪 ,直上银河去。击楫誓中流 ,剑
冲星、醉酣起舞。丈夫志业 ,当使列云台 ,擒颉
利 ,斩楼兰 ,雪耻歼狂虏。

又 九日

佳辰洊九 ,吹帽霜风峭。画阁势崔嵬 ,遍
危阑、翠峰缭绕。茂林修竹 ,别是小壶天 ,烟霭
淡 ,夕阳明 ,隐映溪光渺。

匣琴流水 ,休恨知音少。长啸对西风 ,觉
志气、凌云缥缈。传杯兴逸 ,高会继龙山 ,簪嫩
菊 ,插红萸 ,相对年年好。

东坡引 九日

凉飈生玉宇。黄花晓凝露。汀苹岸蓼秋
将暮。登高开宴俎。

传杯兴逸 ,分咏得句。思戏马、长怀古。
东篱候酒人何处。芳尊须送与。

水龙吟 梅

自来百卉千葩 ,算多有、异芬清绝。此花
独赋 ,天然标致 ,于中超越。月脸妆匀 ,碧琼枝
瘦 ,真仙风骨。向严寒雪里 ,千林冻损 ,钟和
气、先春发。

信是芳姿高洁 ,肯趋陪、游蜂戏蝶。玉堂
静处 ,竹梢斜亚 ,凝烟媚月。一任严城上 ,单于
奏、角声凄切。待芳心结实 ,和羹鼎鼐 ,收功须
别。

满江红

淳熙丁酉六月十三日 ,浙宪芮国瑞巡历东阳 ,招饮涵碧。是日也 ,实予始生之日。国瑞用旧词韵作满江红为寿 ,因和述怀

味道韬光 ,伴耕钓、城南涧曲。吾不羡、炼丹金井 ,访仙王屋。清洁无瑕通隐显 ,满堂岂有贪金玉。向北窗、高卧水风凉 ,槐阴绿。

闲自赏 ,东篱菊。偏喜种 ,幽居竹。信巍然良贵 ,有荣无辱。外物随缘姑泛应 ,无心仕止常知足。喜圣时、协气屡丰年 ,西畴熟。

又

日暖烟轻 ,竹梢映、花阴凌乱。微风皱、池光青碧 ,绿杨垂岸。艳杏墙头红粉媚 ,幽兰砌下飘香暖。称邀宾、明日去寻芳 ,频欢宴。光景速 ,浑如箭。醉梦里 ,春强半。且花前莫厌 ,玉杯频劝。一枕游仙方警悟 ,浮名自笑犹萦绊。醉挥毫、付与雪儿歌 ,娇莺啭。

桂飘香 元名花心动

律应清商 ,嫩凉生、金风乍飘林叶。玉兔腾精 ,光浸楼台 ,宛似广寒宫阙。远山横翠烟霏敛 ,鹄枝绕、蛩声凄切。气萧爽 ,一年好处 ,桂花时节。

香压群芳妙绝。记蟾窟高枝 ,两曾攀折。思报君亲 ,何事壮怀犹郁。傅岩莘野时方隐 ,心先定、经纶施設。赏花醉 ,持杯更邀皓月。

喜迁莺 上巳游涵碧

艳阳时序。向袂褰芳辰 ,登临仙府。碧水澄虚 ,修篁耸翠 ,夹径蕙兰香吐。春晚巧莺声碎 ,风卷飞红无数。凝望处 ,见桑村麦陇 ,竹溪烟浦。

欢聚。须信道 ,游宦东西 ,易得成离阻。北海开尊 ,东山乘兴 ,四乐偷闲赢取。棋战新来常胜 ,诗瘦只因吟苦。心湛静 ,笑白云多事 ,等闲为雨。

八六子 九日

晚秋时。碧天澄爽 ,云何宋玉兴悲。对美景良辰乐事 ,采萸簪菊登临 ,共上翠微。

堪嗟乌兔如飞。秉烛欢游须屡 ,传杯到手休辞。念戏马台存 ,隼游安在 ,且开怀抱 ,听歌金缕 ,从教下客 ,疏狂落帽 ,也胜嬴秦东篱。醉中归。花阴月影正移。

木兰花慢 和旧词韵

念行藏在道 ,仕宦岂为谋身。自谤起营蝇 ,东山高卧 ,北海开尊。荣枯置之度外 ,得饶人处 ,漫也饶人。须信吾躬道义 ,巍然良贵中存。

浮名。蜗角是非蚊。过耳总休论。且啸傲幽居 ,清风皓月 ,光景常新。佩琴行吟胜景 ,

访林泉、避暑赏烟云。谁识怀忠畎亩 ,此心常
不忘君。

柳梢青 游湖

湖岸千峰。嵌岩隐映 ,绿竹青松。古寺东
西 ,楼台上下 ,烟雾溟蒙。

波光万顷溶溶。人面与、荷光共红。拔棹
归欵 ,一天明月 ,十里香风。

哨遍

东坡采归去来词作哨遍 ,音调高古。双溪居士櫟
括赤壁赋 ,被之声歌 ,聊写达观之怀 ,寓超然之兴云

壬戌孟秋 ,苏子夜游 ,赤壁舟轻漾。观水
光、潋渺接遥天 ,月出于东山之上。与客同 ,清
欢扣舷歌咏 ,开怀饮酒情酣畅。如羽化登仙 ,
乘风独立 ,飘然遗世高尚。客吹箫 ,音韵远悠
扬。怨慕舞潜蛟、动凄凉。自古英雄 ,孟德周
郎。旧踪可想。噫 ,水与月兮 ,逝者如斯曷尝
往。变化如一瞬 ,盈虚兮、莫消长。自不变而
观 ,物我无尽 ,何须感物兴悲怅。夫天地之间 ,
物各有主 ,惟同风月清赏。念江山美景岂可
量。吾与子、乐之兴徜徉。听江渚、樵歌渔唱。
□侣鱼虾、友麋鹿 ,举匏尊相劝 ,人生堪笑 ,蜉
蝣一梦 ,且纵扁舟放浪。戏将坡赋度新声 ,试
写高怀 ,自娱闲旷。

小重山

风飏池荷雨盖翻。明珠千万颗 ,碎仍圆。

龟鱼浮戏皱清涟。翠光映 ,垂柳幂瑶烟。

幽兴寓薰弦。俗尘飞不到 ,小壶天。身闲
无事自超然。拚酩酊 ,一枕梦游仙。

满庭芳

榴艳喷红 ,槐阴凝绿 ,薰风初扇微凉。新
荷舒盖 ,翠色映波光。时见金鳞戏跃 ,听莺声、
巧啭垂杨。谁知我 ,身闲无累 ,对景自襄羊。

南堂。清昼永 ,瑶琴横膝 ,芸帙披香。负
气冲牛斗 ,操凛冰霜。吟笔通神掣电 ,乘高兴、
鲸吸飞觞。情何憾 ,君亲未报 ,功业志难忘。

卜算子 梦仙

午枕梦游仙 ,身到蓬莱境。何事莺声啭绿
杨 ,刚把人惊醒。

乘兴对琴尊 ,寄傲吟光景。绕舍清阴映远
岑 ,香篆槐堂静。

粉蝶儿

绕舍清阴 ,还是暮春天气。遍苍苔、乱红
堆砌。问留春不住 ,春怎知人意。最关情 ,云
杪杜鹃声碎。

休怨春归 ,四时有花堪醉。渐红莲、艳妆
依水。次芙蓉岩桂 ,与菊英梅蕊。称开尊 ,日
日殢香偎翠。

临江仙 明远楼

三洞烟霞多胜致 ,壶中别有登临。白鸥飞
处晚云深。群峰罗户牖 ,空翠入衣襟。

分得双溪楼上景 ,四时佳趣供吟。浩歌鲸
饮酒频斟。莺花休恨别 ,风月是知音。

浪淘沙 述怀

清介百无求。民瘼怀忧。席珍藏器效前
修。自负平戎经国略 ,壮气横秋。二纪叹淹
留。寻壑经丘。醉吟适意且遨游。致主丹心
犹未老 ,天意知不。

定风波

万个琅玕筛日影 ,两堤杨柳蘸涟漪。鸣鸟
一声林愈静。吟兴。未曾移步已成诗。

旋汲清湘烹建茗 ,时寻野果劝金卮。况有
良朋谈妙理。适意。此欢莫遣俗人知。

青玉案

烟村茂樾湾溪畔。似远景、摹轻练。细草
平沙骑款段。渔翁欸乃 ,却惊鸥鹭 ,飞起澄波
面。

班荆对饮垂杨岸。枝上莺歌如解劝。山
映斜阳霞绮散。醉吟乘兴 ,锦囊诗满 ,爱月归

来晚。

使牛子

晚天雨霁横雌霓。帘卷一轩月色。纹簟坐苔茵 ,乘兴高歌饮琼液。

翠瓜冷浸冰壶碧。茶罢风生两腋。四座沸欢声 ,喜我投壶全中的。

望海潮 绍兴府西园席上

会稽藩镇 ,舟车都会 ,槐庭燕寝凝香。禹穴旧踪 ,兰亭胜致 ,千岩万壑生光。輿颂美龚黄。庆慈闱戏彩 ,眉寿而康。寓兴西园 ,月台风榭赏群芳。

曹 良 史

江城子

夜香烧了夜寒生。掩银屏。理银筝。一曲春风，都是断肠声。杜宇欲啼杨柳外，愁似海，思如云。

背灯暗卸乳鹅裙。酒初醒。梦初醒。兰炷香篝，谁为暖罗衾。二十四帘人悄悄，花影碎，月痕深。

曹 原

齐天乐 和翁时可悼故姬

翠箫声断青鸾翼，心期破钗谁表。夜烛银屏，春风粉袖，犹记琵琶斜抱。瑶池路杳。恨巫女回云，月娥沈照。谩说蓬莱，玉环花貌梦难到。

岩花亭院乍冷，更蛩吟风碎，鸿飞烟渺。绿玉弹棋，红牙按拍，乐事欢情终少。刘郎未老。要鬓翼堆玄，腕酥凝皓。莫忘香荐，绿罗裙带草。

瑞鹤仙

炉烟销篆碧。对院落秋千，昼永人寂。浓春透花骨。正长红小白，晕香涂色。铜驼巷陌。想游丝、飞絮无力。念绣窗、深锁红鸾，虚度禁烟寒食。

空忆。象床沈水，凤枕屏山，殢欢尤惜。粉香狼藉。海棠下、东风急。自秦台箫咽，汉皋佩冷，断雨零云难觅。但杏梁、双燕归来，似曾旧识。

兰陵王 雨中登龟溪乾元寺阁赋

杏花坼。烟柳藏鸦翠陌。苏堤上、人正踏青，嫩草茸茸衬罗袜。游丝挂晴塔。十里酴红艳白。秋千外，娇靥笑春，一片笙箫绮霞碧。

阿香妒倾国。把镜日深奩，丝雨愁织。崇桃积李无颜色。但蝶粉香渍，燕泥芹冷，紫钱芳晕翳宝瑟。怅还近寒食。

岑寂。恨无极。更酒驿孤烟，棋院长日。梨花满地春狼藉。望凤阙波渺，燕楼云隔。凭阑干晚，吟袖湿，但笑拍。

玲珑四犯 被召赋荼蘼

一架幽芳，自过了梅花，独占清绝。露叶檀心，香满万条晴雪。肌素净洗铅华，似弄玉、乍离瑶阙。看翠蛟、白凤飞舞，不管暮烟啼鴂。

酒中风格天然别。记唐宫、赐樽芳冽。玉蕤唤得馀春住，犹醉迷飞蝶。天气乍雨乍晴，长是伴、牡丹时节。夜散琼楼宴，金铺深掩，一庭香月。

惜馀妍 被召赋二色木香

同根异色，看镂玉雕檀，芳艳如簇。秀叶玲珑，嫩条下垂修绿。禁华深锁清妍，香

满架、风梳露浴。轻盈，便似觉、酴醾格调粗俗。

蜂黄间涂蝶粉，疑旧日二乔，各样妆束。费却春工，斗合靓芳秾馥。翠华临槛清赏，飞凤辇、休辞醉玉。晴昼，镇贮春、瑶台金屋。

宴山亭 被召赋玉绣球

香月玲珑，柔风镂刻，嫩绿枝头圆膩。绯桃院宇，絮柳池塘，独立万红尘外。戏舞千团，讶粉羽、留连春媚。非是。看滚雪抛琼，镜鸾相倚。

唐昌仙观风流，有霞洞藏花，绀鬟玉蕊。彫阑占赏，禁苑承恩，难比太平瑶卉。遍插金瓶，更移近、宝猊烟翠。堪爱。只少个、鸳鸯绣带。

曹鲁孙

贺新郎 题江心

极目天如画。水花中、涌出莲宫 ,翠楹碧瓦。胜景中川金焦似 ,勒石□□□□。尚隔浦、风烟不跨。妖蜃自降真歇手 ,涨平沙、妙补乾坤罅。双寺合 ,万僧夏。

东西塔影龙分挂。夜无云、点点一天 ,星斗相射。七十二滩声到海 ,括橹瓯帆上下。泣不为、琵琶声哑。故寝荒凉成一梦 ,问来鸥、去鹭无知者。烟树湿 ,怒涛打。

曹希蕴

西江月 灯花

零落不因春雨，吹嘘何假东风。纱窗一点自然红。费尽工夫怎种。

有艳难寻膩粉，无香不惹游蜂。更阑人静画堂中。相伴玉人春梦。

踏莎行 灯花

解遣愁人，能添喜气。些儿好事先施力。画堂深处伴妖娆，绛纱笼里丹砂赤。

有艳难留，无根怎觅。几回不忍轻轻别。玉人曾向耳边言，花有信、人无的。

曹修斋

贺新郎 海棠次刘草窗韵

旧事凭谁诉。记锦宫、初试浓妆 ,前身天女。玉辇行春娇侍夜 ,浴殿温泉轻注。一点点、猩红啼吐。绣幄篝香春睡足 ,细温存 ,怕遣惊风雨。春梦散 ,黯凝伫。

韶华寂寞今何许。想故宫、柳亦凝愁 ,倚栏停舞。欲趁啼鹃归月下 ,可奈川回山阻。倩万里、鹄来衔子。工部无诗虽结恨 ,道无香、更恨痴人语。拌绝艳 ,付黄土。

曹勋

法曲 道情

散序

飞金走玉常奔驰。日上还西。自古待著长绳系。算尘心、谩劳役堪悲。盘古到此际。桑田变海，海复成陆高低。噫嘻。下土是凡质容仪。寿考能消，几日支持。念一世。真若朝荣暮落难期。幸有志、日传得神仙希夷。希夷。堪为千古人师。

歌头

柱史乘车，青牛驾轭，紫云覆顶，函关令已前知。西升稍驻，尹喜虔恭誓。求老子。亲谈道德微旨。五千余言，俱救末俗，度脱令咸归生理。体元机。人间方解道术，兼明治身，与国阶梯。更有黄庭，专分二境，内外皆举璇题。羽客见者，虔诚恳诵合彝仪。万神潜礼。密奉二经，炷香静默，心无竞，靡端倪。得失扫去，意海澄流要体。内景防愆失。外景忘疲。阆风蓬岛岂能移。念诵灵辞。指群迷。

遍第一

丽景早春时。正花漏初迟。东君出震 ,太和应物 ,恍惚中立丹基。天风卦成随象 ,记合成□□□□□□必相契。三千六百火候 ,密运精微。蒸入肌肤 ,嫩红潮颊 ,自然旧容生辉。情志。鄙凡尘 ,瑶圃满眼 ,都看桃李。晴云万叠开异色。灵光湛湛增秀逸。与道合。真境丹房 ,随时沐浴 ,亦向朝夕。

遍第二

向虚靖晨起。朝元意达 ,冲漠怡怡。三天澄映 ,九光霁碧 ,如有鹤舞鸾飞。泛空际。瑶室明辉。动与真期。至理常寂 ,户庭无远 ,欣欣端比。侍宴日在瑶池。师友多闲 ,抱琴沽酒度曲 ,笑采华芝。九节倚筇时。何须钓月眠石 ,寻觅占渊静逸。乐修持。澹然灵府泳真谛。怡养丹光里。春已收功 ,自育火枣交梨。

遍第三

珠星璧月 ,昼景夜色相催。正阳炎序火府 ,龙珠蕴照 ,冰海融渐。洞天春常好 ,日日琪花 ,琼蕊芳菲。绛景无别 ,惟似琉璃。平地环绕清泚。火中生莲 ,会成真物 ,更取海底龟儿。胜热涤暑风 ,全形莹若冰肌。常存道意。铄石流金无畏。共协混元一气。入冲极。觉自己。乾体还归。

第四遍

南薰殿阁 ,卷窗户新翠。池沼十顷净 ,俯桥影横霓。龟鱼自乐 ,潺潺螭口 ,流水照碧 ,菱荷绿满长堤。柳烟水色 ,一派涟漪。松竹阴

中 细风缓引凉吹。琴韵响 ,玉德凤辇 ,声转瑶徽。疏襟曳履。或行或凭几。待饮彻、玉鼎云英 ,怎更有炎曦。

入破第一

秋容应节 ,渐肃景入窗扉。碧洞连翠微。商律回岩桂。金精壮盛时。拥蟾轮、生素辉。启口天为侣 ,是列仙行缀。心均太上 ,欲度世缘无亏。用定力坚持。奉真常 ,惟凝寂。忱诚贯斗极。赐长生 ,仍久视。洞达虚皇位。德寿高与天齐。

入被第二

清昼静居香冷 ,风动万年枝。凉应兑卦体。秋色鸣轻颺。冥心运正一。御铁牛、耕寸地。都种金钱花 ,秀色照戊己。新霜万物凋谢 ,我常无为。冲起浩然气。抱冲和 ,人间世。登高共赏宴 ,泛东篱。菊尽醉。谁会。登高意表、迥出凡尘外。

入破第三

光铺晓曦。云影拂霜低。空阔飞鸿过 ,两三行、向天际。晴景乍升 ,晃疏棂 ,蜂翅迷。密障红炉暖 ,香缕飘烟细。超然坐久 ,幽径试导寒梅。酥点竹间稀。正疏(蓓)(菩)吐南枝。微阳动细蕊。任斜日、沈澹晖。惨惨寒威。晚知皓雪欲垂垂。

入破第四

黄钟正严凜 ,飞舞屑琼瑰。清赏丰年瑞。云液喜传杯。阴爻会见复 ,动一阳、生浩气。谁问添宫线 ,炼功在金液。晴檐试暖 ,表里莹

如无疵。庭柳漏春信 ,更萱色、侵苔砌。优游
岁向晚 ,叹人间时序疾。还捧椒觞 ,羽衣礼无
极。

第五煞

多景推移。便似风灯里。将尘寰喻 ,尘里
白驹过隙。今世过却 ,来生何处觅。失时节。
生死到来嗟何及。勤而行之。竞力待与、钟吕
相期。三千行满 ,连环脱下已。驾青鸾素鹤朝
太微。

大椿 太母庆七十

梅拥繁枝 ,香飘翠帘 ,钧奏严陈华宴。诚
孝感南极 ,老人星垂眷。东朝功崇庆远 ,享五
福、长乐金殿。兹时寿协七旬 ,庆古今来稀见。

慈颜绿发看更新 ,玉色粹温 ,体力加健。
导引冲和气 ,觉春生酒面。龙章亲献龟台祝 ,
与中宫、同诚欢忭。忆万斯年 ,当蓬莱、海波清
浅。

花心动 同前

椒柏称觞 ,抚寰瀛佳辰 ,正临端月。瑞应
屡臻 ,宫籙多祥 ,气候暖回微冽。圣母七旬寿 ,
夔无前、天心昭格。溥庆处 坤珍效祉 ,宴开清
切。

金殿萧韶备设。锵钧奏留云 ,舞容回雪。
赭袍绣拥 ,袞翟同诚 ,递捧玉杯欢悦。愿将亿
万喜 ,祝亿万、从兹无缺。太平主 ,永隆圣孝凤

阙。

保寿乐 同前

和气暖回元日 ,四海充庭琛贡至。仗卫俨东朝 ,郁郁葱葱 ,响传环佩。凤历无穷 ,庆慈闱上寿 ,皇情与天俱喜。念永锡难老 ,在昔难比。

六宫嫔嫱罗绮。奉圣德、坤宁俱备。箫韶动钧奏 ,花似锦 ,广筵启。同祝宴赏处 ,从教月明风细。亿载享温清 ,长生久视。

宴清都 太母诞辰

画幕明新晓。晴日薄 ,小春微动花柳。宸闱荐祉 ,东朝诞育 ,载光坤厚。朱颜内鼎丹就。喜自得、长生妙有。奉冕旒、衣彩坤珍 ,同耀帕罗珠袖。

钧奏。翠羽帘垂 ,三千粉色 ,花明如绣。歌声缓引 ,梁尘暗落 ,五云凝昼。龙香绕斟芳酒。尽夜饮、何妨禁漏。万万载、常向慈宁 ,俱献圣寿。

又 贵妃生日

凤苑东风软。春容早 ,岁端新律初转。宫云丽晓 ,人日应钟 ,庆符闺范。元妃懿德尊显。位四圣、晋芳避辇。佐圣主、美化重宣 ,光被海宇弥远。

香满。帝渥恩隆 ,歌珠舞雪 ,俱陈丝管。彤闱共悦 ,天颜有喜 ,看寿觞亲劝。今年外家华焕。拥使节、新班侍宴。愿万载、永冠椒房 ,

常奉舜殿。

一寸金 太母诞辰

霜落鸳鸯 , 绣隐芙蓉小春节。应运看 , 月魄分辉 , 坤顺同符 , 文母徽音芳烈。诞育乾坤主 , 均慈爱、练裙岂别。经沙塞、涉履烟尘 , 瑞色怡然更英发。

上圣中兴 , 严恭问寝 , 宫庭正和悦。看寿筵高启 , 龙香低转 , 声入霓裳 , 檀槽新拨。翠袞同行乐 , 钧韶奏、喜盈绛阙。倾心愿、亿载慈宁 , 醉赏闲风月。

国香 同前

十月新阳。喜桃杏秀发 , 宫殿春香。宝历开图 , 文母协应时康。诞庆欣逢令旦 , 向花闱、罄列嫔嫱。欢荣是九五 , 侍膳芳筵 , 翠宸龙章。

天心人共喜 , 拱三钗瑞彩 , 同捧瑶觞。禁中和气 , 都入法部丝簧。一片神仙锦绣 , 正珠帘、高卷云光。遐龄祝亿载 , 永奉慈颜 , 地久天长。

又 中宫生辰

红染芙蓉。似晓霞丽日 , 秋满珠宫。瑞彩朝来 , 都做和气葱葱。共庆龟台降祉 , 化均凤历同风。升平助阴化 , 奉养余闲 , 翰墨鸾龙。

群仙移彩仗 , 尽红妆玉带 , 乐震霜空。响入千岩 , 芳桂香散房栊。劝寿天颜有喜 , 奉觞雁序雍容。蟠桃待从此 , 岁岁今朝 , 荐酒瑶钟。

齐天乐 同前

芙蓉凝露青霞护 ,朝日绮疏风细。正是中秋 ,时候喜逢 ,中宫葱葱佳气。云龙庆会。赞真主当阳 ,辅成天地。暇日琴书 ,暂闲蚕馆见贤志。

嫔嫱衣罗乍试。尽趋椒殿。喜芳绣筵初启。酒面腾红 ,香烟罩碧 ,恩满六宫金翠。何妨绛烛。任花敲玉侧 ,劝教沈醉。凤阙龙楼 ,夜色凉如水。

透碧霄 同前

阆苑喜新晴。正桂华、飘下太清。宝籀凉秋 ,梦祥明月 ,天开辅盈成。宫闱女职遵慈训 ,见海宇仪型。奉东朝、晨夕趋承。化内外、咸知柔顺 ,已看彤管赋和平。

宴坤宁。香腾金猊 ,烟暖秘殿彩衣轻。六乐丝竹 ,绕云萦水 ,总按新声。天临帝幄 ,亲颁寿酒 ,恩意兼勤。雁行缀、宰府殊荣。愿万亿斯年 ,南山并永 ,坤厚赞尧明。

芰荷香 同前

彩云闲。正西瑶阿母 ,初驻非烟。晓空吹静 ,暑气清度薰弦。母仪万国 ,配帝德、直切天垣。阴化从此俱宣。六宫内壶 ,欣拜新班。

况是关雎咏懿美 ,奉东朝晨夕 ,甘旨芳鲜。

上膺慈训 ,下齐海宇均欢。坤宁暇日 ,庆盛旦、
且款芳筵。永赞二圣当天。雍和化洽 ,亿万斯
年。

玉连环 天申寿词

庆云开霁 ,清华明昼 ,殿阁风度薰弦。电
虹敷瑞 ,应炎运当千。端景命、符圣德 ,三阶
正、万国归化 ,远胜文思睿藻 ,问寝格中天。

深严。邃启芳筵。正花拥绛宸 ,瑶殿神
仙。缓闻钧韶奏下 ,歌舞云边。宫闱罄和气 ,
浹南山。罩翠霭、上寿烟。祝无疆御历万万
年。

夏云峰 圣节

绍洪基 ,抚万宇 ,中兴宝运符千。枢电瑞
绕 ,景命燕及云天。挺生真主 ,平四海、复禹山
川。班列立、瞻云就日 ,职贡衣冠。

欢均鳌禁鹄鸾。望花城粉黛 ,金兽祥烟。
笙箫缓奏 ,化国日永留连。宝觞亲劝 ,须纵饮、
歌舞韶妍。都是祝、南山圣寿 ,亿万斯年。

凤凰台上忆吹箫同前

碧玉烟塘 ,绛罗艳卉 ,朱清炎驭升昇。正
应运、真人诞节 ,宝绪灵光。海宇均颁湛露 ,环
佩拱、北极称觞。欢声浹 ,三十六宫 ,齐奉披
香。

全宋词 曹勋

芬芳。宝薰如霭 ,仙仗捧椒扉 ,秀绕嫔嫱。
上万寿、双鬟妙舞 ,一部丝簧。花满蓬莱殿里 ,
光照坐、尊俎生凉。南山祝 ,常对化日舒长。

安平乐 圣节

圣德如尧 ,圣心如舜 ,欣逢出震昌期。中
兴继体 ,抚有寰瀛 ,三阳方是炎曦。万国朝元 ,
奉崇严宸扆 ,咫尺天威。瑞色满三墀。渐嵩
呼、均庆彤闱。

正金屋妆成 ,翠围红绕 ,香霭高散狻猊。
东朝移雕辇 ,与坤仪、同奉瑶卮。阖殿花明 ,亿
万载、咸歌寿祺。视天民 ,永祈宝历 ,垂衣端拱
无为。

夜合花 同前

星拱尧眉 ,日临云幄 ,晓天初静炎曦。香
凝翠扆 ,花笼禁殿风迟。彩山高与云齐。奉明
主、玉璽交挥。庆天申旦 ,九州四海 ,同咏昌
时。

今年麦有双歧。别有琅玕并节 ,深秀联
枝。丰世瑞物 ,嘉祥效祉熙熙。坐中莫惜沈
醉 ,仰三圣、玉德光辉。献南山寿 ,严宸万载 ,
永奉垂衣。

绿头鸭 同前

喜雨薰泛景 ,翠云低柳。正凉生殿阁 ,梅

润晓天 ,暑风时候。应乘乾、彩虹流渚 ,惊电绕、璇霄枢斗。大业辉光 ,益建火德 ,梯航四海尽奔走。六府焕修 ,多方平定 ,寰宇歌元首。凝九有。三辰拱北 ,万邦孚佑。

对祥烟、霁色清和 ,凤韶九成仪昼。听山声、响传呼舞 ,腾紫府、香浓金兽。禁籞升平 ,慈闱燕适 ,袞衣共上玉觞酒。齐奉舜图 ,南山同永 ,合殿备金奏。祝圣寿。圣寿无疆 ,两仪并久。

赏松菊 寿圣诞辰

凉飙应律惊潮韵 ,晓对彩蟾如水。庆霄占梦月 ,已祥开天地。圣主中兴大业 ,二南化、恭勤辅翊。抚宫闱 ,看仪型 ,海宇尽成和气。

禁掖西瑶宴席。泛天风、响钧韶空外。贵是至尊母 ,极人间崇贵。缓引长生丽曲 ,翠林正、香传瑞桂。向灵华 ,奉光尧 ,同万万岁。

瑞鹤仙 贵妃生辰

小梅凝秀色 ,泛霏霭晴和 ,春容初透。璇霄降仙格 ,觉葱葱佳气 ,先惊花柳。芝兰户牖。庆稟质、天长地久。有当熊避辇 ,嘉声懿德 ,六宫居右。

清昼。文箫仪凤 ,妙舞低云 ,缓锵钧奏。香传绣幄 ,腾非雾 ,上金兽。愿千龄遐算 ,三宫慈爱 ,长享兹辰劝酒。向瑶台阆苑 ,芳音永嫔万寿。

水龙吟 会庆节

翠帘迟晚 ,龙楼丽日 ,海宇明新霁。枢旋大电 ,虹流华渚 ,阳春天气。出震乘乾 ,保民立政 ,垂衣裳治。诞恩均九有 ,功兼七制 ,恢图抚、四荒外。

威动殊邻万里。拥衣冠、称觞玉陛。虞韶缓度 ,龙香飞下 ,晴云如水。行见冰天 ,版图来上 ,诸侯盟会。奉怡颜宴罢 ,归移宝辇 ,向瑶池醉。

又 东宫寿词

嫩凉微袅 ,秋容乍肃 ,迥觉凉如水。重阳已近 ,岩华增秀 ,一钩天际。香动前星 ,气横文圃 ,荣光呈瑞。仰宸心密眷 ,行都正牧 ,兵民奉、神明治。

金殿朝回燕适。肆武功、文德咸备。萧闲翰墨 ,惟亲书史、不寻罗绮。欢动宸严 ,宴开鹤禁 ,生朝和气。愿青宫布政 ,龙楼问寝 ,同千万岁。

又 庆王诞辰

傍阶红药 ,新梢翠竹 ,榭阁薰风静。维神降岳 ,维熊占梦 ,姿仪玉聘。金殿趋庭 ,禁严衣彩 ,寝门温清。是宗藩帝子 ,天潢宝牒 ,当神武、侍明廷。

为善先知最乐 ,咏诗书、存存成性。亲师讲道 ,摘华挥藻 ,水云高兴。一代荣观 ,凯尧显舜 ,古今难并。看青华蕊简 ,松乔比寿 ,佐南风政。

月上海棠慢 咏题

东风扬暖 ,渐是春半 ,海棠丽烟径。似蜀锦晴展 ,翠红交映。嫩梢万点胭脂 ,移西溪、浣花真景。蒙蒙雨 ,黄鹂飞上 ,数声宜听。

风定。朱阑夜悄 ,蟾华如水 ,初照清影。喜浓芳满池 ,暗香难并。悄如彩云光中 ,留翔鸾、静临芳镜。携酒去、何妨花边露冷。

松梢月

院静无声。天边正、皓月初上重城。群木摇落 ,松路径暖风轻。喜揖蟾华当松顶 ,照榭阁、细影纵横。杖策徐步空明里 ,但襟袖皆清。

恍若如临异境 ,漾凤沼岸阔 ,波净鱼惊。气入层汉 ,疑有素鹤飞鸣。夜色徘徊迟宫漏 ,渐坐久、露湿金茎。未忍归去 ,闻何处、重吹笙。

隔帘花 咏题

宿雨初晴 ,花艳迎阳 ,槛前如绣如绮。向晓峭寒轻 ,翠真珠十二。正朝曦、桃杏暖 ,透影帘栊烘春霁。似暂隔、祥烟香雾 ,朝仙侣庭际。

更值迟迟丽日。且休约寻芳 ,与开瑶席。未拟上金钩 ,尽围红遮翠。命佳名、坤殿喜 ,为写新声传新意。待向晚、迎香临月须卷起。

东风第一枝 元夕

宝苑明春 ,青霞射晚 ,六幕云闲风静。茂林修竹昂霄 ,素月照人澄莹。梅花十顷 ,递暗香、琼瑶真景。散万斛金莲 ,崇山秀岭 ,尽开花径。

真个好、月灯相映。真个乐、圣驾游幸。四部箫韶 ,群仙奏乐 ,万光耀境。玉华不夜 ,向洞天、暖烟回冷。好大家、酒色醺醺 ,任教漏移花影。

水龙吟 初夏

鉴天云敛壶中 ,昼暖乍喜薰风永。轻纱渐试 ,香罗初褪 ,梅阴又□。广殿窗虚 ,翠帘卷起 ,一番清影。正新篁绿嫩 ,池光涨雨 ,鱼吹浪、燕飞径。

好是九重邃密 ,有岚光、烟溪深静。升平暇日 ,长廊别院 ,笙歌缓整。宝辇迟留 ,玉觞时举 ,何妨乘兴。况一年好处 ,犹寒未暖 ,是清和景。

夏云峰 端午

五云开 ,过夜来、初收几阵梅雨。画罗携芳扇 ,正喜逢重午。角黍星团 ,巧萦臂、龙纹轻缕。细祝降福天中 ,列箫韶歌舞。

薰风凉殿开处。称绡裙雾縠 ,莲步俦侣。

全宋词 曹勋

翠铺交枝艾 ,便手香微度。菖丝浮玉 ,向台榭、
留连欢聚。笑语。自有冰姿消烦暑。

忆吹箫 七夕

烦暑衣襟 ,乍凉院宇 ,梧桐吹下新秋。望
鹊羽、桥成上汉 ,绿雾初收。喜见西南月吐 ,帘
尽卷、玉宇珠楼。银潢晚 ,应是绛河 ,已度牵
牛。

何妨翠烟深处 ,佳丽拥缯筵 ,斗巧嬉游。
是向夕、穿针竞立 ,香霭飞浮。别有回廊影里 ,
应钿合、钗股空留。江天晓 ,萧萧雨入潮头。

尾犯 中秋

秋空过雨静 ,晚景澄明 ,天淡如水。渐看
蟾彩 ,东山旋升 ,金饼上云际。轻烟散尽 ,莹皓
色、消尘翳。倚琼楼 ,皎若瑶台阆风 ,翠阑十
二。

正好登临无外。满斟与、清光对。虽桂华
飘下 ,玉轮移影 ,归兴犹未。待继日同宴赏 ,听
秘乐、广寒宫里。惟怕却 ,明月阴晴未定 ,且宜
欢醉。

秋蕊香 重阳

秋色宫庭 ,黄花禁籞 ,西风乍透罗衣。龙
山意渐爽 ,瑶砌叶初飞。喜天宇、明洁晓晴时。
翠楼都卷帘帷。奉宴赏 ,菊英环坐 ,金玉成围。

凭阑海山万里 ,登望处 ,休论戏马台池。
揽幽芳、泛酒面香凝 ,携手与、仙姿共游嬉。从
他纱帽频敲。并宝马 ,何妨归路 ,月挂天西。

十六贤 闲暇

拱皇图 ,御宝历 ,上圣垂衣。盱食亲万机。
海宇熙熙。登寿域 ,瑞霞彩云常捧日。花阴麦
垌四民齐。宫卫仗肃 ,阊苑瑶池。台殿倚晴
晖。

当盛际。风俗美。寻胜事。人物总游嬉。
太平何处 ,知不摇征旗摇酒旗。四方感格臻上
瑞。官家闲暇宴芳菲。千万岁。嘉会明盛时。

金盏倒垂莲 牡丹

谷雨初晴 ,对晓霞乍敛 ,暖风凝露。翠云
低映 ,捧花王留住。满阑嫩红贵紫 ,道尽得、韶
光分付。禁籞浩荡 ,天香巧随天步。

群仙倚春似语。遮丽日、更著轻罗深护。
半开微吐 ,隐非烟非雾。正宜夜阑秉烛 ,况更
有、姚黄娇妒。徘徊纵赏 ,任放蒙蒙柳絮。

庆清朝 牡丹

绛罗紫色 ,茸金丽蕊 ,秀格压尽群芳。人
间第一娇妩 ,深紫轻黄。乍过夜来谷雨 ,盈盈
明艳惹天香。春风暖 ,宝幄竞倚 ,名称花王。

朝槛五云拥秀 ,护晓日、偏宜翠幕高张。

秣姿露叶 ,临赏须趁韶光。最喜鉴鸾初试 ,数
枝姚魏插宫妆。然绛蜡 ,共花拚醉 ,莫靳瑶觞。

花心动 芍药

密幄阴阴 ,正嘉花嘉木 ,尽成新翠。蕙圃
过雨 ,牡丹初歇 ,怎见浅深相倚。好称花王侍。
秀层台、重楼明丽。九重晓 ,狂香浩态 ,暖风轻
细。

堪想诗人赠意。喜芳艳卿云 ,嫩苞金蕊。
要看秀色 ,收拾韶华 ,自做殿春天气。与持青
梅酒 ,趁凝仁、晚妆相对。且频醉 ,芳菲向阑可
惜。

又 瑞香

玉井生寒 ,正枫落吴江 ,冷侵罗幕。翠云
翦叶 ,紫锦攒花 ,暗香遍熏珠阁。瑞非兰麝比 ,
氤氲清彻寥廓。向燕寝 ,团团秀色 ,巧宜围却。

宝槛浓开对列 ,蜂共蝶多情 ,未知花萼。
爱玩置向窗几 ,时时更碾 ,建春浇著。最是关
情处 ,惊梦回、酒醒初觉。楚梅早 ,前村任他暗
落。

杏花天慢 杏花

桃蕊初谢 ,双燕来后 ,枝上嫩苞时节。绛
萼滋浩露 ,照晓景、裁翦冰绡标格。烟传靓质。
似淡拂、妆成香颊。看暖日、催吐繁英 ,占断上
林风月。

坛边曾见数枝 ,算应是真仙 ,故留春色。

顿觉偏造化 ,且任他、桃李成蹊谁说。晴霁易雪。待对饮、清赏无歇。更爱惜、留引鹪鹩 ,未须再折。

念奴娇 林擒

禁烟过也 ,正东风浓拂 ,来禽奇绝。翠叶修条千万点 ,轻染微红香雪。霁景烘云 ,暖梢吹绽 ,浩荡春容阔。棠阴已静 ,此花标韵终别。

犹记宝帖开缄 ,如何青李 ,与佳名齐列。秀实甘芳莫待看 ,叶底匀圆堪折。且赏琼苞 ,繁英插鬓 ,淡伫留风月。宜将图画 ,有时凝想重阅。

风流子 海棠

中春膏雨歇 ,雕阑晓 ,最好海棠时。正新梢吐绿 ,方苞凝露 ,暖铺云锦 ,香点胭脂。向枝上 ,绪风开秀色 ,桃李尽成蹊。朱唇晕酒 ,脸红微透 ,翠纱轻卷 ,红映丰肌。

严宸风光主 ,临赏处 ,玉殿丽日迟迟。天与造化西蜀 ,浓艳芳菲。待绣帘卷起 ,欢奉长乐 ,内栖多闲 ,同宴椒闱。须是对花满酌 ,不醉无归。

蜀溪春 黄海棠

蜀景风迟 ,浣花溪边 ,谁种芬芳。天与蔷薇 ,露华匀脸 ,繁蕊竞拂娇黄。枝上标韵别 ,浑

不染、铅粉红妆。念杜陵、曾见时 ,也为赋篇章。

如今盛开禁掖 ,千万朵莺羽 ,先借朝阳。待得君王 ,看花明艳 ,都道赭袍同光。须趁排宴席 ,偏宜带、疏雨笼香。占上苑 ,留住春 ,奉玉觞。

倚阑人 荼蘼

清明池馆 ,芳菲渐晚 ,晴香满架笼永昼。翠拥柔条 ,玉铺繁蕊 ,袅袅舞低襟袖。秀蓓凝浩露 ,疑挂六铢衣绉。檀点芳心 ,体薰清馥 ,粉容宜捻春风手。

肯与芝兰共嗅。向夜阑凝月 ,洞户花 ,别是素芳依旧。翦取长梢 ,青蛟喷雪 ,挽住晓云争秀。楼上人未去。常恐风欺雨瘦。红绡收取 ,举觞犹喜 ,容得醺醺酒。

夹竹桃花 咏题

绛彩娇春 ,苍筠静锁 ,掩映夭姿凝露。花腮藏翠 ,高节穿花遮护。重重蕊叶相怜 ,似青帔艳妆神仙侣。正武陵溪暗 ,淇园晓色 ,宜望中烟雨。

向暖景、谁见斜枝处。喜上苑韶华渐布。又似瑞霞低拥 ,却恐随风飞去。要留最妍丽 ,须且闲凭佳句。更秀容、分付徐熙 ,素屏画图取。

峭寒轻 赏残梅

照溪流清浅 ,正万梅都开 ,峭寒天气。才过了元宵 ,渐昼长禁宇 ,迤邐佳时。断肠枝上雪 ,残英已、片影初飞。苒苒随风 ,送春到、便烂漫香迟。

凝睇。迎芳菲至。觉欣欣桃李 ,嫩色依微。应是有新酸、向嫩梢定须 ,一点藏枝。乍晴还又冷 ,从尊前、自落轻细。寄语高楼 ,夜笛声、且缓吹。

竹马子 柳

喜韶景才回 ,章台向晓 ,官柳舒香缕。正和烟带雨 ,遮桃映杏 ,东君先与。乍引柔条萦路。娇黄照水 ,经渭城朝雨。翠惹丝垂 ,玉阑干风静 ,轻轻搭住。

到此曾追想 ,陶潜旧隐 ,忆隋堤津渡。三眠昼永凝露。更许黄鹂娇语。似怕日暖 ,飞花成絮 ,拟雪堆绣户。待放教婆娑 ,如眉处、笼歌舞。

二色莲 咏题

凤沼湛碧 ,莲影明洁 ,清泛波面。素肌鉴玉 ,烟脸晕红深浅。占得薰风弄色 ,照醉眼、梅妆相间。堤上柳垂轻帐 ,飞尘尽教遮断。

重重翠荷净 ,列向横塘暖。争映芳草岸。

画船未桨 ,清晓最宜遥看。似约鸳鸯并侣 ,又更与、春锄为伴。频宴赏 ,香成阵、瑶池任晚。

八音谐 赏荷花 ,以八曲声合成 ,故名

芳景到横塘 ,官柳阴低覆 ,新过疏雨。望处藕花密 ,映烟汀沙渚。波静翠展琉璃 ,似伫立、飘飘川上女。弄晓色 ,正鲜妆照影 ,幽香潜度。

水阁薰风对万姝 ,共泛泛红绿 ,闹花深处。移棹采初开 ,嗅金缨留取。趁时凝赏池边 ,预后约、淡云低护。未饮且凭阑 ,更待满、荷珠露。

清风满桂楼 丹桂

凉飙霁雨。万叶吟秋 ,团团翠深红聚。芳桂月中来 ,应是染、仙禽顶砂匀注。晴光助绛色 ,更都润、丹青风露。连朝看 ,枝间粟粟 ,巧裁霞缕。

烟姿照琼宇。上苑移时 ,根连海山佳处。回看碧岩边 ,薇露过 ,残黄韵低尘污。诗人谩自许。道曾向、蟾宫折取。斜枝戴 ,惟称瑶池伴侣。

雁侵云慢 咏题

晓云低。是残暑渐消 ,凉意初至。翠帘燕去 ,觉商飙天气。凝华吹、动绣额 ,乍殿阁、金

全宋词 曹勋

茎风细。夜雨笼微阴 ,满绮窗、疏影响清吹。

轻飏嫩细透衣。想宵长漏迟 ,香动罗袂。
戏曾计日 ,忆宾鸿来期。杯盘排备宴适 ,乍好
景、心情先喜。待淡月疏烟里 ,试寻岩桂蕊。

锦标归 待雪

风搅长空 ,冷入寒云 ,正是严凝初至。围
炉坐久 ,珠帘卷起 ,准拟六花飞砌。渐冉冉晴
烟 ,更暗觉、远天开霁。阻琼瑶、不舞蓝田 ,但
有蟾华铺地。

想像如今剡溪 ,应误幽人访客 ,轻舟闲舫。
翠幕登临处 ,散无限清兴 ,顿孤沈醉。念好景
佳时 ,漫望极、祥霁为瑞。却梅花、知我心情 ,
故把飞英飘坠。

索酒 四时景物须酒之意

乍喜惠风初到 ,上林翠红 ,竞开时候。四
吹花香扑鼻 ,露裁烟染 ,天地如绣 ,渐觉南薰 ,
总冰绡纱扇避烦昼。共游凉亭消暑 ,细酌轻讴
须酒。

江枫装锦雁横秋 ,正皓月莹空 ,翠阑侵斗。
况素商霜晓 ,对径菊、金玉芙蓉争秀。万里彤
云 ,散飞翼 ,炉中焰红兽。便须点水傍边 ,最宜
著酉。

凤箫吟 郊祀庆成

列旗常。中宵天净 ,郊丘展彩圆苍。肇裡

三岁礼 ,圣天子为民 ,致福穰穰。凝旒亲奠玉 ,
粲珠联、星斗垂芒。渐月转燔柴 ,露重烟断坛
旁。

欢康。青霞催晓 ,六乐均调 ,响逐新阳。
辇回天仗肃 ,庆千官扑舞 ,绣锦成行。鸡竿双
凤阙 ,肆颁宣、恩动荣光。赞永御 ,梦图霈泽 ,
常抚殊方。

六花飞 册宝

寅杓乍正 ,瑞云开晓 ,罩紫府宫殿。圣孝
虔恭 ,率宸庭冠剑。上徽称、天明地察 ,奉玉
检、璇耀金辉 ,仰吾君 ,亲被袞龙 ,当槛俯旒冕。

中兴明天子 ,舜心温清 ,示未尝闲燕。礼
无前比 ,出渊衷深念。赞木父金母至乐 ,万亿
载、日月荣光俱欢忭 ,罗绮管弦开寿宴。

浣溪沙 赏柑

禁籞芙蓉秋气凉。新柑岂待满林霜。旨
甘初荐摘青黄。

乍剖金肤藏嫩玉 ,吴盐兼味发清香。圣心
此意与天长。

又 赏灯

春到皇居景晏温。冰轮驾玉上祥云。烛
龙衔耀九重门。

宫掖两仪临舜殿 ,金莲万斛奉尧尊。官家
慈孝格乾坤。

又 赏丹桂

初过西风烟雨微。霓光留景正团枝。月
中新彩与增辉。

霞影分丹乘浩露 ,珊瑚秀色满彤墀。凉飙
吹上赭红衣。

又

西园赏牡丹 ,寿圣亲见双花 ,臣下皆未睹 ,折以劝
酒 ,词亦继成

春晓于飞彩仗明。西园嘉瑞格和鸣。花
王特地献双英。

并蒂轻黄宜淡淡 ,联芳竞秀巧盈盈。飞琼
萼绿两倾城。

临江仙

中秋夜 ,禁中待月遐观 ,清风袭人 ,嘉气满坐。前
夕连阴 ,至此顿解。少间 ,月出云静 ,瞻天容如鉴。上
喜 ,以诗句书扇 ,臣谨以临江仙歌之

连夜阴云开晓景 ,中秋胜事偏饶。十分晴
莹碧天高。台升吴岫顶 ,乐振海门潮。

桂影一庭香渐远 ,四并都向今朝。宸欢得
句付风骚。围棋消白日 ,赏月度清宵。

又 赏芍药

嫩绿阴阴台榭映 ,南风初送清微。扬州花
市进芳菲。丝头开万朵 ,玉叶衬繁枝。

自是诗人佳赠意 ,花王香借馀姿。翠红深
展奉瑶卮。何妨沈醉赏 ,天与绊春晖。

西江月 丹桂

霞绮浓披翡翠 ,晨光巧上珊瑚。丹林偏许
下清都。香占深岩烟雨。

秋到九华宫殿 ,赭袍红借繁珠。广寒桂与
世花殊。不带人间风露。

又 西园雪后

连夜六花飞舞 ,清晨玉境瑶阶。湖山寒雾
隐楼台。难画西园真态。

月殿九华同到 ,雕舆乘兴俱来。浮春帘密
锦筵开。不是山阴访戴。

诉衷情 宫中牡丹

西都花市锦云同。谷雨贡黄封。天心故
偏雨露 ,名品满深宫。

开国艳 ,正春融。露香中。绮罗金殿 ,醉
赏浓春 ,贵紫娇红。

武陵春 禁中元夕

元夕晴和中禁好 ,梅影玉阑干。峭窄春衫
试嫩寒。金翠会群仙。

移下一天星斗璨 ,喜色动宸颜。行乐风光
莫放闲。月在凤凰山。

四槛花

鸳瓦霜浓 ,兽炉烟冷 ,琐窗渐明。芙蓉红
晕减 ,疏篁晓风清。睡觉犹眠 ,怯新寒 ,仍宿
酒 ,尚有余醒。拥闲衾。先记早梅粼粼 ,流水
泠泠。

须记岁月堪惊。最难管、苍华满镜生。心
地常自乐 ,谁能问枯荣。一味情尘、揩摩尽 ,人
间世 ,更没亏成。惟萧散 ,眠食外 ,且乐升平。

花心动

绿结阴浓 ,渐南风初到、旧家庭院。细麦
落花 ,圆荷浮叶 ,翠径受风新燕。乍晴还雨香
罗怯 ,惜柳絮、已将春远。最好处 ,清和气暖 ,
喜拈轻扇。

好对层轩邃馆。供极目晴云 ,晓江横练。
煮酒试尝 ,梅子团青 ,草草也休辞劝。待等闲
暇寻胜去 ,又闲事、有时萦绊。且趁取良辰 ,醉
后莫管。

胜胜令

梅风吹粉 ,柳影摇金。渐看春意入芳林。
波明草嫩 ,据征鞍 ,晚烟沈。向野馆、愁绪怎
禁。

过了烧灯 ,醉别院 ,阻同寻。琐窗还是冷
瑶琴。灯花也 ,拥春寒 ,掩闲衾。念翠屏 ,应

倚夜深。

玉蹀躞 从军过庐州作

红绿烟村惨淡 ,市井初经虏。舍馆人家 ,
凄凄但尘土。依旧春色撩人 ,柳花飞处 ,犹听
几声莺语。

黯无绪。匹马三游西楚。行路漫怀古。
可惜风月 ,佳时尚羁旅。归处应及荼蘼 ,与插
云鬓 ,此恨醉时分付。

水龙吟 曾相生日

海榴红暖。圆荷翠小 ,榭阁薰风浅。真人
抚运 ,云龙相际 ,真贤载诞。鲁国元勋 ,相门接
踵 ,传家非远。辅中兴大业 ,折冲邻壤 ,扶红
日、上霄汉。

端是清明重见。范陶熔、咸收群彦。垂绅
正笏 ,炉烟不动 ,宸廷闲燕。天地平成 ,父尧子
舜 ,永膺宸眷。赐我公岁岁 ,恩荣锡命 ,向黄金
殿。

又 送戴郎中漕荆襄

晓云阁雨。疏梅缀玉 ,麈尾闻谈吐。精忠
许国 ,才华摘锦 ,尘劳释去。六印雄图 ,百川明
辩 ,苏张谁数。有奇谋欲下 ,阴山族帐 ,惟英
卫、可接武。

想见临戎丰度。慨然定、中原疆土。果惊
一坐 ,折冲遐裔 ,嘉言循古。安拊疲民 ,静摧骄
虏 ,无烦旗鼓。看功成、入辅中兴 ,永佐乾坤

主。

宴清都

野水澄空 ,远山随眼 ,笋舆乘兴庐阜。天池最极 ,云溪最隐 ,翠迷归路。三峡两龙翔翥。尽半月、犹贪杖履。闲引杯 ,相赏好处奇处 ,险处清处。

凝伫。道友重陪 ,西山胜迹 ,玉隆风御。滕阁下临 ,晴峰万里 ,水云千古。飞觞且同豪举。喜醉客、龙吟度曲。待记成佳话 ,归时从头细数。

江神子 徂父以昔年梦诗寄为长短句 ,因韵叙谢

帝俞赓载下方壶。雨随车。旷时无。尽道南丰 ,仙骨秀而都。光照丹丘人快睹 ,金骰衰 ,玉蟾蜍。

自怜老景病仍臞。芑微躯。驻安舆。暗润赤城 ,风露喜踟蹰。行矣相门还入相 ,看惠爱 ,咏猗欤。

满庭芳

白氎行缠 ,青巾包结 ,几年且混常流。寰中谁见 ,心地自清幽。雨散昆仑顶上 ,香润遍、琼圃无忧。灵芽长 ,如今寒暑 ,饥渴总何愁。

诸公 ,须著力 ,尘缘扫尽 ,师旨坚求。看天边 ,飞金走玉难留。住个庵儿不大 ,争恋得、月

馆青楼。台山里 ,从人一任 ,说个好苏州。

又

玉景明心 ,木鸡修性 ,要须和会三家。未知头面 ,何处认摩耶。自有身中异境 ,藏巨浪、一点笼纱。升沈际 ,难将赋得 ,有限逐无涯。

时时 ,须点检 ,随缘遣性 ,何更兴嗟。那浩然独得 ,迥绝痕瑕。妙占熙风惠日 ,乘正气、三缕明霞。真机运 ,连环放下 ,无处不光华。

又

风搅长空 ,霜飞平野 ,冷云常带遥山。乱鸦声断 ,烟霭有无间。气与寒威共凛 ,深绣户、帘幕重关。梅枝亚 ,纤纤秀色 ,疏影小阑干。

相携 ,同好景 ,窥檐望雪 ,呵手低鬟。笑语里、都言雪意非慳。有个红炉暖处 ,围兽炭、不管宵残。从教醉 ,添香倚玉 ,门外任清寒。

选冠子

淮上兀坐 ,等待取接 ,因得汉使一词 ,他日歌之

细柳排空 ,高榆拥岸 ,乍觉楚天秋意。凉随夜雨 ,望极长淮 ,孤馆漫成留滞。天净无云 ,浪痕清影 ,窗户闲临烟水。叹驱驰尘事 ,殊喜萧散 ,暂来闲适。

常念想、圣主垂衣 ,临朝北顾 ,泛遣聊宽忧寄。辘轳载揽 ,虎节严持 ,谈笑挂帆千里。凭仗皇威 ,滥陪枢筦 ,一语折冲遐裔。待归来 ,瞻对龙颜 ,须知有喜。

又 宿石门

秀木撑空 ,凝云藏岫 ,处处群山横翠。霜

风冽面 ,酒力潜消 ,征辔暂指天际。红叶黄花 ,
水光山色 ,常爱晓云晴霁。念尘埃眯眼 ,年华
易老 ,觉远行非易。

常自感、羽客难寻 ,蓬莱难到 ,强作林泉活
计。鱼依密藻 ,雁过烟空 ,家信渐遥千里。还
是关河冷落 ,斜阳衰草 ,苇村山驿。又鸡声茅
店 ,鸦啼露井重唤起。

定风波

雪后篱边冷未晴。江天浓淡暗还明。断
续流香传玉蓓。心醉。临风嗅蕊不胜清。

映竹幽姿深有思。何似。照溪真色更多
情。待得微酸藏傅粉。黄嫩。湿云潜放雨轻
轻。

祝英台

晚寒浓 ,残雪重 ,春意在何许。萼绿仙姿 ,
海上未飞去。粲粲玉立丰标 ,天寒日暮 ,笑东
风、不曾轻付。

几凝伫。闲为写出横斜 ,无声断肠句。常
对幽情 ,何事更重赋。待约他日貂裘 ,玉溪清
夜 ,喷龙吟、月明徐步。

二郎神

半阴未雨。霁晓寒、轻烟薄暮。乍过了挑
青 ,名园深院 ,把酒偏宜细步。满槛梅花 ,绕堤

溪柳 径暖迁莺相语。春澹澹 渐觉清明 相傍小桃才吐。

凝伫。山村水馆 ,难堪羁旅。甚觑著花开 ,频惊屈指 ,谩写奚奴丽句。幸有家山 ,青鸾应报 ,为我整齐歌舞。一任待 醉倚群红 ,花沾酒污。

满路花

清都山水客 ,何事入临安。珍祠天赐与 ,半生闲。曲池人静 ,水击赤乌蟠。飞上烟岚顶 ,三缕明霞照晚 ,时对胎仙。

圃中有个小庭轩。才到便翛然。坐来闲看了 ,篆香残。道人活计 ,休道出尘难。归去后、安排著 ,一辆麻鞋 ,定期踏遍名山。

木兰花慢

断虹收霁雨 ,卷帘幕、与风期。正燕子将雏 ,莺儿弄巧 ,日影迟迟。荼蘼。牡丹过也 ,但游丝、上下网晴晖。三月韶华 ,转头易失 ,密荫匀齐。

常思。入夏景偏奇。是梅雨霏微。更乍著轻纱 ,凉摇素羽 ,翠点清池。还思。故山旧隐 ,想葱茏、翠竹锁窗扉。独倚西楼谩久 ,此怀冷淡谁知。

念奴娇 送李士举

公家世德 ,建凌烟勋业 ,中兴长策。三十

年来 ,皆帝宸殊选 ,金瓯名迹。眷倚江南 ,澄清一道 ,遴柬惟公得。西清严秘 ,龙光高动奎壁。

深殿衣惹天香 ,皇华原野 ,接萧萧秋色。六筦均输行奏课 ,唐室家声皆识。老我相逢 ,萍蓬飘转 ,晚景俱头白。西山南浦 ,溯风衰泪横臆。

又

璩冰铸雪 ,赋神情天壤 ,无伦香泽。月女霜娥 ,直是有如许 ,清明姿色。细玉钗梁 ,温琼环佩 ,语好新音发。相逢一笑 ,桂宫连夜寒彻。

应是第一瑶台 ,水昌宫殿里 ,飞升仙列。小谪尘寰缘契合 ,同饮银浆凝结。醉里归来 ,魂清骨醒 ,乍向层城别。晓风吹袂 ,冷春犹带残月。

又 持节道京城中秋日

五门照日 ,是真人膺箓 ,炎图家国。二百年来 ,抚四海安乐 ,六服承德。虎旅横江 ,胡尘眯眼 ,恨有中原隔。宫城缺处 ,望来消尽金碧。

征辔暂款神州 ,期宽北顾 ,且驰驱朝夕。皓彩流天宁忍见 ,双阙笼秋月色。欲饮无醪 ,还成长叹 ,清泪空横臆。请纓无路 ,异时林下犹忆。

沁园春 早春

春点烟红 ,露鸪新绿 ,土膏渐香。散懒慵情性 ,寻幽选静 ,一筇烟雨 ,几处松篁。恨我求闲 ,已成迟暮 ,石浅泉甘难屡尝。犹堪去 ,向清风皓月 ,南涧东冈。如今雁断三湘。念酒伴、

不来梅自芳。幸隐居药馆,孙登啸咏,从容云水,无负年光。且共山间,琴书朋旧,时饮无何游醉乡。归常是,趁前村桑柘,犹挂残阳。

又 赠清虚先生

五老横峰,二林云衲,自古洞天。喷玉龙飞,下三峡水,望香炉庵霭,如起非烟。有个真人,拨云峰下,宴坐修真不记年。明廷诏,看龙翔凤翥,宸制奎篇。君臣际会诚难。耸翠阁、频颁宝墨鲜。众妙门皆向,微言显启,两朝天德,甘涌神泉。道化承平,应稽升举,且向人间寻有缘。掀髯笑,做庐山隐逸,大宋神仙。

青玉案

东风冉冉迟芳昼。渐黄缀、疏疏柳。为惜春来通安否。可能相就,径须图醉,莫问伤春瘦。

陶然共酌新醅酒。咏好句、须还凤楼手。唱了新词归来后。琐窗香暗,语声和笑,喜入灯花秀。

又

尘埃踏遍长安道。念云水、归来好。趁得梅花先春到。冷云疏雨,暗香寒艳,万玉明清晓。

青鞋黄帽从渠笑。粲十里、冰姿步时绕。正怕和风都过了。已输高士,锦囊翻句,醉后先倾倒。

虞美人

风流贺监栽培好。梅最妍姿巧。娟娟占得入时妆。秀影横斜香并、彩鸳鸯。汉皋解佩当时遇。绿满经行处。如今清梦已惊残。赖向君家窗户、得重看。

又

芙蓉露下闲庭晚。犹觉秋容浅。惊心莫道岁华赊。已有官梅轻放、小春花。西风河汉溪流月。月下疏疏雪。新妆喜是寿阳人。鸾鉴不劳呵手、对寒云。

阮郎归

谁将春信到长安。江南腊向残。玉妃何事在人间。冰肌莹素颜。

新月上，怯轻寒。香心破紫檀。数枝斜傍小亭闲。黄昏人倚阑。

又

玉宸赐得水云身。初欣不佩绅。烟霞一任著衣巾。朝中散袒人。

湖水静，了无尘。语兼天上春。道人相见肯情亲。银钩墨尚新。

菩萨蛮

乱山影直危楼起。天涯目断雕阑倚。寂

寞过东风。行宫烟雨中。

长安何处日。城郭今寒食。谁待翠华归。
片云天际飞。

又

天台不是登长道。浑如弱水烟波渺。楼上指归程。春风无限情。

石桥书不到。雁阵横空杳。愁绪比遥峰。
依依千万重。

又 和贺子忱

琴堂窗户清无暑。宫妆争捧黄金注。劝我醉秋风。难辞两脸红。

别来三堕叶。同是修门客。十载叹萍蓬。
方欣一笑同。

清平乐

去年春破。强半途中过。日日篷窗眠了坐。饱听吴音楚些。

今年犹在天涯。客情触处思家。柳密何人深院，竹疏特地桃花。

又

风休雨罢。三五春寒夜。翠额重帘何妨下。一炷非兰非麝。

红莲开遍吴宫。华灯小试房栊。客里愁须强遣，从来我辈情钟。

又

春前别后。常是双眉皱。生怕莺声催残

漏。梦破闲衾堆绣。

又还玉露金风。秋声先到房栊。川上不传尺素，云间犹望飞鸿。

点绛唇

秋雨溟空，冷侵窗户琴书润。四檐成韵。孤坐无人问。

壮志消沈，喜入清闲运。常安分。炷烟飘尽。更拨余香烬。

又

惨惨春阴，画桡寒漾梅风去。冷风吹度。愁入淮山路。

歌扇归期，只恐春城暮。人何处。柳汀烟渚。听尽篷窗雨。

又

晓日浓阴，冷云遮断山无数。雁飞筝柱。都向愁边去。

帘影沈沈，一缕芳香度。深庭户。且寻欢聚。雪意还成雨。

又

昏旦交时，个中已有甘香味。咽同真液。便觉温温地。

八一高蟠，光动重楼外。但留意。自然和气。香满昆仑水。

浣溪沙

翠袖携持婉有情。湘筠犀轴巧装成。声

随一苇更分明。

倚竹双丝明玉细 ,低眉数曲语莺轻。转移
新韵几多声。

又

玉柱檀槽立锦筵。低眉信手曲初传。凤
凰飞上四条弦。

杨柳已吹三叠韵 ,何须人在九江船。夜凉
人与月婵娟。

酒泉子

霜护云低 ,竹外斜枝初璀璨 ,仙风吹堕玉
钿新。度清芬。

叹寒冰艳了无尘。不占纷纷桃李径 ,一庭
疏影冷摇春。月黄昏。

又

爱景催暄。初向晴梢舒玉点 ,修筠霭霭隔
婵娟。更清妍。

东风欲到冷霜天。常记孤山残雪路 ,一枝
流水小桥边。卧疏烟。

又

惨惨西风。人与两州俱不见 ,一江残照落
霞红。橹声中。

汀花苹草六朝空。人向赏心增远恨 ,闲云
犹绕建康宫。古今同。

又

帘幕闲垂。密密围毡红兽暖 ,有人陌上冷

征衣。未成归。

檐间鹊语卜归期。应是疑人犹驻马,琐窗
日影又还西。翠眉低。

朝中措

一封清诏下金銮。临遣讲邻欢。谁问火
云挥汗,要看易水摇寒。

何妨谈笑,平生志节,可障狂澜。预约黄
花前后,殊庭瞻对宸颜。

又

空箏偏劝酒杯深。歌舞乍沈沈。秀指十
三弦上,挑吟击玉锵金。

牙台锦面,轻移雁柱,低转新音。妙是不
须银甲,向人说尽芳心。

又 送袁提举

鸣珂揽轡玉霄东。持节散陈红。子舍已
先多士,一鞭同袅春风。

西甌旧治,棠阴秀茂,竹马迎逢。正焙行
驰金殿,仙班看缀夔龙。

西江月 琵琶

弦泛龙香细拨,声回花底莺雏。低眉信手
巧工夫。犹带巫烟楚雨。

人占东风秀色,花笼宝髻真珠。锦绦金凤
要人扶。只恐乘鸾飞去。

又 贺子忱家赏瑞香

春绣东风疑早,映檐翠箔低笼。氤氲不是

梦云空。叶密香繁侵冻。

折桂广寒手段 移来点检珍丛。醉归满载
紫云浓。抱膝庵中仙种。

谒金门

春待去。帘外连天飞絮。老大心情慵纵
步。草迷池上路。

春去不知何处。欲问谁能分付。但有清
阴遮院宇。晚莺和暮雨。

玉楼春

昔年曾到神清洞。笑领希夷非夙梦。看
时须到月边乌 ,养处且论铅与汞。土膏仍有黄
芽动。神水浇香灵气种。夜深谁伴玉琴闲 ,鹤
在九华松露重。

饮马歌

此腔自虏中传至边 ,饮牛马即横笛吹之 ,不鼓不
拍 ,声甚凄断。闻兀术每遇对阵之际 ,吹此则鏖战无
还期也

边头春未到。雪满交河道。暮沙明残照。
塞烽云间小。断鸿悲。陇月低。泪湿征衣悄。
岁华老。

长寿仙促拍 太母生辰

舜德日辉光 ,正初冬盛期。东朝喜、诞生

时。向彤闱、清净均化有 ,自然和气。长生久视 ,金殿熙熙。宴瑶池。

袞衣俱侍、玳筵启。花如锦、耀朝晖。太平际天子 ,天下养、共瞻诚意。南山虔祝 ,亿万同岁。

又 贵妃生日

绛阙岩峩 ,正春光到时。当人日、诞芳仪。向宫壶、雅著徽誉美 ,懿德无亏。深被恩荣 ,金殿宴嬉。气融怡。

贤均樛木 ,宜颂二南诗。天心喜、锦筵启。阖部奏笙箫 ,祝寿处、愿与山齐。年年常奉 ,明主禁掖。

浣溪沙

西苑烟光倚槛新。桃花艳艳静无尘。照溪红映一天云。

肯放落红流水 ,且寻歌舞赏明春。持杯知是洞中人。

又 赏梅

日上龙城散晓阴。琼芳堂下玉成林。江梅开未十分深。随处锦亭穹帐暖 ,冷香邀住入衣襟。酒肠判断付频斟。

酒泉子

连面霜风。野馆山村逢至日 ,开怀欲殢酒杯空。与谁同。

一缄来信托飞鸿。信里催归无限意,黄昏
应是出房栊。夜香浓。

诉衷情

人情世态饱经过。眼也见来多。忙中掉
得便去,不是有人唆。

云似舞,水如歌。笑呵呵。这回还我,半
世偎绥,一味磨跢。

又

得抽头处好抽头。等待几时休。贤且广
张四至,我早已优游。

黄道服,布钱绉。煞风流。往来熟后,也
没惊怕,也没忧愁。

朝中措

酴醾芳架引繁英。香远透帘清。更与洛
阳花市,一齐移在宫庭。

琉璃万朵,娇红嫩紫,总是嘉名。殿阁真
仙同赏,天颜喜入欢声。

又 咏雪

斜斜整整暗江湾。蓑笠有无间。应与君
家却暑,冷看白满群山。

想来何处,金炉焰兽,玉斝酡颜。好是溪
涵寒影,山阴一棹人还。

谒金门 咏木樨

香乍起。满院垂垂岩桂。未卷珠帘香已至。酒杯言笑里。叶下茸金繁蕊。别是清妍风致。更远随人闻细细。月华天似水。

又

春渐至。雪染梅梢轻细。试路新芜殊可喜。冷云闲照水。

白芷今年不寄。最好且寻幽会。不怕清寒侵紫绮。看灯同晚醉。

玉蹀躞

雨过池台秋静 ,桂影凉清昼。槁叶喧空 ,疏黄满堤柳。风外残菊枯荷 ,凭阑一饷 ,犹喜冷香襟袖。

少欢偶。人道消愁须酒。酒又怕醒后。这般光景 ,愁怀煞难受。谁念千种秋情 ,乍凉虽好 ,还恨夜长时候。

水调歌头

江影浮空阔 ,江水拍天流。山藏地秘、伟观须是伟人收。闻道烟斜雨暗 ,还留月底风边 ,墨客一凝眸。阑槛随指顾 ,江海远生秋。

绣帘卷 ,开绮宴 ,翠香浮。邹枚宾从俱咏 ,韵闲出嘉谋。点点群山吴楚 ,历历三州灯火 ,潮落没沙鸥。老子会心处 ,应已付南楼。

醉思仙

记华堂。对宝台绛蜡 ,红艳成行。弹乌云
髻映 ,浅浅宫妆 ,江梅媚 ,生嫩脸 ,莹素质、自有
清香。歌喉稳 ,按镂版缓拍 ,娇倚银床。

天外行云驻 ,轻尘暗落雕梁。似晓莺历
历 ,琼韵锵锵。别来久 ,春将老 ,但梦里、也思
量。仗何人 ,细说与 ,为伊潘鬓成霜。

江神子 徂父生日

南丰诗将驻灵江。下明光。惹天香。十
雨五风 ,连岁致丰穰。初夏清和才四日 ,开寿
席、宴华堂。

严宸已奏二南章。眷循良。比龚黄。玉
笋班联 ,宜冠紫微郎。从此锋车宣室召 ,摅相
业、寿而康。

满庭芳

老不求名 ,心惟耽静 ,旧缘历过艰难。杜
门无事 ,一味放痴顽。只藉炉香上彻 ,与天地、
平直交关。真人喜 ,扶晨遣客 ,时暂下仙班。

矜怜。身已病 ,九疑凤驾 ,来顾台山。看
神超清境 ,玉炼朱颜。为向芝田桂圃 ,收妙有、
与作真丹。他年报 ,冲融朝礼 ,香火紫云间。

又

秋色澄晖 ,蟾波增莹 ,桂华宫殿香凝。夜

全宋词

凉天半 横管度新声。应是齐吹万指 岩谷震、石裂霜清。天如水 飞云散尽 江月照还明。

人间 何处有 祥风缓引 飘下层城。想广寒光冷 妙舞轻盈。愿上君王万寿 空伫忆、酒海吞鲸。归来也 惊涛隐隐 余韵入青冥。

武陵春 重阳

今岁重阳经闰早 金蕊粲繁枝。玉殿珠楼步辇随。高兴在东篱。

且泛金英同潋滟 休与傲霜期。只恐秋香一夜衰 须插满头归。

又

玉露金风寻胜去 一月看三州。红叶黄花满意秋。真是巧装愁。

我在天台山下住 松菊占深幽。归趁梅花映小楼。应问久迟留。

又

惨惨江云浑不动 玉雪耿孤芳。萼绿仙人带暗香。风韵冷尤长。

陇信不来寒日晚 疏影照澄江。肯借横斜伴酒觞。应共月商量。

又

春到小园春草绿 烟雨湿云山。池上梅花已半残。无奈晚来寒。

不怕醉多只怕醒 花影上阑干。人在东风缥缈间。谁与伴幽闲。

玉楼春 后宴词

九重盛旦薰风候。佳气氛氲横永昼。眉心烟彩拥群仙 ,华宴重开同圣后。

箫韶宫殿锵金奏。香绕祥云腾宝兽。三千嫔御奉严宸 ,亿万斯年祈圣寿。

又

佳时莫放游鞍倦。梅润清薰随处宴。不妨一半雨兼风 ,况对有情莺与燕。

琼艘百柁花千点。肯使笙歌容易转。兴来人事酒消磨 ,谁问蚊雷和蚁战。

浪淘沙

归意逐飞鸿。点点书空。爱渠南去晓烟中。不似老人尘土里 ,一似痴聋。

庭院晚来风。还过秋容。旧时与客绕珍丛。有酒不曾无客醉 ,欢与秋浓。

又 木樨开时雨

秋杪喜新凉。烟淡池塘。团团岩桂作风光。多少水云萧散意 ,都付芬芳。

雨逐漏声长。小院回廊。枕边清梦几悠扬。只恐四檐声未断 ,洗褪幽香。

鹧鸪天 咏枨

枫落吴江肃晓霜。洞庭波静耿云光。芳

全宋词

苞照眼黄金嫩 ,纤指开新白玉香。

盐胜雪 ,喜初尝。微酸历齿助新妆。直须
满劝三山酒 ,更喜持杯云水乡。

又

准拟中秋快客情。新亭雨后喜登临。彩
蟾特地中宵出 ,吹散层云十日阴。

松露重 ,月烟深。祥云捧玉到天心。金波
动是经年别 ,为酌金荷醉碧琳。

又

曾到东风最上头。低云阁雨接溪流。只
应缟袂闺房秀 ,尚带天香汗漫游。

当日暇 ,从贤侯。冲寒迎翠小迟留。归骖
白凤来何处 ,更指玉霄城畔楼。

又 席上作 期子忱、季相之酒

雪后疏香一两枝。高轩乘兴访春时。金
蕉酌酒应须醉 ,玉指传觞岂易辞。

嗟老大 ,喜追随。南楼宵漏任迟迟。已闻
水部神仙语 ,更诵骑鲸短李诗。

好事近

花动两山春 ,绿绕翠围时节。雨涨晓来湖
面 ,际天光清彻。

移尊兰棹压深波 ,歌吹与尘绝。应向断云
浓淡 ,见湖山真色。

又

密密偃蜂房 ,香远未应时霎。微露紫烟浥

尽 ,任风欺雪压。

老人曾饮百川空 ,相对肯微呷。揽取占先
风度 ,醉高烧红蜡。

又

湖尽海波平 ,赏尽绿烟凉月。罗袂乍迎风
快 ,悄喜欢不彻。

一年好处记如今 ,朝暮更无热。庭院晚来
些雨 ,是开尊时节。

胜胜慢

素商吹景 ,西真赋巧 ,桂子秋借蟾光。层
层翠葆 ,深隐幽艳清香。占得秀岩分种 ,天教
薇露染娇黄。珍庭晓 ,透肌破鼻 ,细细芬芳。

应是月中倒影 ,喜余叶婆娑 ,灏色迎凉。
移根上苑 ,雅称曲槛回廊。趁取蕊珠密缀 ,与
收花雾著宫裳。帘栊静 ,好围四坐 ,对赏瑶觞。

一剪梅

不占前村占宝阶。芳影横斜积渐开。水
边竹外冷遥春 ,一带冲寒 ,香满襟怀。

管领东风要有才。频携歌酒上春台。直
须日日玉花前 ,金殿仙人 ,同赏同来。

御街行 和陆判院梅词

凌寒架雪知春近。闲探处、如相问。溪流
清浅暮云低 ,玉蓓横斜风定。晚枝雀啅 ,幽姿

全宋词

方展 还映疏篁冷。

镜鸾妆罢明梢嫩。犹记宜相并。如今却月别传香 ,知引何人幽兴。不堪楼上 ,昭华吹断 ,声与愁肠尽。

行香子

也爱休官。也爱清闲。谢神天、教我愚顽。眼前万事 ,都不相干。访好林峦。好洞府 ,好溪山。

日月如盘。缺又还圆。自然他、虎踞龙蟠。河东上下 ,一撞三关。看也非悭。也非易 ,也非难。

蓦山溪 李次仲诞日

乌龙云洞 ,神护红尘外。金鼎养丹砂 ,有仙卿、清修名世。三千功行 ,活字少人知 ,松露咽 ,紫烟深 ,知是聃翁裔。

吹箫后约 ,岂慕穿青紫。八十在人间 ,比当日、何须指李。相逢一笑 ,酒量海同宽 ,拔宅隐 ,玉霄寒 ,升举应新岁。

千秋岁

洞房秀韵 ,结绮临春后。都压尽 ,名花柳。锦堂笼翡翠 ,璫枕同清昼。谁似得 ,佳时占断长欢偶。

我昔闻名久。欲见成消瘦。寻不遇 ,空回

首。征涂难驻马 ,坐想冰姿秀。凭寄语 ,南归更趁酴醾酒。

水龙吟

冻云阁雨 ,长风送雪 ,万里无凝滞。斜斜整整 ,纯白入素 ,应同太始。袁巷萧条 ,冷光寒透 ,有人曾至。但圆虚上下 ,澄明莹洁 ,如□□、混元气。

时听松篁泻坠。任山川、珠联玉缀。一尘不染 ,一毫不现。真空妙治。祥应三白 ,润归多稼 ,已成丰岁。待收拾大翁 ,茶盐贺喜 ,兴村东醉。

念奴娇

烘帘昼暖 ,正飞花堆锦 ,风迟烟暮。绿叶成阴春又老 ,甲子谁能重数。梅已青圆 ,雪深犹记 ,曾捻疏枝否。须知物外 ,这些光景常驻。

闻道江水东头 ,同门相过 ,不作儿女语。醉墨凌波歌数阕 ,心迹都忘逆旅。胸次扶遥 ,壶中光景 ,肯与人同趣。栖尘功就 ,浩然俱待飞去。

又

半阴未雨 ,洞房深、门掩清润芳晨。古鼎金炉 ,烟细细、飞起一缕轻云。罗绮娇春。争拢翠袖 ,笑语惹兰芬。歌筵初罢 ,最宜斗帐黄昏。

楼上念远佳人。心随沈水 ,学兰炷俱焚。

全宋词

事与人非 ,争似此、些子香气常存。记得临分。
罗巾余赠 ,尽日把浓熏。一回开看 ,一回肠断
重闻。

沁园春

浓绿交阴 ,脆圆经雨 ,夏景正新。遽紫泥
封检 红幢建钺 飘然吹起 ,一片闲云。禁殿趋
班 ,玉音亲诏 ,并遣皇华通宝邻。凌歊去 ,任重
霄温暑 ,万里风薰。

炎曦正斡天钧。更午气均齐天地根。运
至精感化 ,千和万合 ,涤除旁说 ,必自成真。已
约归期 ,秋风前后 ,梨枣黄花满地匀。阖闾晚 ,
待朝元紫府 ,上达明君。

菩萨蛮

稽山鉴水无寒暑。荷香莲露相倾注。堂
拟揖樵风。山围晚照红。

桃根随秀叶。玉麈频招客。客况不言蓬。
回船逸兴同。

又

萧萧还是秋容暮。炉薰已冷氲香注。犹
记踏香尘。东风满院春。

冷烟迷望处。声断阑干雨。无计问行云。
黄昏空掩门。

又

花飞零乱随风舞。花梢犹带虚檐雨。帘

幕映黄昏。江天日暮云。

有人楼上望。生怕褰虚幌。冷落对炉薰。
一春常怨春。

又 回文

等闲将度三春景。景春三度将闲等。愁
怕更高楼。楼高更怕愁。

弄花梅已动。动已梅花弄。梅看几年催。
催年几看梅。

又

雨昏连夜催炎暑。暑炎催夜连昏雨。长
簟水波凉。凉波水簟长。

翠鬟双倚醉。醉倚双鬟翠。香枕印红妆。
妆红印枕香。

又

玉珰摇素腰如束。束如腰素摇珰玉。宜
更醉春期。期春醉更宜。

绣鸳闲永昼。昼永闲鸳绣。归念不曾稀。
稀曾不念归。

清平乐

秋凉破暑。暑气迟迟去。最喜连日风和
雨。断送凉生庭户。

晚来灯火回廊。有人新酒初尝。且喜薄
衾围暖 ,却愁秋月如霜。

又

一春老病。空过春光永。药鼎煎炉朝暮

全宋词

景。只是医方药性。

经旬日色云遮。山高寒透窗纱。常恨檐头倾雨 ,犹能枕上看花。

又

赵家燕燕。宜在昭阳殿。春入馆娃深宫宴。秀色从来未见。

浅颦轻笑都宜。临风好是腰肢。今夜松江归路 ,月明愁满清辉。

点绛唇

怯雨羞云 ,翠鬟初按檀槽就。赏心时候。常劝花间酒。

慢捻轻拢 ,怨感随纤手。胡沙奏。几行红袖。都道谁家有。

又 奉旨西湖探梅

不厌频来 ,探梅选胜湖山里。瑶林琼蕊。真是游方外。

玉殿珠楼 ,不并人间世。何妨醉。都无寒意。满坐惟和气。

又

有个庵儿 ,做来不大元非小。阳光常照。坐卧谁知道。

炼得丹砂 ,不是人间灶。冲和妙。鹤鸣猿啸。一任西风老。

又

一气冲融 ,浩然识取生缘处。敛归灵府。

便作真铅柱。

九任玄归 ,行处龙先虎。山头雨。散成清露。玛瑙生玄圃。

又

石洞清寒 ,柳烟吹散松风静。日华光映。翠水环云径。

道境多闲 ,不是人间景。谈清净。道师歌咏。花转云房影。

失调名 赠皇甫坦

自叹孤身早岁 ,黄河渡口蒙情。

玉楼春

晚妆初了明肌雪。春殿嫔娥鱼贯列。笙箫吹断水云闲 ,重按霓裳歌遍彻。

临风谁更飘香屑。醉拍阑干情味切。归时休照烛花红 ,待放马蹄清夜月。

清平乐

别来春半。触目愁肠断。砌下落梅如雪乱。拂了一身还满。

雁来音信无凭。路遥归梦难成。离恨恰如春草 ,更行更远还生。

曹彦约

满庭芳 寿妻

老子今年，年登七十，阿婆年亦相当。
几年辛苦，今日小风光。遇好景，何妨笑饮，
依前是、未放心肠。人都道，明明了了，强
似个儿郎。

幸偿。婚嫁了，双雏蓝袖，拜舞称觞。
女随夫上任，孙渐成行。惭愧十分圆满，无
以报、办取炉香。频频祝，百年相守，老子
更清强。

曹遇

宴桃源 游西湖

西湖避暑棹扁舟。忘机狎白鸥。荷香十里供瀛州。山光翠欲流。

歌浩浩，思悠悠。诗成兴未休。清风明月解相留。琴声万籁幽。

又

廉纤小雨养花天。池光映远山。蕙兰风暖正暄妍。归梁燕翼偏。

芳草碧，绿波涟。良辰近禁烟。酒酣午枕兴怡然。莺声惊梦仙。

蓦山溪 游鉴湖

鉴湖千顷，四序风光好。拨棹皱涟漪，极目处、青山缭绕。微茫烟霭，鸥鹭点菰蒲，云帆过，钓舟横，俱被劳生扰。

知章请赐，独占心何小。风月本无私，同众乐、宁论多少。浮家泛宅，它日郊陶朱，烹鲈鳊，酌松醪，吟笔千篇扫。

水调歌头

造物巧能赋 ,新腊报花期。江梅清瘦、只是洁白逞芳姿。我欲超群绝类 ,故学仙家繁杏 ,浓艳映横枝。朱粉腻香脸 ,酒晕著冰肌。

玉堂里 ,山驿畔 ,最希奇。谁将绛蜡笼玉 ,香雪染胭脂。好向歌台〔舞〕榭 ,斗取红妆娇面 ,偎依韵偏宜。羌管莫吹动 ,风月正相知。

西江月 示彦忠

秋霁嫦娥二八 ,寒光逼散浮云。小山丛桂 ,吐清芬 ,犹带蟾宫风韵。

因念两登仙籍 ,恩沾雨露方新。汝今妙岁已能文。早折高枝荣奋。

曹组

蓦山溪

洗妆真态，不在铅华御。竹外一枝斜，想佳人、天寒日暮。黄昏小院，无处著清香，风细细，雪垂垂，何况江头路。

月边疏影，梦到销魂处。结子欲黄时，又须著、廉纤细雨。孤芳一世，供断有情愁，销瘦却，东阳也，试问花知否。

点绛唇 咏御射

秋劲风高，暗知斗力添弓面。靶分筠干。月到天心满。

白羽流星，飞上黄金碗。胡沙雁。云边惊散。压尽天山箭。

又

疏柳残蝉，助人离思斜阳外。淡烟疏霭。节物随时改。

水已无情，风更无情噉。兰舟解。水流风快。回首人何在。

又

密炬高烧，宝刀时翦金花碎。照人欢醉。

也照人无睡。

待得灰心，陪尽千行泪。笼纱里。夜凉如水。犹喜长成对。

如梦令

门外绿阴千顷。两两黄鹂相应。睡起不胜情，行到碧梧金井。人静。人静。风动一枝花影。

扑蝴蝶

人生一世。思量争甚底。花开十日，已随尘共水。且看欲尽花枝，未厌伤多酒盏，何须细推物理。

幸容易。有人争奈，只知名与利。朝朝日日，忙忙劫劫地。待得一晌闲时，又却三春过了，何如对花沈醉。

忆少年

年时酒伴，年时去处，年时春色。清明又近也，却天涯为客。

念过眼、光阴难再得。想前欢、尽成陈迹。登临恨无语，把阑干暗拍。

蓦山溪

草薰风暖，楼阁笼轻雾。墙短出花梢，

映谁家、绿杨朱户。寻芳拾翠，绮陌自青春，江南远，踏青时，谁念方羁旅。

昔游如梦，空忆横塘路。罗袖舞台风，想桃花、依然旧树。一怀离恨，满眼欲归心，山连水，水连云，怅望人何处。

相思会

人无百年人，刚作千年调。待把门关铁铸，鬼见失笑。多愁早老。惹尽闲烦恼。我醒也，枉劳心，谩计较。

粗衣淡饭，赢取暖和饱。住个宅儿，只要不大不小。常教洁净，不种闲花草。据见定、乐平生，便是神仙了。

品令

乍寂寞。帘栊静，夜久寒生罗幕。窗儿外、有个梧桐树，早一叶、两叶落。独倚屏山欲寐，月转惊飞鸟鹊。促织儿、声响虽不大，敢教贤、睡不著。

小重山

帘卷东风日射窗。小山庭院静，接回廊。疏疏晴雨弄斜阳。凭栏久，墙外杏花香。

时节好寻芳。多情怀酒伴，忆欢狂。归

鸿应已度潇湘。音书杳，前事忍思量。

又

陌上花繁莺乱啼。骅骝金络脑，锦障泥。
寻芳行乐忆当时。联镳处，飞鞚绿杨堤。

春物又芳菲。情如风外柳，只依依。空
怜佳景负归期。愁心切，惟有梦魂知。

青玉案

碧山锦树明秋霁。路转陡、疑无地。忽
有人家临曲水。竹篱茅舍，酒旗沙岸，一簇
成村市。

凄凉只恐乡心起。凤楼远、回头谩凝睇。
何处今宵孤馆里。一声征雁，半窗残月，总
是离人泪。

鹧鸪天

辇路薰风起绿槐。都人凝望满天街。云
韶杳杳鸣鞘肃，芝盖亭亭障扇开。微雨过，
绝纤埃。内家车子走轻雷。千门不敢垂帘看，
总上银钩等驾来。

渔家傲

水上落红时片片。江头雪絮飞撩乱。渺
渺碧波天漾远。平沙暖。花风一阵苹香满。

晚来醉著无人唤。残阳已在青山半。睡

觉只疑花改岸。抬头看。元来弱缆风吹断。

阮郎归

檐头风佩响丁东。帘疏烛影红。秋千人散月溶溶。楼台花气中。

春酒醒，夜寒浓。绣衾谁与同。只愁梦短不相逢。觉来罗帐空。

临江仙

青琐窗深红兽暖，灯前共倒金尊。数枝梅浸玉壶春。雪明浑似晓，香重欲成云。

户外马嘶催客起，席间欢意留人。从他微霰落纷纷。不妨吹酒面，归去醒余醺。

鹧鸪天

浅笑轻颦不在多。远山微黛接横波。情吞醺醺千钟酒，心醉飞琼一曲歌。人欲散，奈愁何。更看朱袖拂云和。夜深醉墨淋漓处，书遍香红拥项罗。

青门饮

山静烟沈，岸空潮落。晴天万里，飞鸿南渡。冉冉黄花，翠翘金钿，还是倚风凝露。岁岁青门饮，尽龙山、高阳俦侣。旧赏成空，

回首旧游，人在何处。

此际谁怜萍泛，空自感光阴，暗伤羁旅。
醉里悲歌，夜深惊梦，无奈觉来情绪。孤馆
昏还晓，厌时闻、南楼钟鼓。泪眼临风，肠
断望中归路。

青玉案

田园有计归须早。在家纵贫亦好。南来
北去何日了。光阴送尽，可怜青鬓，暗逐流
年老。

寂寥孤馆残灯照。乡思惊时梦初觉。落
月苍苍关河晓。一声鸡唱，马嘶人起，又上
长安道。

好事近

茅舍竹篱边，雀噪晚枝时节。一阵暗香
飘处，已难禁愁绝。

江南得地故先开，不待有飞雪。肠断几
回山路，恨无人攀折。

醉花阴

九陌寒轻春尚早。灯火都门道。月下步
莲人，薄薄香罗，峭窄春衫小。

梅妆浅淡风蛾袅。随路听嬉笑。无限面
皮儿，虽则不同，各是一般好。

点绛唇

小小朱桥，柳边人过横塘路。细风时度。
□浪痕痕去。

草软沙平，稳衬寻幽步。□□处。乱红
飞舞。回首春城暮。

又

云透斜阳，半楼红影明窗户。暮山无数。
归雁愁还去。

十里平芜，花远重重树。空凝伫。故人
何处。可惜春将暮。

又

沈醉归来，洞房灯火闲相照。夜寒犹峭，
信意和衣倒。

春梦虽多，好梦长长少。纱窗晓。凤帏
人悄。花外空啼鸟。

水龙吟 牡丹

晓天谷雨晴时，翠罗护日轻烟里。酴醾
径暖，柳花风淡，千葩浓丽。三月春光，上
林池馆，西都花市。看轻盈隐约，何须解语，
凝情处、无穷意。

金殿筠笼岁贡，最姚黄、一枝娇贵。东
风既与花王，芍药须为近侍。歌舞筵中，满
装归帽，斜簪云髻。有高情未已，齐烧绛蜡，
向阑边醉。

声声慢

重檐飞峻，丽彩横空，繁华壮观都城。
云母屏开八面，人在青冥。凭阑瑞烟深处，
望皇居、遥识蓬瀛。回环阁道，五花相斗，
压尽旗亭。

歌酒长春不夜，金翠照罗绮，笑语盈盈。
陆海人山辐辏，万国欢声。登临四时总好，
况花朝、月白风清。丰年乐，岁熙熙、且醉
太平。

蝶恋花

帘卷真珠深院静。满地槐阴，镂日如云
影。午枕花前情思凝。象床冰簟光相映。

过面风情如酒醒。沈水瓶寒，带绶来金
井。涤尽烦襟无睡兴。阑干六曲还重凭。

浣溪沙

柳絮池台淡淡风。碧波花岫小桥通。云
连丽宇倚晴空。

芳草绿杨人去住，短墙幽径燕西东。攀
条弄蕊得从容。

点绛唇 水饭

霜落吴江，万畦香稻登场圃。夜村春黍。

草屋寒灯雨。

玉粒长腰，沈水温温注。相留住。共抄云子。更听歌声度。

又

一片南云，定知来做巫山雨。歌声才度。只向风中住。

恼乱襄王，无限牵情处。长天暮。又还飞去。目断阳台路。

婆罗门引 望月

涨云暮卷，漏声不到小帘栊。银河淡扫澄空。皓月当轩高挂，秋入广寒宫。正金波不动，桂影朦胧。

佳人未逢。叹此夕、与谁同。望远伤怀对景，霜满愁红。南楼何处，想人在、长笛一声中。凝泪眼、泣尽西风。

失调名

甚时得归京里去。

卜算子 兰

松竹翠萝寒，迟日江山暮。幽径无人独自芳，此恨凭谁诉。

似共梅花语。尚有寻芳侣。著意闻时不肯香，香在无心处。

小重山

深拥熏篝倏已冥。寂寥山枕畔，梦难成。
谁堪三两夜乌声。银缸炷，花影上围屏。

犹记旧时情。帘边人似月，月如冰。从
今张眼到天明。衣带缓，谁与问伶俜。

脱银袍

济楚风光，升平时世。端门支散，碗遂
逐旅温来，吃得过、那堪更使金器。分明是。
与穷汉、消灾灭罪。

又没支分，犹然递滞。打笃磨槎来根底。
换头巾，便上弄交番厮替。告官里。驰逗高
阳饿鬼。

忆瑶姬

雨细云轻，花娇玉软，于中好个情性。
争奈无缘相见，有分孤零。香笺细写频相问。
我一句句儿都听。到如今，不得同欢，伏惟
与他耐静。

此事凭谁执证。有楼前明月，窗外花影。
拚了一生烦恼，为伊成病。祇恐更把风流逞。
便因循、误人无定。恁时节、若要眼儿厮觑，
除非会圣。

曹 豳

西河 和王潜斋韵

今日事。何人弄得如此。漫漫白骨蔽川原，恨何日已。关河万里寂无烟，月明空照芦苇。

谩哀痛，无及矣。无情莫问江水。西风落日惨新亭，几人堕泪。战和何者是良筹，扶危但看天意。

只今寂寞蕲泽里。岂无人，高卧闾里。试问安危谁寄。定相将、有诏催公起。须信前书言犹未。

红窗迥

春闱期近也，望帝乡迢迢，犹在天际。懊恨这一双脚底。一日厮赶上五六十里。

争气。扶持我去，转得官归，恁时赏你。穿对朝靴，安排你在轿儿里。更选个、宫样鞋，夜间伴你。

草夫人

满江红 寿妇人又受命 十月廿七

清晓新妆 ,鸾台畔、潜呼小玉。问阿谁庭院 ,调长生曲。报道隔邻人庆寿 ,新来荣领金花轴。细推来、阳月已将周 ,惟三宿。

陈□颂 ,年多祝。环珠翠 ,人如簇。奉金杯相庆 ,满斟醽醁。愿享麻姑难老福 ,屡餐王母蟠桃熟。更儿孙、岁岁献莱庭 ,蓝袍绿。

查荃

透碧霄

舣兰舟。十分端是载离愁。练波送远，屏山遮断，此去难留。相从争奈，心期久要，屡更霜秋。叹人生、杳似萍浮。又翻成轻别，都将深恨，付与东流。

想斜阳影里，寒烟明处，双桨去悠悠。爱渚梅、幽香动，须采掇、倩纤柔。艳歌粲发，谁传馀韵，来说仙游。念故人、留此遐洲。但春风老后，秋月圆时，独倚西楼。

柴 望

摸鱼儿 丙午归田，严滩褚孺奇席上赋

问长江、几分秋色，三分浑在烟雨。何人折尽丝丝柳，此日送君南浦。帆且驻。试说著、羊裘钓雪今何许。鱼虾自舞。但一舸芦花，数声霜笛，鸥鹭自来去。

年年事，流水朝朝暮。天涯长叹飘聚。衾寒不转钧天梦，楼外谁歌白紵。君莫诉。君试按、秦筝未必如钟吕。乡心最苦。算只有娟娟，马头皓月。今夜照归路。

齐天乐 戊申百五王野处酌别

青青杨柳丝丝雨，他乡又逢寒食。几度刘郎，当年曼倩，迢递水村烟驿。寻踪访迹。正马上相逢，杏花狼籍。惟有沙边，旧时鸥鹭似相识。

天涯流浪最久，十年何所事，幽素历历。换字鹅归。看梅鹤去，回首征衫泪渍。新欢旧忆。笑客处如归。归处如客。独倚危阑，乱山无数碧。

祝英台 丁巳晚春访杨西村，湖上怀旧

小船儿，双去橹。红湿海棠雨。燕子归时，芳草暗南浦。自从翠袖香消，明珰声断，怕回首、旧寻芳处。

向谁语。可怜金屋无人，冷落凤箫谱。翠入菱花，蛾眉为谁妩。断肠明月天涯，春风海角，恨不做、杨花飞去。

阳关三叠 庚戌送何师可之维扬

西风吹鬓，残发早星星。叹故国斜阳，断桥流水，荣悴本无凭。但朝朝、才雨又晴。人生飘聚等浮萍。谁知桃叶，千古是离情。

正无奈、黯黯离情。渡头烟暝，愁杀渡江人。伤情处，送君且待江头月，人共月、千里难并。笳鼓发，戍云平。

此夜思君，肠断不禁。尽思君送君。立尽江头月，奈此去、君出阳关，纵有明月，无酒酌故人。奈此去、君出阳关，明朝无故人。

摸鱼儿

宝祐甲寅（案“寅”原作“戌”，而宝祐无甲戌。此据丁氏藏钞秋堂集本改）春赋

这情怀、怎生消遣。思量只是凄怨。一春长为花和柳，风雨又还零乱。君试看。便杜牧风流，也则肠先断。更深漏短。更听得

杜宇，一声声切，流水画桥畔。

人间世，本只阴晴易换。斜阳衰草何限。悲欢毕竟年年事，千古漫嗟修短。无处问。是闲倚帘栊，尽日厌厌闷。浮名尽懒。但笑拍阑干，连呼大白，心事付归燕。

念奴娇 丙辰寄钱若洲

匆匆别去，算别来、又是几番春暮。酒债不偿还似可，负了若干吟句。渭北春天，江南夜雨，总是伤情处。黯然消歇，绿杨一阵莺语。

空记十载嬉游，如今蓦地，两处成离阻。纵是相逢天涯路，难觅年时欢侣。寄语东君，岁华不驻，谁为留春住，小楼昨夜，东风依旧飞絮。

摸鱼儿 景定庚申会使君陈碧栖

便无他、杜鹃催去，匆匆春事能几。看来不见春归路，飞絮又随流水。留也是。怎禁得、东风红紫还飘坠。天涯万里。怅燕子人家，沈沈夜雨，添得断肠泪。

嬉游事。早觉相如倦矣。谢娘庭院犹记。闲情已付孤鸿去，依旧被莺呼起。谁料理。正乍暖还寒，未是晴天气。无言自倚。想旧日桃花，而今人面，都是梦儿里。

满江红 别沧洲赵茂仲

载酒何人，登临处、沧洲空阔。凭阑外、

晴杨两岸，晚烟泼□。水鸟不知梁燕去，溪山半属冬青阁。有小舟、隐约载歌姝，调新曲。

留与去，如何得。风又雨，催行色。共白苹红蓼，好生飘泊。别后三年重会面，人生几度三年别。正乡心、客梦两绸缪，城头角。

贺新郎

满酌西湖酒。觉湖山、依然未老，游人如旧。数过清明才六日，欲暖未晴时候。正画舫、春明波透。记得名园曾驻马，锦鞍鞴、浅映堤桥柳。寻胜赏，重回首。

不妨旋摘枝头有。喜青青、垂丸带子，脆圆如豆。想是和羹消息近，报与醉翁太守。道玉铉、有人启奏。红药当阶明似锦，觉娇莺、舞燕皆称寿。唱此曲，付红袖。

念奴娇 山河

登高回首，叹山河国破，于今何有。台上金仙空已去，零落逋梅苏柳。双塔飞云，六桥流水，风景还依旧。凤笙龙管，何人肠断重奏。

闻道凝碧池边。宫槐叶落，舞马衔杯酒。旧恨春风吹不断，新恨重重还又。燕子楼高，乐昌镜远，人比花枝瘦。伤情万感，暗沾啼血襟袖。

又

春来多困，正日移帘影，银屏深闭。唤梦幽禽烟柳外，惊断巫山十二。宿酒初醒，新愁半解，恼得成憔悴。鬢松云鬓，不忺鸾镜梳洗。

门外满地香风，残梅零乱，玉糝苍苔碎。乍暖乍寒浑莫拟，欲试罗衣犹未。斗草雕阑，买花深院，做踏青天气。晴鸠鸣处，一池昨夜春水。

桂枝香

今宵月色。叹暗水流花，年事非昨。潇洒江南似画，舞枫飘柞。谁家又唱江南曲。一番听、一番离索。孤鸿飞去，残霞落尽，怨深难托。

又肠断、丁香画雀。记牡丹时候，归燕帘幕。梦里襄王，想念王孙飘泊。如今雪上萧萧鬓，更相思、连夜花发。柘枝犹在，春风那似，旧时宋玉。

齐天乐

淒淒杨柳潇潇雨，悄窗怎禁滴沥。思里传蜚，愁边落雁，多少东吴山色。知他恨极。料为我窗前，强鸣刀尺。竟日西风，那堪无寐更邻笛。

黄花开遍未也，花开应笑我，年少难觅。灞上长安，河边渭水，都把韶华暗掷。何人

全宋词 柴 望

碎壁。尚衰草连天，暮烟凝碧。怕说相思，
撼枫喧夜寂。

柴元彪

唱金缕 咸淳癸酉茶陵灯夕 时文文山为湖南提刑

春到云中早。恰梅花、雪后□□,锁窗寒悄。鼓吹喧天灯市闹,在处鳌山蓬岛。正新岁、金鸡唱晓。一点魁星光焰里,这水晶、庭院知多少。鸣凤舞,洞箫袅。

太平官府人嬉笑。道紫微、魁星聚会,参差联照。借地栽花河阳县,桃李芳菲正好。暖沁入、东风池沼。百里楼台天不夜,看祥烟、瑞霭相辽绕。生意满,翠庭草。

水龙吟

己卯中秋,寓玉山章泉赵石涧家,相留为延桂把菊之会

秋云元自无心,那曾系得归心住。阳关酒尽,灞桥人远,也须别去。□□□□,□□□□,□□□□。有哀雁声声,愁蛩切切,悄悄地,听人语。

回首琵琶旧恨,叹西风、□兴如许。江左百年,风流云散,不堪重举。怎得归来,樵歌互答,自相容与,又何须□□,三五蟾光,重阳风

雨。

踏莎行 戊寅秋客中怀钱塘旧游

淡柳平芜 ,乱烟疏雨。雁声叫彻芦花渚。
亭前落叶又西风 ,断送离怀无著处。

切切归期 ,盈盈尺素。断魂正在西兴渡。
满船空载暮愁来 ,潮头一吼推将去。

蝶恋花 己卯菊节得家书 ,欲归未得

去年走马章台路。送酒无人 ,寂寞黄花
雨。又是重阳秋欲暮。西风此恨谁分付。

无限归心归不去。却梦佳人 ,约我花间
住。蓦地觉来无觅处。雁声叫断潇湘浦。

苏幕遮 客中独坐

晚晴初 ,斜照里。远水连天 ,天外帆千里。
百尺高楼谁独倚。滴滴梧桐 ,一片相思泪。

马又嘶 ,风又起。断续寒砧 ,又送黄昏至。
明月照人人不睡。愁雁声声 ,更切愁人耳。

海棠春 客中感怀

阳关可是登高路。算到底 ,不如归去。时
节近中秋 ,那更黄花雨。

酒病恹恹 ,羁愁缕缕。且是没人分诉。何
似白云深 ,更向深深处。

惜分飞 客怀

候馆天寒灯半灭。对着灯儿泪咽。此恨难分说。能禁几度黄花别。

乍转寒更敲未歇。蛩语更添凄惻。今夜归心切。砧声敲碎谁家月。

高阳台 怀钱塘旧游

丹碧归来 ,天荒地老 ,骀骀华发相催。见说钱塘 ,北高峰更崔嵬。琼林侍宴簪花处 ,二十年、满地苍苔。倩阿谁 ,为我起居 ,坡柳逋梅。

凄凉往事休重省 ,且凭阑感慨 ,抚景衔杯。冷暖由天 ,任他花谢花开。知心只有西湖月 ,尚依依、照我徘徊。更多情 ,不间朝昏 ,潮去潮来。

禅峰

百字谣 贺彭谦仲八月生子

中秋近也 ,正于门瑞气 ,葱葱时节。隔岁
维熊占吉梦 ,今夕天生英杰。仙籍流芳 ,瑞龙
毓秀 ,应是非凡骨。诗书勋业 ,妙龄行见英发。

好是日满三朝 ,剩陈汤饼 ,投辖留宾客。
玉果犀钱排绮宴 ,窈窕歌珠舞雪。枕玉凉时 ,
屏山深处 ,好事权休说。小蛮杨柳 ,迩来还可
攀折。

晁补之

水龙吟 别吴兴至松江作

水晶宫绕千家，卞山倒影双溪里。白苹洲渚，诗成春晚，当年此地。行遍瑶台，弄英携手，月婵娟际。算多情小杜，风流未睹，空肠断、枝间子。

一似君恩赐与，贺家湖、千峰凝翠。黄梁未熟，红旗已远，南柯旧事。常恐重来，夜阑相对，也疑非是。向松陵回首，平芜尽处，在青山外。

八声甘州 扬州次韵和东坡钱塘作

谓东坡、未老赋归来，天未遣公归。向西湖两处，秋波一种，飞霭澄辉。又拥竹西歌吹，僧老木兰非。一笑千秋事，浮世危机。

应倚平山栏槛，是醉翁饮处，江雨霏霏。送孤鸿相接，今古眼中稀。念平生、相从江海，任飘蓬、不遣此心违。登临事，更何须惜，吹帽淋衣。

又 历下立春

谓东风、定是海东来，海上最春先。乍

微阳破腊，梅心已省，柳意都还。雪后南山
耸翠，平野欲生烟。记得相逢日，如上林边。

莫叹春光易老，算今年春老，还有明年。
叹人生难得，常好是朱颜。有随轩、金钗十
二，为醉娇、一曲踏珠筵。功名事，算何如
此，花下尊前。

满庭芳 赴信日舟中别次膺十二叔

鸥起苹中，鱼惊荷底，画船天上来时，
翠湾红渚，宛似武陵迷。更晚青山更好，孤
云带、远雨丝垂。清歌里，金尊未掩，谁使
动分携。

竹林、高晋阮，阿咸潇散，犹愧风期。
便弃官终隐，钓叟苔矶。纵是冥鸿云外，应
念我、垂翼低飞。新词好，他年认取，天际
片帆归。

凤凰台上忆吹箫 自金乡之济至羊山迎次膺

千里相思，况无百里，何妨暮往朝还。
又正是、梅初淡伫，禽未绵蛮。陌上相逢缓
辔，风细细、云日斑斑。新晴好，得意未妨，
行尽青山。

应携后房小妓，来为我，盈盈对舞花间。
便拚了、松醪翠满，蜜炬红残。谁信轻鞍射
虎，清世里、曾有人闲。都休说，帘外夜久
春寒。

又

才短官慵，命奇人弃，年年故里来还。

记往岁、莲塘送我，远赴荆蛮。莫道风情似旧，青镜里、绿鬓新斑。佳人怪，把盏为我，微敛眉山。

从来嗣宗高韵，独见赏，青云笈绝尘间。谩回首、平生醉语，一梦惊残。莫笑移花种柳，应备办、投老同闲。从枯槁，松桧耐得霜寒。

摸鱼儿 东皋寓居

买陂塘、旋栽杨柳，依稀淮岸江浦。东皋嘉雨新痕涨，沙觜鹭来鸥聚。堪爱处。最好是、一川夜月光流渚。无人独舞。任翠幄张天，柔茵藉地，酒尽未能去。

青绫被，莫忆金闺故步。儒冠曾把身误。弓刀千骑成何事，荒了邵平瓜圃。君试觑。满青镜、星星鬓影今如许。功名浪语。便似得班超，封侯万里，归计恐迟暮。

永遇乐 同前

松菊堂深，芰荷池小，长夏清暑。燕引雏还。鸠呼妇往，人静郊原趣。麦天已过，薄衣轻扇，试起绕园徐步。听衡宇、欣欣童稚，共说夜来初雨。

苍菅径里，紫葳枝上，数点幽花垂露。东里催锄，西邻助饷，相戒清晨去。斜川归兴，翛然满目，回首帝乡何处。只愁恐、轻鞭犯夜，灞陵旧路。

过涧歇 同前

归去。奈故人、尚作青眼相期，未许明
时归去。放怀处。买得东皋数亩，静爱园林
趣。任过客、剥啄相呼昼扃户。

堪笑儿童事业，华颠向谁语。草堂人悄，
圆荷过微雨。都付邯郸，一枕清风，好梦初
觉，砌下槐影方停午。

黄莺儿 同前

南园佳致偏宜暑。两两三三修篁，新篁
新出初齐，猗猗过檐侵户。听乱飏芰荷风，
细洒梧桐雨。午馀帘影参差，远林蝉声，幽
梦残处。

凝伫。既往尽成空，暂遇何曾住。算人
间事、岂足追思，依依梦中情绪。观数点茗
浮花，一缕香萦炷。怪来人道陶潜，做得羲
皇侣。

消 息 同前 自过腔，即越调永遇乐端午

红日葵开，映墙遮牖，小斋端午。杯展
荷金，簪抽笋玉，幽事还数。绿窗纤手，朱
奁轻缕。争斗彩丝艾虎。想沈江怨魄归来，
空惆怅、对菰黍。

朱颜老去，清风好在，未减佳辰欢聚。
趣蜡酒深斟，菖菹细糝，围坐从儿女。还同

子美，江村长夏，闲对燕飞鸥舞。算何须、
楚王雄风，方消畏暑。

梁州令叠韵 案此处疑脱“同前”二字

田野闲来惯。睡起初惊晓燕。樵青走挂
小帘钩，南园昨夜，细雨红芳遍。

平芜一带烟光浅。过尽南时雁。俱远。
凭栏送目空肠断。

好景难常占。过眼韶华如箭。莫教鸂鶒
送韶华，多情杨柳，为把长条绊。

清樽满酌谁为伴。花下提壶劝。何妨醉
卧花底，愁容不上春风面。

酒泉子 同前

萱草戎葵，松菊堂深犹畏暑，晚云催雨
霭帘栊。满楼风。

池莲翻倒小莲红。看扫鉴、天清似水，
一轮明月却当空。画栏中。

归田乐 同前

春又去，似别佳人幽恨积。闲庭院，翠
阴满，添昼寂。一枝梅最好，至今忆。

正梦断，炉烟袅，参差疏帘隔。为何事、
年年春恨，问花应会得。

诉衷情 同前 送春

东城南陌路歧斜。芳草遍藏遮。黄鹂自是来晚，莫恨海棠花。

惊雪絮，满天涯。送春赊。问春莫是，忆著东君，自去还家。

金凤钩 同前 送春

春辞我向何处。怪草草、夜来风雨。一簪华发，少欢饶恨，无计殢春且住。

春回常恨寻无路。试向我、小园徐步。一阑红药，倚风含露。春自未曾归去。

又 同前

雪消闲步花畔。试屈指、早春将半。樱桃枝上最先到，却恨小梅芳浅。忽惊拂水双来燕。暗自忆、故人犹远。一分风雨占春愁，一来又对花肠断。

生查子 同前 夏日即事

永日向人妍，百合忘忧草。午枕梦初回，远柳蝉声杳。

藓井出冰泉，洗瀹烦襟了。却挂小帘钩，一缕炉烟袅。

行香子 同前

前岁栽桃，今岁成蹊。更黄鹂、久住相知。微行清露。细履斜晖。对林中侣，闲中我，醉中谁。

何妨到老，常闲常醉，任功名、生事俱非。衰颜难强，拙语多迟。但酒同行，月同坐，影同嬉。

诉衷情 同前

小园过午，便觉凉生翠柏。戎葵闰出墙红，萱草静依径绿。还是去年，浮瓜沈李，追凉故绕池边竹。小筵促。

忽忆杨梅正熟。卞山南畔，画舸笙歌逐。愁凝目，使君彩笔，佳人锦字，断弦怎续。尽日栏干曲。

木兰花 遐观楼

小楼新创堪临远。一带寒山都入眼。人间应未觉春归，楼上已先变柳眼。

风威自与微阳战。雪意不遮残腊换。少须文栋燕双回，来看东城花一片。

行香子 同前

归鸟翩翩，楼上黄昏。黯天气、残照馀

痕。曲栏千里，有个愁人。向不言中，千载事，一年春。

春来似客，春归如云。付楼前、行路双轮。倾江变酒，举斛为尊。断浮生外，愁千丈，不关身。

阮郎归 同前

小楼独上暮钟时。红霞楼外飞。烟中远鸟一双归。城门灯火微。

横短吹，傍危梯。冰轮涌海迟。天涯幽恨有谁知。凉风时动衣。

引驾行

梅梢琼绽，东君次第开桃李。痛年年、好风景，无事对花垂泪。园里。旧赏处、幽葩柔条，一一动芳意。恨心事。春来间阻，忆年时、把罗袂。

雅戏。樱桃红颗，为插边明丽。又渐是。樱桃尝新，忍把旧游重记。何意。便云收雨歇，瓶沈簪折两无计。谩追悔。凭谁向说，只厌厌地。

碧牡丹 焦成马上口占

春山事、撩心眼。似血桃花，似雪梨花相间。望极雅川，阳焰迷归雁。征鞍方长坂。正魂乱。

旧事如云散。良游盛年俱换。罢说功名，
但觉青山归晚。记插宫花，扶醉蓬莱殿。如
今霜尘满。

江神子 集句惜春

双鸳池沼水融融。桂堂东。又春风。今
日看花，花胜去年红。把酒问花花不语，携
手处，遍芳丛。

留春且住莫匆匆。秉金笼。夜寒浓。沈
醉插花，走马月明中。待得醒时君不见，不
随水，即随风。

好事近 中秋不见月，重阳不见菊

风雨过中秋，愁对画帘银烛。那更气迟
节晚，负重阳金菊。

月期花信尚参差。功名更难卜。何事四
时俱好，□一杯一曲。

洞仙歌 留春

花恨月恼。更夏有凉风，冬轩雪皎。闲
事不关心，算四时皆好。从来又说，春台登
览，人意多同，常是惜、春过了。须痛饮，
莫放欢情草草。年少。

尚忆瑶阶，得隼寻芳，骅骝东城，适见
垂鞭，酩酊南陌，又逢低帽。莺花荡眼，功
名满意，无限嬉游，荣华事、如梦杳。伤富

贵浮云，曾萦怀抱。为春醉倒。愿花更好。
春休老。开口笑。占醉乡、莫教人到。

又 填卢仝诗

当时我醉，美人颜色，如花堪悦。今日
美人去，恨天涯离别。青楼朱箔，婵娟蟾桂，
三五初圆，伤二八、还又缺。空伫立，一望
一见心绝。心绝。

顿成凄凉，千里音尘，一梦欢娱，推枕
惊巫山远，洒泪对湘江阔。美人不见，愁人
看花，心乱含愁，奏绿绮、弦清切。何处有
知音，此恨难说。怨歌未阕。恐暮雨收、行
云歇。窗梅发。乍似睹、芳容冰洁。

水龙吟 次韵林圣予惜春

问春何苦匆匆，带风伴雨如驰骤。幽葩
细萼，小园低槛，壅培未就。吹尽繁红，占
春长久，不如垂柳。算春常不老，人愁春老，
愁只是、人间有。

春恨十常八九。忍轻辜、芳醪经口。那
知自是，桃花结子，不因春瘦。世上功名，
老来风味，春归时候。纵樽前痛饮，狂歌似
旧，情难依旧。

洞仙歌 温园赏海棠

群芳老尽，海棠花时候。雨过寒轻好清
昼。最妖饶一段，全是初开，云鬟小，涂粉
施朱未就。

全开还自好，骀荡春馀，百样宫罗斗繁
绣。纵无语也，心应恨我来迟，恰柳絮、将
春归后。醉犹倚柔柯，怯黄昏，这一点愁，
须共花同瘦。

又 梅

年年青眼。为江梅肠断。一句新诗思无
限。向碧琼枝上，白玉葩中、春犹浅。一点
龙香清远。

谁抛倾国艳。昨夜前村，都恐东皇未曾
见。正倚墙红杏，芳意浓时，惊千片。何许
飘零仙馆。待冰雪丛中看奇姿，乍一笑能回，
上林冬暖。

行香子梅

雪里清香，月下疏枝。更无花、比并琼
姿。一年一见，千绕千回。向未开时，愁花
放，恐花飞。

芳樽移就，幽葩折取，似玉人，携手同
归。扬州应记，东阁逢时。恨刘郎误，题诗
句，怨桃溪。

盐角儿 亳社观梅

开时似雪。谢时似雪。花中奇绝。香非
在蕊，香非在萼，骨中香彻。

占溪风，留溪月。堪羞损、山桃如血。
直饶更、疏疏淡淡，终有一般情别。

清平乐 对晚菊作

黄花过也。月酒何曾把。寒蝶多情爱潇洒。晴日双双飞下。

沈吟独倚朱栏。采芳贻向□边。枕上醉排金靺，幽香付与谁怜。

江神子 亳社观梅呈范守、秦令

去年初见早梅芳。一春忙。短红墙。马上不禁、花恼只颠狂。苏晋长斋犹好事，时唤我，举离觞。

今年春事更茫茫。浅宫妆。断人肠。一点多情、天赐骨中香。赖有飞凫贤令尹，同我过，小横塘。

望海潮 扬州芍药会作

人间花老，天涯春去，扬州别是风光。红药万株，佳名千种，天然浩态狂香。尊贵御衣黄。未便教西洛，独占花王。困倚东风，汉宫谁敢斗新妆。

年年高会维阳。看家夸绝艳，人诧奇芳。结蕊当屏，联葩就幄，红遮绿绕华堂。花面映交相。更秉菅观洧，幽意难忘。罢酒风亭，梦魂惊恐在仙乡。

夜合花 和李浩季良牡丹

百紫千红，占春多少，共推绝世花王。
西都万家俱好，不为姚黄。谩肠断巫阳。对
沈香、亭北新妆。记清平调，词成进了，一
梦仙乡。

天葩秀出无双。倚朝晖，半如酣酒成狂。
无言自有，檀心一点偷芳。念往事情伤。又
新艳、曾说滁阳。纵归来晚，君王殿后，别
是风光。

下水船 和季良琼花

百紫千红翠。唯有琼花特异。便是当年，
唐昌观中玉蕊。尚记得、月里仙人来赏，明
日喧传都市。

甚时又，分与扬州本，一朵冰姿难比。
曾向无双亭边，半酣独倚。似梦觉，晓出瑶
台十里。犹忆飞琼标致。

浣溪沙 樱桃

雨过园亭绿暗时。樱桃红颗压枝低。绿
兼红好眼中迷。

荔子天教生处远，风流一种阿谁知。最
红深处有黄鹂。

万年欢梅

心忆春归，似佳人未来，香径无迹。雪里江梅，因甚早知消息。百卉芳心正寂。夜不寐、幽姿脉脉。图清晓、先作宫妆，似防人见偷得。

真香媚情动魄。算当时寿阳，无此标格。应寄扬州，何郎旧曾相识。花似何郎鬓白。恐花笑、逢花羞摘。那堪羌管惊心，也随繁杏抛掷。

感皇恩 海棠

常岁海棠时，偷闲须到。多病寻芳懒春老。偶来恰值，半谢妖饶犹好。便呼诗酒伴，同倾倒。

繁枝高阴，疏枝低绕。花底杯盘花影照。多情一片，恨我归来不早。断肠铺碎锦，门前道。

洞仙歌 菊

今春闰好。怪重阳菊早。满槛煌煌看霜晓。唤金钱翠雨，不称标容，潇洒意、陶潜诗中能道。

不应夸绝艳，曾妒春华，因甚东君意不到。又似锁，三千汉女，偏教明妃、怨西风边草。也何必、牛山苦沾衣，算只好龙山，

醉狂吹帽。

喜朝天 秦宅作，海棠

众芳残。海棠正轻盈，绿鬓朱颜。碎锦繁绣，更柔柯映碧，纤掐匀殷。谁与将红间白，采薰笼、仙衣覆斑斓。如有意、浓妆淡抹，斜倚栏干。

天饶向晚春后，惯困欹晴景，愁怕朝寒。纵有狂雨，便离披损，不奈幽闲。素李来禽总俗，谩遮映、终羞格疏顽。谁采顾，斜风教舞，月下庭间。

生查子 梅

青帝晓来风，偏傍梅梢紧。未放玉肌开，已觉龙香喷。

此意比佳人，争奈非朱粉。惟有许飞琼，风味依稀近。

少年游 次季良韵

庐山瑶草四时春。烟锁上宫门。记得南游，偶寻飞涧，一洗庾公尘。

香炉高咏君家事，文彩近前人。它日骑鲸，尚怜迷路，与问众仙真。

又

如今田野谩抛春。红雨掩衡门。懒读诗书，欠伸扶杖，几案任生尘。

从教便向东山老，谁知是个中人。莫怪年来，倦寻城市，嫌我性情真。

满江红 次韵吊汶阳李诚之待制

华鬓春风，长歌罢、伤今感昨。春正好、瑶墀已叹，侍臣冥寞。牙帐尘昏馀剑戟，翠帷月冷虚弦索。记往岁、龙坂误曾登，今飘泊。

贤人命，从来薄。流水意，知谁托。绕南枝身似，未眠飞鹊。射虎山边寻旧迹，骑鲸海上追前约。便江湖、与世永相忘，还堪乐。

离亭宴 次韵吊豫章黄鲁直

丹府黄香堪笑。章台坠鞭年少。细雨春风花落处，醉里中人传诏。却上五湖船，悲歌楚狂同调。

青草荆江波渺。香炉紫霄簪小。人去江山长依旧，幼妇空传辞妙。洒泪作招魂，枫林子规啼晓。

千秋岁 次韵吊高邮秦少游

江头宛外。常记同朝退。飞骑轧，鸣珂碎。齐讴云绕扇，赵舞风回带。严鼓断，杯盘藉草犹相对。

洒涕谁能会。醉卧藤阴盖。人已去，词

空在。兔园高宴悄，虎观英游改。重感慨，
惊涛自卷珠沈海。

迷神引 贬玉溪对江山作

黯黯青山红日暮。浩浩大江东注。馀霞
散绮，向烟波路。使人愁，长安远，在何处。
几点渔灯小，迷近坞。一片客帆低，傍前浦。

暗想平生。自悔儒冠误。觉阮途穷，归
心阻。断魂素月，一千里、伤平楚。怪竹枝
歌，声声怨，为谁苦。猿鸟一时啼，惊岛屿。
烛暗不成眠，听津鼓。

满江红 赴玉山之谪，与诸父泛舟大泽，分题为别

莫话南征，船头转、三千馀里。未叹此、
浮生飘荡，但伤佳会。满眼青山芳草外，半
篙碧水斜阳里。问此中、何处芰荷深，渔人
指。

清时事，羁游意。尽付与，狂歌醉。有
多才南阮，自为知己。不似朱公江海去，未
成陶令田园计。便楚乡、风景胜吾乡，何人
对。

古阳关 寄无斁八弟宰宝应

暮草蛩吟噎。暗柳萤飞灭。空庭雨过，
西风紧，飘黄叶。卷书帷寂静，对此伤离别。
重感叹、中秋数日又圆月。

沙觜樯竿上，淮水阔。有飞凫客，词珠玉，气冰雪。且莫教皓月，照影惊华发。问几时、清尊夜景共佳节。

玉蝴蝶

暗忆少年豪气，烂南国、蓬岛风光。醉倚吴王宫殿，不解悲凉。舞犹慵、小腰似柳，歌尚怯、娇语如簧。好林塘。玳筵留住，彩舫携将。

清狂。扬州一梦，中山千日，名利都忘。细数从前，眼中欢事尽成伤。去船迷、乱花流水，遗佩悄、寒草空江。黯愁肠。暮云吟断，青鬓成霜。

安公子 送进道四弟赴官无为

柳老荷花尽。夜来霜落平湖净。征雁横天鸥舞乱，鱼游清镜。又还是、当年我向江南兴。移画船、深渚蒹葭映。对半篙碧水，满眼青山魂凝。

一番伤华鬓。放歌狂饮犹堪逞。水驿孤帆明夜事、此欢重省。梦回处、诗塘春草愁难整。官情与、归期终朝竞。记它年相访，认取斜川三径。

惜分飞 别吴作

山水光中清无暑。是我消魂别处。只有

多情雨。会人深意留人住。

不见梅花来已暮。未见荷花又去。图画他年觑。断肠千古苕溪路。

又 代别

消暑楼前双溪市。尽住水晶宫里。人共荷花丽。更无一点尘埃气。

不会史君匆匆至。又作匆匆去计。谁解连红袂。大家都把兰舟系。

离亭宴 忆吴兴寄金陵怀古声中

忆向吴兴假守。双溪四垂高柳。仪凤桥边兰舟过，映水雕甍华牖。烛下小红妆，争看史君归后。

携手松亭难又。题诗水轩依旧。多少绿荷相倚恨，背立西风回首。怅望采莲人，烟波万重吴岫。

满庭芳 忆庐山

欲买庐山，山前三亩，小桥横过松间。变名吴市，谁认旧容颜。最好栖贤峡外，应自此、都隔尘寰。人稀到，壶中化国，光景更堪闲。

无心，求至道，柴门闭了，饱睡甘餐。幸儿成孙长，为扫家山。若问它年归去，蓦地也、双桨来还。愁难舍，清风万壑，高处正跻攀。

又 次韵答季良

闲说秋来，乘槎心懒，梦回三岛波间。便思黄帽，同我老山颜。上界仙人官府，何似我、萧散尘寰。云无止，流泉自急，此意本来闲。

寂寥，松桂圃，陪君好语，亦可忘餐。况琼枝玉蕊，秀满春山。若问幽栖何意，莫道是、飞鸟知还。无言处，孙登半岭，高韵更难攀。

又 用东坡韵题自画莲社图

归去来兮，名山何处，梦中庐阜嵯峨。二林深处，幽士往来多。自画远公莲社，教儿诵、李白长歌。如重到，丹崖翠户，琼草秀金坡。

生绡，双幅上，诸贤中履，文彩天梭。社中客，禅心古井无波。我似渊明逃社，怡颜盼、百尺庭柯。牛闲放，溪童任懒，吾已废鞭蓑。

尾犯 庐山 一名碧芙蓉

庐山小隐。渐年来疏懒，浸浓归兴。彩桥飞过，深溪地底，奔雷馀韵。香炉照日，望处与、青霄近。想群仙、呼我应还，怪来须丝垂镜。

海上云车回轂。少姑传、金母信。森翠裾琼佩，落日初霞，纷纭相映。谁见壶中景。花洞里、杳然渔艇。别是个、潇洒乾坤，世情尘土休问。

尉迟杯 毫社作惜花

去年时。正愁绝，过却红杏飞。沈吟杏子青时。追悔负好花枝。今年又春到，傍小阑、日日数花期。花有信，人却无凭，故教芳意迟迟。

及至待得融怡。未攀条拈蕊，已叹春归。怎得春如天不老，更教花与月相随。都将命、拚与酬花，似岷山、落日客犹迷。尽归路，拍手拦街，笑人沈醉如泥。

八六子 重九即事呈徐倅祖禹十六叔

喜秋晴。淡云萦缕，天高群雁南征。正露冷初减兰红，风紧潜雕柳翠，愁人漏长梦惊。

重阳景物凄清。渐老何时无事，当歌好在多情。暗自想、朱颜并游同醉，官名缰锁，世路蓬萍。难相见，赖有黄花满把，从教绿酒深倾。醉休醒。醒来旧愁旋生。

临江仙 呈祖禹十六叔

尽说彭门新半刺，昆吾刳玉如泥。功名馀事不须为。才情诗里见，风味酒边知。

好在阿咸同老也，青云往岁心期。千钟百首兴来时。伯伦从妇劝，元亮信儿痴。

又

十岁儿曹同砚席，华裾织翠如葱。一生

心事醉吟中。相逢俱白首，无语对西风。

莫道樽前情调减，衰颜得酒能红。可怜此会意无穷。夜阑人总睡，独绕菊花丛。

蓦山溪 谯园饮酒为守令作

谯园幽古，烟锁前朝桧。摇落枣红时，满园空、几株苍翠。史君才誉，金殿握兰人，将风调，改荒凉，便是嬉游地。

刘郎莫问，去后桃花事。司马更堪怜，掩金觞、琵琶催泪。愁来不醉。不醉奈愁何，汝南周，东阳沈，劝我如何醉。

又

金樽玉酒，佳味名仙桧。恐是九龙泉，堪一饮、霜毛却翠。何须说此，只但饮陶陶，灯光底，百花春，自是仙家地。

星郎早贵，惯见风流事。留我不须归，倒尊空、烛堆红泪。飞凫令尹，才调更翩翩，休吊古，枉伤神，有兴来同醉。

又 亳社寄文潜舍人

兰台仙史，好在多情否。不寄一行书，过西风、飞鸿去后。功名心事，千载与君同，只狂饮，只狂吟，绿鬓殊非旧。

山歌村馆，愁醉浔阳叟。且借两州春，看一曲、樽前舞袖。古来毕竟，何处是功名，不同饮，不同吟，也劝时开口。

又 和王定国朝散忆广陵

扬州全盛，往事今何处。帆锦两明珠，

罍蔷薇、月中嬉语。朱衣白面，公子似神仙，
登云屿。临烟渚。狂醉成怀古。

兰舟归后，谁与春为主。吟笑我重来，
倚琼花、东风日暮。吴霜点鬓，流落共天涯，
竹西路。高阳侣。魂梦应相遇。

忆秦娥 和留守赵无愧送别

牵人意。高堂照碧临烟水。清秋至。东
山时伴，谢公携妓。

黄菊虽残堪泛蚁。乍寒犹有重阳味。应
相记。坐中少个，孟嘉狂醉。

好事近 南都寄历下人

丝管闹南湖，湖上醉游时晚。独看小桥
官柳，泪无言偷满。

坐中谁唱解愁辞，红妆劝金盏。物是奈
人非是，负东风心眼。

阮郎归 同十二叔泛济州环溪

西城北渚旧追随。荒台今是非。白苹无
主绿蒲迷。停舟忆旧时。

双鸭戏、乱鸥飞。人家烟雨西。不成携
手折芳菲。兰桡惆怅归。

又

一濠秋水净涟漪。红妆照水嬉。攀条寻
藕怯船移。浮萍湿绣衣。

临好景，惜轻归。夕阳洲渚迷。城门灯火簇轮蹄。沙鸥飞去时。

又

儿童嬉戏杏花堤。春归不解悲。重来草露湿人衣。无花空绕枝。

曾学道，久忘机。一尊甘若饴。平生鱼鸟与同归。临风心自知。

宴桃源

往岁真源谪去。红泪扬州留住。饮罢一帆东，去入楚江寒雨。无绪。无绪。今夜秦淮泊处。

一丛花 谢济倅宗室令郟送酒

王孙眉宇凤凰雏。天与世情疏。扬州坐上琼花底，佩锦囊、曾忆奚奴。金盏醉挥，满身花影，红袖竞来扶。

十年一梦访林居。离缺重踟蹰。应怜肺病临邛客，寄洞庭、春色双壶。天气未佳，梅花正好，曾醉燕堂无。

又

十二叔节推以无咎生日于此声中为辞，依韵和答

碧山无意解银鱼。花底且携壶。华颠又喜熊羆且，笑骐驎、老反为驹。文史渐抛，功名更懒，随处见真如。

高情敢并汉庭疏。长揖去田庐。囊无上

赐金堪散，也未妨、山猎溪渔。廉颇纵强，
莫随年少，白马向黄榆。

又 再呈十二叔

飞凫仙令气如虹。脱屣向尘笼。凌烟画
像云台议，似眼前、百草春风。盏里圣贤，
壶中天地，高兴更谁同。

应怀得隼大明宫。无事老冯公。玉山且
向花间倒。任从笑、老入花丛。三径步馀，
一枝眠稳，心事付千钟。

临江仙 用韵和韩求仁南都留别

曾唱牡丹留客饮，明年何处相逢。忽惊
鹊起落梧桐。绿荷多少恨，回首背西风。

莫叹今宵身是客，一尊未晓犹同。此身
应似去来鸿。江湖春水阔，归梦故园中。

又 同前

常记河阳花县里，恰如饭颗山逢。春城
何处满丝桐。纶巾并羽扇，君有古人风。

重向梁王台畔见，黄花绿酒谁同。新诗
别后寄南鸿。回头思照碧，人在白云中。

浣溪沙 广陵被召留别

帐饮都门春浪惊。东飞身与白鸥轻。淮
山一点眼初明。

谁使梦回兰芷国，却将春去凤凰城。墙
乌风转不胜情。

忆少年 别历下

无穷官柳，无情画舸，无根行客。南山尚相送，只高城人隔。

罨画园林溪绀碧。算重来、尽成陈迹。刘郎鬓如此，况桃花颜色。

江神子 广陵送王左丞赴阙

旧山铅倦栖迟。叩宸闱。向淮圻。五马行春，初喜后车随。太守风流容客醉，花压帽，酒淋衣。

隋宫烟外草萋萋。菊花时。动旌旗。起舞留公，且住慰相思。王粲诗成何处寄，人北去，雁南飞。

虞美人 广陵留别

江南载酒平生事。游宦如萍寄。蓬山归路傍银台。还是扬州一梦、却惊回。

年年后土春来早。不负金尊倒。明年珠履赏春时。应寄琼花一朵、慰相思。

金盏倒垂莲 依韵和次膺寄杨仲谋观察

诸阮英游，尽千钟饮量，百丈词源。对舞春风，螺髻小双莲。念两处、登高临远，又伤芳物新年。此泪不待，桓伊危柱哀弦。

身闲未应无事，趁栽梅径里，插柳池边。
野鹤飘飘，幽兴在青田。也莫话、书生豪气，
更铭功业燕然。毕竟得意，何如月下花前。

又 次韵同寄霸师杨仲谋安抚

休说将军，解弯弓掠地，昆岭河源。彩
笔题诗，绿水映红莲。算总是、风流馀事，
会须行乐□年。况有一部，随轩脆管繁弦。

多情旧游尚忆，寄秋风万里，鸿雁天边。
未学元龙，豪气笑求田。也莫为、庭槐兴叹，
便伤摇落凄然。后会一笑，犹堪醉倒花前。

西平乐 广陵送王资政正仲赴阙

凤诏传来绛阙，当宁思贤辅。淮海甘棠
惠化，霖雨商岩吉梦，熊虎周郊旧卜。千秋
盛际，催促朝天归去。动离绪。

空眷恋，难暂驻。新植双亭临水，风月
佳名未睹。准拟金尊时举。况乐府、风流一
部。妍歌妙舞，萦云回雪，亲教与，恨难诉。
争欲攀辕借住。功成绣袞，重与江山作主。

御街行 待命护国院，不得入国门。寄内

年年不放春闲了。今岁衔杯少。来时柳
上浅金黄，归路玉绵吹帽。惜春长似，五陵
狂俊，不道朱颜老。

斜烟薄雨青林杳。犹有莺声到。西园红
艳绿盘龙，辜负一年春好。锦城乐事，不关
愁眼，何似还家早。

生查子 同前 感旧

宫里妒娥眉，十载辞君去。翠袖怯天寒，
修竹无人处。

今日近君家，望极香车骛。一水是红墙，
有恨无由语。

青玉案 同前

十年不向都门道。信匹马、羞重到。玉
府骅骝犹年少。宫花头上，御炉烟底，常日
朝回早。

霞觞翻手群仙笑。恨尘土人间易春老。
白发愁占彤庭杳。红墙天阻，碧濠烟锁，细
雨迷芳草。

水龙吟 始去齐，路逢次膺叔感别 叙旧

去年暑雨钩盘，夜阑睡起同征辔。今年
芳草，齐河古岸，扁舟同舣。萍梗孤踪，梦
魂浮世。别离常是。念当时绿鬓，狂歌痛饮，
今憔悴、东风里。

此去济南为说。道愁肠、不醒犹醉。多
情北渚。两行烟柳，一湖春水。还唱新声，
后人重到，应悲桃李。待归时，揽取庭前皓
月，也应堪寄。

南歌子 谯园作

霜细犹欺柳，风柔已弄梅。东园撻鼓赏新醅。唤取舞周歌沈、探春回。

妙舞堪千盏，长歌可百杯。笑人将恨上春台。劝我十分一举、两眉开。

醉落魄 用韵和李季良泊山口

高鸿远鹭。溪山一带人烟簇。知君船近渔矶宿。轻素横溪，天淡挂寒玉。

谁家红袖阑干曲。南陵风软波平绿。幽吟无伴芳尊独。清瘦休文，一夜伤单縠。

万年欢 次韵和季良

忆昔论心，尽青云少年，燕赵豪俊。二十南游，曾上会稽千仞。捐袂江中往岁，有骚人、兰荪遗韵。嗟管鲍、当日贫交，半成翻手难信。

君如未遇元礼，肯抽身盛时，寻我幽隐。此事谈何容易，骥才方骋。彩舫红妆围定，笑西风、黄花班鬓。君欲问、投老生涯，醉乡歧路偏近。

临江仙 信州作

谪宦江城无屋买，残僧野寺相依。松间

药臼竹间衣。水穷行到处，云起坐看时。

一个幽禽缘底事，苦来醉耳边啼。月斜西院愈声悲。青山无限好，犹道不如归。

虞美人 羊山饯杜侍郎郡君十二姑及外弟天逵

原桑飞尽霜空杳。霜夜愁难晓。油灯野店怯黄昏。穷途不减酒杯深。故人心。

羊山古道行人少。也送行人老。一般别语重千金。明年过我小园林。话如今。

安公子 和次膺叔

少日狂游好。阆苑花间同低帽。不恨千金轻散尽，恨花残莺老。命小辔、翩翩随处金尊倒。从市人、拍手拦街笑。镇琼楼归卧，丽日三竿未觉。

迷路桃源了。乱山沈水何由到。拨断朱弦成底事，痛知音人悄。似近日、曾教青鸟传佳耗。学凤箫、拟入烟萝道。问刘郎何计，解使红颜却少。

绿头鸭 韩师朴相公会上观佳妓轻盈弹琵琶

新秋近，晋公别馆开筵。喜清时、衔杯乐圣，未饶绿野堂边。绣屏深、丽人乍出，坐中雷雨起鵀弦。花暖间关，冰凝幽咽，宝钗摇动坠金钿。未弹了、昭君遗怨，四坐已凄然。西风里、香街驻马，嬉笑微传。

算从来、司空惯，断肠初对云鬟。夜将阑、井梧下叶，砌蛩收响悄林蝉。赖得多愁，浔阳司马，当时不在绮筵前。竞叹赏、檀槽倚困，沈醉到觥船。芳春调、红英翠萼，重变新妍。

水龙吟 寄留守无愧文

满湖高柳摇风，坐看骤雨来湖面。跳珠溅玉，圆荷翻倒，轻鸥惊散，堂上凉生，槛前暑退，罗裾凌乱。想东山谢守，纶巾羽扇，高歌下、青天半。

应记狂吟司马，去年时、黄花高宴。竹枝苦怨，琵琶多泪，新年鬓换。常恐归时，眼中物是，日边人远。望隋河一带，伤心雾霭，遣离魂断。

惜奴娇

歌阕琼筵，暗失金貂侣。说衷肠、丁宁嘱付。棹举帆开，黯行色、秋将暮。欲去。待却回、高城已暮。

渔火烟村，但触目伤离绪。此情向、阿谁分诉。那里思量，争知我，思量苦。最苦。睡不著、西风夜雨。

临江仙

身外闲愁空满眼，就中欢事常稀。明年

应赋送君诗。试从今夜数，相会几多时。

浅酒欲邀谁共劝，深情惟有君知。东溪春近好同归。柳垂江上影。梅谢雪中枝。

又

自古齐山重九胜，登临梦想依依。偶来恰值菊花时。难逢开口笑，须插满头归。

昨夜一江风色好，平明秋浦帆飞。可怜如赴史君期。且当酬令节，不用叹斜晖。

满庭芳

乡物牵情，家山回首，浩然归兴难收。报恩心事，投老拚悠悠。却笑当年牛下，轻自许、激烈寒讴。成何事，夷犹桂楫，兰芷咏芳洲。

人生，萍梗迹，谁非乐土，何处吾州。算不须，临歧惆怅迟留。要看香炉瀑布，丹枫乱、江色凝秋。真堪与，潇湘暮雨，图上画扁舟。

定风波

跨鹤扬州一梦回。东风拂面上平台。阊苑花前狂覆酒。拍手。东风骑凤却教来。

谪好伯阳丹井畔。官满。平台还见片帆开。上界虽然官府好。总道。散仙无事好追陪。

千秋岁

玉京仙侣，同受琅函结。风雨隔，尘埃绝。霞觞翻手破，阆苑花前别。鹏翼敛，人间泛梗无由歇。

岂忆山中酒，还共溪边月。愁闷火，时间灭。何妨心似水，莫遣头如雪。春近也，江南雁识归时节。

又

叶舟容易，行尽江南地。南雁断，无书至。怜君羁旅处，见我飘蓬际。如梦寐、当年阆苑曾相对。

休说深心事。但付狂歌醉。那更话，孤帆起。水精溪绕户，云母山相砌。君莫去，只堪伴我溪山里。

鹧鸪天

欲上南湖彩舫嬉。还思北渚与岚漪。圆荷盖水垂杨暗，鸂鶒鸳鸯总下时。

持此意，遣谁知。清波还照鬓间丝。西楼重唱池塘好，应有红妆敛翠眉。

清平乐

炎天畏景。午漏那堪永。何苦相仍愁薄领。短壑清溪牵兴。

瑶台月下曾逢。何由却睹冰容。一笑为

驱烦暑，故人元是清风。

虞美人 用韵答秦令

荒城又见重阳到。狂醉还吹帽。人生开口笑难逢。何况良辰一半、别离中。

平台珠履登高处。犹自怀人否。且簪黄菊满头归。惟有此花风韵、似年时。

浣溪沙

江上秋高风怒号。江声不断雁嗷嗷。别魂迢递为君销。

一夜不眠孤客耳，耳边愁听雨萧萧。碧纱窗外有芭蕉。

万年欢 寄韵次膺叔

十里环溪，记当年并游，依旧风景。彩舫红妆，重泛九秋清镜。莫叹歌台蔓草，喜相逢、欢情犹胜。苹洲畔、横玉惊鸾，半天云正愁凝。

中秋醉魂未醒。又佳辰授衣，良会堪更。早岁功名，豪气尚凌汝颖。能致黄金一井，也莫负、鸱夷高兴。别有个、潇洒田园，醉乡天地同永。

一丛花

东君密意在花心。飞雪戏妆林。多情定

怪春来晚，故穿花、千点深深。烟柳上轻，
风丝漫袅，楼阁晚还阴。

雕梁双燕悄来音。帘幕镇沈沈。西城未
有花堪采，醉狂兴、冷落难禁。应约万红。
商量细细，留向未开寻。

减字木兰花 和求仁南郡都别

萍蓬行路。来不多时还遣去。会有重来。
还把清尊此地开。

隋河杨柳。见我五年三执手。红泪多情。
待得重来走马迎。

菩萨蛮

玉京不许尘容到。疏慵只合疏慵老。鸥
鸟共烟波。田夫与醉歌。

忘怀无物我。莫似陈惊坐。勋业付长闲。
西山爽气间。

鹧鸪天 杜四侍郎郡君十二姑生日

吉梦灵蛇朱夏宜。佳辰阿母会瑶池。竹
风荷雨来消暑，玉李冰瓜可疗饥。

心悟了，道成时。不劳龙女骋威仪。僧
祇世界供游戏，贤懿光阴比寿期。

凤箫吟 永嘉郡君生日

晓瞳眈。雨和雨细，南园次第春融。岭

全宋词 晁补之

梅犹妒雪，露桃云杏，已绽碧呈红。一年春正好，助人狂、飞燕游蜂。更吉梦良辰，对花忍负金钟。

香浓。博山沈水，小楼清旦，佳气葱葱。旧游应未改，武陵花似锦，笑语相逢。蕊宫传妙诀，小金丹、同换冰容。况共有、芝田旧约，归去双峰。

梁州令 同前

二月春犹浅。去年樱桃开遍。今年春色怪迟迟，红梅常早，未露胭脂脸。

东君故遣春来缓。似会人深愿。蟠桃新镂，双盏相期，似此春长远。

引驾行 同前 亦名长春

春云轻锁，春风乍扇园林晓。扫华堂，正桃李芳时，诞辰还到。年少。记绛蜡光摇，金猊香郁宝妆了，骤骏马、天街向晚，喜同车、咏窈窕。

多少。卢家壶范，杜曲家声荣耀。庆孟光齐眉，冯唐白首，镇同欢笑。缥缈。待琅函深讨。芝田高隐去偕老。自别有、壶中永日，比人间好。

菩萨蛮 同前

百花含蕊东风里。南园小雨朱扉启。春

色一年年。年年花共妍。

清谈招隐去。莫认如宾处。华发好风光。
林间此味长。

点绛唇 同前

回雁风微，养花浓淡天容好。似春知道。
吉梦佳辰到。

共乐春台，携手蓬莱小。同倾祷。愿春
不老。岁岁寻芳草。

上林春 韩相生日

天惜中秋，三夜淡云，占得今宵明月。
〔孟〕陬岁好，金风气爽，清时挺生贤哲。相
门出相，算钟庆、自应累叶。乍归来，暂燕
处，共仰赤松高辙。

想人生、会须自悦。浮云事，笑里尊前
休说。旧有衮衣，公归未晚，千岁盛明时节。
命圭相印，看重赏、晋公勋业。济生灵，共
富寿，海深天阔。

杨柳枝

素色清薰出俗华。腊前花。轩前爱日扫
云遮。几枝斜。

月淡纱窗香暗透，白于纱。幽人独酌对
芳葩。兴无涯。

蓦山溪

凤凰山下，东畔青苔院。记得当初个，
与玉人、幽欢小宴。黄昏风雨，人散不归家，
帘旌卷。灯火颤。惊拥娇羞面。

别来憔悴，偏我愁无限。歌酒情都减，
也不独、朱颜改变。如今桃李，湖上泛舟时，
青天晚。青山远。愿见无由见。

又

自来相识，比你情都可。咫尺千里算，
惟孤枕、单衾知我。终朝尽日，无绪亦无言，
我心里，忡忡也，一点全无那。

香笺小字，写了千千万。我恨无羽翼，
空寂寞、青苔院锁。昨朝冤我，却道不如休，
天天天，不曾么，因甚须冤我。

生查子

夜饮别佳人，梅小犹飘雪。忍泪一春愁，
过却花时节。

相见话相思，重与临风月。休似那回时，
无事还轻别。

少年游

当年携手，是处成双，无人不羡。自间
阻、五年也，一梦拥、娇娇粉面。

柳眉轻扫，杏腮微拂，依前双靥。盛睡

里、起来寻觅，却眼前不见。

青玉案

三年宋玉墙东畔。怪相见、常低面。一曲文君芳心乱。匆匆依旧吹散，月淡梨花馆。

秋娘苦妒浮金盏。漏些子堪猜是娇盼。归去相思肠应断。五更无寐，一怀好事，依旧蓝桥远。

江城子 赠次膺叔家娉娉

娉娉闻道似轻盈。好佳名。也堪称。楚观云归，重见小樊惊。豆蔻梢头春尚浅，娇未顾，已倾城。

章台休咏旧青青。惹离情。恨难平。无事飞花，撩乱扑旗亭。不似刘郎春草小，能步步，伴人行。

青玉案 伤娉娉

彩云易散琉璃脆。念往事、心将碎。只合人间十三岁。百花开尽，丁香独自。结恨春风里。

小园幽槛经行地。恨春草佳名谩抛弃。簇蝶罗裙休将施。香残烛烬，微风触幔，仿佛娇嗔是。

胜胜慢 家妓荣奴既出有感

朱门深掩，摆荡春风，无情镇欲轻飞。
断肠如雪，撩乱去点人衣。朝来半和细雨，
向谁家、东馆西池。算未肯、似桃含红蕊，
留待郎归。

还记章台往事，别后纵青青，似旧时垂。
灞岸行人多少，竟折柔枝。而今恨啼露叶，
镇香街、抛掷因谁。又争可、妒郎夸春草，
步步相随。

点绛唇 同前

檀口星眸，艳如桃李情柔惠。据我心里。
不肯相抛弃。

哭怕人猜，笑又无滋味。忪忪地。系人
心里。一句临歧誓。

永遇乐 赠雍宅璨奴

银烛将残，玳筵初散，依旧愁绪。醉里
凝眸，娇来纵体，此意难分付。怜伊只似，
风前轻燕，好语暂来还去。重楼静，珠帘休
下，待扫画梁留住。

青娥皓齿，云鬟花面，见了绮罗无数。
只你厌厌，教人竟日，一点无由诉。如今拚
了，萦眠惹梦，没个顿身心处。深诚事，骖
鸾解佩，是许未许。

虞美人 代内

梅花时候君轻去。曾寄红笺句。胡麻好种少人知。正是归时何处、误芳期。

谁教又作狂游远。归路杨花满。当年不负琐窗春。老向长楸走马、更愁人。

行香子 赠轻盈

柳态纤柔，雪艳疏明。问人来、人道轻盈。张琵莲脸，一寸波横。比潇洒处，犹难称，此嘉名。

花前烛下，微嚙浅笑，要题诗、盏畔低声。司空自惯，狂眼须惊。也不辞写，双罗带，恐牵情。

感皇恩

终岁忆春回，西园行尽。欢喜梅梢上春信。去年携手，暗约芳时还近。燕来莺又到，人无准。

凭谁向道，流光一瞬。佳景闲无事衣褪。春归何处，又对飞花难问。旧欢都未遇，成新恨。

临江仙 代内

马上匆匆听鹊喜，朦胧月淡黄昏。碧罗

双扇拥朝云。粉光先辨脸，朱色怎分唇。

暂别宝奁蛛网遍，春风泪污榴裙。香笺小字寄行云。纤腰非学楚，宽带为思君。

碧牡丹 王晋卿都尉宅观舞

院宇帘垂地。银筝雁、低春水。送出灯前，婀娜腰肢柳细。步蹙香衾，红浪随鸳履。梁州紧，凤翘坠。悚轻体。

绣带因风起。霓裳恐非人世。调促香檀，困入流波生媚。上客休辞，眼乱尊中翠。玉阶霜、透罗袂。

少年游

前时相见，楼头窗畔，尊酒望银蟾。如今间阻，银蟾又满，小阁下珠帘。

愿得吴山山前雨，长恁晚廉纤。不见楼头婵娟月，且寂寞、闭窗眠。

西江月

似有如无好事，多离少会幽怀。流莺过了又蝉催。肠断碧云天外。

不寄书还可恨，全无梦也堪猜。秋风吹泪上楼台。只恐朱颜便改。

鹧鸪天

绣幕低低拂地垂。春风何事入罗帏。胡

麻好种无人种，正是归时君未归。

临晚景，忆当时。愁心一动乱如丝。夕阳芳草本无恨，才子佳人空自悲。

满江红 寄内

月上西窗，书帙静、灯明又灭。水漏涩、铜壶香尽，夜霜如雪。睡眼不曾通夕闭，梦魂争得连宵接。念碧云、川路古来长，无由越。

鸾钗重，青丝滑。罗带缓，小腰怯。伊多感那更，恨离伤别。正是少年佳意气，渐当故里春时节。归去来、莫教子规啼，芳菲歇。

菩萨蛮 代歌者怨

丝篁斗好莺羞巧。红檀微映燕脂小。当□敛双蛾。曲中幽恨多。

知君怜舞袖。舞要歌成就。独舞不成妍。因歌舞可怜。

临江仙

离别寻常今白首，更须竹雨萧萧。不应都占世间豪。清风居士手，杨柳洛城腰。

文字功名真自误，从今好月良宵。只消怜取董娇饶。修门君自到，不用我词招。

又 晁达州见和

君似苍崖千仞竹，一枝孤映蒿萧。簟瓢

不减万钟豪。闲情搔短发，佳句咏纤腰。

罢酒兰舟回楚桡，相思何处今宵、淮南幽桂水云饶。他年春草恨，应有小山招。

紫玉箫 过尧民金部四叔位见韩相家姬轻盈所留题

罗绮丛中，笙歌丛里，眼狂初认轻盈。无花解比，似一钩新月，云际初生。算不虚得，都占与、第一佳名。轻归去，那知有人，别后牵情。

襄王自是春梦，休谩说东墙，事更难凭。谁教慕宋，要题诗曾倚，宝柱低声。似瑶台晓，空暗想、众里飞琼。余香冷、犹在小窗，一到魂惊。

斗百草

别日常多，会时常少天难晓。正喜花开，又愁花谢，春也似人易老。惨无言、念旧日朱颜，清欢莫笑。便苒苒如云，霏霏似雨，去无音耗。

追想墙头梅下，门里桃边，名利为伊都忘了。血写香笺，泪封罗帕，记三日、离肠恨搅。如今事，十二楼空凭谁到。此情悄。拟回船、武陵路杳。

又

往事临邛，旧游雅态羞重忆。解赋才高，好音情慧，琴里句中暗识。正当年、似阆苑琼枝，朝朝相倚。便涤器何妨，当炉正好，

镇同比翼。

谁使褰裳佩失，推枕云归，惆怅至今遗恨积。双鲤书来，大刀诗意，纵章台、青青似昔。重寻事，前度刘郎转愁寂。谩赢得。对东风、对花叹息。

斗百花 汶妓阎丽

小小盈盈珠翠。忆得眉长眼细。曾共映花低语，已解伤春情意。重向溪堂，临风看舞梁州，依旧照人秋水。转更添姿媚。

与问阶上，簸钱时节，记微笑，但把纤腰，向人娇倚。不见还休，谁教见了厌厌，还是向来情味。

又 汶妓褚延娘

脸色朝霞红腻。眼色秋波明媚。云度小钗浓鬓，雪透轻绮香臂。不语凝情，教人唤得回头，斜盼未知何意。百态生珠翠。

低问石上，凿井何由及底。微向耳边，同心有缘千里。饮散西池，凉蟾正满纱窗，一语系人心里。

又

斜日东风深院。绣幕低迷归燕。潇洒小屏娇面，仿佛灯前初见。与选筵中，银盆半拆姚黄，插向凤凰钗畔。微笑遮纨扇。

教展香衾，看舞霓裳促遍。红飏翠翻，惊鸿乍拂秋岸。柳困花慵，盈盈自整罗巾，须劝倒金盏。

御街行

天街月照珠帘粉。辇辂曾相近。繁华乐事老来慵，对酒尚怜佳景。王孙年少，风流应更，无奈春愁闷。

幽期莫误香闺恨。罗带今朝褪。月圆花好一般春，触处总堪乘兴。有人惆怅。何如归好，相见凭君问。

南歌子

睡起临窗坐，妆成傍砌闲。春来莫卷绣帘看。嫌怕东风吹恨、在眉间。

鹦鹉花前弄，琵琶月下弹。蓦然收袖倚栏干。一向思量何事、点云鬟。

清平乐

寒风雁度。声向千门去。也到文闱校文处。也到文君绣户。

背灯解带惊魂。长安此夜秋声。早是夜寒不寐，五更风雨无情。

好事近

归路苦无多，正值早秋时节。应是画帘灵鹊，把归期先说。

就中风送马蹄轻，人意渐欢悦。此夜醉

眠无梦，任西楼斜月。

调 笑

盖闻民俗殊方，声音异好。洞庭九奏，谓踊跃于鱼龙；子夜四时，亦欣愉于儿女。欲识风谣之变，请观调笑之传。上佐清欢，深惭薄伎。

西子

西子江头自浣纱。见人不语入荷花。天然玉貌非朱粉，消得人看隘若耶。游冶谁家少年伴。三三五五垂杨岸。紫骝飞入乱红深，见此踟蹰但肠断。

肠断。越江岸。越女江头纱自浣。天然玉貌铅红浅。自弄芙蓉日晚。紫骝嘶去犹回盼。笑入荷花不见。

宋玉

楚人宋玉多微词。出游白马黄金羁。殷勤扣户主人女，上客日高无乃饥。琴弹秋思明心素。女为客歌客无语。冠纓定挂翡翠钗，心乱谁知岁将暮。

将暮。乱心素。上客风流名重楚。临街下马当窗户。饭煮雕胡留住。瑶琴促轸传深语。万曲梁尘不顾。

大堤

妾家朱户在横塘。青云作髻月为珰。常伴大堤诸女士，谁令花艳独惊郎。踏堤共唱襄阳乐。轲峨大艑帆初落。宜城酒熟持劝郎，郎今欲渡风波恶。

波恶。倚江阁。大艑轲峨帆夜落。横塘朱户多行乐。大堤花容绰约。宜城春酒郎同酌。醉倒银缸罗幕。

解佩

当年二女出江滨。容止光辉非世人。明珰戏解赠行客，意比骖鸾天汉津。恍如梦觉空江暮。云雨无踪佩何处。君非玉斧望归来，流水桃花定相误。

相误。空凝伫。郑子江头逢二女。霞衣曳玉非尘土。笑解明珰轻付。月从云堕劳相慕。自有骖鸾仙侣。

回纹

窦家少妇美朱颜。藁砧何在山复山。多才况是天机巧，象床玉手乱红间。织成锦字纵横说。万语千言皆怨别。一丝一缕几萦回，似妾思君肠寸结。

寸结。肝肠切。织锦机边音韵咽。玉琴尘暗薰炉歇。望尽床头秋月。刀裁锦断诗可灭。恨似连环难绝。

唐儿

头玉皎皎翠刷眉。杜郎生得好男儿。惟有东家娇女识，骨重神寒天〔庙〕姿。银鸾照衫马丝尾。折花正值门前戏。侬笑书空意为谁，分明唐字深心记。

心记。好事。玉刻容颜眉刷翠。杜郎生得真男子。况是东家妖丽。眉尖春恨难凭寄。笑作空中唐字。

春草

刘郎初见小樊时。花面丫头年未笄。千金欲置名春草，图得身行步步随。郎去苏台云水国。青青满地成轻掷。闻君车马向江南，为传春草遥相忆。

相忆。

顿轻掷。春草佳名惭赠璧。长洲茂苑吴王国。自有芊绵碧色。根生土长铜驼陌。纵

欲随君争得。

洞仙歌 泗州中秋作，此绝笔之词也

青烟幂处，碧海飞金镜。永夜闲阶卧桂影。露凉时、零乱多少寒蛩，神京远，惟有蓝桥路近。

水晶帘不下，云母屏开，冷浸佳人淡脂粉。待都将许多明，付与金尊，投晓共、流霞倾尽。更携取、胡床上南楼，看玉做人间，素秋千顷。

下水船

上客骊驹系。惊唤银屏睡起。困倚妆台，盈盈正解罗髻。凤钗垂，缭绕金盘玉指。巫山一段云委。

半窥镜、向我横秋水。斜颌花枝交镜里。淡拂铅华，匆匆自整罗绮。敛眉翠。虽有惜惜密意，空作江边解佩。

失调名

残腊初雪霁。梅白飘香蕊。依前又还是，迎春时候，大家都备。灶马门神，酒酌酴酥，桃符尽书吉利。

五更催驱傩，爆竹起。虚耗都教退。交年换新岁。长保身荣贵。愿与儿孙、尽老今生，祝寿遐昌，年年共同守岁。

洞仙歌

江陵种橘，尚比封侯贵。何况江涛转千里。带天香，含洞乳，宜入春盘，红荔子，驰驿风流仅比。

齿疏潘令老，怯咀冰霜，十颗金苞谩分遗。记觞前、须细认，别有余甘，从此去，枉却栽桃种李。想相如酒渴对文君，迥不是人间，等闲风味。

又

温江异果，惟有泥山贵。驿送江南数千里。半含霜，轻噀雾，曾怯吴姬，亲赠我，绿橘黄柑怎比。

双亲云水外，游子空怀，惆怅无人可归遗。报周郎、须念我，物少情多，春酒醉，独胜甜桃醋李。况灯火楼台近元宵，似不减年时，袖中香味。

朝天子

酒醒情怀恶。金缕褪、玉肌如削。寒食过却。海棠花零落。

渐日照阑干、烟淡薄。绣额珠帘笼昼阁。春睡著。觉来失、秋千期约。

晁冲之

汉宫春

黯黯离怀，向东门系马，南浦移舟。薰风乱飞燕子，时下轻鸥。无情渭水，问谁教、日日东流。常是送、行人去后，烟波一向离愁。

回首旧游如梦，记踏青殢饮，拾翠狂游。无端彩云易散，覆水难收。风流未老，拚千金、重入扬州。应又是、当年载酒，依前名占青楼。

玉蝴蝶

目断江南千里，灞桥一望，烟水微茫。尽锁重门，人去暗度流光。雨轻轻、梨花院落，风淡淡、杨柳池塘。恨偏长。佩沈湘浦，云散高唐。

清狂。重来一梦，手搓梅子，煮酒初尝。寂寞经春，小桥依旧燕飞忙。玉钩栏、凭多渐暖，金缕枕、别久犹香。最难忘。看花南陌，待月西厢。

感皇恩

小阁倚晴空，数声钟定。斗柄寒垂暮天净。向来残酒，尽被晓风吹醒。眼前还认得，当时景。

旧恨与新愁，不堪重省。自叹多情更多病。绮窗犹在，敲遍阑干谁应。断肠明月下，梅摇影。

又

蝴蝶满西园，啼莺无数。水阁桥南路。凝伫。两行烟柳，吹落一池飞絮。秋千斜挂起，人何处。

把酒劝君，闲愁莫诉。留取笙歌住。休去。几多春色，禁得许多风雨。海棠花谢也，君知否。

又

寒食不多时，牡丹初卖。小院重帘燕飞碍。昨宵风雨，只有一分春在，今朝犹自得，阴晴快。

熟睡起来，宿醒微带。不惜罗襟揜眉黛，日高梳洗，看著花阴移改。笑摘双杏子，连枝戴。

临江仙

双舸亭亭横晚渚，城中飞观嵯峨。画桥灯火照清波。玉钩平浸水，金锁半沈河。

试问无情堤上柳，也应厌听离歌。人生
无奈别离何。夜长嫌梦短，泪少怕愁多。

又

忆昔西池池上饮，年年多少欢娱。别来
不寄一行书。寻常相见了，犹道不如初。

安稳锦屏今夜梦，月明好渡江湖。相思
休问定何如。情知春去后，管得落花无。

又

谩道追欢惟九日，年年此恨偏浓。今朝
吹帽与谁同。黄花都未拆，和泪泣西风。

应恐登临肠更断，故交烟雨迷空。为君
一曲送飞鸿。谁能推毂我，深入醉乡中。

渔家傲

浦口潮来沙尾涨。危樯半落帆游漾，水
调不知何处唱。风淡荡。鳊鱼吹起桃花浪。

雪尽小桥梅总放。层楼一任愁人上。万
里长安回首望。山四向。澄江日色如春酿。

传言玉女

一夜东风，吹散柳梢残雪。御楼烟暖，
正鳌山对结。箫鼓向晚，凤辇初归宫阙。千
门灯火，九街风月。

绣阁人人，乍嬉游、困又歇。笑匀妆面，
把朱帘半揭。娇波向人，手捻玉梅低说。相
逢常是，上元时节。

如梦令

帘外新来双燕。珠阁琼楼穿遍。香径得泥归，飞蹙池塘波面。谁见。谁见。春晚昭阳宫殿。

又

墙外辘轳金井。惊梦瞢腾初省。深院闭斜阳，燕入阴阴帘影。人静。人静。花落鸟啼风定。

又

门在垂杨阴里。楼枕曲江春水。一阵牡丹风，香压满园花气。沈醉。沈醉。不记绿窗先睡。

上林春慢

帽落宫花，衣惹御香，凤辇晚来初过。鹤降诏飞，龙擎烛戏，端门万枝灯火。满城车马，对明月、有谁闲坐。任狂游，更许傍禁街，不扃金锁。

玉楼人、暗中掷果。珍帘下、笑著春衫袅娜。素蛾绕钗，轻蝉扑鬓，垂垂柳丝梅朵。夜阑饮散，但赢得、翠翘双亸。醉归来，又重向、晓窗梳裹。

汉宫春梅

潇洒江梅，向竹梢稀处，横两三枝。东

君也不爱惜，雪压风欺。无情燕子，怕春寒、轻失佳期。惟是有、南来归雁，年年长见开时。

清浅小溪如练，问玉堂何似，茅舍疏篱。伤心故人去后，冷落新诗。微云淡月，对孤芳、分付他谁。空自倚，清香未减，风流不在人知。

小重山

碧水浮瓜纹簟前。只知闲枕手，不成眠。晚云如火雨晴天。轻云远，亭外一声蝉。

池馆几年年。倚阑催小艇，采新莲。多情还到芰荷边。应相忆，折藕看丝牵。

临江仙

万里彤云密布，长空琼色交加。飞如柳絮落泥沙。前村归去路，舞袖拂梨花。

此际堪描何处景，江湖小艇渔家。旋斟香酝过年华。披蓑乘远兴，顶笠过溪沙。

晁端礼

绿头鸭

锦堂深，兽炉轻喷沈烟。紫檀槽、金泥花面，美人斜抱当筵。挂罗绶、素肌莹玉，近鸾翅、云鬓梳蝉。玉笋轻拢，龙香细抹，凤凰飞出四条弦。碎牙板、烦襟消尽，秋气满庭轩。今宵月，依稀向人，欲斗婵娟。

变新声、能翻往事，眼前风景依然。路漫漫、汉妃出塞，夜悄悄、商妇移船。马上愁思，江边怨感，分明都向曲中传。困无力、劝人金盏，须要倒垂莲。拚沈醉，身世恍然，一梦游仙。

又 咏月

晚云收，淡天一片琉璃。烂银盘、来从海底，皓色千里澄辉。莹无尘、素娥淡伫，静可数、丹桂参差。玉露初零，金风未凛，一年无似此佳时。露坐久，疏萤时度，乌鹊正南飞。瑶台冷，栏干凭暖，欲下迟迟。

念佳人、音尘别后，对此应解相思。最关情、漏声正永，暗断肠、花影偷移。料得来宵，清光未减，阴晴天气又争知。共凝恋，如今别后，还是隔年期。人强健，清尊素影，

长愿相随。

望海潮

高阳方面，河间都会，三关地最称雄。粉堞万层，金城百雉，楼横一带长虹。烟素敛晴空。正望迷平野，目断飞鸿。易水风烟，范阳山色有无中。

安边暂倚元戎。看纶巾对酒，羽扇摇风。金勒少年，吴钩壮士，宁论卫霍前功。乃眷在清衷。恐凤池虚久，归去匆匆。幸有佳人锦瑟，玉笋且轻拢。

水龙吟

夜来深雪前村路，应是早梅初绽。故人赠我，江头春信，南枝向暖。疏影横斜，暗香浮动，月明溪浅。向亭边驿畔。行人立马，频回首、空肠断。

别有玉溪仙馆。寿阳人、初匀妆面。天教占了，百花头上，和羹未晚。最是关情处，高楼上、一声羌管。仗谁人向道，何如留取，倚朱栏看。

又

岭梅香雪飘零尽，繁杏枝头犹未。小桃一种，妖娆偏占，春工用意。微喷丹砂，半含朝露，粉墙低倚。似谁家卯女，娇痴怨别，空凝睇、东风里。

好是佳人半醉。近横波、一枝争媚。元

都观里，武陵溪上，空随流水。惆怅如红雨，风不定、五更天气。念当年门里，如今陌上，洒离人泪。

又

小桃零落春将半。双燕却来池馆。名园相倚，初开繁杏，一枝遥见。竹外斜穿，柳间深映，粉愁香怨。任红敲宋玉，墙头千里，曾牵惹、人肠断。

常记山城斜路，喷清香、日迟风暖。春阴挫后，马前惆怅，满枝红浅。深院帘垂雨，愁人处、碎红千片。料明年更发，多应更好，约邻翁看。

又

倦游京洛风尘，夜来病酒无人问。九衢雪小，千门月淡，元宵灯近。香散梅梢，冻消池面，一番春信。记南楼醉里，西城宴阁，都不管、人春困。

屈指流年未几，早人惊、潘郎双鬓。当时体态，如今情绪，多应瘦损。马上墙头，纵教瞥见，也难相认。凭栏干，但有盈盈泪眼，把罗襟搵。

上林春

霖雨成功，堂称继美，旧说安阳家世。峻岳降神，长庚应梦，佳辰况当秋霁。玉函金篆，帝锡与、寿眉觚齿。向清时、便告老，尽取貂蝉轻弃。

把朝廷旧勋屈指。有谁人似此，能全终

始。谤书顿释，先芬未泯，君王自为知己。
看花临水。算已号、醉吟居士。奈苍生，尚
满望、谢公重起。

又

伊洛清波，嵩山秀色，共与皇家为瑞。
挺生异质，亲逢盛旦，簪纓旧传家世。雁炉
烟里，罩一段、照人清气。灿金章、映紫绶，
自是真官标致。

把朝廷縉绅屈指。有谁人似得，多才多
艺。片言悟主，封侯赐璧，君王自为知己。
暂来卧治。况廊庙、正多虚位。看登庸，辅
圣主、万年康济。

满庭芳

天与疏慵，人怜憔悴，分甘抛弃簪纓。
有时乘兴，波上叶舟轻。十里横塘过雨，荷
香细，苹末风清。真如画，残霞淡日，偏向
柳梢明。

凝情。尘网外，鲈鱼旋鲙，芳酒深倾。
又算来、何须身后浮名。无限沧浪好景，蓑
笠下、且遣馀生。长歌去，机心尽矣，鸥鹭
莫相惊。

又

绿绕群峰，红摇手柄，夜来暑雨初收。
共君乘兴，轻舸信悠悠。且尽一尊别酒，荷
香里、满酌轻讴。明朝去，征帆夜落，何处
好汀洲。

风流、吾小阮，朝辞东观，夕向南州。

况圣时、争教贾傅淹留。若过浔阳亭上，琵琶泪、莫洒清秋。堤边柳，从今爱惜，留待系归舟。

又

北渚澄兰，南山凝翠，望中浑似仙乡。万家烟霭，朱户锁垂杨。好是飞泉漱玉，回环遍。小曲深坊。西风里，芙渠带雨，飘散满城香。

微凉。湖上好，桥虹倒影，月练飞光。命玳簪促席，云鬓分行。谁似风流太守，端解道、春草池塘。须留恋，神京纵好，此地也难忘。

又

雪满貂裘，风摇金辔，笑看锦带吴钩。照人青鬓，年少定封侯。此去马蹄何处，山万叠，济水南州。君知否，卢郎未老，曾是恣狂游。

风流。佳丽地，十年屈指，一梦回头。最难忘，西湖北渚澄秋。玉砌雕栏好在，桃共李、能忆人不。衰翁也，多情为我，将恨寄红楼。

又

浅约鸦黄，轻匀螺黛，故教取次梳妆。减轻琶面，新样小鸾凰。每为花娇玉嫩，容对客、斜倚银床。春来病，兰薰半歇，一炷舞衣裳。

悲凉。人事改，三春秣艳，一夜繁霜。似人归洛浦，云散高唐。痛念你、平生分际，

辜负我、临老风光。罗裙在，凭谁为我，求取返魂香。

雨中花

倦贰文昌，乐请左符，双旌去指东藩。有腰金新宠，昼锦荣观。独步文章，家传素业，世宝青毡。动欢声和气，里巷初惊，侍从衣冠。

朱门映柳，绮窗临水，盛游应记当年。端解道、香留罗袜，墨在蛮笺。惆怅江边侧帽，寻思花底遗鞭。不如深醉，莫思身外，且斗樽前。

又

豆蔻梢头，鸳鸯帐里，扬州一梦初惊。忆当时相见，双眼偏明。南浦绿波，西城杨柳，痛悔多情。望征鞍不见，况是并州，自古高城。

几多映月，凭肩私语，傍花和泪深盟。争信道、三年虚负，一事无成。瑶佩空传好好，秦筝闻说琼琼。此心在了，半边明镜，终遇今生。

又

流水知音，轻裘共敝，相逢才换星霜。多少风亭棋酒，画阁丝簧。纤指声犹馀响，红粉泪已成行。怅绿波浦上，芳草堤边，又整归航。

新移槛竹，手种庭花，未容烂漫飞觞。归去也、重趋丹禁，密侍清光。醉帽斜萦御

柳，朝衣浓惹天香。帝城春好，多应不念，
水郭渔乡。

玉楼宴

记红颜日、向瑶阶，得俊饮、散蓬壶。
绣鞍纵骄马，故坠鞭柳径，缓辔花衢。斗帐
兰缸曲，曾是振、声名上都。醉倒旗亭，更
深未归，笑倩人扶。

光阴到今二纪，算难寻前好，懒访仙居。
近来似闻道，向雾关云洞，自乐清虚。月帔
与星冠，不念我、华颠皓须。纵教重有相逢，
似得旧时无。

醉蓬莱

正中秋初过，淡碧云容，嫩凉天气。紫
府真仙，暂谪居尘世。慕道高情，照人清骨，
是寿星标致。德在民心，勋藏帝室，清芬相
继。

庭有芝兰，世调鼎鼐，晋美乌衣，汉称
韦氏。未必当时，解功成身退。天下苍生，
未知此意，望谢公重起，善颂阴资，何须更
觅，西山灵剂。

又

看梅梢初动，池面冰渐，小春时候。当
日生贤，庆皇家忠厚。龙种殊常，照人眉宇，
似汝阳端秀。世取贤科，胪传圣语，增光华
[胄]

天汉灵源，最为亲近，茅土真封，旧相传授。开府新恩，拜除书非久。鸣佩拖绅，曳香摇翠，向画堂称寿。物外光阴，樽前笑语，年年依旧。

又

乍酒醒孤馆，梦断幽窗，嫩凉天气。潇洒情怀，想乡关迢递。一枕清风，半帘残月，是闷人滋味。南浦离多，东阳带缓，新来憔悴。

因念当时，乱花深径，画楫环溪，屡陪欢醉。踪迹飘流，顿相望千里。水远山高，雁沈鱼阻，奈信音难寄。吟社阑珊，酒徒零落，重寻无计。

金人捧露盘

天锡禹圭尧瑞，君王受鳌，未央宫殿。三五庆元宵，扫春寒、花外蕙风轻扇。龙阙前瞻，凤楼背耸，中有鳌峰见。渐紫宙、星河晚。放桂华浮动，金莲开遍。御帘卷。须臾万乐喧天，群仙扶辇。

云间，都人望天表，正仙葩竞插，异香飘散。春宵苦长短，指花阴，愁听漏传银箭。京国繁华，太平盛事，野老何因见。但时效华封祝，愿岁岁闻道，金舆游宴。暗魂断。天涯望极长安远。

玉女摇仙佩

宫梅弄粉，御柳摇金，又喜皇州春早。盛世生贤，真仙应运，当日来从三岛。车马喧青晓。看千钟赐饮，中人传诏。最好是、芝兰并砌，鸣佩腰金，彩衣相照。炉烟袅。高堂半卷珠帘，神仙缥缈。

须信槐庭荫美，凤沼波澄，屈指十年三到。九叙重歌，元圭再锡，已把成功来告。四海瞻仪表。庆君臣会集，诗符天保。况自有、仙风道骨，玉函金篆，阴功须报。方知道。八千岁月椿难老。

蓦山溪

轻衫短帽，重入长安道。屈指十年中，一回来、一回渐老。朋游在否，落托更能无，朱弦悄。知音少。拨断相思调。

花边柳外，潇洒愁重到。深院锁春风，悄无人、桃花自笑。金钗一股，拟欲问音尘，天杳杳。波渺渺。何处寻蓬岛。

又

栏干十二，倚遍还重倚。一曲一般愁，对芳草、伤春千里。绮窗深处，还解忆人无，碧云辞，红叶字。曾仗东风寄。

繚墙深院，无路通深意。纵使得新声，又争知、相如名字。从来风韵，潇洒不禁愁，捻梨花，看菊蕊。应也成憔悴。

又

广寒宫殿，千里同云晓。飞雪满空来，
翦云英、群仙齐到。乱飘僧舍，密处洒歌楼，
闲日少。风光好。且共宾朋笑。

华堂深处，满满觥船掉。梅蕊拆来看，
已偷得、春风些小。绮罗香暖，不怕卷珠帘，
沈醉了。樽前倒。红袖休来叫。

又

春来心事，分付千钟酒。午醉梦还醒，
两眉愁、才消又有。天涯远梦，归路日中迷。
楚云深，孤馆静，潇洒梨花手。

回文歌罢，幽恨新兼旧。帘影卷斜阳，
乱红飞、风摇暮柳。独携此意，和泪上层楼，
尽平芜，穷远目，认断千山首。

喜迁莺

嫩柳初摇翠。怪朝来早有，飞花零坠。
洞门斜开，珠帘初卷，惊起谢娘吟缀。蕊珠
宫殿晓，谁乱把、云英揉碎。气候晚，被寒
风卷渡，龙沙千里。

沈醉、深院里。粉面照人。疑是瑶池会。
润拂炉烟，寒欺酒力，低压管弦声沸。艳阳
过半也，应是好、郊原新霁。待更与上层楼，
遍倚栏干十二。

又

伫立蘅皋暮，冻云乍敛，霜飈微列。怅
饮杯深，阳关声苦，愁见画船催发。夜来红

泪烛，还解惜、王孙轻别。怅望处，乍金丝冷落，兰薰销歇。

闻说。归兴切。华鬓未生，得意浓时节。画戟门开，斑衣追逐，晓日凤凰双阙。帝城春信早，随处有、江海攀折。烂熳赏，也多应忘了，东堂风月。

又

清和时序。望桂影渐生，薰风微度。挺秀金芝，传芳玉叶，天上瑞麟重睹，竞爽谢庭兰玉，信美西雍鸳鹭。庆门里，把丹枝争折，青云平步。

声誉。喧盛世，人咏少年，古锦囊中句。艺祖诸孙，宗王贤子，偏爱汝阳眉宇。画堂令辰称寿，愿与冈陵同固。更看取，继汾公勋业，东平茅土。

沁园春

络纬催凉，断虹收雨，庭梧报秋。绕郡城、千顷烟波绿，正鱼肥酒美，名冠东州。芰荷风细，蒹葭烟淡，宛在潇湘南岸头。凝望处，似桃源洞口，初泛兰舟。

贤侯。酝藉风流。向庭讼闲时多宴游。有信陵家世，梁园客右，才华高掩，沈谢何刘。政声朝奏，除书夕至，即看归趋丹凤楼。须眷恋，况新堂莹澈，好共迟留。

水调歌头

忆昔红颜日，金玉等泥沙。青楼紫陌，

惟解惜月与贪花。谁信如今憔悴，尘暗金徽玉轸，藓污匣中蛇。一事都无就，双鬓只堪嗟。

恨无情，乌与兔，送年华。不如归去，无限云水好生涯。未用轻蓑短棹。犹有青鞋黄帽，行处即吾家。回首人间世，幽意在青霞。

金盏倒垂莲

流水漂花，记同寻阆苑，曾宴桃源。痛饮狂歌，金盏倒垂莲。未省负、佳时良夜，烂游风月三年。别后空抱瑶琴，谁听朱弦。

风流少年儒将，有威名震虏，谈笑安边。寄我新诗，何事赋归田。想歌酒、情怀如旧，后房应也依然。此外莫问升沈，且斗樽前。

百宝装

枫叶初丹，苹花渐老，蘅皋谁系扁舟。故人思我。征棹少淹留。一尊潋滟西风里，共醉倒、同销万古愁。况今宵自有，明月照人，逼近中秋。

常爱短李家声，金闺彦士，才高沈谢何刘。片帆初卷，歌吹是扬州。此心自难拘形役，恨未能、相从烂漫游。酒醒时，路遥人远，为我频上高楼。

玉胡蝶

淡淡春阳天气，夜来一霎，微雨初晴。

向暖犹寒，时候又是清明。乱沾衣、桃花雨闹。微弄袖、杨柳风轻。晓莺声。唤回幽梦，犹困春醒。

牵萦。伤春怀抱，东郊烟暖，南浦波平。况有良朋，载酒同放彩舟行。劝人归、啼禽有意，催棹去、烟水无情。黯销凝。暮云回首，何处高城。

木兰花

苦春宵漏短，梦回晚、酒醒迟。正小雨初收，馀寒未放，怯试单衣。娇痴。最尤殢处，被罗襟、印了宿妆眉。潇洒春工斗巧，算来不在花枝。

芳菲。正好踏春，携素手、暂分飞。料恨月愁花，多应瘦损，风柳腰肢。归期，况春未老，过南园，尚及牡丹时。拚却栏边醉倒，共伊插满头归。

金盏子

断魂凝睇。望故国迢迢，倦摇征辔。恨满西风，有千里云山，万重烟水。遥夜枕冷衾寒，数更筹无寐。想伊家、应也背著孤灯，暗弹珠泪。

屈指。重算归期，知他是何时见去里。翻思绣阁旧时，无一事，只管爱争闲气。及至恁地单栖，却千般追悔。从今后，彼此记取，厌厌况味。

洞仙歌

年时此际，向扁舟同载。风送征帆暮天外。对沙汀宿鹭，与波上轻鸥。双双处，相唤相呼自在。

如今重整棹，烟景依然，谁念轻分绣罗带。向蓬窗独坐，不觉徊徨，鸥与鹭、想一齐惊怪。怎生得、今宵梦还家，又譬如秉烛，夜阑相对。

安公子

帝里重阳好。又对短发来吹帽。满目风光还似旧，奈樽前人老。暗忆当年，伴侣同倾倒。夸俊游、争买千金笑。到如今憔悴，恰似华胥一觉。

此恨何时了。旧游屈指愁重到。小曲深坊闲信马，掩朱扉悄悄。怎得个多情，为我传音耗。但向伊耳边轻轻道。道近来应是，忘了卢郎年少。

庆寿光

叔祖母黄氏，年九十一岁。其长子尝齿仕籍。大观赦恩，例许叙封。事在可疑，有司难之。次子论列于朝，特封寿光县太君。诰词有蕴仁积善之褒，采纶言以名所居之堂曰“积善”，日与亲旧歌酒为寿于其间，命族孙端礼作庆寿光曲，以纪一时之美。其词曰

丹宸疏恩，庆闾受命，圣朝广孝非常。
大邑高封，名兼寿考辉光。闾巷相传盛事，
焕丝五色成章。崇新栋，天语荣夸，共瞻积
善华堂。

灵龟荐祉，紫鸾称寿，千钟泛酒，百和
焚香。况有新教歌舞，妙选丝篁。馀庆从今
沓至，看儿孙、朱紫成行。闻说道，贤德阴
功，姓名仍在仙乡。

黄鹂绕碧树

鸳瓦霜轻，玳帘风细，高门瑞气非烟。
积厚源深，有长庚应梦，乔岳生贤。妙龄秀
发，应谢庭、兰玉争妍。名动缙绅，况文章
政术，俱是家传。

别有阴功厚德，向东州、治狱平反。玉
函高篆，仙风道骨，锡与长年。最好素秋新
霁，对画堂、高启宾筵。何妨纵乐笙歌，剩
举觥船。

永遇乐

龙阁先芬，凤毛荣继，当世英妙。峻岳
储灵，长庚应梦，还庆佳辰到。黄花浥露，
碧瓦凝霜，香馥郡斋清晓。忆当年、青云平
步，共喜骤跻华要。

阴功厚德，玉符金篆，锡与世间难老。
注意方浓，分符屡请，雅志人应少。棠阴无
讼，乐府新教，正好醉山频倒。有谁莱衣游
戏。萱堂寿考。

满江红

五两风轻，移舟向、斜阳岛外。最好是、潇湘烟景，自然心会。倒影芙蓉明镜底，更折花嗅蕊西风里。待问君、明日向何州，东南指。

人生事，谁如意。剩拚取，尊前醉。想升沈有命，去来非己。菊老松深三径在，田园已有归来计。问甚时、重此望归舟，远相对。

春晴

燕子来时，清明过了，桃花乱飘红雨。倦客凄凉，千里云山将暮。泪眸回望，人在玉楼深处。向此多应念远，凭栏无语。

芳菲可惜轻负。空鞭弄游丝，帽冲飞絮。恨满东风，谁识此时情绪。数声啼鸟，劝我不如归去。纵写香笺，仗谁寄与。

河满子

满浦亭前杨柳，一年三度攀条。瞬息光阴都几许，离情常是迢迢。须信沈腰易瘦，争教潘鬓相饶。

不忍重寻香径，还来独立溪桥。唯有无情东去水，来时曾傍兰桡。今夜欲求好梦，望中莫遣魂消。

醉桃源

又是青春将暮。望极桃溪归路。洞户悄无人，空锁一庭红雨。凝伫。凝佇。人面不知何处。

一丛花

谪仙海上驾鲸鱼。谈笑下蓬壶。神寒骨重真男子，是我家、千里龙驹。经纶器业，文章光焰，流辈更谁如。

渊明元与世情疏。松菊爱吾庐。他年定契非熊卜。也未应、鹤发樵渔。手栽露桃，亲移云杏，真是种星榆。

感皇恩

蜀锦满林花，三年重到。应被花枝笑人老。半开微谢，占得几多时好。便须拚痛饮、花前倒。

醉中但记，红围绿绕。人面花光斗相照。繚墙重院，爱惜遮藏须早。免如攀折柳，临官道。

御街行

柳条弄色梅飘粉。还是元宵近。小楼深巷月胧明，记得恁时风景。庭花影转，珠帘

人静，依旧厌厌闷。

如今对酒翻成恨。春瘦罗衣褪。王孙何处草萋萋，辜负小欢幽兴。谁知此际，有人灯下，偷把归期问。

踏莎行

萱草栏干，榴花庭院。悄人无语重帘卷。屏山掩梦不多时，斜风雨细江南岸。

昼漏初传，林莺百啭。日长暗记残香篆。洞房消息有谁知，几回欲问梁间燕。

又

柳暗重门，花深小院。盆池昨夜新荷卷。银床斜倚小屏风，吴波澄淡春山远。

纨扇风轻，薰炉烟断。日高睡起眉山浅。尘侵鸾镜懒匀妆，谁人与整钗头燕。

又

衰柳残荷，长山远水。扁舟荡漾烟波里。离杯莫厌百分斟，船头转便三千里。

红日初斜，西风渐起。琵琶休洒青衫泪。区区游宦亦何为，林泉早作归来计。

蝶恋花

潋潋长波迎鹢首。雨淡烟轻，过了清明候。岸草汀花浑似旧。行人只是添清瘦。

沈水香消罗袂透。双橹声中。午梦初惊后。枕上懵腾犹病酒。卷帘数尽长堤柳。

又

骨秀肌香冰雪莹。潇洒风标，赋得温柔性。松髻遗钿慵不整。花时长是厌厌病。

枕上晓来残酒醒。一带屏山，千里江南景。指点烟村横小艇。何时携手重寻胜。

定风波

花倚东风柳弄春。分明浅笑与轻颦。更忆当时声细细，偎人。秦筝轻衬砑罗裙。

别后此欢谁更共。春梦。只凭胡蝶伴飞魂。独倚高楼还日暮。情绪。浮烟漠漠雨昏昏。

江城子

幽香闲艳露华浓。晚妆慵。略匀红。春困厌厌，常爱鬓云松。早是自来莲步小，新样子。为谁弓。

画堂西下小栏东。醉醒中。苦匆匆。卷上珠帘，依旧半床空。香炷满炉人未寝，花弄月，竹摇风。

又

石榴双叶忆同寻。卜郎心。向谁深。长恁娇痴，尤殢怎生禁。内样双眉新画得，还印了，在罗襟。

相思幽怨付鸣琴。望来音。久沈沈。若论当初，谁信有如今。瘦尽标容羞见也，明

镜子，任尘侵。

临江仙

今夜征帆何处落，烟村几点人家。莫惊双泪向风斜。渔人西塞曲，商女后庭花。

从此五湖归去好，一杯酒送生涯。多情犹解惜年华。春闺重见处，霜鬓不须嗟。

西江月

去路湘桃破萼，归时乳燕巢梁。不成一事又还乡。也是经春游荡。

香烬重燃鸂鶒，罗衾再拂鸳鸯。今宵应解话愁肠。指点尘生绣帐。

又

洛浦神仙流品，姑山冰雪肌肤。谁家池馆雨晴初。肠断风标白鹭。

国艳枉教无语，玉颜不待施朱。采菱人散夜蟾孤。冷落西溪风露。

诉衷情

红窗小艇雨馀天。李郭未神仙。片时[篷]底幽梦，即是五湖船。

追往事，惜流年。恨风烟。向人依旧，两行垂杨，一片新蝉。

又

吴宫绝艳楚宫腰。怯挂紫檀槽。纤纤玉

笋轻捻，莺语弄春娇。

松钿带，弹金翘。暗香飘。红牙拍碎，
绛蜡烧残，月淡天高。

又

金盆水冷又重煨。不肯傍妆台。从教髻
鬟松慢，斜弹卷云钗。

莲步稳，黛眉开。后园回。手掣柳带，
鬟插梅梢，探得春来。

清平乐

朦胧月午。点滴梨花雨。青翼欺人多谩
语。消息知他真否。

兽炉鸳被重熏。故将灯火挑昏。最恨细
风摇幕，误人几度迎门。

又

深沈玉宇。枕簟清无暑。睡起花阴初转
午。一霎飞云过雨。

雨馀隐隐残雷。夕阳却照庭槐。莫把绣
帘垂下，妨它双燕归来。

又

琐窗朱户。曾是娇眠处。只有馀香留得
住。满地花钿翠羽。

三年宋玉东邻。断肠月夕烟春。看取画
屏深处，题诗欲付何人。

又

清樽泛菊。共剪西窗烛。一抹朱弦新按

曲。更遣歌喉细逐。

明朝匹马西风。黄云衰草重重。试问剑歌悲壮，何如玉指轻拢。

浣溪沙

误入仙家小洞来。碧桃花落乱浮杯。满身罗绮裛香煤。

醉倒任眠深迳里，醒时须插满头归。更收馀蕊酿新醅。

又

紫蔓凝阴绿四垂。暗香撩乱扑罗衣。醉眠惟有落花知。

玉笋纤纤初嗅罢，乌云娜娜乱簪时。此般风韵雅相宜。

又

阆苑瑶台指旧居。当年一念别仙都。庆门曾梦得明珠。

赋畀已教尘累浅，修持更与俗缘疏。慧心从此悟真如。

又

似火山榴映翠娥。依依香汗浥轻罗。恼人无奈是横波。

金凿落倾欢事少，玉搔头袅闷时多。不留人住意如何。

又

一见郎来双眼明。春风楼上玉箫声。谁

信同心双结子、苦难成。

瑶佩空传张好好，钿筝谁继薛琼琼。若是今生无此分、有来生。

又

清润风光雨后天。蔷薇花谢绿窗前。碧琉璃瓦欲生烟。

十里闲情凭蝶梦，一春幽怨付鲲弦。小楼今夜月重圆。

又

昼漏迟迟出建章。惊回残梦日犹长。风微歌吹度昭阳。

沈水烧残金鸭冷，胭脂匀罢紫绵香。一枝花影上东廊。

又

湘簟纱厨午睡醒。起来庭院雨初晴。夕阳偏向柳梢明。

懒炷薰炉沈水冷，罢摇纨扇晚凉生。莫将闲事恼卿卿。

菩萨蛮

薄衾小枕重门闭。孤灯照著人无寐。风雨夜来多。春寒可奈何。

深闺香暖处。还解怜人否。只道不来归。那知心似飞。

又

午阴未转晴窗暖。无风著地杨花满。睡

起日犹长。卷帘红杏香。

春心无处定。又作花时病。芳草伴离愁。
绵绵早晚休。

又

百花未报芳菲信。一枝探得春风近。只有雪争光。更无花似香。

孤标天赋与。冷艳谁能顾。庭院好深藏。
莫教开路傍。

又 回纹

卷帘风入双双燕。燕双双入风帘卷。明月晓啼莺。莺啼晓月明。

断肠空望远。远望空肠断。楼上几多愁。
愁多几上楼。

又

远山眉映横波脸。脸波横映眉山远。云鬓插花新。新花插鬓云。

断魂离思远。远思离魂断。门掩未黄昏。
昏黄未掩门。

一落索

正向溪堂欢笑。忽惊传新诏。马蹄准拟乐郊行，又却近、长安道。

鹳鹊楼边初到。未花残莺老。崔徽歌舞有馀风，应忘了、东平好。

虞美人

木兰舟稳桃花浪。重到清溪上。刘郎惆怅武陵迷。无限落英飞絮、水东西。

玉觞潋滟谁相送。一觉扬州梦。不知何物最多情。惟有南山不改、旧时青。

又

短亭过尽长亭到。未忍过征棹。天涯自是别离身。更折一枝杨柳、赠行人。

淮阴堤上残阳里，暮草连空翠。一樽别酒苦匆匆。还似陇头流水、各西东。

一斛珠

伤春怀抱。清明过后莺声老。劝君莫向愁人道。又被香轮，碾破青青草。

夜来风雨连清晓。秋千院落无人到。梦回酒醒愁多少。犹赖春寒，未放花开了。

少年游

建溪灵草已先尝。欢意尚难忘。未放笙歌，暂留簪佩，犹有紫芝汤。

醉中纤手殷勤捧，欲去断人肠。绛蜡迎归，绣鞍扶下，笑语尽闻香。

鹊桥仙

多情应解，留连春意，满地紫花惹絮。
王孙何在不归来，又遍满、闲门要路。

咸阳原上，姑苏台下，肠断绿波南浦。
迢迢归思碧连云，解送我、春山尽处。

点绛唇

洞户深沈，起来闲绕回廊转。凤箫声远。
小院杨花满。

旧曲重寻，移遍秦筝雁。芳心乱。栏干
凭暖。目向天涯断。

鹧鸪天

并蒂芙蓉本自双。晓来波上斗新妆。朱
匀檀口都无语，酒入圆腮各是香。

辞汉曲，别高唐。芳心应解妒鸳鸯。不
封虢国并秦国，应嫁刘郎与阮郎。

又

红紫飘零绿满城。春风于此独留情。谁
将十幅吴绫被，扑向熏笼一夜明。

风不定，雨初晴。晓来苔上拾残英。连
教贮向鸳鸯枕，犹有馀香入梦清。

武陵春

湖上风光寒食近，准拟醉花枝。不忍东风烂熳时。红泪湿胭脂。

情知今后游从少，鸾镜懒重窥。金凤衔花旧绣衣。憔悴舞腰肢。

苏幕遮

碧桃花，春婉婉。未断尘缘，暂别瑶池宴。谪限迢迢应未满。乘月骖鸾，曾有深深愿。

帝城赊，凤楼远。长寿杯深，此际谁人劝。闷倚屏山凝泪眼。百和烟中，细想千娇面。

朝中措

短亭杨柳接长亭。攀折赠君行。莫怪尊前无语，大都分外多情。

何须苦计，时间利禄，身后功名。且尽十分芳酒，共倾一梦浮生。

丑奴儿

小庭数朵寒梅放，雪缀霜棱。装点香英。玉软琼娇两未胜。

佳人皓腕争攀取，插向壶冰。素色相乘。

不羨高花万万层。

又

来朝匹马萧萧去，且醉芳卮。明夜天涯。
浅酌低吟欲殢谁。

归来应过重阳也，菊有残枝。纤手重携。
未必秋香一夜衰。

惜双双

天上星杓春又到。应律管、微阳已报。
暖信惊梅早。昨夜南枝，先得芳菲耗。

迟日曛胧光破晓。馥绣幄、麝炉烟袅。
为寿金壶倒。四坐簪纓，共比松筠老。

脱银袍

纤条绿沁。春色为伊难禁。传芳意、东
君信任。燕愁莺懒，怕轻寒犹噤。护占得、
幽香转甚。

粉面初匀，冰肌未饮。何须爱、妖桃胜
锦。夜阑人静，任月华来浸。待抱著、花枝
醉寝。

行香子

别恨绵绵。屈指三年。再相逢、情分依
然。君初霜鬓，我已华颠。况其间有，多少
恨，不堪言。

小庭幽槛，菊蕊阑斑。近清宵、月已婵

娟。莫思身外，且斗樽前。愿花长好，人长健，月长圆。

小重山

朱户深深小洞房。曲屏龟甲样，画潇湘。纱轻蓝嫩镂牙床。人如玉，一见已心凉。

午枕梦悠扬。流莺声唤觉，日犹长。几回烟断玉炉香。庭花影，不肯上东廊。

雨霖铃

槐阴添绿。雨馀花落，酒病相续。闲寻双杏凝伫，池塘暖、鸳鸯浴。却向窗昼卧，正春睡难足。叹好梦、一一无凭，帐掩金花坐凝目。

当时共赏移红烛。向花间、小饮杯盘促。蔷薇花下曾记，双凤带、索题诗曲。别后厌厌，应是香肌，瘦减罗幅。问燕子、不肯传情，甚入华堂宿。

玉叶重黄

玉纤初捻梅花蕊。早忆著、上元天气。重寻旧曲声韵，收拾放灯欢计。

况人生、百岁能几。任东风、笑我双鬓里。重来花下醉也，不减旧时风味。

金蕉叶

楼头已报冬冬鼓。华堂渐、停杯投箸。
更闻急管频催，凤口香销炷。花映玉山倾处。
主人无计留宾住。溪泉泛、越瓯春乳。
醉魂一啜都醒，绛蜡迎归去。更看后房歌舞。

南歌子

月到中秋夜，还胜别夜圆。高河瑟瑟转金盘，
三十六宫深处、卷帘看。
香雾云鬟湿，清辉玉臂寒。寻常岂是不婵娟，
吟赏莫辞终夕、动经年。

鹧鸪天

晏叔原近作鹧鸪天曲，歌咏太平，辄拟之为十篇。
野人久去辇毂，不得目睹盛事，姑诵所闻万一而已

霜压天街不动尘。千官环佩贺成禋。三竿阊阖楼边日，
五色蓬莱顶上云。

随步辇，卷香裯。六宫红粉倍添春。乐章近与中声合，
一片仙韶特地新。

又

数骑飞尘入凤城。朔方诸部奏河清。圉扉木索频年静，
大晟箫韶九奏成。

流协气，溢欢声。更将何事卜升平。天颜不禁都人看，
许近黄金辇路行。

又

阆苑瑶台路暗通。皇州佳气正葱葱。半天楼殿朦胧月，午夜笙歌淡荡风。

车流水，马游龙。万家行乐醉醒中。何须更待元宵到，夜夜莲灯十里红。

又

洛水西来泛绿波。北瞻丹阙正嵯峨。先皇秘聿无人解，圣子神孙果众多。

民物阜，岁时和。帝居不用壮山河。卜年卜世过周室，亿万斯年入咏歌。

又

壁水溶溶漾碧漪。桥门清晓驻鸾旗。三千儒服鸳兼鹭，十万犀兵虎与貔。

春服就，舞雩归。四方争颂育莪诗。熙丰教养今成效，已见夔龙集凤池。

又

八彩眉开喜色新。边陲来奏捷书频。百蛮洞穴皆王土，万里戎羌尽汉臣。

丹转毂，锦拖绅。充庭列贡集珠珍。宫花御柳年年好，万岁声中过一春。

又

圣泽昭天下漏泉。君王慈孝自天然。四民有养跻仁寿，九族咸亲迈古先。

歌舜日，咏尧年。竞翻玉管播朱弦。须知大观崇宁事，不愧生民下武篇。

又

日日仙韶度曲新。万机多暇宴游频。歌

余兰麝生纨扇，舞罢珠玑落绣茵。

金屋暖，[璧]台春。意中情态掌中身。
近来谁解辞同辇，似说昭阳第一人。

又

万国梯航贺太平。天人协赞甚分明。两
阶羽舞三苗格，九鼎神金一铸成。

仙鹤唳，玉芝生。包茅三脊已充庭。翠
华脉脉东封事，日观云深万仞青。

又

金碧觚棱斗极边。集英深殿听胪传。齐
开雉扇双分影，不动金炉一喷烟。

红锦地，碧罗天。升平楼上语喧喧。依
稀曾听钧天奏，耳冷人间四十年。

并蒂芙蓉

太液波澄，向鉴中照影，芙蓉同蒂。千
柄绿荷深，并丹脸争媚。天心眷临圣日，殿
宇分明敞嘉瑞。弄香嗅蕊。愿君王，寿与南
山齐比。

池边屡回翠辇，拥群仙醉赏，凭栏凝思。
萼绿揽飞琼，共波上游戏。西风又看露下，
更结双双新莲子。斗妆竞美。问鸳鸯、向谁
留意。

寿星明

露湿晴花，散红香清影，建章宫殿。玉

宇风来，银河云敛，天外老人星现。向晓千官入，称庆山呼鳌抃。凤髓香飘，龙墀翡翠，帘栊高卷。

朝罢仪卫再整，肃鸣鞘，又向瑶池高宴。海宇承平，君臣相悦，乐奏徵招初遍。治极将何报，检玉泥金封禅。见说山中居民，待看雕辇。

黄河清

晴景初升风细细。云收天淡如洗。望外凤凰双阙，葱葱佳气。朝罢香烟满袖，近臣报、天颜有喜。夜来连得封章，奏大河、彻底清泚。

君王寿与天齐，馨香动上穹，频降嘉瑞。大晟奏功，六乐初调清徵。合殿春风乍转，万花覆、千官尽醉。内家传敕，重开宴、未央宫里。

舜韶新

晨光射牖，新燕子、一一穿帘飞去。露晞鸳瓦，萧瑟风生琼宇。香篆烟消昼永，锁深院、榴花半吐。映绛绡、冰雪肌肤，自是清凉无暑。

浮荣何用萦怀，冷笑看、车马喧喧尘土。地偏心远，终日何妨扃户。一枕江南好梦，泛孤棹、轻烟细雨。被数声、幽鸟惊回，砌下槐阴亭午。

上林春

相识来来，真个为伊，尽把精神役破。
谿殢性□，娇痴做处，双眉镇长愁锁。为伊
恁地，便诸事、自来饶过。暂时间未觑得，
又早孜煎无那。

想从来、性气恁么。那堪更等闲，经时
抛掷。料得那里、千倖万傜，嗔我也思量我。
再归见了，算应是、絮得些个。但初心、尚
未改，任从摧挫。

雨中花

小小中庭，深深洞户，谁人笑里相迎。
有三年窥宋，一顾倾城。舞态方浓，箫声未
阕，又黯离情。怎奈向，赢得多情怀抱，薄
幸声名。

良宵记得，醉中携手，画楼月皎风清。
难忘处、凭肩私语，和泪深盟。假使钗分金
股，休论井引银瓶。但知记取，此心常在，
好事须成。

醉蓬莱

向重门深闭，永夜孤眠，梦魂飞过。梦
里分明，共玉人双卧。粉淡香浓，翠深红浅，
是那回梳裹。楚雨难成，巫云易散，依前惊
破。

无绪无聊，向谁分诉，独语独言，自家
[摧]挫。梦也多磨，更那堪真个。暗数残
更，半敲孤枕，对夜深灯火。怨泪频弹，愁
肠屡断，伊还知么。

吴音子

细想当初事，又非是、取次相知。一年
来、觑著尚迟。疑□时、敢共些儿。似恁秤
停期克了，便一成望不相离。却何期、恩情
陡变，中路分飞。

都缘我自心肠软，润就得、转转娇痴。

如今未中再偎随。选不甚，且从待他疏
狂心性，足变堆垛，更吃禁持管取你回心，
却有投奔人时。

洞仙歌

眼来眼去，未肯分明道。有意于人甚不
早。谩教我、心下终日悬悬，星□事，知他
何时是了。

几回猜伊意，也是难为，拟待偷怜又胆
小。奈何我已狂迷，怎肯乾休，情深后、不
免求告。但只教、时时得些儿，便拚了一生，
为伊烦恼。

安公子

渐渐东风暖。杏梢梅萼红深浅。正好花

前携素手，却云飞雨散。是即是、从来好事多磨难。就中我与你才相见。便世间烦恼，受了千千万万。

回首空肠断。甚时与你同欢宴。但得人心长在了，管天须开眼。又只恐、日疏日远衷肠变。便忘了、当本深深愿。待寄封书去，更与丁宁一遍。

河满子

草草时间欢笑，厌厌别后情怀。留下一场烦恼去，今回不比前回。幸自一成休也，阿谁教你重来。

眠梦何曾安稳，身心没处安排。今世因缘如未断，终期他日重谐。但愿人心长在，到头天眼须开。

踏莎行

骂女嗔男，呼奴喝爪。新来司户多心躁。家中幸自好熙熙，眉儿皱著乾烦恼。

饱喜饥嗔，多愁早老。古人言语分明道。剩须将息少孜煎，人生万事何时了。

临江仙

火冷灯□山驿静，无人与暖香衾。阿谁教你惜人深。一成迷后，不望有如今。

枕畔耳边都悄悄，忆伊模样声音。些儿

年纪正难禁。盟言虽在，只恐我痴心。

清平乐

娇羞未惯。长是低花面。笑里爱将红袖掩。遮却双双笑靥。

早来帘下逢伊。怪生频整衫儿。元是那回欢会，齿痕犹在凝脂。

一落索

道著明朝分袂。早眉头攒翠。不言不语只偎人，满眼里、汪汪地。

向道不须如此。转吞声饮气。一团儿肌骨不禁春，甚有得、许多泪。

一斛珠

相思最苦。别来有甚好情绪。夜间无限恹惶处。睡不著时，没个人言语。

所恨不能飞上路。书书只怪迟归去。外边闲事无心觑。直自我咱，怕你恶肠肚。

少年游

眼来眼去又无言。教我怎生团。又不分明，许人一句，纵未也心安。

是即自古常言道，色须是艰难。愿早得来，虽然容易，管不等闲看。

鹊桥仙

从来因被，薄情相误，误得人来已怕。
那回时、有愿不昏沈，甚近日、依前又也。

你莫捱就，偎随人便，却骑墙两下。自
家懣、都望有前程，背地里、莫教人咒骂。

点绛唇

我也从来，唤做真个收拾定。据伊情性。
怎到如今恁。

捱就百般，终是心肠狠。应难更。是我
薄命。不怨奴薄幸。

卜算子

恩义重如山，情意深如海。假使黄金北
斗高，这一分、何由买。

领家看取彩。莫要胡厮赖。堂印傍边更
碧油，但管取、无人赛。

柳初新

些儿柄靶天来大。闷损也、还知么。共
伊合下、深盟厚约，比望收因结果。这好事、
难成易破。到如今、彼此无那。

终日行行坐坐。未曾识、展眉则个。若
还不是、前生注定，甚得许多摧挫。去你行、

有甚罪过。送一场、烦恼与我。

步蟾宫

昨宵争个甚闲事。又不道、被谁调戏。
任孜孜、求告不回头，谩满眼、汪汪地泪。

奴哥一向不赌是。算谁敢、共他争气。
且偎随、须有喜欢时，待款款、说些道理。

千秋岁

飞云骤雨。草草成睽阻。寸肠结尽千千
缕。别离谁是没，惟我于中苦。最苦是，看
奴未足抛奴去。

一句临歧语。忍泪奴听取。身可舍，情
难负。纵非瓶断绠，也是钗分股。再见了，
知他似得如今否。

殢人娇

旋剔银灯，高褰斗帐。孜孜地、看伊模
样。端相一饷，揉搓一饷。不会得、知他甚
家娘养。

不见些儿，行思坐想。分飞后、怎生□
向。天天若许，长长偎傍。顶戴著、一生也
即不枉。

遍地花

密约幽欢试思忖。教人又、怎生安稳。

算都来、些子精神，诮烦恼、看看瘦损。

也拟待、罗织伊家，图开解、较些可闷。
把从前、已往寻思，又无可、教人得恨。

梁州令

各自寻思取。更莫冤他人做。如今划地
怕相逢，愁多正在相逢处。

人前不敢分明语。暗里频回顾。罗襟滴
泪无数。匆匆又是空归去。

滴滴金

庞儿周正心儿得。眼儿单、鼻儿直。口
儿香、发儿黑。脚儿一折。

从来薄命多阻隔。未曾有恁相识。除非
烧香做功德。且图消得。

失调名

花前月下堪垂泪，水边楼上总关心。

蓦山溪

风流心胆，直把春偿酒。选得一枝花，
绮罗中、算来未有。名园翠苑，风月最佳时，
夜迢迢，车款款，是处曾携手。

重来一梦，池馆皆依旧。幽恨写新诗，

全宋词 晁端礼

托何人、章台问柳。渔舟归后，云锁武陵溪，
水潺潺，花片片，舣棹空回首。

晁公武

鹧鸪天

笑擘黄柑酒半醒。玉壶金斗夜生冰。开
窗尽见千山雪 ,雪未消时月正明。

兰烬短 ,麝煤轻。画楼钟鼓已三更。倚栏
谁唱清真曲 ,人与梅花一样清。

陈 璧

踏莎行

江阔天低，楼高思迥。春烟蘸淡如秋景。
今年芳草去年愁，分明又报明年信。

燕子还来，归期未定。可堪醉梦红尘境。
世间万事尽消磨，水流不尽青山影。

陈 草 阁

沁园春

霜剥枯崖，何处邮亭，玉龙夜呼。唤经年幽梦，悠然独觉，参横璇汉，漏彻铜壶。漠漠风烟，昏昏水月，醉耸诗肩骑瘦驴。孤吟处，更寻香吊影，搔首踟蹰。

古心落落如予。悄独立高寒凌万夫。对荒烟野草，浅溪沙路，班荆三嗅，此意谁如。高卧南阳，归来彭泽，借问风光还似无。难穷处，待凭将妙手，作岁寒图。

陈 策

摸鱼儿 仲宣楼赋

倚危梯、酹春怀古，轻寒才转花信。江城望极多愁思，前事恼人方寸。湖海兴。算合付元龙，举白浇谈吻。凭高试问。问旧日王郎，依刘有地，何事赋幽愤。

沙头路，休记家山远近。宾鸿一去无信。沧波渺渺空归梦，门外北风凄紧。乌帽整。便做得功名，难绿星星鬓。敲吟未稳。又白鹭飞来，垂杨自舞，谁与寄离恨。

满江红 杨花

倦绣人闲，恨春去、浅颦轻掠。章台路，雪黏飞燕，带芹穿幕。委地身如游子倦，随风命似佳人薄。叹此花、飞后更无花，情怀恶。

心下事，谁堪托。怜老大，伤飘泊。把前回离恨，暗中描摸。又趁扁舟低欲去，可怜世事今非昨。看等闲、飞过女墙来，秋千索。

陈 成 之

小重山

恨入眉尖熨不开。日高犹未肯，傍妆台。
玉郎嘶骑不归来。梁间燕，犹自及时回。

粉泪污香腮。纤腰成瘦损，有人猜。一
春那识下香阶。春又去，花落满苍苔。

陈从古

蝶恋花

日借轻黄珠缀露。困倚东风,无限娇春处。看尽天红浑谩语。淡妆偏称泥金缕。
不共铅华争胜负。殿后开时,故欲寻春去。去似朝霞无定所。那堪更著催花雨。

陈 达 叟

更漏子

妾倚门，君上马。残月晓星犹挂。眉黛敛，泪珠凝。别离多少情。

翠翘横，云鬓乱。复入绮衾犹暖。人独自，枕成双。争教不断肠。

菩萨蛮

举头忽见衡阳雁。千声万字情何限。叵耐薄情夫。一行书也无。

泣归香阁恨。和泪掩红粉。待雁却回时。也无书寄伊。

陈德武

水龙吟 西湖怀古

东南第一名州 ,西湖自古多佳丽。临堤台榭 ,画船楼阁 ,游人歌吹。十里荷花 ,三秋桂子 ,四山晴翠。使百年南渡 ,一时豪杰 ,都忘却、平生志。

可惜天旋时异。藉何人、雪当年耻。登临形胜 ,感伤今古 ,发挥英气。力士推山 ,天吴移水 ,作农桑地。借钱塘潮汐 ,为君洗尽 ,岳将军泪。

西江月 漳州丹霞驿

山拱罗城四面 ,柳营横接江东。十年前事影随风。今日宛如春梦。

天下几多邮驿 ,人生到处飘蓬。丹霞楼上再相逢。横笛为君三弄。

望海潮 钱塘怀古

瓠山西峙 ,浙江东逝 ,谁馀一箭临冲。凤舞龙飞 ,地灵人杰 ,当年树此勋庸。强弩万夫

雄。今冯夷退舍 ,海若潜锋。拥石成堤 ,百川
约束障西东。

至今人物蕃丰。仰功扬山立 ,德润川容。
乐极西湖 ,愁多南渡 ,他都是梦魂空。感古恨
无穷。叹表忠无观 ,古墓谁封。棹舣钱塘 ,浊
醪和泪洒秋风。

水龙吟

十月二十三日阻雨 ,住长乐兴宁驿馆舍 ,寂甚。
偶见窗外桃花数朵 ,遂成此调以寓意焉

驿楼岁暮萧条 ,小桃何事迎人笑。无言如
诉 ,命睽王母 ,信沈青鸟。靛瘦繁霜 ,脂销零
雨 ,梦寒清晓。自刘郎去后 ,天台路隔 ,知孤
负、春多少。

今日玉骢来到。喜相逢、菱花孤照。清幽
谁伴 ,黄花告谢 ,芙蓉云老。早趁东风 ,移根换
叶 ,脱身池沼。卜佳期 ,前度琴心一曲 ,作相思
调。

沁园春 舟中夜雨

冬夜如年 ,客枕无眠 ,怎到天明。待数残
二十五、寒更点 ,听余一百八、晓钟声。两脚敲
篷 ,滩头激缆 ,总与离人诉不平。遍闻得 ,我浚
深恨海 ,砌起愁城。

问君何事牵萦。想最苦人间是别情。念
千山万水 ,沈鱼阻雁 ,一身两地 ,炒燕煎莺。绣
枕痕多 ,锦衾香冷 ,意有巫山梦不成。怎撇下 ,
这两字相思 ,万里虚名。

西江月 冬至

时序去如流矢 ,人生宛似飞蓬。石湾江上
又逢冬。且喜一阳初动。

但见堪舆杳杳 ,更连山水重重。凄凉云物
雨濛濛。惟足睡中归梦。

望海潮 拱日亭

山涯海角 ,天高地厚 ,长安举首何妨。万
水朝宗 ,众星环极 ,平生此志无忘。亭上一翱
翔。见烟收雾敛 ,凤翥龙骧 ,海色沧凉 ,金乌拍
翅上扶桑。

遥瞻咫尺清光。物无遐不烛 ,有隐皆彰。
发藟心劳 ,之官路远 ,篙师又促归航。不敢久
徜徉。抱梧桐绮实 ,葵藿心肠。假我双翰 ,一
朝飞上五云乡。

木兰花慢 寄桂林通判叶夷仲

自淮阳别后 ,一回首、又穷年。叹蓬逐旋
飙 ,叶随流水 ,星散维垣。南来忽闻归兴 ,岂苍
天、故意要储贤。云慢凌司马赋 ,风偏动季鹰
船。

梅窗夜月见修妍。骏轡忆连钱 ,命画桨溪
流 ,篮舆山郭 ,囊锦诗篇。休辞岁寒远道 ,对松
篁、莫慰寂寥边。尘榻谁为我下 ,酒杯惟待君
传。

又 再用前韵

对江云日暮 ,又那更、夜如年。见霜满晴空 ,山衔星斗 ,月挂城垣。知心故人间阻 ,几何时、尊酒会多贤。冷落巴山夜雨 ,凄凉剡水寒船。

麝容羞睹镜中妍。远水与天连。怪梦有余甜 ,酒无好味 ,诗不成篇。刀圭解生毛羽 ,向晨风、飞傍彩云边。报道东君到也 ,一枝春信先传。

又 三用前韵

一春看又尽 ,问何日、是归年。望五岭重关 ,九疑叠翠 ,满目藩垣。苍梧几时舫棹 ,许论文、高议仰英贤。夜立残花影月 ,朝盼尽柳阴船。

天台山水世间妍。天姥赤城连。好收拾兰庄 ,白云深处 ,咏卜居篇。重寻旧游莺燕 ,恐无心、待雁夕阳边。声迹今犹密迩 ,鸾笺莫厌频传。

望海潮 清明咏怀

三分春色 ,十分官事 ,令人孤负芳菲。歌燕簧莺 ,语化舞柳 ,园林好处谁知。还忆旧游时。对海棠驻马 ,红药题诗。一别东君 ,回顾又是隔年期。

相思远在天涯。镇海填恨臆 ,山锁愁眉。杜宇能言 ,鹧鸪有泪 ,慢劳蝴蝶于飞。景与少年宜。把榆分新火 ,香透罗衣。风月常存 ,双鱼报道早来归。

百字谣 咏惜花春起早

惜花心事 ,不由人、蝴蝶梦魂先觉。刚纳
绣鞋行掠鬓 ,仰见斗横林杪。昨日深红 ,今朝
轻白 ,颜色殊昏晓。此中滋味 ,料他尘世知少。

问二十四番风 ,寒梅并绛栋 ,始终俱好。
须看未开开又谢 ,多少落英颠倒。彩缀隋园 ,
鹿游唐苑 ,哀乐无凭祷。此音谁寄 ,凭阑犹把
琴袍。

又 咏爱月夜眠迟

古今明月 ,魄生明后 ,积渐圆还缺。秋解
伤神春最好 ,衾枕几番铺设。十二瑶台 ,千金
一刻 ,横竹休吹彻。绣帘高揭 ,戒他莫把灯爇。

夜久谁共婵娟 ,掩孤帟睡去 ,此情尤切。
梦驾彩鸾何处觅 ,飞上玉楼琼阙。舞按霓裳 ,
歌扬红豆 ,高处风光别。鸟声惊觉 ,冲冠怒竖
吾发。

又 咏掬水月在手

晚临湘浦 ,忆鲛人、曾许泪珠绡帕。盥掬
空明和月待 ,宫镇水晶深夜。跃璧初圆 ,浮金
不定 ,敌眼寒光射。水心龙镜 ,喜来翻不成把。
最恨对面姮娥 ,舞霓裳掌上。

又 咏弄花香满衣 词全阙

望海潮二调 寄别浔郡鲁教谕子振、李训道宗深

南冠一载 ,西流万里 ,离怀孰不伤情。富

贵邯郸 ,雨云巫峡 ,回头一梦空惊。谁辱又谁荣。问当时道德 ,今日功名。楚水吴山 ,向来多少送和迎。

长安古道长亭。叹马蹄不驻 ,车辙难停。薇老首阳 ,芝深商谷 ,时遥雾拥云平。此意已羞评。但金緌白雪 ,锦佩青萍。采竹昆仑 ,有时吹作凤凰鸣。

又

祖觞东馆 ,称舟南渡 ,江天云树离离。盘谷渔樵 ,舞雩风咏 ,渴心常望云霓。知与故人齐。念翼残犹铍 ,足蹶还羈。百折江流 ,峡猿水鸟助孤凄。

几回梦绕山西。耐疏篷夜雨 ,惊枕晨鸡。对无声诗 ,哦有声画 ,仪形已见端倪。回首暮云迷。又桐飞金井 ,燕落乌衣。有意相思 ,双鳞乘羽莫教迟。

西江月 题洞箫亭

凤舞汉阳月丽 ,龙吟汉水波飞。行云何事驻天涯。横玉危阑四倚。

问岳阳三度后 ,看尘世几番棋。鹤群何处未归来 ,冷落吴头楚尾。

又 咏雪三调

为问云间滕六 ,天工何事依违。冬前三白不时为。今日驾言春瑞。

瘦损穷彭泽柳 ,禁持杀傅岩梅。仁风反掌霁天威。都做一江流水。

又

疏散履穿东郭 ,流离马没蓝关。瓜洲谁问卧袁安。孤负新年月半。

铁瓮成银瓮出 ,金山做玉山看。无知儿女不知寒。冰箸掌中争看。

又

压雪江山亦老 ,迎春草木俱新。雪销春去逐飞轮。谁识静中机运。

浊浊坝头泥土 ,攘攘市上风尘。为何不住往来人。都被利名淘尽。

又 咏云

有信江头春色 ,无凭天上浮云。白衣苍狗又何频。岂是随风情性。

法受三千谪路 ,翻成万里思亲。瓜洲中道不逢人。谁寄江南春信。

归朝欢 送前王通判惟善赴召

昨夜城头望牛斗。金气横空作龙吼。朝天尺一鹤飞书 ,尊前夺我龙头友。风流江左后。青毡旧物曾坚守。念侨居、淮阳九载 ,闲却丝纶手。

花骢欲系无长柳。玉箸频挥翻短袖。凤凰台近月重圆 ,紫薇花暖香依旧。功名随分有。论交要在知心友。唱阳关、一杯别酒 ,先祝斯文寿。

望海潮 和韵寄别叶睢宁

陵山载酒 ,泗河扬柁 ,尊前折尽将离。才试牛刀 ,俄惊鳧舄 ,令人去后多思。休唱别离词。看玉函星铁 ,骑佩铜丝。丹凤鸣阳 ,碧梧栖尔最高枝。

等闲展对声词。对一庭明月 ,千里邦畿。西涧家声 ,玉堂人物 ,夜窗梦果心期。才思浩无涯。若深航濂洛 ,峻驾峨眉。胸抱相思 ,银箏锦字莫教迟。

沁园春 送春

飞雨一番 ,杜宇数声 ,东君又回。对花垂粉泪 ,舟移洛浦 ,柳眉颦黛 ,马走章台。南架海棠 ,北窗红药 ,都是当年手自栽。伤离别 ,想今朝去也 ,明日重来。

轩车且莫相催。待细把衷肠诉此怀。这画阑六曲 ,懒和月倚 ,朱帘十二 ,不与风开。青杏园林 ,朱樱酪酒 ,争似和羹雪后梅。那时节 ,好都将心事 ,分付多才。

庆春宫 立春

风送深冬 ,雪消残腊 ,天时人事相催。堂北迎萱 ,水东问柳 ,阿谁报道春回。土牛装罢 ,候葭琯、先飞律灰。宜春宝字 ,是处人家 ,罗绮筵开。

三年客里情怀。千里亲闱，一寸灵台。彩燕金钗，青丝生菜，还思纤手安排。韶光是也，可人的、如今再来。介他眉寿，但愿年年，春酒盈杯。

水调歌头

题杨妃夜宴醉归图。上写秦虢二夫人、贵妃抱婴于马上

 天色隐花萼，清夜宴华清。梁州新曲初就，锦瑟按银箏。中坐太真妃子，列坐亲封秦虢，欢笑尽倾城。百斛金尊倒，一醉玉山倾。

 扶上马，东小玉，右双成。绛纱笼烛高照，宫漏已三更。抱得禄儿归去，酒醒三郎何处，忽听鼓鼙惊。可惜马嵬恨，不得寄丹青。

水龙吟 次韵寄别叶尹

 花骢柳外频嘶，使君底事拚人去。圯桥风月，睢陵桃李，几回良遇。我待君来，他催君去，谁留君住。想尊空北海，诗成东阁，这都是、欢娱处。

 宝月才圆又缺，况人生、会难离易。驭风无计，缩地无术，问天无语。枯海为炉，赭山为炭，尽烧愁绪。把一心天地，一家南北，此身堪寄。

醉春风 三月二十七日出禁谪宁夏安置

 推枕床羞下。临鸾眉不画。妒深谁复白

圭瑕。怕怕怕。飞燕班姬 ,昭君延寿 ,孰知淫雅。

背倚茶蘼架。泪满鲛绡帕。白头吟断怨琵琶。罢罢罢。采柏卖珠 ,牵萝补屋 ,顺天生化。

水调歌头 咏惜花春起草

好是三春景 ,都在百花轩。美人眠不成梦 ,早已绣帘掀。分付海棠睡足 ,检点牡丹开未 ,桃李寂无言。叶露联珠络 ,枝月坠金盆。

树铃索 ,高障槛 ,补篱藩。丁宁莺燕蜂蝶 ,上下莫争翻。遥想韶光九十 ,只恐花飞一片 ,瘦减玉颜温。不惮银瓶冷 ,汲井沃芳根。

又 咏爱月夜眠迟

三五嫦娥月 ,夜色正婵娟。自从窃药归去 ,天上几千年。试问广寒高处 ,为甚缺多圆少 ,此理孰为权。弦望知天定 ,离合可人怜。

典宫锦 ,歌水调 ,载楼船。谪仙居士何在 ,月色尚依然。遥想人生百岁 ,三万六千良夜 ,能星几时圆。莫遣金盆落 ,达曙照无眠。

又 咏掬水月在手

莲衬凌波步 ,笋浴影娥东。晚妆脂粉犹腻 ,雪洁弄春溶。恰似玉盘拈指 ,莫是金环脱腕 ,宝镜逐华容。好个明珠颗 ,落在掌窝中。

可人意 ,拿不住 ,握还空。骑鲸便欲深取 ,恐触卧骊龙。奈玉春纤冻也 ,那壁团圆何处 ,有影却无踪。不上广寒殿 ,便入水晶宫。

又 咏弄花香满衣

梦足芙蓉曙 ,步入牡丹丛。试将枝叶枚数 ,宠紫与娇红。如诉如歌体态 ,轻暖轻寒天气 ,春色把人烘。百斛沈檀味 ,两腋麝兰风。

春衫透 ,罗袜沁 ,暗回中。芳心能有多少 ,一点束千重。只恐游丝行露 ,漫惹狂蜂轻蝶 ,珍重惜仪容。兰蕙修芳佩 ,苹藻荐公宫。

惜余春慢 忆海棠

不语佳人 ,多才名友 ,天遣伴吾幽独。令姿潘岳 ,太素何郎 ,争似一丛红玉。谁为织云锦裳 ,天孙巧处 ,暗空机轴。别离间、陡觉春风一度 ,电光惊目。

因念著、旧日欢娱 ,清平歌曲。板按玉人横竹。金盆月落 ,银烛纱笼 ,一刻千金难赎。微醉欲醒未醒 ,声声唤起 ,睡何时足。待移根、与赋归来 ,敢比渊明松菊。

浣溪沙 春思

庭院深沈绝俗埃。绿苔因雨上层阶。画帘低卷燕归来。

月似有情中夜入 ,花何无语向人开。漫劳飞梦到天台。

西江月 春暮

时序去如流水 ,功名冷似寒灰。尽教江庾

赋多才。一刻千金难买。

客里月圆月缺 ,尊前花落花开。春来何处带愁来。春去此愁还在。

蝶恋花 送春

昨夜狂风今日雨。风雨相催 ,断送春归去。万计千方留不住。春归毕竟归何处。

好鸟如歌花解舞。花鸟无情 ,也诉离愁苦。流水落红芳草渡。明年好记归时路。

浣溪沙 送春

月落桐梢杜宇啼。云埋芳树鹧鸪飞。夜阑分作送春诗。

山上安山经几载 ,口中添口又何时。相思一曲诉伊谁。

木兰花慢 思情

自东君别后 ,对花柳、愈无聊。但旅寓年年 ,梦添夜夜 ,饭减朝朝。应怜此情何似 ,恰梅天、风雨正潇潇。奁玉有谁暖眼 ,带围漫自松腰。

深沈庭院好香烧。水远玉人遥。念信阻鸾笺 ,调空绿绮 ,字满鲛绡。东君也知人意 ,几黄昏 ,天际送兰桡。锦荔堂前载酒 ,梧桐月下吹箫。

清平乐 咏月

娥眉淡伫。未约心先许。坐待不来来又去。直到碧窗深处。

雨云偏妒妖娇。几孤三五良宵。要见残妆新画,多应暮暮朝朝。

又 咏星

天孙自织。经纬天南北。明月楼台高百尺。玉手昔曾亲摘。

种榆人去何年。乘槎偶认张骞。报道秋期近也,好将巧思相传。

又 咏风

呼来吸去。毕竟为谁主。软力慢扶花柳舞。禁不住颠狂处。

等闲天易凉炎。每教人爱人嫌。最是相思病起,呼儿紧下珠帘。

又 咏雨

丝丝线线。惹起云根燕。万里江山春欲遍。多在梨花庭院。

经旬一见通宵。恍如身在蓝桥。记与巫山神女,不禁暮暮朝朝。

又 咏云

随风情性。聚散元无定。雨过黄昏收拾尽。送出月明花影。

谁言出岫无心。腾腾飞上巫岑。梦断不知何处,玉人鬓上斜簪。

又 咏蝉

娇声娇语。恰似深闺女。三叠琴心音一缕。趁在绿阴深处。

此音宁与人知。此身不与人欺。薄暮背将斜月，隳声飞上高枝。

又 咏蚊

三三两两。夜夜教人想。偷入霜绡斜隙帐。直到珊瑚枕上。

玉人梦绕江南。轮他一饷肥甘。莫恨我心儿毒，只因你口儿馋。

又 咏蝶

轻姿傅粉。学得偷香俊。百紫千红人未问。先与芳心折损。

一生天赋风流。不知节去蜂愁。堪笑庄周老子，将身梦里追游。

又 咏蛙

黄梅雨住。青草池塘暮。轻许天然乐两部。遥想周郎不顾。

生憎利口喃喃。凭谁井塞泥缄。最是玉人枕上，几回梦断江南。

又 咏萤

星星散散。绕地无人管。一点寒光虽有烂。飞不到河西畔。

画堂花暗银缸。井阑添个双双。欲照相思两字，藉风扶过虚窗。

又 咏促织

啾啾唧唧。夜夜鸣东壁。如诉如歌如涕

泣。乱我离怀似织。

画堂帘幕沈深。美人睡稳香衾。懒妇知眠到晓，尔虫枉自劳心。

醉春风 闺情

陌上轮蹄满。花间蜂蝶乱。画帘低卷对南山。□□□。轻暖轻寒，乍晴乍雨，风流云散。

罗袖伤春晚。纨扇惊秋换。谁将白雪污青鬟。懒懒懒。金屋笙歌，茅檐风月，悲欢相伴。

玉蝴蝶 雨中对紫薇

好是春光秋色，天工巧处，都上花枝。更值云情雨态，净沐芳姿。醉相扶、霓裳舞困，眠未得、宫锦淋漓。有谁知。眼空相对，心系相思。

相思。鲛绡帕上，珠悬红泪，水洗胭脂。寂寞阑干，无言暗忆旧游时。五花骢、载将郎去，双喜鹊、报道郎归。卜佳期。梦回巫峡，春在瑶池。

千秋岁引 咏前

濯锦丰姿，新凉台阁。懊悔巫云太轻薄。琵琶未诉衣衫湿，菱花不照胭脂落。凤凰池，鸯鸯殿，重金钥。

春色画船何处泊。秋色丹青人难摸。可惜风流总闲却。此情不与人知道,知时只恐人挠著。碧窗前,银灯下,陪孤酌。

玉蝴蝶 七夕

金井梧桐飞报,秋期近也,乌鹊成桥。为问双星何事,长待今宵。别今年、新欢暂展,更五鼓、旧恨重播。黯魂销。两情脉脉,一水迢迢。

寂寥。寄言儿女,纵能多巧笑,奚暇相调。暗想离愁,人间天上古来饶。但心坚、天长地久,何意在、雨暮云朝。宝香烧。无缘驾海,有分吹箫。

木兰花慢 春游

值升平海宇,又春色、与俱还。向杨柳楼台,海棠庭院,红药阑干。可人好风良月,都收拾入锦囊间。心事已超尘外,天公分付人间。

世途陆海拥波澜。回首梦中看。想酒醒罗浮,云空巫峡,饭熟邯郸。从兹破琴煮鹤,猗兰不用对人弹。粗足少游衣食,何妨司马江山。

水龙吟 和雪后过瓜洲渡韵

问津扬子江头,滔滔潮汐东流去。六朝文物,千年陈迹,几更乌兔。天限东南,水流今

古地分吴楚。喜壮游千里,桑弧蓬矢,功名事、儒生语。

翘首石头城北,簇楼台、远连芳树。雪销天气,澄江如练,碧峰无数。银瓮春回,金山钟晓,梦闲鸥鹭。早归来,尽日风平人静,孤舟横渡。

望远行

城头初鼓,天街上、渐渐行人声悄。半窗风月,一枕新凉,睡熟不知天晓。最是家山千里,远劳归梦,待说离情难觉。觉来时,帘外数声啼鸟。

谁道。为甚新来消瘦,底事恹恹烦恼。不是悲花,非干病酒,有个离肠难扫。怅望江南,天际白云飞处,念我高堂人老。寸草心、朝夕怎宽怀抱。

满江红

记得年时,离筵上、把梅花折。还经尽、江南烟雨,淮阳风雪。寒食清明都过了,看看又到端阳节。倚阑干、屈指数流光,经年别。

心一寸、肠千结。千里梦、三更月。□晓来寒透,不堪愁绝。羞见慈乌啼反哺,厌闻乳燕调新舌。睹禽物、愈觉倍伤情,归心切。

惜余春慢

阑葺疏芦,帘编小苇,好个清幽公馆。栽

槐夹道 种菊盈轩 ,景物便堪吟玩。门外一番雨余 ,嫩绿缘枝 ,浅清清眼。悄无人 ,一枕新凉睡觉 ,燕泥香暖。

暮地里、对景伤怀 ,思量无限。回首故园春远。松期竹待 ,壑谙林嘲 ,苦被浮名牵绊。一种思情最长 ,万叠江山 ,怎生遮断。向北堂见了 ,忘忧萱草 ,此心芳满。

忆秦娥

疏帘揭。云端仰见娟娟月。娟娟月。不应何恨 ,照人离别。

闭门独睡空愁绝。姮娥梦里低低说。低低说。悲欢离合 ,阴晴圆缺。

踏莎行 中秋不见月

雾失南楼 ,云低东阁。枝头不见南飞鹊。姮娥何事太多情 ,今宵故误年时约。

天易阴晴 ,人多哀乐。从来此事难凭度。匆匆又是隔年期 ,且烧银烛酬高酌。

一翦梅 九日

新酒初香菊半含。月也三三。日也三三。登高已约上嵒岩。世事相担。风雨相担。

头上茱萸颠倒簪。身在河南。心在江南。渊明何日解征骖。俯也何惭。仰也何惭。

鹧鸪天 咏菊

三径芳根自不群。每于霜后播清芬。枝头蛱蝶如羞见，篱外征鸿不可闻。

情脉脉，思纷纷。绕窗吟咏理余薰。卷帘人在西风里，知是新来瘦几分。

踏莎行

声迹随风，浪痕如霰。蓝桥路远无由见。黄昏肠断倚阑时，看看数尽南飞雁。

日理丝机，宵拈针线。春秋不管莺和燕。欲将心事诉佳期，回文直上金銮殿。

又

梅压宫妆，柳横眉黛。都将留得春光在。弄琴台上忽相逢，吹箫月下曾相待。

海燕春归，江鸿秋迈。到头总是恩和爱。佳期约在白云间，一团和气春如海。

陈东

秦刷子

谁斫碧琅玕，影撼半庭风月。尚有岁寒心在，留得数根华发。

龙孙受戏碧波涛，喜动清风发。到得浪花深处，□一瓯香雪。

西江月

风动一轩花竹，琅玕青锦薰笼。怜才自是宋墙东。更识琴心挑弄。

暮雨乍收寒浅，朝云又起春浓。冰肌玉骨信俱融。不比巫山闲梦。

蓦山溪 元夕

半生羁旅，几度经元夜。长是竞虚名，把良宵、等闲弃舍。去年元夜，道得□身闲，依旧是，客长安，寂寞孤眠者。

今年元夜。也则非乡社。却有人□约，携手□、灯前月下。那知风雨，此事又参差，成怨恨，独凄惶，清泪潸然洒。

全宋词 陈东

西江月 七夕

我笑牛郎织女，一年一度相逢。欢情尽
逐晓云空。愁损舞鸾歌凤。

牛女而今笑我，七年独卧西风。西风还
解过江东。为报佳期入梦。

陈 东 甫

谒金门

西风竹。风入翠烟□矗。红小阑干知几曲。声声敲碧玉。

窗下凤台银烛。断梦已惊难续。曾伴去年庭下菊。夜阑听雨宿。

长相思

花深深。柳阴阴。度柳穿花觅信音。君心负妾心。

怨鸣琴。恨孤衾。钿誓钗盟何处寻。当初谁料今。

望江南

芳思远，南苑惜春时。翠柳枝柔金笛怨，碧桃花老玉笙悲。风日正迟迟。

陈 逢 辰

乌夜啼

月痕未到朱扉。送郎时。暗里一汪儿泪、
没人知。

搵不住。收不聚。被风吹。吹作一天愁
雨、损花枝。

西江月

杨柳雪融滞雨，醺醺玉软欺风。飞英簌
簌扣雕栊。残蝶归来粉重。

罨画扇题尘掩，绣花纱带寒笼。送春先
自费啼红。更结疏云秋梦。

陈风仪

一络索 送蜀守蒋龙图

蜀江春色浓如雾。拥双旌归去。海棠也似别君难，一点点、啼红雨。

此去马蹄何处。沙堤新路。禁林赐宴赏花时，还忆著、西楼否。

陈 瓘

减字木兰花 题韦深道独乐堂

世间拘碍。人不堪时渠不改。古有斯人。
千载谁能继后尘。

春风入手。乐事自应随处有。与众熙怡。
何似幽居独乐时。

又 题深道寄傲轩

结庐人境。万事醉来都不醒。鸟倦云飞。
两得无心总是归。

古人逝矣。旧日南窗何处是。莫负青春。
即是升平寄傲人。

满庭芳

槁木形骸，浮云身世，一年两到京华。
又还乘兴，闲看洛阳花。闻道鞦红最好，春
归后、终委泥沙。忘言处，花开花谢，不似
我生涯。

年华。留不住，饥餐困寝，触处为家。
这一轮明月，本自无瑕。随分冬裘夏葛，都
不会、赤水黄芽。谁知我，春风一拐，谈笑

有丹砂。

卜算子

身如一片舟，万事潮头起。水长船高一任伊，来往洪涛里。

潮落又潮生，今古长如此。后夜开尊独酌时，月满人千里。

一落索

体上衣裳云作缕。不论寒暑。世间多少老婆禅，犹苦问、台山路。

堪笑庞翁无趣。临行却住。古人公案不须论，还了得、如今否。

减字木兰花

大江北去。未到沧溟终不住。淮水东流。日夜朝宗亦未休。

香炉烟袅。浓淡卷舒终不老。寸碧千钟。人醉华胥月色中。

又

华胥月色。万水千山同一白。南北相望。独醉香山旧草堂。

淮岑妙境。十载醺酣犹未醒。一腹便便。也读春秋也爱眠。

卜算子

只解劝人归，都不留人住。南北东西总是家，劝我归何处。

去住总由天，天意人难阻。若得归时我自归，何必闲言语。

又

黄了旧皮肤，最是风流处。多少纷纷陌上人，不听春鹃语。

触目是家山，到了须拈取。云散长空月满天，好个还乡路。

又

梦里不知眠，觉后眠何在。试问眠身与梦身，那个能祇对。

醉后有人醒，醒了无人醉。要识三千与大千，不在微尘外。

青玉案

碧空黯淡同云绕。渐枕上、风声峭。明透纱窗天欲晓。珠帘才卷，美人惊报，一夜青山老。

使君留客金尊倒。正千里琼瑶未经扫。欺压梅花春信早。十分农事，满城和气，管取明年好。

蓦山溪

扁舟东去，极目沧波渺。千古送残红，到如今、东流未了。午潮方去，江月照还生，千帆起，玉绳低，枕上莺声晓。

锦囊佳句，韵压池塘草。声遏去年云，恼离怀、余音缭绕。倚楼看镜，此意与谁论，一重水，一重山，目断令人老。

减字木兰花

世间药院。只爱大黄甘草贱。急急加工。更靠硫黄与鹿茸。

鹿茸吃了。却恨世间凉药少。冷热平均。须是松根白茯苓。

满庭芳

扰扰匆匆，红尘满袖，自然心在溪山。寻思百计，真个不如闲。浮世纷华梦影，罽尘路、来往循环。江湖手，长安障日，何似把鱼竿。

盘旋。那忍去，他邦纵好，终异乡关。向七峰回首，清泪班班。西望烟波万里，扁舟去，何日东还。分携处，相期痛饮，莫放酒杯慳。

又

淮叶缤纷，江烟浓淡，别尊同倒寒晖。

未逢春信，霜露惹征衣。往事元无是处，无须待、回首知非。春鹃语，从来劝我，常道不如归。

家山，何处近，江楼帘栋，夕卷朝飞。问西江笋蕨，何似鲈肥。且置华胥旧梦，忘言处、千古同时。君知我，平生心事，相契古来稀。

醉蓬莱

问东州何处，境胜人幽，两俱难得。狼山相望，有高堂千尺。妙曲轰空，彩云翻袖，乐奏壶天长日。笑我飘然，蓬窗竹户，只延山色。

拟棹觥船，径冲花浪，直造雕筵，共醺仙液。仍乞蟠桃，向庐山亲植。未举江帆，早逢淮雁，问故人踪迹。远老池边，陶翁琴里，此情何极。

临江仙

闻道洛阳花正好，家家庭户春风。道人饮去百壶空。年年花下醉，看谢几番红。

此别又从何处去，风萍一任西东。语声虽异笑声同。一轮深夜月，何处不相逢。

蝶恋花

海角芳菲留不住。笔下风生，飞入青云

去。仙箬有名天赐与。致君事业安排取。
要识世间平坦路。当使人人，各有安心处。
黑发便逢尧舜主。笑人白首归南亩。

卜算子

咄咄汝何人，眼在眉毛下。明月相随万里来，何处分真假。
问著总无言，有口番成哑。荆棘林中自在身，即是知音者。

蝶恋花

有个胡儿模样别。满颌髭须，生得浑如漆。见说近来头也白。髭须那得长长黑。
□□□□□□□。簪子镊来，须有千堆雪。莫向细君容易说。恐他嫌你将伊摘。

减字木兰花 赠广陵马推官

一尊薄酒。满酌劝君君举手。不是亲朋。谁肯相从寂寞滨。
人生如梦。梦里惺惺何处用。盏到休辞。醉后全胜未醉时。

阮郎归

从来多唱杜鹃辞。如今真个归。健帆笑里落湖西。回看江浪飞。

全宋词 陈 瓘

说情话，复何疑。临流应赋诗。引觞自
酌更何之。心闲光景迟。乾道四明图经卷八

失调名

吴檣越櫓，都是利名人。

又

彩衣长久。五世祥烟薰舞袖。

陈 鹄

失调名

莫待柳吹绵。吹绵时杜鹃。

陈 合

宝鼎现 寿贾师宪

神鳌谁断，几千年再，乾坤初造。算当日、枰棋如许，争一著、吾其衽左。谈笑顷、又十年生聚，处处豳风葵枣。江如镜，楚氛余几，猛听甘泉捷报。

天衣细意从头补。烂山龙、华虫黼藻。宫漏水、千门鱼钥，截断红尘飞不到。街九轨，看千貂避路，庭院五侯深锁。好一部、太平六典，一周公手做。

赤舄绣裳，消得道、斑斓衣好。尽庞眉鹤发，天上千秋难老。甲子平头才一过，未说汾阳考。看金盘，露滴瑶池，龙尾放班回早。

陈济翁

蓦山溪

去年今日 ,从驾游西苑。彩仗压金波 ,看
水戏、鱼龙曼衍。宝津南殿 ,宴坐近天颜 ,金杯
酒 ,君王劝。头上宫花颤。

六军锦绣 ,万骑穿杨箭。日暮翠华归 ,拥
钧天、笙歌一片。如今关外 ,千里未归人 ,前山
雨 ,西楼晚。望断思君眼。

又

薰风时候。芍药披晴昼。天上玉阑干 ,展
一枰、天家锦绣。汉宫唐殿。嫔御逞妖娆 ,飞
燕女 ,太真妃 ,一样新妆就。

黄金捻线 ,色与红芳斗。谁把绛绡衣 ,误
将他、胭脂渍透。晚风生处 ,襟袖卷浓香 ,持玉
斝 ,秉纱笼 ,倚醉听更漏。

踏青游

濯锦江头 ,羞杀艳桃秾李。纵赵昌、丹青
难比。晕轻红 ,留浅素 ,千娇百媚。照绿水。
恰如下临鸾镜 ,妃子弄妆犹醉。

全宋词 陈济翁

诗笔因循 ,不晓少陵深意。但满眼、伤春
珠泪。燕来时 ,莺啼处 ,年年憔悴。便除是。
秉烛凭阑吟赏 ,莫教夜深花睡。

陈纪

贺新郎 听琵琶

趁拍哀弦促。听泠泠、弦间细语，手间推覆。莺语间关花底滑，急雨斜穿梧竹。又涧底、松风簌簌。铁拨鹍弦春夜永，对金钗钟乳人如玉。敲象板。翦银烛。

六么声断凉州续。怅梅花、岁晚天寒，佳人空谷。有限弦声无限意，沦落天涯幽独。顿唤起、闲愁千斛。贺老定场无处问，到如今、只鼓昭君曲。呼羯鼓，泻醪醑。

念奴娇 梅花

断桥流水，见横斜清浅，一枝孤袅。清气乾坤能有几，都被梅花占了。玉质生香，冰肌不粟，韵在霜天晓。林间姑射，高情迥出尘表。

除是孤竹夷齐，商山四皓，与尔方同调。世上纷纷巡檐者，尔辈何堪一笑。风雨忧愁，年来何逊，孤负渠多少。参横月落，有怀付与青鸟。

满江红 重九登增江凤台望崔清献故居

凤去台空 ,庭叶下、嫩寒初透。人世上、几番风雨 ,几番重九。列岫迢迢供远目。晴空荡荡容长袖。把中年、怀抱更登台 ,秋知否。

天也老 ,山应瘦。时易失 ,欢难久。到于今惟有 ,黄花依旧。岁晚凄其诸葛恨 ,乾坤只可渊明酒。忆坡头、老菊晚香寒 ,空搔首。

倦寻芳 郭颐堂寒食有无家之感 ,为赋

满簪霜雪 ,一帽尘埃 ,消几寒食。手捻梨花 ,还是年时岑寂。簌簌落红春似梦 ,萋萋柔绿愁如织。怪东君、太匆匆 ,亦是人间行客。

问几度、五侯传烛 ,但回首东风 ,吹尽尘迹。笑杜陵泪洒 ,金波如积。对酒且宽愁意绪 ,题诗与寄真消息。待归来 ,细温存、慰伊相忆。

满江红 钱赵佥事

揽辔埋轮 ,算不负、苍髯如戟。人争看、横秋一鹗 ,轩然健翼。只手为天行日月 ,寸怀与物同苏息。到于今、天定瘴云开 ,伊谁力。

云霄路 ,金门客。念往事 ,情何极。把行藏细说 ,应无惭色。虹气上横牛斗剑 ,梅花不软心肠石。愿此行、珍重不赀躯 ,无瑕璧。

念奴娇 钓鳌台用东坡赤壁韵。台在亭头海滨

凭高远眺 ,见凄凉海国 ,高秋云物。岛屿
沈洋萍几点 ,漠漠天垂四壁。粟粒太虚 ,蜉蝣
天地 ,怀抱皆冰雪。清风明月 ,坐中看我三杰。

为爱暮色苍寒 ,天光上下 ,舫棹须明发。
一片玻璃秋万顷 ,天外去帆明灭。招手仙人 ,
拍肩居士 ,散我骑鲸发。钓鳌台上 ,叫云吹断
残月。

陈 景 沂

壶中天

江邨湘驿。问暮年何事，暮冬行役。马首摇摇经历处，多少山南溪北。冷著烟扉，孤芳云掩，瞥见如相识。相逢相劳，如痴如诉如忆。

最是近晓霜浓，初弦月挂，傅粉金鸾侧。冷淡生涯忧乐忘，不管冰檐雪壁。魁榜虚夸，调羹浪语，那里求真的。暗香来历，自家还要知得。

点绛唇

今古凡花，词人尚作词称庆。紫薇名盛。似得花之圣。

为底时人，一曲稀流咏。花端正。花无郎病。病亦归之命。

水龙吟

阶前砌下新凉，嫩姿弱质婆娑小。仙家甚处，凤雏飞下，化成窈窕。尖叶参差，柔

枝袅娜，体将玉造。自川葵放后，堂萱谢了，
是园苑、无花草。

自恨西风太早。逞芳容、紫围绯绕。管
里低昂，篴头约略，空成懊恼。圆胎结就，
小铃垂下，直开临□。□凡间谪堕，不如西
帝，曾关宸抱。

陈居仁

水调歌头

重过钓台路 ,风物故依然。羊裘轩上 ,俯临清泚面孱颜。仰见先生风节 ,更有两公名德 ,冰雪照人寒。龙野方驰逐 ,鸿翼自孤骞。

酹壶觞 ,追往昔 ,笑华颠。别来三纪 ,推排曾戴侍臣冠。惭愧君恩难答 ,聊复守符重绶 ,敢叹客途艰。少报期年政 ,行泛五湖船。

陈 垲

满江红 循视江兴水备舟中赋

万里长江，天与限、东南吴楚。何人者，
提英□□，指鞭欲渡。孟德舳舻烟赤壁，佛
狸心胆寒瓜步。问波涛、说尽几英雄，今犹
古。

中原地，纷 下阙

陈康伯

阮郎归

闲来溪上有云飞。溪光接翠微。江南三月落花时。春波去棹迟。

寻竹路 ,破林扉。苍台旧钓矶。欲归回首未成归。黄尘满素衣。

浪淘沙 云藏鹅湖山

台上凭阑干。犹怯春寒。被谁偷了最高山。将谓六丁移取去 ,不在人间。却是晓寒闲。特地遮拦。与天一样自漫漫。喜得东风收卷尽 ,依旧追还。

陈克

临江仙

枕帐依依残梦，斋房忽忽余醒。薄衣团扇绕阶行。曲阑幽树，看得绿成阴。

檐雨为谁凝咽，林花似我飘零。微吟休作断肠声。流莺百啭，解道此时情。

又

四海十年兵不解，胡尘直到江城。岁华销尽客心惊。疏髯浑似雪，衰涕欲生冰。

送老菑盐何处是，我缘应在吴兴。故人相望若为情。别愁深夜雨，孤影小窗灯。

渔家傲

宝瑟尘生郎去后。绿窗闲却春风手。浅色宫罗新染就。晴时后。裁缝细意花枝斗。

象尺熏炉移永昼。粉香浥浥蔷薇透。晚景看来浑似旧。沈吟久。个侬争得知人瘦。

浣溪沙

浅画香膏拂紫绵。牡丹花重翠云偏。手

援梅子并郎肩。

病起心情终是怯，困来模样不禁怜。旋移针线小窗前。

又

香雾空蒙堕彩蟾。倾城催映出重帘。
□□银烛夜厌厌。

何物与侬供醉眼，半黄梅子带红盐。粉融香润玉纤纤。

又

淡墨花枝掩薄罗。嫩蓝裙子窄湘波，水晶新样碾风荷。

问著似羞还似恶，恼来成笑不成歌。芙蓉帐里奈君何。

又

短烛荧荧照碧窗。重重帘幕护梨霜。幽欢不怕夜偏长。

罗袜钿钗红粉醉，曲屏深幔绿橙香。征鸿离远断人肠。

又

小院春来百草青。拂墙桃李已飘零。绝知春意总无凭。

卢女嫁时终薄命，徐娘身老谩多情。洗香吹粉转娉婷。

又

窗纸幽幽不肯明。寒更忍作断肠声。背人残烛却多情。

合下心期唯有梦，如今魂梦也无凭。几

行闲泪莫纵横。

摊破浣溪沙

鬢慢梳头浅画眉。乱莺残梦起多时。不
道小庭花露湿，翦酴醾。

帘额好风低燕子，窗油晴日打蜂儿，翠
袖粉笺闲弄笔，写新诗。

谒金门

花满院。飞去飞来双燕。红雨入帘寒不
卷。晓屏山六扇。

翠袖玉笙凄断。脉脉两蛾愁浅。消息不
知郎近远。一春长梦见。

又

柳丝碧。柳下人家寒食。莺语匆匆花寂
寂。玉阶春藓湿。

闲凭薰笼无力。心事有谁知得。檀柱绕
窗灯背壁。画檐残雨滴。

又

深院静。尘暗曲房凄冷。黄叶满阶风不
定。无端吹酒醒。

露湿小园幽径。悄悄啼姑相应。半被余
熏残烛影。夜长人独冷。

又

春漏促。谁见两人心曲。罨画屏风银蜡

烛。泪珠红蔌蔌。

懊恼欢娱不足。只许梦中相逐。今夜月明何处宿。画桥春水绿。

又

春草碧。忆著去年寒食。白纻红裙香□□，折花闹调客。

好在江南东北。燕子不传消息。醉眼腾腾羞面赤。断肠依记得。

又

罗帐薄。缥缈绮疏飞阁。红地团花金解络。香囊垂四角。

尽日春风帘幕。谁见绿屏纤弱。云压枕函钗自落。无端春梦恶。

又

愁脉脉。目断江南江北。烟树重重芳信隔。小楼山几尺。

细草孤云斜日。一向弄晴天色。帘外落花飞不得。东风无气力。

又

春寂寂。绿暗溪南溪北。溪水沈沈天一色。鸟飞春树黑。

肠断小楼吹笛，醉里看朱成碧。愁满眼前遮不得。可怜双鬓白。

虞美人

踏车不用青裙女。日夜歌声苦。风流墨

绶强跻攀。唤起潜蛟飞舞、破天悭。

公庭休更重门掩。细听催诗点。一尊已咏北窗风。卧看雪儿纤手、剥莲蓬。

又

小山戢戢盆池浅。芳树阴阴转。红阑干上刺蔷薇。蝴蝶飞来飞去、两三枝。

绣裙斜立腰肢困。翠黛萦新恨。风流踪迹使人猜。过了斗鸡时节、合归来。

又

绿阴满院帘垂地。落絮萦香砌。池光不定药栏低。闲并一双鸂鶒、没人时。

旧欢黯黯成幽梦。帐卷金泥重。日虹斜处暗尘飞。脉脉小窗孤枕、镜花移。

菩萨蛮

柳条窈窕闲庭院。锦波绣浪春风转。红日上阑干。晚来花更寒。

绿檀金隐起。翠被香烟里。幽恨有谁知。空梁落燕泥。

又

赤阑桥尽香街直。笼街细柳娇无力。金碧上青空。花晴帘影红。

黄衫飞白马。日日青楼下。醉眼不逢人。午香吹暗尘。

又

池塘淡淡浮鸂鶒。杏花吹尽垂杨碧。天

气度清明。小园新雨晴。

绿窗描绣罢。笑语醺醺下。围坐赌青梅。
困从双脸来。

又

绿芜墙绕青苔院。中庭日淡芭蕉卷。蝴蝶上阶飞。烘帘自在垂。

玉钩双语燕。宝甃杨花转。几处簸钱声。
绿窗春睡轻。

又

柳条到地莺声滑。鸳鸯睡稳清沟阔。九曲转朱阑。花深人对闲。

日长刀尺罢。试屐樱桃下。髻髻玉钗风。
云轻线脚红。

又

绿阴寂寂樱桃下。盆池劣照蔷薇架。帘影假山前。映阶红叶翻。

芭蕉笼碧砌。猧子中庭睡。香径没人来。
拂墙花又开。

点绛唇

曲陌春风，谁家姊妹同墙看。映花烘暖。
困入茸茸眼。

细马轻衫，倚醉偷回面。垂杨转。坠鞭挥扇。
白地肝肠断。

好事近

寻遍石亭春，黯黯暮山明灭。竹外小溪

深处，倚一枝寒月。

淡云疏雨苦无情，得折便须折。醉帽凤鬟归去，有余香愁绝。

千秋岁

柏舟高躅。晚岁宜遐福。门户壮，疏汤沐。青袍围白发。端锦缥犀轴。仙桂长，交柯却映蟠桃熟。

缥缈长江曲。入破□箫逐。香雾满，飞华屋。玉钩凉月挂，冰麝芙蓉馥。千万寿，酒中倒卧南山绿。

鹧鸪天

禁彥余寒酒半醒。蒲萄力软被愁侵。鲤鱼不寄江南信，绿尽菖蒲春水深。疑梦断，怆离襟。重帘复幕静愔愔。赤阑干外梨花雨，还是去年寒食心。

又

芳树阴阴脱晚红。余香不断玉钗风。薄情夫婿花相似，一片西飞一片东。金翡翠，绣芙蓉。从教纤媚笑床空。揉蓝衫子休无赖，只与离人结短封。

又

小市桥弯更向东。便门长记旧相逢。踏青会散秋千下，鬓影衣香怯晚风。悲往事，向孤鸿。断肠肠断旧情浓。梨花院落黄茅店，

绣被春寒此夜同。

豆叶黄

粉墙丹柱柳丝中。帘箔轻明花影重。午
醉醒来一面风。绿匆匆。几颗樱桃叶底红。

又

树头初日鹁鸪鸣。野店山桥新雨晴。短
褐无泥竹杖轻。水泠泠。梅片飞时春草青。

又

秋千人散小庭空。麝冷灯昏愁杀侬。独
有闲阶两袖风。月胧胧。一树梨花细雨中。

鹧鸪天 阳羨竞渡

柳外东风不满旗。青裾白面出疏篱。噉
来打鼓侬吹笛，催送儿郎踏浪飞。倾两耳斗
双螭。家家春酒泻尖泥。侬今已是沧浪客，
莫向尊前唱教池。

浣溪沙

罨画溪头春水生。铜官山外夕阳明。暖
风无力小舟横。

万事悠悠生处熟，三杯兀兀醉时醒。杏
花杨柳更多情。

又 阳羨上元

桥北桥南新雨晴。柳边花底暮寒轻。万家灯火照溪明。

鳧舄差池官事了，木山彩错市人惊。街头酒贱唱歌声。

减字木兰花 子寿母

阆风玄圃。阳羨溪头山好处。郁郁葱葱。胜日尊罍笑语中。

十分芳酒。鹤发初生千万寿。乐事年年。弟劝兄酬阿母前。

临江仙 秋夜怀人

老屋风悲脱叶，枯城月破浮烟。谁人惨惨把忧端。蛮歌犯星起，重觉在天边。

秋色巧摧愁鬓，夜寒偏著诗肩。不知桂影为谁圆。何须照床里，终是一人眠。

清平乐 怀人

枕边清血。梦好离肠切。笑倚柳条同挽结。满眼河桥烟月。

莺啼新晓璁珑。罗窗寂寞春空。只许梦魂相近，此生枉是相逢。

鹧鸪天 寄友人

白苧吴侬红颊儿。行歌半是使君诗。山茶处处春犹浅，灯市人人夜不归。拚剧饮，莫相违。皇恩往往下丹墀。挥毫却对莲花炬，忆著苹洲秉烛时。

南歌子 毛翰林席上

午夜添红蜡，分曹立翠娥。觥筹寂寂断经过。谁料绮丛香里、是银河。老去空髯戟，愁来奈脸波。一杯如此断肠何。枉杀两人心事、只闻歌。

又

献鲤荣今日，凭熊瑞此邦。年年寿酒乐城隍。共道使君椿树、似甘棠。歌舞重城晓，从容燕席凉。不须苏合与都梁。风外荷花无数、是炉香。

又

北固烟中寺，西津雨后山。看公英气两眉间。如在林霏、江月袭人寒。展骥声名久，占熊福艾全。风流不是地行仙。好去鞭笞鸾凤、紫微天。

又

云里千山暖，溪头八月凉。华簪霭霭待萱堂。羨子怀中双橘、半青黄。老去齐眉案，闲来坦腹床。相如何日从长杨。惭愧年年高

会、索槟榔。

又

胜日萱庭小，西风橘柚长。天怜扇枕彩
衣郎。乞与淡云纤月、十分凉。潋滟三危雾
氤氲百濯香。年来椿树更苍苍。不用蓝桥辛
苦、捣玄霜。

又

画幃经梅润，罗衣尚麦寒。古苔苍石绿
句栏。帘外映花新竹、两三竿。蠢蠢吴蚕卧，
娉娉楚女闲。红阴角子共尝酸。肠断个依憨
态、小眉弯。

又

看月凭肩枨，娇春枕臂眠。不禁花絮夜
来寒。帐底浓香残梦、更缠绵。起晚笼莺怪，
妆迟绣伴牵。声声催唤药栏边。整髻收裙无
力、上秋千。

虞美人

曹申甫以著色山水小景作短制，思极萧
散，方倅裘明邀予为咏

越罗巧画春山叠。个里融香雪。满身空
翠不胜寒。恰似那回偷印、小眉山。

青骢油壁西陵下。仿佛当时话。而今眼
底是高唐。拂拂淡云疏雨、断人肠。

陈 亮

水调歌头 送章德茂大卿使虏

不见南师久，谩说北群空。当场只手，
毕竟还我万夫雄。自笑堂堂汉使，得似洋洋
河水，依旧只流东。且复穹庐拜，会向藁街
逢。

尧之都，舜之壤，禹之封。於中应有，
一个半个耻臣戎。万里腥膻如许，千古英灵
安在，磅礴几时通。胡运何须问，赫日自当
中。

念奴娇 至金陵

江南春色，算来是、多少胜游清赏。妖
冶廉纤，只做得，飞鸟向人偎傍。地辟天开，
精神朗慧，到底还京样。人家小语，一声声
近清唱。

因念旧日山城，个人如画，已作中州想。
郑禹笑人无限也，冷落不堪惆怅。秋水双明，
高山一弄，著我些悲壮。南徐好住，片帆有
分来往。

贺新郎 同刘元实唐与正陪叶丞相饮

修竹更深处。映帘栊、清阴障日，坐来无暑。水激泠泠如何许。跳碎危栏玉树。都不系、人间朝暮。东阁少年今老矣，况樽中有酒嫌推去。犹著我，名流语。

大家绿野陪容与。算等闲、过了薰风，又还商素。手弄柔条人健否，犹忆当时雅趣。恩未报、恐成辜负。举目江河休感涕，念有君如此何愁虏。歌未罢，谁来舞。

满江红 怀韩子师尚书

曾洗乾坤，问何事、雄图顿屈。试著眼、阶除当下，又添英物。北向争衡幽愤在，南来遗恨狂酋失。算凄凉部曲几人存，三之一。

诸老尽，郎君出。恩未报，家何恤。念横飞直上，有时还戢。笑我只知存饱暖，感君元不论阶级。休更上百尺旧家楼，尘侵帙。

桂枝香 观木樨有感寄吕郎中

天高气肃。正月色分明，秋容新沐。桂子初收，三十六宫都足。不辞散落人间去，怕群花、自嫌凡俗。向他秋晚，唤回春意，几曾幽独。

是天上、馀香胜馥。怪一树香风，十里相续。坐对花旁，但见色浮金粟。芙蓉只解

添秋思，况东篱、凄凉黄菊。入时太浅，背时太远，爱寻高躅。

三部乐 七月送丘宗卿使虜

小屈穹庐，但二满三平，共劳均佚。人中龙虎，本为明时而出。只合是、端坐王朝，看指挥整办，扫荡飘忽。也持汉节，聊过旧家宫室。

西风又还带暑，把征衫著上，有时披拂。休将看花泪眼，闻弦□骨。对遗民、有如皎日。行万里、依然故物。入奏几策，天下里、终定于一。

水调歌头 癸卯九月十五日寿朱元晦

人物从来少，篱菊为谁黄。去年今日，倚楼还是听行藏。未觉霜风无赖，好在月华如水，心事楚天长。讲论参洙泗，杯酒到虞唐。

人未醉，歌宛转，兴悠扬。太平胸次，笑他磊砢欲成狂。且向武夷深处，坐对云烟开敛，逸思入微茫。我欲为君寿，何许得新腔。

念奴娇 登多景楼

危楼还望，叹此意、今古几人曾会。鬼设神施，浑认作、天限南疆北界。一水横陈，

连岗三面，做出争雄势。六朝何事，只成门户私计。

因笑王谢诸人，登高怀远，也学英雄涕。凭却长江管不到，河洛腥膻无际。正好长驱，不须反顾，寻取中流誓。小儿破贼，势成宁问疆场。

贺新郎 寄辛幼安和见怀韵

老去凭谁说。看几番、神奇臭腐，夏裘冬葛。父老长安今馀几，后死无仇可雪。犹未燥、当时生发。二十五弦多少恨，算世间、那有平分月。胡妇弄，汉宫瑟。

树犹如此堪重别。只使君、从来与我，话头多合。行矣置之无足问，谁换妍皮痴骨。但莫使、伯牙弦绝。九转丹砂牢拾取，管精金、只是寻常。龙共虎，应声裂。

瑞云浓慢 六月十一日寿罗春伯

蔗浆酪粉，玉壶冰醕，朝罢更闻宣赐。去天咫尺，下拜再三，幸今有母可遗。年年此日，共道月入怀中最贵。向暑天，正风云会遇，有恁嘉瑞。

鹤冲霄，鱼得水。一超便、直入神仙地。植根江表，开拓两河，做得黑头公未。骑鲸赤手，问如何、长鞭尺捶。向来王谢风流，只今管是。

阮郎归 重午寿外舅

波光渺渺浸晴陂。有亭湖岸西。芰荷香拂柳丝垂。升堂献寿卮。

红约腕，绿侵衣。愿祝届期颐。花间妙语欲无诗。一年歌一词。

祝英台近 六月十一日送叶正则如江陵

驾扁舟，冲剧暑。千里江上去。夜宿晨兴，一一旧时路。百年忘了旬头，被人馋破，故纸里、是争雄处。

怎生诉。欲待细与分疏，其如有凭据。包裹生鱼，活底怎遭遇。相逢樽酒何时，征衫容易，君去也、自家须住。

蝶恋花 甲辰寿元晦

手捻黄花还自笑。笑比渊明，莫也归来早。随世功名浑草草。五湖却共繁华老。

冷淡家生冤得道。旖旎妖娆，春梦如今觉。管个岁华须到了。此花之后花应少。

水调歌头 和吴允成游灵洞韵

人爱新来景，龙认旧时湫。不论三伏，小住便觉凜生秋。我自醉眠其上，任是水流其下，湍激若为收。世事如斯去，不去为谁

留。

本无心，随所寓，触虚舟。东山始末，
且向灵洞与沈浮。料得神仙窟穴，争似提封
万里，大小几琉球。但有君才具，何用问时
流。

念奴娇 送戴少望参选

西风带暑，又还是、长途利牵名役。我
已无心，君因甚，更把青衫为客。邂逅卑飞，
几时高举，不露真消息。大家行处，到头须
管行得。

何处寻取狂徒，可能著意，更问渠侬骨。
天上人间，最好是、闹里一般岑寂。瀛海无
波，玉堂有路，稳著青霄翼。归来何事，眼
光依旧生碧。

卜算子 九月十八日寿徐子才

悄静菊花天，洗尽梧桐雨。倍九周遭烂
漫开，祝寿当头取。

顶戴御袍黄，叠秀金棱吐。仙种花容晚
节香，人愿争先睹。

贺新郎 酬辛幼安再用韵见寄

离乱从头说。爱吾民、金缯不爱，蔓藤
累葛。壮气尽消人脆好，冠盖阴山观雪。亏
杀我、一星星发。涕出女吴成倒转，问鲁为

齐弱何年月。丘也幸，由之瑟。

斩新换出旗麾别。把当时、一桩大义，拆开收合。据地一呼吾往矣，万里摇肢动骨。这话霸、又成痴绝。天地洪炉谁扇鞴，算于中、安得长坚铁。淝水破，关东裂。

垂丝钓 九月七日自寿

菊花细雨。萧萧红蓼汀渚。景物渐幽，风致如许。秋未暮。又值吾初度。

看天宇。正澄清欲往，登高未也，红尘当面飞舞。几人吊古。乌帽牢收取。短发还羞觑。遐寿身、近五云深处。

彩凤飞 十月十六日寿钱伯同

人立玉，天如水，特地如何撰。海南沈烧著，欲寒犹暖。算从头，有多少、厚德阴功，人家上，一一旧时香案。嚙经惯。

小驻吾州才尔，依然欢声满。莫也教、公子王孙眼见。这些儿、颖脱处，高出书卷。经纶自入手，不了判断。

鹧鸪天 怀王道甫

落魄行歌记昔游。头颅如许尚何求。心肝吐尽无馀事，口腹安然岂远谋。

才怕暑，又伤秋。天涯梦断有书不。大都眼孔新来浅，羡尔微官作计周。

谒金门 送徐子宜如新安

新雨足。洗尽山城袢褥。见说好峰三十六。峰峰如立玉。

四海英游追逐。事业相时伸缩。入境德星须做福。只愁金诏趣。

天仙子 七月十五日寿内

一夜秋光先著柳。暑力平明羞失守。西风不放入帘帟，饶永昼。沈烟透。半月十朝秋定否。

指点芙蓉凝伫久。高处成莲深处藕。百年长共月团圆，女进男，酒称寿。一点浮云人似旧。

水调歌头 和赵用锡

事业随人品，今古几麾旌。向来谋国，万事尽出汝书生。安识鲲鹏变化，九万里风在下，如许上南溟。斥鷃旁边笑，河汉一头倾。

叹世间，多少恨，几时平。霸图消歇，大家创见又成惊。邂逅汉家龙种，正尔乌纱白纈，驰骛觉身轻。樽酒从渠说，双眼为谁明。

洞仙歌 丁未寿朱元晦

秋容一洗，不受凡尘浣。许大乾坤这回大。向上头，些子是雕鹗抟空，篱底下，只有黄花几朵。

骑鲸汗漫，那得人同坐。赤手丹心扑不破。问唐虞、禹汤文武，多少功名，犹自是、一点浮云铲过。且烧却、一瓣海南沈，任拈取，千年陆沈奇货。

祝英台近 九月一日寿俞德载

嫩寒天，金气雨，揽断一秋事。全样霏微，还作小晴意。世间万宝都成，些儿无欠，只待与、黄花为地。

好招致。对此郁郁葱葱，新篁未成醉。翻手为云，造物等儿戏，也知富贵来时，一班呈露，便做出人中祥瑞。

踏莎行 怀叶八十推官

书册如仇，旧游浑讳。有怀不断人应异。千山上去梦魂轻，片帆似下蛮溪水。

已共酒杯，长坚海誓。见君忽忘花前醉。从来解事苦无多，不知解到毫芒未。

南乡子 谢永嘉诸友相饯

人物满东瓯。别我江心识俊游。北尽平

芜南似画，中流。谁系龙骧万斛舟。

去去几时休。犹自潮来更上头。醉墨淋漓人感旧，离愁。一夜西风似夏不。

三部乐 七月廿六日寿王道甫

入脚西风，渐去去来来，早三之一。春花无数，毕竟何如秋实。不须待、名品如麻，试为君屈指，是谁层出。十朝半月，争看抟空霜鹘。

从来别真共假，任盘根错节，更饶仓卒。还他济时好手，封侯奇骨。没些儿、蹒跚勃率。也不是、峥嵘突兀。百二十岁，管做彻、元分人物。

贺新郎 怀辛幼安用前韵

话杀浑闲说。不成教、齐民也解，为伊为葛。樽酒相逢成二老，却忆去年风雪。新著了、几茎华发。百世寻人犹接踵，叹只今两地三人月。写旧恨，向谁瑟。

男儿何用伤离别。况古来、几番际会，风从云合。千里情亲长晤对，妙体本心次骨。卧百尺、高楼斗绝。天下适安耕且老，看买犁卖剑平家铁。壮士泪，肺肝裂。

点绛唇 咏梅月

一夜相思，水边清浅横枝瘦。小窗如昼。

情共香俱透。

清入梦魂，千里人长久。君知否。雨馥云僊。格调还依旧。

又 圣节

电绕璇枢，此时昌运生真主。庆联簪组。喜气生绵宇。

宴启需云，湛露恩均布。锵韶濩。凤歌鸾舞。玉斝飞香醕。

又

碧落蟠桃，春风种在琼瑶苑。几回花绽。一子千年见。

香染丹霞，摘向流虹旦。深深愿。万年天算。玉颗常来献。

又

烟雨楼台，晓来独上无滋味。落花流水。掩映渔樵市。

酒圣诗狂，只遣愁无计。频凝睇。问人天际。曾见归舟未。

南歌子

池草抽新碧，山桃褪小红。寻春闲过小园东。春在乱花深处、鸟声中。

游鞚归敲月，春衫醉舞风。谁家三弄学元戎。吹起闲愁、容易上眉峰。

好事近

篱菊吐寒花，香弄小园秋色。携手画阑

西畔，忆去年同摘。

小亭依旧锁西风，往事已无迹。懒向碧云深处，问征鸿消息。

又

横玉叫清宵，帘外月侵残烛。人在画楼高处，倚阑干几曲。

穿云裂石韵悠扬，风细断还续。惊落小梅香粉，点一庭苔绿。

又 咏梅

的皪两三枝，点破暮烟苍碧。好在屋檐斜入，傍玉奴横笛。

月华如水过林塘，花阴弄苔石。欲向梦中飞蝶，恐幽香难觅。

浣溪沙

小雨翻花落画檐。兰堂香注酒重添。花枝能语出朱帘。

缓步金莲移小小，持杯玉笋露纤纤。此时谁不醉厌厌。

采桑子

桃花已作东风笑，小蕊嫣然。春色暄妍。缓步烟霞到洞天。

一杯满泻蒲桃绿，且共留连。醉倒花前。也占红香影里眠。

朝中措

蓼花风淡水云纤。倚阁卷重帘。索寞败荷翠减，萧疏晚□红添。

魂销天末，眉横远岫，斜挂新蟾。谁信故人千里，此时却到眉尖。

柳梢青

柳丝烟织。掩映小池，鳞鳞波碧。几片飞花，半檐残雨，长亭愁寂。

凭高望断江南，怅千里、疏烟淡日。斗草风流，弄梅情分，教人思忆。

浪淘沙

霞尾卷轻绡。柳外风摇。断虹低系碧山腰。古往今来离别地，烟水迢迢。

归雁下平桥。目断魂销。夕阳无限满江皋。杨柳杏花相对晚，各自无聊。

又 梅

院落晓风酸。春入西园。芳英吹破玉阑干。墙外红尘飞不到，彻骨清寒。

清浅小堤湾。瘦竹团栾。水光疏影有无间。仿佛浣沙溪上见，波面云鬟。

小重山

碧幕霞绡一缕红。槐枝啼宿鸟，冷烟浓。
小楼愁倚画阑东。黄昏月，一笛碧云风。

往事已成空。梦魂飞不到，楚王宫。翠
绡和泪暗偷封。江南阔，无处觅征鸿。

转调踏莎行 上巳道中作

洛浦尘生，巫山梦断。旗亭烟草里，春
深浅。梨花落尽，酴醾又绽。天气也似，寻
常庭院。

向晚情怀，十分恼乱。水边佳丽地，近
前细看。娉婷笑语，流觞美满。意思不到，
夕阳孤馆。

品 令 咏雪梅

潇洒林塘暮。正迤逦、香风度。一番天
气，又添作琼枝玉树。粉蝶无踪，疑在落花
深处。

深沈庭院，也卷起、重帘否。十分春色，
依约见了，水村竹坞。怎向江南，更说杏花
烟雨。

最高楼 咏梅

春乍透，香早暗偷传。深院落，斗清妍。

紫檀枝似流苏带，黄金须胜辟寒钿。更朝朝，
琼树好，笑当年。

花不向沈香亭上看。树不著唐昌宫里玩。
衣带水，隔风烟。铅华不御凌波处，蛾眉淡
扫至尊前。管如今，浑似了，更堪怜。

青玉案

武陵溪上桃花路。见征骑、匆匆去。嘶
入斜阳芳草渡。读书窗下，弹琴石上，留得
销魂处。

落花冉冉春将暮。空写池塘梦中句。黄
犬书来何日许。辋川轻舸，杜陵尊酒，半夜
灯前雨。

诉衷情

独凭江槛思悠悠。斜日堕林邱。鸳鸯属
玉飞处，急桨荡轻舟。

红蓼岸，白苹洲。夜来秋。数声渔父，
一曲水仙，歌断还愁。

南乡子

风雨满苹洲。绣阁银屏一夜秋。当日袜
尘何处去，溪楼。怎对烟波不泪流。

天际目归舟。浪卷涛翻一叶浮。也似我
侬魂不定，悠悠。宋玉方悲庾信愁。

一丛花 溪堂玩月作

冰轮斜辗镜天长。江练隐寒光。危阑醉倚人如画，隔烟村、何处鸣榔。乌鹊倦栖，鱼龙惊起，星斗挂垂杨。

芦花千顷水微茫。秋色满江乡。楼台恍似游仙梦，又疑是、洛浦潇湘。风露浩然，山河影转，今古照凄凉。

清平乐

秋晚，伯成兄往龙兴山中，意其登山临水，不无闺房之思，作此词恼之

银屏绣阁。不道鲛绡薄。嘶骑匆匆尘漠漠。还过夕阳村落。

乱山千叠无情。今宵遮断愁人。两处香消梦觉，一般晓月秋声。

渔家傲 重阳日作

漠漠平沙初落雁。黄花浊酒情何限。红日渐低秋渐晚。听客劝。金荷莫诉真珠满。

坐上少年差气岸。题诗落帽从来惯。戏马龙山当日燕。真奇观。尊前未觉风流远。

丑奴儿 咏梅

黄昏山驿消魂处，枝亚疏篱。枝亚疏篱。

酝籍香风蜜打围。

隔篱鸡犬谁家舍，门掩斜晖。门掩斜晖。
花落花开总不知。

滴滴金

断桥雪霁闻啼鸟。对林花、弄晴晓。画
角吹香客愁醒，见梢头红小。

团酥剪蜡知多少。向风前、压春倒。江
嶂人烟画图中，有短篷香绕。

七娘子 三衢道中作

风流家世传张绪。似灵和新种垂杨缕。
绮席摘词，银台奏赋。当年梦绕蓬山路。

卖花声断蓝桥暮。记吟鞭醉帽曾经处。
蜀郡归来，荆州老去。心情零乱随风絮。

醉花阴

重九，诸公招饮于兹者十有六人，偶掇醉花阴
腔，折堊书之壁间，聊以志时耳。

峻极云端潇洒寺。赋我登高意。好景属
清游，玉友黄花，谩续龙山事。秋风满座芝
兰媚。杯酒随宜醉。行乐任天真，一笑和同，
休问无携妓。

又 再用前韵

姓名未勒慈恩寺。谁作山林意。杯酒且

同欢，不许时人，轻料吾曹事。可怜风月于人媚。那对花前醉。珍重主人情，闻说当年，宴出红妆妓。

汉宫春

雪月相投。看一枝才爆，惊动香浮。微阳未放线路，说甚来由。先天一着，待辟开、多少旬头。却引取，春工入脚，争教消息停留。

官不容针时节，做一般孤瘦，无限清幽。随缘柳绿柳白，费尽雕镂。疏林野水，任横斜、谁与妆修。猛认得，些儿合处，不堪持献君侯。

暮花天

天意微悭，春工多裕，长须未后殷勤。骨瘦挽先，肌韵恰好，花头径尺徐陈。红黄粉紫，更牛家、姚魏为真。留几种，蒂殢中州，异时齐顿浑身。

承平当日开多少，笙歌何限，是甚人人。气入江南，心知芍药，仿佛前事犹存。名品应须，认旧家、雨露方新。成一处，蓓蕾根株，剩看诸谱纷纷。

新荷叶

艳态还幽，谁能洁净争妍。淡抹疑浓，

肯将自在求怜。终嫌独好，任毛嫱、西子差肩。六郎涂涴，似和不似依然。

赫日如焚，诸馀只凭光鲜。雨过风生，也应百事随缘。香须道地，对一池、著甚沈烟。根株好在，淤泥白藕如椽。

秋兰香

未老金茎，些子正气，东篱淡伫齐芳。分头添样白，同局几般黄。向闲处、须一一排行。浅深饶间新妆。那陶令，漉他谁酒，趁醒消详。

况是此花开后，便蝶乱无花，管甚蜂忙。你从今、采却蜜成房。秋英诚商量。多少为谁，甜得清凉。待说破，长生真诀，要饱风霜。

汉宫春

见早梅呈吕一郎中郑四六监岳（题从永乐大典卷二千八百零八梅字韵补）

雪满江头，怪一枝不耐，还漏微阳。诗人越样眼浅，早自成章。群葩如绣，到那时、争爱春长。须知道，未通春信，是谁饱试风霜。

堪笑红炉画阁，问从来寒气，损甚容光。枝头有花恁好，映带新妆。寒窗愁绝，嗅清芬、不料饥肠。都缘是，此君小异，费他万种消详。

桂枝香

仙风透骨。向夏叶丛中，春花重出。骏发天香，不是世间尤物。占些空阔闲田地，共霜轮、伴他秋实。浅非冷蕊，深非幽艳，中无倚握。

任点取、龙涎笃耨。儿女子看承，万屈千屈。做数珠见，刻画毋盐唐突。不知几树栾团着，但口吻、非鸣云室。是耶非也，书生见识，圣贤心术。

水龙吟

钱王霸图成时，多应是百年遗树。羞将高古，为渠遮映，鱼盐调度。且向空山，趁时多事，四垂盘踞。算兴衰坐阅，权奇磊块，世间□、□斤斧。

又见当天明圣，便弹丸、也难分土。一番整顿，旧家草木，新来雨露。铁石心肠，虬龙根干，亭亭天柱。纵茯苓下结，芎罗高际，怎堪攀附。

临江仙

五百年间非一日，可堪只到今年。云龙欲化艳阳天。从来耆旧传，不博地行仙。

昨夜风声何处度，典型犹在南山。自怜不结傍时缘。著鞭非我事，避路只渠贤。

水龙吟 春恨

闹花深处层楼，画帘半卷东风软。春归翠陌，平莎茸嫩，垂杨金浅。迟日催花，淡云阁雨，轻寒轻暖。恨芳菲世界，游人未赏，都付与、莺和燕。

寂寞凭高念远。向南楼、一声归雁。金钗斗草，青丝勒马，风流云散。罗绶分香，翠绡封泪，几多幽怨。正销魂，又是疏烟淡月，子规声断。

洞仙歌 雨

琐窗秋暮，梦高唐人困。独立西风万千恨。又檐花落处，滴碎空阶，芙蓉院，无限秋容老尽。

枯荷摧欲折，多少离声，锁断天涯诉幽闷。似蓬山去后，方士来时，挥粉泪、点点梨花香润。断送得、人间夜霖铃，更叶落梧桐，孤灯成晕。

虞美人 春愁

东风荡扬轻云缕。时送萧萧雨。水边台榭燕新归。一口香泥湿带、落花飞。

海棠糝径铺香绣。依旧成春瘦。黄昏庭院柳啼鸦。记得那人和月、折梨花。

眼儿媚 春愁

试灯天气又春来。难说是情怀。寂寥聊似，扬州何逊，不为江梅。

扶头酒醒炉香爇，心绪未全灰。愁人最是，黄昏前后，烟雨楼台。

思佳客 春感

花拂阑干柳拂空。花枝绰约柳鬟松。蝶翻淡碧低边影，莺啭浓香杪处风。

深院落，小帘栊。寻芳犹忆旧相逢。桥边携手归来路，踏皱残花几片红。

浣溪沙 南湖望中

爽气朝来卒未阑。可能着我屋千间。不须拄笏望西山。

柳外霎时征马骏，沙头尽日白鸥闲。称心容易足君欢。

贺新郎

人有见诳以六月六日生者，且言喜唱贺新郎，因用东坡屋字韵追寄

镂刻黄金屋。向炎天、蔷薇水洒，净瓶儿浴。湿透生绡裙微褪，谁把琉璃籍玉。更管甚、微凉生熟。磊浪星儿无著处，唤青奴、

记度新翻曲。娇不尽，蕲州竹。

一泓曲水鳞鳞蹙。粉生红、香脐皓腕，
藕双莲独。拂掠乌云新妆晚，无奈纤腰似束。
白筇褥、霞觞浮绿。三岛十洲身在否、是天花、
只怕凡心触。才乱坠，便簌簌。

又

又有实告以九月二十七日者，因和叶少蕴缕字
韵并寄

昵昵骈头语。笑黄花、重阳去也，不成
分数。倾国容华随时换，依旧清歌妙舞。苦
未冷、都无星暑。恰好良辰花共酒，斗尊前、
见在阳台女。朝共暮，定何许。

蓼红徙倚明汀渚。正萧萧、迎风夹岸，
淡烟微雨。筇褥龙涎烧未也，好向儿家祝取。
是有分、分工须与。以色事人能几好，愿衾
稠、无缝休离阻。心一片，丝千缕。

陈梦协

渡江云 寿妇人集曲名

瑞云浓 ,缥缈弦月当庭 ,天香满院。玉女
传言 ,把真珠帘卷。拥鹊桥仙 ,引江城子 ,拟醉
蓬莱宴。吹紫玉箫 ,唱黄金缕 ,按拍声声慢。

昼锦堂前 ,倾杯为寿 ,祝快活年 ,应天长
远。喜似娘儿 ,解称人心愿。梦兰蕙芳 ,种宜
男草 ,丹凤吟非晚。更步蟾宫 ,宴琼林日 ,汉宫
春暖。

陈妙常

杨柳枝

襄王梦里雨云期。两心知。子羔无意恋
琼姬。漫心痴。

吾心恰似絮沾泥。不狂飞。任把杨枝作
柳枝。枉挨尸。

又

清净堂前不卷帘。景幽然。闲花野草漫
连天。莫胡言。

独坐洞房谁是伴，一炉烟。闲来窗下理冰
弦。小神仙。

青玉案

茅屋藏身随所寓。冷淡清虚，正是修真
处。默诵黄庭香一炷。四时节序不关心，自有
逍遥趣。

重门尽日无人过。只有营巢燕来去。放
入双双梁上住。帘幙空悬贮。

西江月

松舍清灯闪闪 ,云堂钟鼓沈沈。黄昏独自展孤衾。未睡先愁不稳。

一念静中思动 ,遍身欲火难禁。强将津液咽凡心。争奈凡心转甚。

杨柳枝

昨宵肠断黄昏约。人寂寞。洞房独对灯花落。无归著。

纱窗几阵东风恶。罗衣薄。今宵何事青鸾邈。肌如削。

摊破浣溪沙

寂寂云堂斗帐闲。炉香消尽爇沈烟。烘却布衾图睡暖 ,转生寒。

霏霏细雨穿窗湿 ,飒飒西风透枕珊。此际道心禁不得 ,故思凡。

鹧鸪天

相堂潭潭数十重。入门马上气如虹。俨然端坐黄堂上 ,忧国忧民俯仰中。蒙下顾 ,谢姑容。仙禽从此脱樊笼。当初只说常清净 ,羞对先生满面红。

临江仙

眉如云开初月 纤纤一搦腰肢。与君相识
未多时。不知因个甚 裙带短些儿。

茶饭不思常是病 终朝如醉如痴。此情犹
恐外人疑。特将心腹事 报与粉郎知。

陈 睦

沁园春

小雪初晴，画舫明月，强饮未眠。念翠鬟双耸，舞衣半卷，琵琶催拍，促管危弦。密意虽具，欢期难偶，遣我离情愁绪牵。追思处，奈溪桥道窄，无计留连。

天天。莫是前缘。自别后、深诚谁为传。想玉篴偷付，珠囊暗解，两心长在，须合金钿。浅淡精神，温柔情性，记我疏狂应痛怜。空肠断，奈衾寒漏永，终夜如年。

清平乐

鬓云斜坠。莲步弯弯细。笑脸双蛾生多媚。百步兰麝香喷。

从前万种愁烦。枕边未可明言。好是蓝桥再渡，玉篴还胜金钿。

陈 楠

水调歌头 赠九霞子鞠九思

夺取天机妙，夜半看辰杓。一些珠露，阿谁运倒稻花头。便向此时采取，宛如碧莲含蕊，滴破玉池秋。万籁风初起，明月一沙鸥。

紫河车，乘赤凤，入琼楼。谓之玉汞，与铅与土正相投。五气三花聚顶，吹著自然真火，炼得似红榴。十月胎仙出，雷电送金虬。

鹊桥仙 赠蛰虚子沙道昭

红莲含蕊，露珠凝碧，飞落华池滴滴。运归金鼎唤丁公，炼得似、一枚朱橘。

三花喷火，五云拥月，上有金胎神室。洞房云雨正春风，十个月、胎仙了毕。

真珠帘 赠海南子白玉蟾

金丹大药人人有。要须是、心传口授。一片白龙肝，一盏醍醐酒。只为离无寻坎有。

移却南宸回北斗。好笑，见金翁姹女，两个厮斗。

些儿铅汞调匀，观汉月海潮，抽添火候。一箭透三关，方表神仙手。兔子方来乌处住，龟儿便把蛇吞了。知否。那两个钟吕，是吾师友。

望江南

黄中宝，须向胆中求。春风令人生万物，乾坤膝下与吾俦。百脉自通流。

施造化，左右火双抽。浩浩腾腾光宇宙，苦烟烟上覆环楼。夫妇渐相谋。

又

玄珠降，丹窟在中宫。九候息调重九数，赤波或进太阳东。心肾遂交通。

逢六变，重六息阴功。火自海门朝帝坐，水从莲萼佐丁公。紫电透玲珑。

又

毛发薄，三转运行阳。胎色渐红阴渐缩，推移岁运助阳刚。育火养中央。

成物象，五转辨微茫。出入尚迟形上小，晨昏时饮玉壶浆。天籁奏笙簧。

又

丹已返，四转运行阴。逢六闭藏阳户气，三关全透合丁壬。龟游任浮沉。

时出入，无碍贯他心。游戏神通常出面，圆光周匝绕千寻。寒暑不相侵。

又

珠自右，紫电入丹城。内养婴儿成赤象，
时逢五转采阳精。火自水中生。

烧鬼岳，紫电起峥嵘。随意嬉游寰海内，
寐如砂磧卧长鲸。时序与偕行。

又

日精满，阴魄化无形。每遇月圆开地户，
神龟时饮碧瑶精。清洁复如冰。

阳砂赤，阴粉色微青。粉换肉兮砂换骨，
凡胎换尽圣胎灵。飞举似流星。

又

形透日，七转任飞腾。幽静深岩图宴坐，
息无来往气坚凝。却粒著其能。

生成火，返本气澄清。九候浴时开地户，
月中取火日求冰。五内换重新。

又

内外变，八转始还元。地带长垂主坎户，
周行胎息贯天门。太始道方存。

纯一体，赤黑气常喷。丹火发时烧内景，
冷泉涌处浴猴孙。神水赤龟吞。

陈彭年

瑞鹧鸪

尽出花钿散宝津。云鬟初剪向残春。因
惊风雨难留世，遂作池莲不染身。贝叶乍翻疑
锦轴，梵声才学误梁尘。从兹艳质归空后，湘
浦应无解佩人。

陈 朴

望江南

中黄宝，须向胆中求。春帝令行生万物，
乾坤膝下与吾侑。百脉自通流。

施造化，左右火双抽。浩浩腾腾充宇宙，
苦烟袅袅上环楼。夫妇渐相谋。

又

玄珠降，丹窟在中宫。九候息调重九数，
赤波忽进太阳东。心肾始交通。

逢六变，重六息阴功。火自海门朝帝坐，
水从莲沼佐丁公。紫电透玲珑。

又

毛发落，丹左运行阳。胎色渐红阴渐小，
推移岁运助乾刚。育火养中央。

成物象，五岳辨微茫。出入尚迟形尚小，
晨昏天籁奏笙簧。常饮玉壶浆。

又

丹往右，四转运行阴。逢六闭藏阳户气，
玉关泉透合丁壬。龟戏任浮沉。

时出入，无碍贯他心。游戏神通常出面，
圆光周匝绕千寻。寒暑不相侵。

又

珠自右，飞电入丹城。内养婴儿盈尺象，
时逢九数采阳精。火向水中生。

烧鬼岳，紫殿势峥嵘。随意出游寰海内，
寐如砂磧卧长鲸。时序与偕行。

又

日精满，阴魄化无形。每遇月圆开北户，
神龟时饮碧瑶玲。形魄岂能停。

阳砂赤，阴粉色微青。粉换肉肌砂换骨，
凡胎换尽圣胎灵。飞举似流星。

又

形透日，七转任飞腾。幽入深岩图宴坐，
息无来去使神凝。却粒著奇能。

生神火，返本气清澄。九候浴时开地户，
月中取火日求冰。五内换重新。

又

内外遍，八转始還元。地带长垂生坎户，
周行胎息贯天门。太始道方存。

纯一体，黑赤气常喷。丹火发来烧内境，
冷泉深处浴猴孙。神水赤龟吞。

又

丹九转，纯一太初颜。内外无为常抱朴，
纵横海外与人间。功行积丘山。

青阙诏，玉简赐金环。饮罢刀圭乘羽驾，
旌幢箫鼓过天关。朝帝列仙班。

陈耆卿

鹧鸪天 母侯置酒南教场赏芙蓉

莫惜花前泥酒壶。沙场千步锦平铺。将军闲试临边手，按出吴宫小阵图。

清露里，晓霜余。娇红淡白更怜渠。人间落木萧萧下，独倚秋江画不如。

又 再赋

艳朵珍丛间舞衣。蹴球场外打红围。小舆穿入花深处，且住簪花醉一卮。

秋欲尽，最怜伊。江梅未破菊离披。情知不与韶华竞，回首西风怨阿谁。

陈潜心

百字令 寿虞守 正月十二

梅峰孕秀 , 庆仙翁、咫尺元宵三夕。盛德温温如玉粹 , 多少殊勋嘉绩。两拥朱幡 , 独清节高谊真难屈。景疏堂下 , 台星长伴南极。

雅羨椿桂联芳 , 金章紫绶 , 拜舞欢声溢。福备宜高仁者寿 , 喜占人间八十。汉重申公 , 周登尚父 , 盛事今犹昔。九重注想 , 蒲车行聘遗逸。

陈 人 杰

沁园春

予以为古今词人抱负所有，妍媸长短，虽已自信，亦必当世名钜为之印可，然后人信以传。昔刘叉未有显称，及以雪车、冰柱二篇为韩文公所赏，一日之名，遂埒张孟。予赏得叉遗集，观其余作，多不称是。而流传至今，未就泯灭者，以韩公所赏题品尔。今才士满世，所负当不止叉如，然而奖借后进，竟未有如韩公者。才难，不其然，有亦未易识。诵山谷之诗，不觉喟然。因作思古人一曲。他时傥遇知己，无妨反骚

不恨穷途，所恨吾生，不见古人。似道傍郭泰，品题季伟，舟中谢尚，赏识袁宏。又似元之，与苏和仲，汲引孙丁晁李秦。今安在，但高风凛凛，坟草青青。

江东无我无卿。政自要胸中分渭泾。叹今人荣贵，只修边幅，斯文寂寞，终欠宗盟。面蹉长江，目迷东野，却笑韩公接后生。知音者，恨黄金难铸，清泪如倾。

又 天问

我梦登天，尽把不平，问之化工。似桂花开日，秋高露冷，梅花开日，岁老霜浓。如此清标，依然香性，长在凄凉索寞中。何

为者，只纷纷桃李，占断春风。

一时列鼎分封。岂猿臂将军无寸功。想世间成败，不关工拙，男儿济否，只系遭逢。天曰果然，事皆偶尔，凿井得铜奴得翁。君归去，但力行好事，休问穷通。

又 留春

春为谁来，谁遣之归，挽之不还。纵小桃秾李，大都寂寞，紫薇红药，未到阑珊。毕竟须归，何妨小驻，容我一尊烟雨间。春无语，只游丝舞蝶，懒上杯盘。

故园。风物班班。奈声利羁留身未闲。望归鸿影尽，白云万里，啼鹃声切，落日千山。春却笑人，年来何事，要得一归如许难。君知否，百八盘世路，尽在长安。

又 守岁

太岁茫茫，犹有归时，我胡不归。为桂枝关约，十年阙下，梅花梦远，半夜天涯。婪尾三杯，胶牙一标，节物依然心事非。长安市，只喧喧箫鼓，催老男儿。

篝灯自理征衣。正历乱愁肠千万丝。想椒盘寂寞，空传旧颂，桃符冷落，谁撰新诗。世事乾忙，人生寡遂，何限春风抛路歧。身安处，且开眉一笑，何以家为。

又 问杜鹃

为问杜鹃，抵死催归，汝胡不归。似辽东白鹤，尚寻华表，海中玄鸟，犹记乌衣。吴蜀非遥，羽毛自好，合趁东风飞向西。何为者，却身羁荒树，血洒芳枝。

兴亡常事休悲。算人世荣华都几时。看
锦江好在，卧龙已矣，玉山无恙，跃马何之。
不解自宽，徒然相劝，我辈行藏君岂知。闽
山路，待封侯事了，归去非迟

又

卢仝有诗云“大岁只游桃李径，春风肯管岁寒
枝。”予每三复斯言，以为叹息。偶因庭竹有感，因
作此词

春事方浓，寂寞此君，谁相品题。到僝
桃僂李，鸠边雨急，埋薇瘞药，燕外泥肥。
鸟影舒炎，黄埃涨暑，又过绿阴青子时。夫
然后，向猷家载酒，诂室题诗。

风标如此清奇。叹世俗炎凉真可悲。看
眼空凡木，云霄直上，心交古干，霜雪相依。
弹压溪山，留连风月，红紫纷纷谁似之。人
间世，这澹中风味，儿辈争知。

又

诗不穷人，人道得诗，胜如得官。有山
川草木，纵横纸上，虫鱼鸟兽，飞动毫端。
水到渠成，风来帆速，廿四中书考不难。惟
诗也，是乾坤清气，造物须慳。

金张许史浑闲。未必有功名久后看。算
南朝将相，到今几姓，西湖名胜，只说孤山。
象笏堆床，蝉冠满座，无此新诗传世间。杜
陵老，向年时也自，并冻衣寒。

又

予弱冠之年，随牒江东漕闱，尝与友人暇日命
酒层楼。不惟钟阜、石城之胜，班班在目，而平淮
如席，亦横陈樽俎间。既而北历淮山，自齐安溯江

泛湖，薄游巴陵，又得登岳阳楼，以尽荆州之伟观，孙刘虎视遗迹依然，山川草木，差强人意。泊回京师，日诣丰乐楼以观西湖。因诵友人“东南妩媚，雌了男儿”之句，叹息者久之。酒酣，大书东壁，以写胸中之勃郁。时嘉熙庚子秋季下浣也

记上层楼，与岳阳楼，酹酒赋诗。望长山远水，荆州形胜，夕阳枯木，六代兴衰。扶起仲谋，唤回玄德，笑杀景升豚犬儿。归来也，对西湖叹息，是梦耶非。

诸君傅粉涂脂。问南北战争都不知。恨孤山霜重，梅凋老叶，平堤雨急，柳泣残丝。玉垒腾烟，珠淮飞浪，万里腥风吹鼓鼙。原夫辈，算事今如此，安用毛锥。

又 丁酉岁感事

谁使神州，百年陆沈，青毡未还。怅晨星残月，北州豪杰，西风斜日，东帝江山。刘表坐谈，深源轻进，机会失之弹指间。伤心事，是年年冰合，在在风寒。

说和说战都难。算未必江沱堪宴安。叹封侯心在，鱣鲸失水，平戎策就，虎豹当关。渠自无谋，事犹可做，更剔残灯抽剑看。麒麟阁，岂中兴人物，不画儒冠。

又 吴兴怀古

落日都门，买得扁舟，乘兴而东。正苕川半夜，月寒似水，苹洲一路，秋老多风。携妓溪山，寻春岁月，往事黄粱昨梦中。高楼上，问何人怀古，湖海元龙。

诸君解后相逢。更休问奚奴金错空。向琐窗看镜，鬓无霜白，玉觥挥酒，脸有潮红。

莼美鲈肥，橙香蟹壮，风味不如归兴浓。明朝去，有西门一水，直与天通。

又 同前韵再会君鼎饮，因以为别

此去长安，说似交游，我来自东。向蒹葭极浦，吟篷泊雨，梧桐孤店，醉帙敲风。青市生涯，白洲活计，都在水乡鱼稻中。邮亭上，俯清流长啸，惊起虬龙。

雪山面面相逢。便回首旧游云水空。有连天秋草，寒烟借碧，满城霜叶，落照争红。六代蜂窠，七贤蝶梦，勾引客愁如酒浓。人间世，只醉乡堪向，休问穷通。

又 吴门怀古

草满姑苏，问讯夫差，今安在哉。望虎丘苍莽，愁随月上，蠡湖浩渺，兴逐潮来。自古男儿，可人心事，惆怅要离招不回。离之后，似舞阳几个，成甚人才。

西风斜照徘徊。比旧日江南尤可哀。叹茫茫马腹，黄尘如许，纷纷牛背，青眼难开。应物香销，乐天句杳，无限风情成死灰。都休问，向客边解后，只好拈杯。

又 浙江观澜

日薄风狞，万里空江，隐隐有声。旋千旗万棹，一时东指，青山断处，白浪成层。渐近渐高，可惊可喜，欵作雪峰楼外横。教人讶，是鲸掀鳌扑，蛟斗龙争。

属镂忠恨腾腾。要句践城台都荡平。奈岸身不动，潮头自落，又如飞剑，斫倒鼂城。若到夜深，更和月看，组练分明十万兵。尤

奇特，有稼轩一曲，真野狐精。

又 赠陈用明

把酒西湖，花月三年，不见家山。想荆州座上，消磨岁月，唐风集里，收卷波澜。鹤邑朝帆，鲈乡夕棹，来往菰蒲何处间。应思我，似骑驴杜甫，长在长安。

相逢依旧开颜。听玉屑霏霏当暑寒。笑髯生如许，尚夸年少，心忙未了，浪说身闲。尘梦无凭，菟裘堪老，付子声名吾欲还。斜阳外，把平生心事，同倚阑干。

又 送陈起莘归长乐

过了梅花，纵有春风，不如早还。正燕泥日暖，草绵别路，莺朝烟澹，柳拂征鞍。黎岭天高，建溪雷吼，归好不知行路难。龟山下，渐青梅初熟，卢橘犹酸。

名场老我闲关。分岁晚诛茅湖上山。叹龙舒君去，尚留破砚，鱼轩人老，长把连环。镜影霜侵，衣痕尘暗，赢得狂名传世间。君归日，见家林旧竹，为报平安。

又 送高君绍游雪川

斗酒津亭，方送月芎，夫君又行。正夕阳枯竹，低回征路，寒烟衰草，迤邐离情。京洛风尘，吴兴山水，等是东西南北人。思君处，只梅花解后，心目开明。

江湖夜雨青灯。曾说尽百年闲废兴。叹屠龙事业，依然汗漫，歌鱼岁月，政尔峥嵘。但使豫州，堪容玄德，何必区区依景升。需时耳，算不应长是，竖子成名。

又 送郑通父之吴门谒宋使君

塞外江山，如此萧条，可堪别离。纵虹桥烟浪，要君怀古，凤城风雨，奈我相思。玉茧挥诗，金鲸泻酒，件件清狂分付谁。长安市，有几多心事，岁老相期。

春风渐到梅枝。算我辈荣枯应似之。莫提携剑铗，悲歌一曲，摩挲髀肉，清泪双垂。话到辛酸，居然慷慨，跃马岁年心自知。君行矣，有广平东阁，堪著男儿。

又 庚子岁自寿

未省吾生，石室云林，金门玉堂。但吕公来说，风神清怪，甘公来说，寿禄高强。果若人言，自应年少，曳紫鸣珂游帝乡。何为者，更风尘牢落，岐路回皇。

替人缝嫁衣裳。奈未遇良媒空自伤。岂平生犹欠，阴功活蚁，从前未卜，吉地眠羊。岁晏何如，时来便做，但恐鬓毛容易霜。今休问，且揆予初度，满引金觞。

又 辛丑岁自寿

五彩云中，群玉峰头，是吾故乡。为瑶池侍宴，偶违酒令，玉皇降敕，谪作诗狂。桧柏风姿，山林气象，未到中年先老苍。西湖路，尽留连光景，傲睨冰霜。

东窗。剪烛焚香。剩满引梅花进寿觞。梦群仙相庆，烹炮麟凤，十洲同往，骖翳鸾凰。约向人间，尽偿吟债，依旧乘风来帝旁。如今未，且百年管领，橘绿橙黄。

又 赠人

如此男儿，可是疏狂，才大兴浓。看曹瞒事业，雀台夜月，建封气概，燕子春风。叱咤生雷，肝肠似石，才到尊前都不同。人间世，只婵娟一剑，磨尽英雄。

半生书剑无功。漫赢得闲情如二公。向紫云歌畔，玉最满，红桃笑里，金错长空。驰陌三年，牛腰几束，半在兰香巾笥中。君知否，是扬州景物，消得司封。

又 送宗人景召游姑苏

世路如秋，万里萧条，君何所之。想鲈乡烟水，尚堪垂钓，虎丘泉石，尽可题诗。橙弄霜黄，芦飘雪白，何处西风无酒旗。经行地，有会心之事，好吐胸奇。

一邱封了要离。问世上男儿今有谁。但一尊相属，居然感慨，扁舟独往，可是嵌寄。齐邸歌鱼，扬州跨鹤，风味浅深君自知。匆匆去，算梅边春动，又是归期。

又 次韵林南金赋愁

抚剑悲歌，纵有杜康，可能解忧。为修名不立，此身易老，古心自许，与世多尤。平子诗中，庾生赋里，满目江山无限愁。关情处，是闻鸡半夜，击楫中流。

澹烟衰草连秋。听鸣鸠声声相应酬。叹霸才重耳，泥涂在楚，雄心元德，岁月依刘。梦落莼边，神游菊外，已分他年专一丘。长安道，且身如王粲，时复登楼。

又

南金又赋无愁。予曰：丈夫涉世，非心木石，安得无愁时，顾所愁何如尔。杜子美平生困蹶不偶，而叹老羞卑之言少，爱君忧国之意多，可谓知所愁矣。若于著衣吃饭，一一未能忘情，此为不知命者。故用韵以反骚

我自无忧，何用攒眉，今忧古忧。叹风寒楚蜀，百年受病，江分南北，千载归尤。洛下铜驼，昭陵石马，物不自愁人替愁。兴亡事，向西风把剑，清泪双流。

边头。依旧防秋。问诸将君恩酬未酬。帐书生浪说，皇王帝霸，功名已属，韩岳张刘。不许请缨，犹堪草檄，谁肯种瓜归故邱。江中蜃，识平生许事，吐气成楼。

又 送马正君归东嘉

尽典春衣，换酒津亭，送君此行。叹清朝有道，何曾逐客，有司议法，忍及书生。归去来兮，噫其甚矣，见说江涛也不平。君之友，岂都无义士，剖胆相明。

挑诗行李如冰，正趁得越山桃李春。把从前豪举，著些老气，不应造物，到底无情。雁荡烟霞，凤城风雨，两地相思魂梦清，重来否，算海波。

又 咏西湖酒楼

南北战争，惟有西湖，长如太平。看高楼倚郭，云边矗栋，小亭连苑，波上飞甍。太守风流，游人欢畅，气象迥来都斩新。秋千外，剩钗骈玉燕，酒列金鲸。

人生。乐事良辰。况莺燕声中长是晴。

正风嘶宝马，软红不动，烟分采鹢，澄碧无声。倚柳分题，藉花传令，满眼繁华无限情。谁知道，有种梅处士，贫里看春。

又

同林义倩游惠觉寺，衲子差可与语，因作葛藤语示之

万法皆空，空即是空，佛安在哉。有云名妙净，可遮热恼，海名圆觉，堪洗尘埃。翠竹真如，黄花般若，心上种来心上开。教参熟，是菩提无树，明镜非台。

偷闲来此徘徊。把人世黄梁都唤回。算五陵豪客，百年荣贵，何如衲子，一钵生涯。俯仰溪山，婆娑松桧，两腋清风茶一杯。拿舟去，更扫尘东壁，聊记曾来。

又 壬寅春寓东林山中有感而作

懒学冯君，弹铗歌鱼，如今五年。为西湖西子，费人料理，东林东老，特地留连。坐注虫鱼，行吟雌霓，竟负逍遥第一篇。过从少，但赤髭白足，时复谈禅。

倚门白水平田。看数点青山无尽天。叹春风心事，已成待兔，夕阳时节，又听啼鹃。如此凄凉，若为排遣，不是诗边即酒边。中宵梦，有逋梅吹雪，坡柳摇烟。

又 赋月潭主人荷花障

云锦亭西，记与诗人，拍浮酒船。看洛川妃子，锦衾照水，汉皋游女，玉佩摇烟。秋老芳心，波空艳质，惟见寒霜凋碧圆。争知道，有西湖五月，长在尊前。素纨红障相

鲜。更澹静一枝真叶仙。向风轩摇动，但无香耳，蓼丛掩映，自是天然。猊背生烟，蜡心吐月，赢得吴娃歌采莲。陈公子，似日休钟爱，兴满吟边。

又 饶镜游吴中

易得仲宣，难得世间，有刘景升。叹男儿未到，鸣珂谒帝，此身那免，弹铗依人。橘自盈洲，莼难共器，一榻相看如越秦。元龙者，独门前有客，胸次无尘。

君今重莅诗盟。载弄玉飞琼车后行。过鸱夷西子，曾游处所，水云应喜，重见娉婷。张禹堂深，马融帐暖，吟罢不妨丝竹声。松江上，约扁舟棹雪，同看梅春。

又

淳祐壬寅黄钟之月，连日风雨。陈月潭以上浣三日举神霄将吏之祀，登坛焚篆，忽云开晴，作沁园春歌之

道骨仙风，自天上来，月潭主人。把玉清宝印，按行川岳，神霄铁尺，鞭叱雷霆。雨部收晴，日君腾照，一寸灵章飞杳冥。幡旗外，觉阴风肃肃，奔走神兵。

登坛沥酒刑牲。有法馔如山饱万灵。想乖龙惊起，碧潭无底，妖蟆戮尽，珪月长明。行比旌阳，功高李靖，玉府丹台登姓名。平生志，合为霖为雨，大慰苍生。

又

姑苏新邑有善为计然之术者，家用以肥。既而作堂佚老，扁曰闲贵，盖取唐人“白衣闲亦贵，何必谒天阶”之句。友人池袭父邀予同赋，因作长短

句遗之

禁鼓蓬蓬，忙杀公侯，穴城影中。正花
前豪士，宿醒未解，松间逋客，清梦才浓。
龙尾危机，犀围长物，何必飞书交子公。人
间世，只闲之一字，受用无穷。

主人窗户玲珑。悟富贵荣华回首空。向
竹梧侧畔，聚先秦录，兰荪里许，吟晚唐风。
琴外鸿归，棋边鹭静，天把一丘荣此翁。孙
刘辈，枉百年争战，一味雌雄。

陈汝羲

减字木兰花

纤纤素手。盘里醉花新点就。对叶双心。
别有东风意思深。

琼沾粉缀。消得玉堂留客醉。试嗅清芳。
别有红罗巧袖香。

陈若晦

满庭芳 游大涤赋

五洞深沈 ,九峰回抱 ,望中云汉相侵。暮春天气 ,宫殿翠烟深。一片山光澹净 ,溪月上、碧水浮金。琼楼杪 ,仙人度曲 ,空外响虚音。

龙香 ,时暗引 ,青鸾白鹤 ,飞下秋阴。露华冷、琼珠点缀瑶林。犹记华胥梦断 ,从别后、几许追寻。人间世 ,逝川东注 ,红日又西沈。

陈 若 水

沁园春 寿游侍郎

某恭审某官受天异稟，间世笃生。光辅三朝，伟甚忠清之节；退安一壑，粹然恬淡之风。帝眷耆英，神绥福祉。某不量寸朽，切庇万间。心之所祈，姑寄沁园春之赋；仁者必寿，愿同庄椿岁之多。俯伏露忱，仰祈电盼。

拂袖归来，懒踏前回，京华软尘。算宦游虽好，何如生处，急流勇退，赢得闲人。身羡仙翁，萧然野服，笑咏东溪溪上亭。头犹黑、甚丰姿鹤瘦，标致梅清。

今年转觉精神。便次第平头八十人。肯又抛渭钓，似周尚父，且来洛社，作宋耆英。报答明恩，一时分付，贤子贤孙事业新。丹心在，尚瓣香岁岁，遥祝尧龄。

陈三聘

满江红 冬至

薄日轻云，天气好、相将祈谷。民情喜、颂声洋溢，清风斯穆。饮酒不多元有量，吟诗无数添新轴。对古人、一笑我真愚，君无俗。

斜川路，经行熟。黄花在，归心足。问渊明去后，有谁能属。神武衣冠惊梦里，江湖渔钓论心曲。但从今、散发更披襟，谁能束。

又

天岂无情，天若道、有情亦老。功名事、问天因甚，蒙人不了。好伴云烟耕谷口，休将翰墨传江表。算鬓边、能得几春风，惊秋早。

陶令伊，张京兆。怀舒啸，贪荣耀。尽南柯一梦，漏残钟晓。滕阁暮霞孤鹜举，庾楼明月乌飞绕。念老来、于此兴无穷，知音少。

又 雨后携家游西湖，荷花盛开

绀縠浮空，山拥髻、晚来风急。吹骤雨、

藕花千柄，艳妆新浥。窥鉴粉光犹有泪，凌波罗袜何曾湿。讶汉宫、朝罢玉皇归，凝情立。

尊前恨，歌三叠。身外事，轻飞叶。怅当年空击，誓江孤楫。云色远连平野尽，夕阳偏傍疏林入。看月明、冷浸碧琉璃，君须吸。

又

斜日熔金，三万顷、棹歌齐举。风不动、采苹双桨，翠鬟相语。月殿欲浮蟾兔魄，海神不放鱼龙舞。到今宵，秋气十分清，无今古。

君试唤，扁舟侣。来伴我，潇湘渚。共夷犹春浪，笑歌秋浦。霸越独高身退后，尘缨未濯人谁许。叹酒杯、不到子陵台，刘伶土。

千秋岁 重到桃花坞

当年渔隐，路转桃溪汇。流水下，青山外。客行花径曲，月上松门对。撑艇子，雪中蓑笠亲曾载。

老去谁倾盖。腰瘦频移带。人健否，花仍在。明年春更好，来向花前醉。青鬓改，恁时难拚千金买。

浣溪沙 烛下海棠

酒力先从脸晕生。粉妆新丽笑相迎。晓

寒高护彩云轻。

不语似愁春力浅，有情应恨烛花明。更于何处觅倾城。

又

翠幕遮笼锦一丛。尊前初见浅深红。淡云和月影葱笼。

醉态只疑春睡里，啼妆愁听雨声中。更烧银烛醉东风。

又 新安驿席上留别

不怕春寒更出游。兰桡飞动却惊鸥。烟光佳处辄迟留。

屏曲未曾歌醉梦，眉尖空只锁闲愁。从教丝柳绊行舟。

又

越浦潮来信息通。吴山不见暮云重。人生何事各西东。

烟外好花红浅淡，雨余芳草绿葱茏。苦无欢意敌春浓。

又 元夕后三日王文明席上

点检尊前花柳丛。于中偏占牡丹风。等闲言语惯迎逢。

扇影不摇珠的砾，钗梁斜亸玉玲珑。梦魂长向楚江东。

又

不跃银鞍与绣鞦。曲筇芒屨见衰年。寻幽来立渡头船。

碧涧芹羹珍下箸，红莲香饭乐归田。不

妨尊酒兴悠然。

又

帘押低垂月影疏。梅枝和雪玉相扶。儿
家春信入来无。

半坠宝钗慵览镜，任偏罗髻却拈书。琴
心谁与问相如。

朝中措 丙午立春大雪，是岁十二月九日丑时立春

朝来和气满西山。拄颊小阑干。柳色野
塘幽兴，梅花纸帐轻寒。

三杯淡酒，玉腴蔬嫩，青缕堆盘。细写
池塘诗梦，玉人剪做春幡。

又

求田何处是生涯。双鬓已先华。随分夏
凉冬暖，赏心秋月春花。

吾年如此，愁来问酒，困后呼茶。结社
竹林诗老，卜邻江上渔家。

又

去年曾醉杏花坊。柳色间轻黄。重觅旧
时行迹，春风满路梅香。

平沙岸草，夫差故国，知是吾乡。梦断
数声柔橹，只应已过横塘。

又

草堂春过一分余。幽事酒醒初。琴调细
鸣焦木，矢声不断铜壶。

关心药裹，忘年蓑笠，自著潜夫。雨后

长铗东麓，月明短艇西湖。

又

秋山横截半湖光。湖渚橘枝黄。纨扇罢摇蟾影，练衣已怯风凉。

插红裂蟹，银丝鲙鲫，莫负传觞。醉里乾坤广大，人间宠辱兼忘。

蝶恋花

阆阖城西山四面。鸭绿鳞鳞，轻拍横塘岸。一阵东风羊角转。望中已觉孤帆远。

独恨寻芳来较晚。柘老桑稠，农务村村遍。山鸟劝酤官酒贱。炊烟深巷听缲茧。

南柯子

别后惊人远，归心怯橹柔。晚天凉思冷于秋。冷浸一溪明月、水涵流。

醉里狂仍在，吟余趣极幽。夜深何用数更筹。别有好风吹酒、不须求。

又

烟树观前浦，风苹听远洲。等闲来上水边楼。怅望天涯、何处有归舟。

香断灯花夜，歌停扇影秋。欲缄尺素说离愁。不见双鱼、空有大江流。

又 七夕

月傍云头吐，风将雨脚吹。夜深乌鹊向南飞。应是星娥颦恨、入双眉。

旧怨垂千古，新欢只片时。一年屈指数佳期。到得佳期别了、又相思。

水调歌头

玉鉴十分满，清露一年秋。漂流踪迹，谁念楚尾与吴头。此夜刮明尘眼。望极好张诗胆。何处有高楼。浩荡银潢冷，缥缈白云浮。

笑劳生，难坎止，亦乘流。阑干拍碎，清夜起舞不胜愁。万里关河依旧。一寸功名乌有。清泪滴衣裘。老去心空在，归梦绕苹洲。

又 燕山九日作

有客念行役，劲气凜于秋。男儿未老，衔命如虏亦风流。决定平戎方略，恢复旧燕封壤，安用割鸿沟。莫献肃霜马，好衣白狐裘。

我何人，怀壮节，但凝愁。平生未逢知己、吟伍实堪羞。金马文章何在，玉鼎勋庸何有，一笑等云浮。拚断好风月，羯鼓打梁州。

西江月

诗眼曾逢花面，画图还识春娇。当年风格太妖饶。粉腻酥柔更好。

酒晕不温香脸，玉慵犹怯轻绡。春风别后又秋高。再见只应人老。

又

春事已浓多日，游人偏盛今年。梨花寒食雨余天。鸭绿含风浪浅。

翠袖半黏飞粉，罗衣尚怯轻寒。不辞归路委香钿。门外东风如箭。

鹊桥仙 七夕

银潢仙仗，离多会少，朝暮世情休妒。夜深风露洒然秋，又莫是、轻分泪雨。

云收雾散，漏残更尽，遥想双星情绪。凭谁批敕诉天公，待留住、今宵休去。

宜男草

摇落丹枫素秋后。舞长亭、尚余衰柳。别梦回、忆得霜柑分我，应自浓香噀手。

宿醒谁解三杯酒。晓山横、望中衔斗。人去也、纵得相逢似旧，问当日、红颜在否。

又

绿水黏天净无浪。转东风、縠纹微涨。个中趣、莫遣人知，容我日日、扁舟独往。

平生书癖已无恙。解名缰、更逃羁网。春近也、梅柳频看，枝上玉蕊、金丝暗长。

秦楼月

云衣薄。春晴自有东风掠。东风掠。试

听枝上，几声乾鹊。

曲屏心事新题却。离愁何用堆眉角。堆眉角。今朝莫是，打头风恶。

又

花前狭。翠茵围坐花阴合。花阴合。闲情不似，一双狂蝶。

春沟何处寻红叶。春寒料想罗衣怯。罗衣怯。午醺醒未，翠衾重叠。

又

光风薄。杨花欲谢春应觉。春应觉。一庭红杏，粉花吹落。

冶游无复飞红索。凭高独上湖边阁。湖边阁。黄昏独倚，画阑西角。

又

青楼缺。楼心人待黄昏月。黄昏月。入帘无奈，柳绵吹雪。

谁人弄笛声呜咽。伤春未解丁香结。丁香结。鳞鸿何处，路遥江阔。

又

春膏集。新雷忽起龙蛇蛰。龙蛇蛰。柳塘风快，水流声急。

伤心有泪凭谁浥。尊前容易青衫湿。青衫湿。渡头人去，野船鸥立。

念奴娇

浮云吹尽，卷长空、千顷都凝寒碧。兔

杵无声风露冷，天也应怜人寂。故遣姮娥，
驾蟾飞上，玉宇元同色。天津何事，此时偏
界南北。

不但对影三人，我歌君和，我舞君须拍。
涤洗胸中愁万斛，莫问今宵何夕。老矣休论，
著鞭安用，一笑真狂客。夜深归去，烂然溪
上阡陌。

又

晴风丽日，算东君、坼遍梅心桃萼。独
有名花开殿后，一笑嫣然如昨。黄袂层肤，
霞冠高拥，多态春才觉。雨巾风帽，故人来
趁花约。

好是罗绮添春，香风环坐，半醉金钗落。
老去心情难似旧，手捻花枝为乐。麝馥萦愁，
妆花凝恨，莫惜金荷酌。酒阑花睡，梦魂重
到京洛。

又

水空高下，望沈沈一色，浑然苍碧。天
籁不鸣凉有露，金气横秋寂寂。玉宇琼楼，
望中何处，月到天中极。御风归去，不愁衣
袂无力。

此夜飘泊孤篷，短歌谁和，自笑狂踪迹。
咫尺蓝桥仙路远，杳杳云英消息。疏影婆娑，
恍然身世，我是尊前客。一声凄怨，倚楼谁
弄长笛。

又

余霞飞绮，望长天、顷刻云容凝碧。今
夕江皋风力软，明日波心头白。客舸东流，

语离深夜，遣我新愁积。春融花丽，定知天相行色。

别后一纸乡书，故人相问，好趁秋鸿翼。空有佳人千点泪，锦字机中曾织。利锁名缰，古今同是，谁失知谁得。来朝愁望，旧楼何处西北。

又 和徐尉游石湖

扁舟此计，问当年、谁与寻盟鸥鸟。许国勋名彝鼎在，风月不妨吟笑。碧草台边，红云溪上，寿杖扶诗老。水浮天处，未应俗驾曾到。

盛事埒美知章，鉴湖君赐，宸翰今题号。指点飞烟轻霭外，有路直通仙岛。蓑笠渔船，琴书客坐，清夜尊罍倒。未须归去，片蟾初上林表。

惜分飞

莫唱骊驹容首聚。花径重来微步。从此朝天去。故山怨鹤栖猿侣。

试卜西园春在否。无奈蒙蒙细雨。明日长亭路。断魂芳草人何处。

梦玉人引

别来何处，酒醒后，梦难觅。晚日溪亭，清晓便挂帆席。满载离愁，指去程、还作江南行客。目断层城，数迢迢山驿。

素巾空染，泪痕斑、应是暗中滴。记得

轻分，玉箫犹自凄咽。昨夜东风，梅柳惊春色。料伊也、没心情，过却好天良夕。

又

倚阑干久，人不见，暮云碧。芳草池塘，春梦暗惊诗客。昨夜溪梅，向空山雪里轻匀颜色。好赠行人，折枝南枝北。雨巾风帽，昔追游、谁念旧踪迹。料得疏篱，暗香时度风息。淡月微云，有何人消得。便归去、踏溪桥，慰我经年思忆。

如梦令

红紫不将春住。风定更飘无数。溪涨绿含风，短艇晚横沙渡。归去。归去。肯念西池鸳鹭。

又

珍重故人相许。来向水亭幽处。文字间金钗，消尽晚天微暑。无雨。无雨。不比寻常端午。

菩萨蛮

筇枝探得梅开了。青鞋渐踏江头草。日日作东风。海棠相次红。

离多良会少。此计应须早。莫待作行人。却将愁送春。

又 元夕立春

春城办得红蕖了。红蕖未点春先到。新

月入新年。方才今夜圆。

云屏谁为隔。肠断金钗客。好语写春幡。
都教席上看。

又

杨花满院飞红索。春光不似人情薄。楼阁断霞明。梨花开晚晴。

玉虬香散后。扶困三杯酒。不是听思归。
归心思此时。

临江仙

夜饮只愁更漏促，留连笑罨蔷薇。歌声
缭绕彻帘帏。坐中清泪落，梁上暗尘飞。

重睹舞腰惊束素，不应更褪罗衣。别来
容易见来稀。次公狂已甚，不醉亦忘归。

又

白首故人重会面，论交尔汝忘形。从今
心迹喜双清。飞鸿追往事，为蝶笑馀生。

琥珀杯浓春正好，此怀端为君倾。旧时
猿鹤敢寒盟。鸠居从拙计，鹏翼任高程。

减字木兰花

凝云不动。玉海无声千丈冻。来倚阑干。
襟袖凭虚彻骨寒。

归心易折。后夜月明应恨别。罨画图边。
著我披蓑上钓船。

又

东篱黄菊。细捻香枝人事熟。少缓芳尊。

且醉侬家曲米春。

老人斋戒。底事新来移角带。归梦相关。
明月松江万顷宽。

又

盈盈袅袅。欲问卿卿还好好。无奈娇何。
摺摺湘裙薄薄罗。

尊前顾曲。舞作回风花拍促。压尽时流。
棋里输伊一百筹。

又

先生困熟。万卷书中聊托宿。似怯清寒。
更熟都梁向博山。

游仙梦杳。啼鸟声中春又晓。未著乌纱。
独坐溪亭数落花。

又

殷勤举白。昨夜东风犹有雪。莫恨春迟。
曾见梅花第一枝。

阴晴未决。早晚清明新火活。梦绕秦楼。
欲趁归潮上客舟。

鹧鸪天

酒晕从教上脸丹。春愁何事点眉山。都
将别后深深意，且向尊前细细看。

多少恨，说应难。粉巾空染泪斓斑。炉
猊箏雁长闲却，明月楼心夜正寒。

又

指剥春葱去采苹。衣丝秋藕不沾尘。眼

波明处偏宜笑，眉黛愁来也解颦。

巫峡路，忆行云。几番曾梦曲江春。相逢细把银缸照，犹恐今宵梦似真。

又

昨夜东风怒不成。晓来犹自扫残英。半酸梅子连枝重，无力杨花到地轻。

情易感，涕先零。玉虬香冷更凄清。事如芳草绵绵远，恨比浮云冉冉生。

又 雪梅

翦碎霜绡巧作团。玉纤特地破朝寒。疏花好向钗横见，瘦影难敲月堕看。

将旧恨，入眉弯。不须多样缕金幡。当时千点东风泪，怪见妆成粉末乾。

好事近

我欲御天风，飞上广寒宫阙。撼动一轮秋桂，照人间愁绝。

归来须著酒消磨，玉面点红缬。起舞为君狂醉，更何须邀月。

又

枝上几多春，数点不融香雪。纵有笔头千字，也难夸清绝。

艳桃秾李敢争妍，清怨笛中咽。试策短筇溪上，看影浮波月。

卜算子

雪后竹枝风，醉梦风吹醒。瘦立寒阶满

地春，淡月梅花影。

门外辘轳寒，晓汲喧金井。长笛何人更倚楼，玉指风前冷。

又

涧下水声寒，壑底松风静。时有清香度竹来，步月寻疏影。

往事属东风，试问花应省。曾是花前把酒人，别梦溪堂冷。

三登乐

南北相逢，重借问、古今齐楚。烛花红、夜阑共语。怅六朝兴废，但倚空高树。目断帝乡，梦迷雁浦。

故人疏、梅驿断，音书有数。塞鸿归、过来又去。正春浓，依旧作、天涯行旅。伤心望极，淡烟细雨。

又

注望晓山，晴色丽、晨餐应饱。縠纹平、涨天渺渺。倚藤枝、撑艇子，昔游曾到。江山自古，水云转好。

怅年来、心纵在，盟寒鸥鸟。故人中、黑头渐少。问几时、寻旧约，石矶重扫。一竿钓月，鬓霜任老。

又

久蛰群虬，犹未肆、新雷初启。鼓东风、雨膏为洗。望横塘、越溪路，石湖烟水。西接洞庭，下连甫里。

忆当年、归计早，扁舟从此。祖清风、相门有几。圃堂高、应解笑，纷纷蜗蚁。锦囊雪月，更看醉里。

又

一品归来，强健日、小园幽圃。扁舟兴、恐天未许。想当年、持汉节，众齐咻楚。丹忠此日，盛名千古。

挹词章、师海内，纬文经武。莫寒盟、故山旧侣。到鲈乡、还又是，秋风斜雨。鸣刀鲙雪，未应便去。

浪淘沙

风雨晚春天。芳兴慵悭。浅红稠绿满园间。独有梨花三四朵，留住春寒。

年少跃金鞍。咫尺关山。倦飞如我已知还。洒向东风千点泪，衣上重看。

虞美人 寄人觅梅

融融睡觉东风息。行到溪亭侧。一枝梅玉似人人。索笑依然消瘦、不禁春。

相逢试问情多少。应怪山翁老。翠罗高护结花邻。一任馀芳争学、捧心颦。

又

天公意向人情满。灯月教同看。中秋虽是十分明。不比今宵处处、有华灯。

艳桃秾李歌阑后。更醉青楼酒。不妨饮

尽玉东西。横笛声中春色、要君知。

又

飞琼晓压梅枝重。酒面羊羔冻。谁将绀带逐车翻。明月秦楼昨夜、不胜寒。

何须卷起重帘幕。愁怕春罗薄。玉杯持劝醉厌厌。无奈有人笼袖、出香尖。

又 红木犀

乾红翦碎烦纤玉。相并黄金粟。汉宫素面说明妃。马上秋风应解、著燕支。

黄昏小树堪愁绝。不比梅花月。满天风露透肌凉。插取双枝归去、是谁香。

醉落魄 元夕

东风寒绝。江城待得花枝发。欲知此夜碧天阔。

眼儿媚

酸。何人为我，丁宁驿使，来到江干。

全宋词 陈 善

陈 善

满江红

三月风前花薄命，五更枕上春无力。

陈 诩

眼儿媚 饯别

鬓边一点似飞鸦。休把翠钿遮。二年三载，千拦百就，今日天涯。

杨花又逐东风去，随分入人家。要不思量，除非酒醒，休照菱花。

陈深

水龙吟 寿白兰谷

此翁疑是香山 ,老来愈觉才情富。天孙借与 ,金刀玉尺 ,裁云缝雾。一曲阳春 ,樽前惟欠 ,柳蛮樱素。对苍松翠竹 ,江空岁晚 ,伴明月、倾芳醑。

深谷修兰楚楚。续离骚、载歌初度。麻姑素约 ,天寒相访 ,遗余琼露。拟借青鸾 ,吹笙碧落 ,采芝玄圃。奈玉堂催召 ,文园醉叟 ,草凌云赋。

贺新郎

寿黄春谷 ,时自南州过浙右相宅 ,合卺有期 ,适逢寿日

丹凤翔云表。览德辉、翩然飞下 ,翠蓬仙岛。银汉无声天似水 ,昨夜新凉多少。听一曲、琼箫音渺。千尺秦台凌空峻 ,见一双、翠羽先飞到。披紫雾 ,揽瑶草。

风流别乘当英妙。对江山、掀髯把酒 ,浩歌长啸。绿发公侯何足浼 ,自是无双才调。况槐荫、青青天杪。月殿姮娥云深处 ,近清秋、丹

全宋词 陈深

桂催开早。斟绿醕 ,戴花帽。

沁园春 次日兰谷韵

浪迹烟霞 ,有酒千钟 ,有书五车。任从来
萧散 ,闲心似水 ,何堪妩媚 ,笑面如花。濯发沧
浪 ,放歌江海 ,肯被红尘半点遮。谁知道 ,抱无
名钜璞 ,重价难赊。

嘻嗟。大泽龙蛇。且蟠屈、深潜得计些。
看淋漓醉墨 ,神情自足 ,摩挲雄剑 ,肝胆无邪。
渭水烟蓑 ,营丘绣袞 ,出处何尝有异耶。今何
在 ,但素蟾东出 ,红日西斜。

齐天乐 八月十八日寿妇翁 ,号菊圃

秋涛欲涨西陵渡 ,江亭晓来雄观。帝子吹
笙 ,洛妃起舞 ,应喜蓬宫仙诞。斗墟东畔。望
缥缈星槎 ,来从河汉。明月楼台 ,绣筵重启曼
桃宴。

庄椿一树翠色 ,五枝芳桂长 ,金蕊玉干。
自笑狂疏 ,尊前起寿 ,不似卫郎温润。一卮泛
满。羨彭泽风流 ,醉巾长岸。老圃黄花 ,清香
宜岁晚。

西江月 制香

龙沫流芳旖旎 ,犀沈锯削霏霏。薇心玉露
练香泥。压尽人间花气。

银叶初温火缓 ,金猊静袅烟微。此时清赏

只心知。难向人前举似。

虞美人 题玉环玩书图

玉搔斜压乌云堕。拄颊看书卧。开元天子惜娉婷。一笑嫣然何事、便倾城。

马嵬风雨归时路。艳骨销黄土。多情谁写画图中。江水江花千古、恨无穷。

洞仙歌 八月十七日寿耕参夫人 时命羽士设醮

银波湛碧 ,遥泛仙槎早。婺宿荧煌瑞云晓。庆芳传丹桂 ,欢动连枝 称寿处 ,一簇蓬莱翠窈。

步虚声宛转 ,清彻瑶坛 疑是钧霄凤音渺。正金姥、礼虚皇 ,天阶净 ,凉入绡衣风袞。想金书、秘字赐长生、进九酝霞卮 练颜长好。

陈师道

菩萨蛮 七夕

行云过尽星河烂。炉烟未断蛛丝满。想得两眉颦。停针忆远人。

河桥知有路。不解留郎住。天上隔年期。人间长别离。

又

东飞乌鹊西飞燕。盈盈一水经年见。急雨洗香车。天回河汉斜。

离愁千载上。相远长相望。终不似人间。回头万里山。

又

绮楼小小穿针女。秋光点点蛛丝雨。今夕是何宵。龙车乌鹊桥。

经年谋一笑。岂解令人巧。不用问如何。人间巧更多。

又

银潢清浅填乌鹊。画檐急雨长河落。初月未成圆。明星惜此筵。

愁来无断绝。岁岁年年别。不用泪红滋。

年年岁岁期。

木兰花

阴阴云日江城晚。小院回廊春已满。谁教言语似鹧鸪，深闭玉笼千万怨。

蓬莱易到人难见。香火无凭空有愿。不辞歌里断人肠，只怕有肠无处断。

南柯子 贺彭舍人黄堂成

故国山河在，新堂冰雪生。万家和气贺初成。人在笙歌声里、暗生春。

今代无双士，当年第一人。杯行到手莫辞频。明日凤池归路、隔清尘。

西江月 席上劝彭舍人饮

楼上风生白羽，尊前笑出青春。破红展翠恰如今。把酒如何不饮。

绣幕灯深绿暗，画帘人语黄昏。晚云将雨不成阴。竹月风窗弄影。

菩萨蛮 和彭舍人留别

喧喧车马西郊道。临行更觉人情好。住有一年情。去留千载名。

离歌声欲尽。只作常时听。天上玉堂东。阳春是梦中。

虞美人 席上赠王提刑

城南观阁连云起。形像丹青里。使君笳鼓渡江来。尽带江南春色、放春回。

青春欲住风催去。流水花无数。尊前触目一番新。只有玉楼明月、记游人。

木兰花 汝阴湖上同东坡用六一韵

湖平木落摇空阔。叶底流泉鸣复咽，酒边清漏往时同，花里朱弦纤手抹。

风光过手春冰滑。十事违人常七八。不将白发并黄花，拟下清流揽明月。

南乡子 九日用东坡韵

晴野下田收。照影寒江落雁洲。禅榻茶炉深闭阁，飕飕。横雨旁风不到头。

登览却轻酬。剩作新诗报答秋。人意自阑花自好，休休。今日看时蝶也愁。

又

潮落去帆收。沙涨江回旋作洲。侧帽独行斜照里，飕飕。卷地风前更掉头。

语妙后难酬。回雁峰南未得秋。唤取佳人听旧曲，休休。瘴雨无花孰与愁。

西江月 咏酴醿菊

点点轻黄减白，垂垂重露生鲜。肌香骨秀月中仙。雪满瑶台曳练。

绰约却宜长见，清真不假余妍。殷勤与插小婵娟。要试尊前玉面。

又 咏榴花

叶叶枝枝绿暗，重重密密红滋。芳心应恨赏春迟。不会春工著意。

晚照酒生娇面，新妆睡污胭脂。凭将双叶寄相思。与看钗头何似。

菩萨蛮

髻钗初上朝云卷，眼波翻动眉山远。一曲杜韦娘。当年枉断肠。

佳期如好月。拟满还须缺。别易见应难。长须仔细看。

减字木兰花 九日

清尊白发。曾是登临年少客。不似当年。人与黄花两并妍。

来愁去恨。十载相看情不尽。莫更思量。梦破春回枉断肠。

满庭芳 咏茶

闽岭先春，琅函联璧，帝所分落人间。
绮窗纤手，一缕破双团。云里游龙舞凤，香
雾起、飞月轮边。华堂静，松风竹雪，金鼎
沸潏潏。

门阑。车马动，扶黄籍白，小袖高鬟。
渐胸里轮囷，肺腑生寒。唤起谪仙醉倒，翻
湖海、倾泻涛澜。笙歌散，风帘月幕，禅榻
鬓丝斑。

南乡子

急雨打寒窗。雨气侵灯暗壁缸。窗下有
人挑锦字，行行。泪湿红绡减旧香。

往事最难忘。更著秋声说断肠。曲渚圆
沙风叶底，藏藏。谁使鸳鸯故作双。

清平乐 二首

休休莫莫。更莫思量著。记著不如浑忘
著。百种寻思枉却。

绣囊锦帐吹香。雄蜂雌蝶难双。眉上放
开春色，眼前怜取新郎。

又

藏藏摸摸。好事争如莫。背后寻思浑是
错。猛与将来放著。

吹花卷絮无踪。晚妆知为谁红。梦断阳

台云雨，世间不要春风。

南乡子

阴重雨垂垂。并马西郊试薄衣。红蕊未
开花已过，迟迟。不见东风著意时。

酒到更须辞。报答春光旧有期。勤苦著
书妨作乐，痴痴。莫学衰翁万事非。

罗敷媚 二首 和何大夫酴醾菊

春风吹尽秋光照，瘦减初黄。改样新妆。
特地相逢只认香。

南台九日登临处，不共飞觞。镜里伊傍。
独秀钗头殿众芳。

又

芙蓉不借韶华助，故著缃黄。宿面留妆。
不出寒花只暂香。

伤春不尽悲秋苦，落蕊浮觞。知在谁傍。
一笑盈盈百种芳。

木兰花 和何大夫

荣光休气天为瑞。道祖当天传宝裔。千
年昌运此时逢，四海欢声今日沸。

蒙蒙香雾沾衣腻。漠漠轻寒梅柳细。封
人长有祝尧心，从此年年并岁岁。

木兰花减字 赠晁无咎舞鬟

娉婷娜袅。红落东风青子小。妙舞逶迤。
拍误周郎却未知。

花前月底。谁唤分司狂御史。欲语还休。
唤不回头莫著羞。

又

娉娉袅袅。芍药枝头红玉小。舞袖迟迟。
心到郎边客已知。

当筵举酒。劝我尊前松柏寿。莫莫休休。
白发簪花我自羞。

临江仙

离别寻常今白首，更须竹雨萧萧。不应
都占世间豪。清风居士手，杨柳洛城腰。

文字功名真自误，从今好月良宵。只消
怜取董娇饶。修门君自到，不用我词招。

南柯子 问王立之督茶

天上云为瑞，人间睡作魔，疏帘清簟汗
成河。酒醒梦回眇眼、费摩挲。

但有寒暄问，初无凤鸟过。尘生铜碾网
生罗。一诺十年犹未、意如何。

木兰花减字

匀红点翠。取次梳妆谁得似。风柳腰肢。
尽日纤柔属阿谁。

娇娇小小。却是寻春人较老。著便休痴。
付与风流幕下儿。

清平乐 二首

秋声隐地。叶叶无留意。冰簟流光团扇
坠。惊起双栖燕子。

夜堂帘合回廊。风帷吹乱凝香。卧看一
庭明月，晓衾不耐初凉。

又

秋光烛地。帘幕生秋意。露叶翻风惊鹊
坠。暗落青林红子。

微行声断长廊。熏炉衾换生香。灭烛却
延明月，揽衣先怯微凉。

卜算子

纤软小腰身，明秀天真面。淡画修眉小
作春，中有相思怨。

背立向人羞，颜破因谁倩。不比阳台梦
里逢，亲向尊前见。

洛阳春

酒到横波娇满。和香喷面。攀花落雨祝东风，诮不借、周郎便。

背立腰肢挪捻。更须回盼。多生不作好因缘，甚只向、尊前见。

浣溪沙

暮叶朝花种种陈。三秋作意向诗人。安排云雨要新清。

随意且须追去马，轻衫从使著行尘。晚窗谁念一愁新。

临江仙 送叠罗菊与赵使君

官样初黄过闰九。鲜妍时更宜寒。挽回人意不成阑。香罗堆叶密，芳意著心单。

过与后房歌舞手，轻盈喜色生颜。堕钗拥髻与垂鬟。欲知谁称面，遍插一枝看。

清平乐 并引咏柑子菊

柑子菊姿韵俱胜，如王谢家十五女儿，而名不雅驯，为改之曰官样黄，作清平乐词，且令方内知有此名也。

重重叠叠。娜袅裙千褶。时样官黄香百叶。一岁相逢两节。曲阑绕遍芳丛。一枝作

意妍秾。折得有谁相忆，却须还与秋风。

南乡子 并引

晁大夫增饰披云，务欲压黄楼，而张、马二子，皆当年尊下世所谓英英、盼盼者。盼卒，英嫁，而盼之子莹，颇有家风，而曹妓未有显者，黄楼不可胜也。作南乡子以歌之。

风絮落东邻。点缀繁枝旋化尘。关锁玉楼巢燕子，冥冥。桃李摧残不见春。

流转到如今。翡翠生儿翠作衿。花样腰身官样立，婷婷。困倚阑干一欠伸。

其二 咏棣棠菊

乱蕊压枝繁。堆积金钱闹作团。晚起涂黄仍带酒，看看。衣剩腰肢故著单。

薄瘦却禁寒。牵引人心不放阑。拟折一枝遮老眼，难难。蝶横蜂争只倚阑。

临江仙

曲巷斜街信马，小桥流水谁家。浅衫深袖倚门斜。只缘些子意，消得百般夸。

粉面初生明月，酒容欲退朝霞。春风还解染霜华。肯持鸳绮被，来伴杜家花。

蝶恋花 送彭舍人罢徐

九里山前千里路。流水无情，只送行人去。路转河回寒日暮。连峰不许重回顾。

全宋词 陈师道

水解随人花却住。衾冷香销，但有残妆污。泪入长江空几许。双洪一抹无寻处。

西江月 咏丁香菊

浅色千重柔叶，深心一点娇黄。只消可意更须香。好个风流模样。

玉蕊今谁攀折，诗人此日凄凉。正须蛮素作伊凉。与插钗傍鬓上。

洛阳春

素手拈花纤软。生香相乱。却须诗力与丹青，恐俗手、难成染。

一顾教人微倩。那堪亲见。不辞紫袖拂清尘，也要识、春风面。

菩萨蛮 寄赵使君

清词丽句前朝曲。使君借与灯前读。读罢已三更。寒窗雨打声。

应怜诗客老。要使情怀好。犹有解歌人。尊前未得听。

木兰花减字 和对雪

清愁叠积。更莫迟留春酒逼。吹面和风。梅信新来一线通。

危楼晓望。雪满群山开画障。目断瑶川。

同凭阑干意几般。

卜算子 送梅花与赵使君

梅岭数枝春，疏影斜临水。不借芳华只自香，娇面长如洗。

还把最繁枝，过与偏怜底。试傍鸾台仔细看，何似丹青里。

渔家傲 从叔父乞苏州湿红笺

一舸姑苏风雨疾。吴笺满载红犹湿。色润朝花光触日。人未识。街南小阮应先得。

青入柳条初著色。溪梅已露春消息。拟作新词酬帝力。轻落笔。黄秦去后无强敌。

少年游

御园果子压枝繁。看看分摘无缘。团沙弄雪，劳心费手，不肯暂时圆。

赛神旧愿心儿有，终了待、几时还。芍药梢头，红红白白，一种几千般。

南乡子

袅娜破瓜余。豆蔻梢头二月初。众里腰肢遥可识，应殊。暗里犹能摸得渠。

醉侧不须扶。唤作周家行画图。背立欠伸花絮底，知无。未信丹青画得如。

木兰花减字

今年百五。风日清明尘不举。紫秀红陈。
三节烟花次第春。

来舆去马。千念一空春事谢。白下门东。
谁见初杨弄晚风。

踏莎行

红上花梢，风传梅信。青春欲动群芳竞。
林声鸟语带余寒，江光野色开游径。

乍雨还晴，暄寒不定。重门深院帘帷静。
又还日日唤愁生，到谁准拟风流病。

菩萨蛮 佳人

晓来误入桃源洞。恰见佳人春睡重。玉
腕枕香腮。荷花藕上开。

一扇俄惊起。敛黛凝秋水。笑倩整金衣。
问郎来几时。

卜算子

摇风影似凝，带雪香如抱。开尽南枝到
北枝，不道春将老。

飘飘姑射仙，谁识冰肌好。会有青绡梦
觉人，可爱池塘草。

二

绣幕罩梅花，莫放清香透。鉴里朱颜岁岁移，只道花依旧。

把酒问梅花，知我离情否。若使梅花知我时，料得花须瘦。

三

雪暗岭头云，竹冷溪边树。还似潇湘缥缈人，玉骨笼香雾。

月下幽香度。梦里香魂驻。回首南枝酒半醺，寂寞无寻处。

陈士豪

沁园春 寿胡守

把酒西湖 ,问梅一笑 ,为谁试花。有淡庵人品 ,精忠许国 ,文昌地位 ,清白传家。鸾检封芝 [麟] 符剖竹 ,立马嘶风催戍瓜。从今好 ,听夜郎江上 ,谯鼓喧树。

雌堂玉暖吴娃。向燕寝香中早放衙。但一麾十里 ,风清画戟 ,五溪六诏 ,云拥高牙。褒玺疏荣 ,锋车趣召 ,万寿杯中色翠霞。何须更 ,问武陵玉屑 ,勾漏丹砂。

陈恕可

水龙吟 浮翠山房拟赋白莲

素姬初宴瑶池 ,佩环误落云深处。分香华井 ,洗妆湘渚 ,天姿淡泞。碧盖吹凉 ,玉冠迎晓 ,盈盈笑语。记当时乍识 ,江明夜静 ,只愁被、婵娟误。

几点沙边飞鹭。旧盟寒、远迷烟雨。相思未尽 ,纤罗曳水 ,清铅泣露。玉镜台空 ,银瓶绠绝 ,断魂何许。待今宵试探 ,中流一叶 ,共凌波去。

齐天乐 余闲书院拟赋蝉

碧柯摇曳声何许 ,阴阴晚凉庭院。露湿身轻 ,风生翅薄 ,昨夜绡衣初翦。琴丝宛转。弄几曲新声 ,几番凄惋。过雨高槐 ,为渠一洗故宫怨。

清虚襟度漫与 ,向人低诉处 ,幽思无限。败叶枯形 ,残阳绝响 ,消得西风肠断。尘情已倦。任翻鬓云寒 ,缀貂金浅。蜕羽难留 ,顿觉仙梦远。

又 同上

蛲仙飞佩流空远 ,珊珊数声林杪。薄暑眠轻 ,浓阴听久 ,勾引凄凉多少。长吟未了。想犹怯高寒 ,又移深窈。与整绡衣 ,满身风露正清晓。

微薰庭院昼永 ,那回曾记得 ,如诉幽抱。断响难寻 ,余悲独省 ,叶底还惊秋早。齐宫路杳。叹往事魂消 ,夜阑人悄。谩省轻盈 ,粉奁双鬓好。

桂枝香 天柱山房拟赋蟹

西风故国。记乍免内黄 ,归梦溪曲。还是秦星夜映 ,楚霜秋足。无肠枉抱东流恨 ,任年年、褪匡微绿。草汀篝火 ,芦洲纬箔 ,早寒渔屋。

叙旧别、芳筵荐玉。正香擘新橙 ,清泛佳菊。依约行沙乱雪 ,误惊窗竹。江湖岁晚相思远 ,对寒灯、谩怀幽独。嫩汤浮眼 ,枯形蛻壳 ,断魂重续。

陈 舜 翁

南柯子

德祖家珍熟，钱塘五月中。碧梧桐盖翠筠笼。倾向水晶盘内、斗尝空。

绛粟成团小，清甜笑蜜浓。微酸犹解惨人容。最是玉纤拈处、染轻红。

陈 坦 之

塞翁吟

远碧秋痕瘦，楚玉恨赋凄凉。荷雨碎，泣残妆。系愁在垂杨。秋衣拂叠仙栀露，裁云刀尺犹香。诗锦字，献明珰。肯容易相忘。

思量。空掩抑，分宵缓枕，终不敌、凉
谯漏长。自解佩、兰皋去后，渐消灭、香梅
酝酿，小杜疏狂。年华驶水，鬓影西风，都
付清觞。

沁园春

睡起闻莺，卷帘微雨，黄昏递愁。正青
翰音断，离怀几摺，碧云暮合，千里双眸。
思发花前，人归雁后，误记归帆天际舟。浑
无据，但余香绕梦，频到西楼。

风流。翻是花雠。漫长遣眉山翠不流。
想哀筝绕指，鸿移凤咽，残灯背泣，玉沁春
柔。夜月精神，朝阳微艳，何处瑶台轻驻留。
愁无际，被东风吹去，绿黯芳洲。

柳梢青

绿弱红臞。暖云沁雨，乍有还无。破晓幽禽，平渠流水，春响庭除。

梅酸初著花跗。似滴滴、新愁未舒。几信花风，一痕青烧，万里秦吴。

谒金门

归未卜。频倒金驱纤玉。明月绡窗停剪烛。搦愁题蠹绿。

秋水娟娟鱼目。腰素几分销缩。接得云笺无意读。雕鞍何处宿。

陈惟喆

水调歌头 寿曹太守

近畿贤太守 ,陆地隐神仙。功高玉记 ,名通紫府自长年。拂拭壶中光景 ,游戏人间风月 ,富贵本青毡。十载五分牧 ,惠泽浸江天。

把文章 ,做勋业 ,德才全。龟峰堂上 ,满城和气入歌筵。春在百花庭院 ,坐拥十眉珠翠 ,寿酒吸长川。来岁称觞处 ,稳向凤池边。

陈 辂

兰陵王

角声切。何处梅梢弄雪。还乡梦，玉井楼前，千朵芙蕖插空碧。邻翁问消息。为说红尘倦客。应怜笑、弓剑旌旗，底事留人未归得。

淮山旧相识。记急处笙歌，静里锋镝。隋堤杨柳犹春色。嗟十载人事，几番棋局，青油年少已鬓白。漫惆怅京国。

朱墨。困无力。似病鹤樊笼，老骥羁勒。夕阳不系栖林翼。待添竹东圃，种松西陌。功名休问，吾老矣，付俊杰。

临江仙 陈守美任

三十四年台榭，八千余里江津。去时杨柳正轻颦。重来桃李少，不似旧时春。

风扫半空烟雨，玉虹翠浪如新。可怜笳鼓送行人。白头梳上见，归梦枕边频。

哨 遍 陈抑斋乞致仕

多病倦游，在家又贫，毕竟如何是。十

万钱，骑鹤更扬州，是人间几曾有底。算一生，大都能消几屐，劳神到老成何事。趁齿落已双，发丝在两，归寻闲里滋味。不见青云路有危机。金缕歌声，渐变成悲。待思大东门，忆鹤华亭，悔之晚矣。

休，归去来兮，北山幸有闲田地。地瘠宜瓜菜，引泉凿成方泚。这仲子蔬园，三公不换，况东陵自来瓜美。间走马溪头，倚阑垂钓，解衣自濯清泚。酿山泉、时复一中之。琴横膝。古淡无弦有音徽。送归鸿、暮云千里。蓬莱自古无路，玄圃何时到，只消曲几蒲团，镇日闲庐打盹。这乾坤日月，更远游、问他王子。

陈 无 咎

失调名

一年一度春来，何时是了。花落花开浑是梦，只解把人引调。可怜浮世，等闲过日，却不识，绿水青山，四时都好。

遇笔题诗，逢人饮酒，世间万事，看尽多多少少。怎得似、羽扇纶巾，云屏烟障，几曾受些儿烦恼。便乘风归去小蓬莱，听门外、猿啼鹤啸。

陈袭善

减字木兰花

江南二月。犹有枝头千点雪。邀上芳尊。
却占东君一半春。

尊前眼底。南国风光都在此。移过江来。
从此江南不复开。

渔家傲 忆营妓周子文

鹜岭峰前阑独倚。愁眉蹙损愁肠碎。红
粉佳人伤别袂。情何已。登山临水年年是。

常记同来今独至。孤舟晚扬湖光里。衰
草斜阳无限意。谁与寄。西湖水是相思泪。

陈 偕

八声甘州

菱荷风、浣面恰麦秋，应倒著春衣。渡晓溪云湿，日流尘脚，露泐蛛丝。调翼受风雏燕，弱不解争泥。衬琅玕锦院，竹外蔷薇。

立久阑干凭暖，看行鱼吹沫，波晕平池。藓痕斑础石，渐雨熟梅时。傍短篱、成团粉蝶、掠野花、相逐□高低。忘言处，徽弦乍拂，流水先知。

满庭芳 西湖

岚影浮春，云容阁雨，澄泓碧展玻璃。高低楼观，窗户舞涟漪。别有轻盈水面，清讴起、舟叶如飞。沙堤上，垂鞭信马，柳重绿交枝。

渐残红倒影，金波潋潋，弦管催归。看飘香陈粉，满路扶携。不尽湖边风月，孤山下、猿鸟须知。东风里，年年此水，贮尽是非。

又 送春

榆荚抛钱，桃英胎子，杨花已送春归。未成萍叶，水面绿纹肥。沙暖溪禽行哺，忘机处、

雏母相随。重帘静 ,铜壶昼歇 ,声度竹间棋。

人生如意少 ,乐随春减 ,恨为情离。怕牵
愁勾怨 ,渐近金徽。浮世更相代谢 ,江头明月 ,
渡口斜晖。关情处 ,摩挲钓石 ,莫遣上苔衣。

陈 亚

生查子 药名寄章得象陈情

朝廷数擢贤，旋占凌霄路。自是郁陶人，
险难无移处。

也知没药疗饥寒，食薄何相误。大幅纸
连粘，甘草归田赋。

又 药名闺情

相思意已深，白纸书难足。字字苦参商，
故要槟郎读。

分明记得约当归，远至樱桃熟。何事菊
花时，犹未回乡曲。

又 同上

小院雨馀凉，石竹风生砌。罢扇尽从容，
半下纱厨睡。

起来闲坐北亭中，滴尽真珠泪。为念媚
辛勤，去折蟾宫桂。

又 同上

浪荡去未来，踟躅花频换。可惜石榴裙，
兰麝香销半。

全宋词 陈 亚

琵琶闲抱理相思，必拨朱弦断。拟续断
朱弦，待这冤家看。

陈彦章妻

沁园春

记得爷爷 ,说与奴奴 ,陈郎俊哉。笑世人无眼 ,老夫得法 ,官人易聘 ,国士难媒。印信乘龙 ,夤绿叶凤 ,选似扬鞭选得来。果然是 ,西雍人物 ,京样官坯。

送郎上马三杯。莫把离愁恼别怀。那孤灯只砚 ,郎君珍重 ,离愁别恨 ,奴自推排。白发夫妻 ,青衫事业 ,两句微吟当折梅。彦章去 ,早归则个 ,免待相催。

陈尧佐

踏莎行

二社良辰，千家庭院。翩翩又见新来燕。
凤凰巢稳许为邻，潇湘烟暝来何晚。

乱入红楼，低飞绿岸。画梁时拂歌尘散。
为谁归去为谁来，主人恩重珠帘卷。

陈以庄

水龙吟 记钱塘之恨

晚来江阔潮平，越船吴榜催人去。稽山滴翠，胥涛溅恨，一襟离绪。访柳章台，问桃仙浦，物华如故。向秋娘渡口，泰娘桥畔，依稀是、相逢处。

窈窕青门紫曲，茜罗新、衣翻金缕，旧音恍记，轻拢慢捻，哀弦危柱。金屋难成，阿娇已远，不堪春暮。听一声杜宇，红殷绿老，雨花风絮。

贺新郎 和刘潜夫韵

晓梦莺呼起。便安排、诗家厨传，酒家行李。点检花边新雨露。春在万家生齿、道官似、锦溪清驶。但便有人耕绿野，正不妨、鼓吹频来此。方觅句，且夷俟。

画桥西畔多春意。记年年、曾来几度，落花流水。行到水穷云起处，依约辋川竹里。兴未属、王孙公子。料想明年端门里，有传柑宴罢黄封醉。肯回首，万杉底。

蓦山溪 寿种春翁

亭兰风蕙，昨日山阴曲。又过五峰来，
听华堂、管弦丝竹。今年风物，著意庆生朝，
□鹤舞，黑猿吟，花下眠青鹿。

九龄五福，盛事人皆祝。谁识种春翁，
等浮云、飞蚊过目。上方渴士，忠节起闻孙，
金坡近，玉堂深，莫羨春田绿。

陈义

菩萨蛮

平生只被今朝误。今朝却把平生补。重午一年期。斋僧只待时。

主人恩义重。两载蒙恩宠。清净得为僧。幽闲度此生。

又

包中香黍分边角。彩丝剪就交绒索。樽俎泛菖蒲。年年五月初。

主人恩义重。对景承欢宠。何日玩山家。葵篙三四花。

又

天生体态腰肢细。新词唱彻歌声利。出口便清奇。扬尘簌簌飞。

主人恩义重。宴出红妆宠。便要赏新荷。时光也不多。

又

去年共饮菖蒲酒。今年却向僧房守。好事更多磨。教人没奈何。

全宋词 陈义

主人恩义重。知我心头痛。待要赏新荷。
争知疾愈么。

陈与义

法驾导引

世传顷年都下市肆中 ,有道人携乌衣椎髻女子 ,
买斗酒独饮。女子歌词以侑 ,凡九阕 ,皆非人世语。
或记之以问一道士 ,道士惊曰 :“此赤城韩夫人所制水
府蔡真君法驾导引也 ,乌衣女子疑龙 ”云。得其三而
亡其六 ,拟作三阕

朝元路 ,朝元路 ,同驾玉华君。千乘载花
红一色 ,人间遥指是祥云。回望海光新。

又

东风起 ,东风起 ,海上百花摇。十八风鬟
云半动 ,飞花和雨著轻绡。归路碧迢迢。

又

帘漠漠 ,帘漠漠 ,天澹一帘秋。自洗玉舟
斟白醴 ,月华微映是空舟。歌罢海西流。

虞美人 亭下桃花盛开 ,作长短句咏之

十年花底承朝露。看到江南树。洛阳城
里又东风。未必桃花得似、旧时红。

胭脂睡起春才好。应恨人空老。心情虽

在只吟诗。白发刘郎孤负、可怜枝。

忆秦娥 五日移舟明山下作

鱼龙舞。湘君欲下潇湘浦。潇湘浦。兴亡离合，乱波平楚。

独无尊酒酬端午。移舟来听明山雨。明山雨。白头孤客，洞庭怀古。

临江仙

高咏楚词酬午日，天涯节序匆匆。榴花不似舞裙红。无人知此意，歌罢满帘风。

万事一身伤老矣，戎葵凝笑墙东。酒杯深浅去年同。试浇桥下水，今夕到湘中。

虞美人 大光祖席醉中赋长短句

张帆欲去仍搔首。更醉君家酒。吟诗日日待春风。及至桃花开后、却匆匆。

歌声频为行人咽。记著尊前雪。明朝酒醒大江流。满载一船离恨、向衡州。

点绛唇 紫阳寒食

寒食今年，紫阳山下蛮江左。竹篱烟锁。何处求新火。

不解乡音，只怕人嫌我。愁无那。短歌谁和。风动梨花朵。

虞美人 邢子友会上

超然堂上闲宾主。不受人间暑。冰盘围坐此州无。却有一瓶和露、玉芙蓉。

亭亭风骨凉生牖。消尽尊中酒。酒阑明月转城西。照见纱巾藜杖、带香归。

渔家傲 福建道中

今日山头云欲举。青蛟素凤移时舞。行到石桥闻细雨。听还住。风吹却过溪西去。

我欲寻诗宽久旅。桃花落尽春无所。渺渺篮舆穿翠楚。悠然处。高林忽送黄鹂语。

虞美人

余甲寅岁 ,自春官出守湖州。秋杪道中 ,荷花无复存者。乙卯岁 ,自琐闼以病得请奉祠。卜居青墩。立秋后三日行 ,舟之前后 ,如朝霞相映 ,望之不断也。以长短句记之

扁舟三日秋塘路。平度荷花去。病夫因病得来游。更值满川微雨、洗新秋。

去年长恨拿舟晚。空见残荷满。今年何以报君恩。一路繁花相送、过青墩。

浣溪沙

离杭日 ,梁仲谋惠酒 ,极清而美。七月十二日晚卧小阁 ,已而月上 ,独酌数杯

全宋词 陈与义

送了栖鸦复暮钟。栏干生影曲屏东。卧看孤鹤驾天风。

起舞一尊明月下 ,秋空如水酒如空。谪仙已去与谁同。

玉楼春 青镇僧舍作

山人本合居岩岭。聊问支郎分半境。残年藜杖与纶巾 ,八尺庭中时弄影。

呼儿汲水添茶鼎。甘胜吴山山下井。一瓯清露一炉云 ,偏觉平生今日永。

清平乐 木犀

黄衫相倚。翠葆层层底。八月江南风日美。弄影山腰水尾。

楚人未识孤妍。离骚遗恨千年。无住庵中新事 ,一枝唤起幽禅。

定风波 重阳

九日登临有故常 ,随晴随雨一传觞。多病题诗无好句。孤负。黄花今日十分黄。

记得眉山文翰老。曾道。四时佳节是重阳。江海满前怀古意。谁会。阑干三抚独凄凉。

菩萨蛮 荷花

南轩面对芙蓉浦。宜风宜月还宜雨。红

少绿多时。帘前光景奇。

绳床乌木几。尽日繁香里。睡起一篇新。
与花为主人。

南柯子 塔院僧阁

矫矫千年鹤，茫茫万里风。阑干三面看秋空。
背插浮屠千尺、冷烟中。林坞村村暗，溪流处处通。
此间何似玉霄峰。遥望蓬莱依约、晚云东。

临江仙 夜登小阁，忆洛中旧游

忆昔午桥桥上饮，坐中多是豪英。长沟流月去无声。
杏花疏影里，吹笛到天明。

二十余年如一梦，此身虽在堪惊。闲登小阁看新晴。
古今多少事，渔唱起三更。

木兰花慢

北归人未老，喜依旧、著南冠。正雪暗溱沔，云迷芒碭，梦绕邯郸。
乡心促、日行万里，幸此身、生入玉门关。多少秦烟陇雾，西湖净洗征衫。

燕山。望不见吴山。回首一归鞍。慨故宫离黍，故家乔木，那忍重看。
钧天紫微何处，问瑶池、八骏几时还。谁在天津桥上，杜鹃声里阑干。

陈 郁

声声慢 应制赋芙蓉、木樨

澄空初霁，暑退银塘，冰壶雁程寥寞。
天阙清芬，何事早飘岩壑。花神更裁丽质，
涨红波、一奁梳掠。凉影里，算素娥仙队，
似曾相约。

闲把两花商略。开时候、羞趁观桃阶药。
绿幕黄帘。好顿胆瓶儿著。年年粟金万斛，
拒严霜、绵丝围幄。秋富贵，又何妨、与民
同乐。

宝鼎现

虞弦清暑，佳气葱郁，非烟非雾。人正
在、东闾堂上，分瑞祥辉腾翠渚。奉玉笋，
总欢呼称颂，争羨神光葆聚。庆诞节、弥生
二佛，接踵瑶池仙母。

最好英慧由天赋。有仁慈宽厚襟宇。每
留念、修身忱意，博问谦勤亲保傅。染宝翰、
镇规随宸画，心授家传有素。更吟咏、形容
雅颂，隐隐赓歌风度。

恩重汉殿传觞，宣付祝、恭承天语。对

南薰初试，宫院笙箫竞举。但长愿，际升平世，万载皇基因睹。问寝日，俟鸡鸣舞拜，龙楼深处。

绛都春

晴天媚晓。正禁苑乍暖，莺声娇小。柳拂玉阑，花映朱帘韶光早。熙朝多暇舒长昼。庆圣主、新颁飞诏。贻谋恩重，齐家有训，万邦仪表。

偏称宫闱欢笑。酿和气共结，天香缭绕。侍宴回车，韶部将迎金莲照。鸡鸣警戒丁宁了。但管取、咸常同道。东皇先报宜男，已生瑞草。

念奴娇

没巴没鼻，霎时间、做出漫天漫地。不论高低并上下，平白都教一例。鼓动滕六，招邀巽二，一任张威势。识他不破，只今道是祥瑞。

却恨鹅鸭池边，三更半夜，误了吴元济。东郭先生都不管，关上门儿稳睡。一夜东风，三竿暖日，万事随流水。东皇笑道，山河原是我底。

陈 云 崖

玉楼春

琼奴家与章台并。路远可怜归梦近。波头浪语脸红潮，镜面频思眉翠晕。

年年花月年年病。花月无情人有恨。欲将此恨寄湘流，又恐湘流流不尽。

谒金门

春昼永。接叶鸣禽相应。风定落红香一径。疏疏窗竹影。

寂寞年时酒病。远笛悠悠吹醒。闲上层楼天又暝。云山青不尽。

陈 允 平

摸鱼儿 西湖送春

倚东风、画阑十二，芳阴帘幕低护。玉屏翠冷梨花瘦，寂寞小楼烟雨。肠断处。怅折柳柔情，旧别长亭路。年华似羽，任锦瑟声寒，琼箫梦远，羞对彩鸾舞。

文园赋。重忆河桥眉妩。啼痕犹溅纨素。丁香共结相思恨，空托绣罗金缕。春已暮。纵燕约莺盟，无计留春住。伤春倦旅。趁暗绿稀红，扁舟短棹，载酒送春去。

木兰花慢 赋牡丹

杜鹃声渐老，过花信、几番风。爱翠幄笼晴，文梭扬暖，阑槛青红。新妆步摇未稳，捧心娇、乍入馆娃宫。消得金壶万朵，护风帘幄重重。

匆匆。少小忆相逢。诗鬓已成翁。且持杯秉烛，天香院落，同赏芳秾。花应怕春去早，尽迟迟、待取绿阴浓。拚却花前醉也，梦随蝴蝶西东。

绛都春 旧上声韵，今改平声

秋千倦倚，正海棠半坼，不耐春寒。殢雨弄晴，飞梭庭院绣帘闲。梅妆欲试芳情懒。翠颦愁入眉弯。雾蝉香冷，霞绡泪搵，恨袭湘兰。

悄悄池台步晚。任红薰杏靥，碧沁苔痕。燕了未来，东风无语又黄昏。琴心不度春云远。断肠难托啼鹃。夜深犹倚，垂杨二十四阑。

酹江月 赋水仙

汉江露冷，是谁将瑶瑟，弹向云中。一曲清冷声渐杳，月高人在珠宫。晕额黄轻，涂腮粉艳，罗带织青葱。天香吹散，佩环犹自丁东。

回首杜若汀洲，金钿玉镜，何日得相逢。独立飘飘烟浪远，袜尘羞溅春红。渺渺予怀，迢迢良夜，三十六陂风。九疑何处，断云飞度千峰。

倦寻芳

杏檐转午，清漏沈沈，春梦无据。凤锦龟纱，空闭酒尘香雾。流水行云天四远，玉箫声断人何处。倦寻芳，镇情尖翠压，强拈飞絮。

记旧约、荼蘼开后，屈指心期，数了还数。误我凭阑，几度片帆南浦。燕懒莺慵春去也，落花犹是东风主。正销凝，被愁鹃、又啼烟树。

大酺 元夕寓京

渐入融和，金莲放、人在东风楼阁。天香吹辇路，净无云一点，桂流霜魄。雪霁梅飘，春柔柳嫩，半卷真珠帘箔。迢迢鸣鞘过，隘车钿辔玉，暗尘轻掠。拥琼管吹龙，朱弦弹凤，柳衢花陌。

鳌山侵碧落。绛绡远，春霭浮鸂鶒。民共乐、金吾禁静，翠辇声闲，遍青门、尽停鱼钥。袞袞寒初觉。方怪失、绣鸳弓窄。误良夜、瑶台约。渐彩霞散，双阙星微烟薄。洞天共谁跨鹤。

永遇乐 旧上声韵，今移入平声

玉腕笼寒，翠阑凭晓，莺调新簧。暗水穿苔，游丝度柳，人静芳昼长。云南归雁，楼西飞燕，去来惯认炎凉。王孙远，青青草色，几回望断柔肠。

蔷薇旧约，尊前一笑，等闲孤负年光。斗草庭空，抛梭架冷，帘外风絮香。伤春情绪，惜花时候，日斜尚未成妆。闻嬉笑，谁家女伴，又还采桑。

月上海棠

游丝弄晚，卷帘看处，燕重来时候，正秋千亭榭，锦窠春透。梦回褪浴华清，凝温泉、绛绡微皱。芳阴底，人立东风，露华如昼。

宜酒。啼香泪薄，醉玉痕深，与春同瘦。想当年金谷，步帷初绣。彩云影里徘徊，娇无语、夜寒归后。莺窗晓，花间重携素手。

疏影

疏影、暗香，白石自度曲也。予过宛陵，登双溪叠嶂，拊先伯父菊坡先生遗墨有感，借韵以赋

千峰翠玉。送孤云伴我，罗窗清宿。拂晓凭虚，春碧生寒，衣单瘦倚筇竹。东风不解吹愁醒，但芳草、溪城南北。认雾鬟，遥锁修颦，眉妩为谁愁独。

江上轻鸥似识，背昭亭两两，飞破晴渌。一片苍烟，隔断家山，梦绕石窗萝屋。相看厌朝还暮，算几度、赤阑干曲。待倩诗、收拾归来，写作卧游屏幅。

暗香

霁天秋色。正倚楼待月，谁伴横笛。涨绿浮空，闲数河星手堪摘。弥望澄光练净，分付与、玄晖才笔。烟溆阔，云远波平，归鸟趁风席。

南国。信音寂。怅雁渚渡闲，鹭汀沙积。藓碑露泣。时拊遗踪暗嗟忆。人事空随逝水，今古但、双流一碧。待办取、蓑共笠，小舟泛得。

水龙吟 奉川实化凤花

杜鹃啼老春愁，泪痕吹作胭脂雨。飞花乱点，东风枝上，红翔翠翥。丹穴鸣初，碧梧栖未，凄凉山坞。怅琼姬梦远，玉箫声断，孤鸾影、对谁舞。

林下风光自许。算何必、玉京瑶圃。阑干醉倚，游尘香散，芳菲无主。经院僧眠，月楼钟静，欲飞还驻。待青松、化尽苍龙头角，共乘云去。

齐天乐 泽国楼偶赋

湖光只在阑干外，凭虚远迷三楚。旧柳犹青，平芜自碧，几度朝昏烟雨。天涯倦旅。爱小却游鞭，共挥谈麈。顿觉尘清，宦情高下等风絮。

芝山苍翠缥缈，黯然仙梦杳，吟思飞去。故国楼台，斜阳巷陌，回首白云何处。无心访古。对双塔栖鸦，半汀归鹭。立尽荷香，月明人笑语。

酹江月

霁空虹雨，傍啼蛩莎草，宿鹭汀洲。隔

岸人家砧杵急，微寒先到帘钩。步幄尘高，征衫酒润，谁暖玉香篝。风灯微暗，夜长频换更筹。

应是雁柱调筝，鸳梭织锦，付与两眉愁。不似尊前今夜月，几度同上南楼。红叶无情，黄花有恨，孤负十分秋。归心如醉，梦魂飞趁东流。

桂枝香 杨山甫席上赋

残蝉乍歇。又乱叶打窗，蛩韵凄切。寂寞天香院宇，露凉时节。乘鸾扇底婆娑影，幻清虚、广寒宫阙。小山秋重，千岩夜悄，举尊邀月。

甚赋得、仙标道骨。倩谁捣玄霜，犹未成屑。回首蓝桥路迥，梦魂飞越。雕阑翠甃金英满，洒西风、非雨非雪。惜花心性，输他少年，等闲攀折。

汉宫春 芍药

开尽荼蘼，正桑云麦浪，天气如秋。南园露梢半坼，金粟丝头。温香傍酒，尽多娇、不识春愁。莺院悄，轻阴弄晚，何人堪伴清游。

偏爱紫蕤黄袅，想金壶胜赏，依旧扬州。花前夜阑醉后，斜月当楼。翻阶句好，记玄晖、此日风流。双鬓改，一枝帽底，如今应为花羞。

木兰花慢 和李笈房题张寄闲家圃韵

爱吟休问瘦，为诗句。几凭阑。有可画亭台，宜春帐箔，如寄身闲。胸中四时胜景，小蓬莱、幻出五云间。一掬苹香暗沼，半梢松影虚坛。

相看。倦羽久知还。回首鹭盟寒。记步履寻云，呼灯听雨，越岭吴峦。幽情未应共懒，把周郎旧曲谱新翻。帘外垂杨自舞，为君时按弓弯。

宝鼎见 云岩师书灯夕命赋

六鳌初驾，缥缈蓬阆，移来洲岛。还又是、梅飘冰泮，一夜青阳回海表。渐媚景、傍元宵时候，花底馀寒料峭。更喜报、三边晏静，人乐清平宇宙。

画鼓簇队行春早。拥烟花、粉黛缭绕。开洞府、桃源路窈。戟外东风吹岸柳。正翠靥、映星桥月榭，十里红莲绽了。庆万家、珠帘半卷，绰约歌裙舞袖。

重锦绣幄围香，阖凤管鸾丝环奏。望非烟非雾，春在壶天易晓。早隐隐、半空星斗。看取收灯后。趁凤书、吹入黄扉，立马金门玉漏。

八宝妆 秋宵有感

望远秋平。初过雨、微茫水满烟汀。乱

荳疏柳，犹带数点残萤。待月重帘谁共倚，
信鸿断续两三声。夜如何，顿凉骤觉，纨扇
无情。

还思骖鸾素约，念凤箫雁瑟，取次尘生。
旧日潘郎，双鬓半已星星。琴心锦意暗懒，
又争奈、西风吹恨醒。屏山冷，怕梦魂、飞
度蓝桥不成。

昼锦堂 北城韩园即事

上苑寒收，西塍雨歇，东风是处花柳。
步锦笼纱，依旧五陵台沼。绣帘珠箔金翠袅，
琐窗雕槛青红斗。频回首。茶灶酒垆，春时
几番携手。

知否。人渐老。嗟眼为花狂，肩为诗瘦。
唤醒乡心，无奈数声啼鸟。秉烛清游嫌夜短，
采香新意输年少。归来好，畋趁故园池阁，
绿阴芳草。

绮罗香 秋雨

雁宇苍寒，蛩疏翠冷，又是凄凉时候。
小揭珠帘，夜润唾花罗皱。饶晓鹭、独立衰
荷，溯归燕、尚栖残柳。想黄花，羞涩东篱，
断无新句到重九。

孤檠清梦易觉，肠断唐宫旧曲，声迷官
漏。滴入愁心，秋似玉楼人瘦。烟槛外、催
落梧桐，带西风、乱捎鸳甃。记画檐，灯影
沈沈，共裁春夜韭。

西湖十咏

探 春 苏堤春晓

上苑乌啼，中洲鹭起，疏钟才度云窈。
篆冷香篝，灯微尘幌，残梦犹吟芳草。
搔首卷帘看，认何处、六桥烟柳。翠桡才舣西泠，
趁取过湖人少。

掠水风花缭绕。还暗忆年时，旗亭歌酒。
隐约春声，钿车宝勒，次第凤城开了。惟有
踏青心，纵早起、不嫌寒峭。画阑闲立，东
风旧红谁扫。

秋 霁 平湖秋月

千顷玻璃，远送目斜阳，渐下林阒。题
叶人归，采菱舟散，望中水天一色。碾空桂
魄。玉绳低转云无迹。有素鸥，闲伴夜深，
呼棹过环碧。

相思万里，顿隔婵媛，几回琼台，同驻
鸾翼，对西风、凭谁问取，人间那得有今夕。
应笑广寒宫殿窄。露冷烟淡，还看数点残星，
两行新雁，倚楼横笛。

百字令 断桥残雪

凝云沍晓，正蘼花才积，荻絮初残。华
表翩跹何处鹤，爱吟人在孤山。冻解苔铺，
表翩跹何处鹤，爱吟人在孤山。冻解苔铺，

冰融沙甃，谁凭玉勾阑。茸衫毡帽，冷香吹上吟鞍。

将次柳际琼销，梅边粉瘦，添做十分寒。闲踏轻渐来荐菊，半潭新涨微澜。水北峰峦，城阴楼观，留向月中看。嶰云深处，好风飞下晴湍。

扫花游 雷峰落照

数峰蘸碧，记载酒甘园，柳塘花坞。最堪避暑。爱莲香送晚，翠娇红妩。欸乃菱歌乍起，兰桡竞举。日斜处。望孤鹜断霞，初下芳杜。

遥想山寺古。看倒影金轮，溯光朱户。暝烟带树。有投林鹭宿，凭楼僧语。可惜流年，付与朝钟暮鼓。漫凝佇。步长桥、月明归去。

八声甘州 曲院风荷

放船杨柳下，听鸣蝉、薰风小新堤。正烟蓑露蓼，飞尘酿玉，第五桥西。遥认青罗盖底，宫女夜游池。谁在鸳鸯浦，独棹玻璃。

一片天机云锦，见凌波碧翠，照日胭脂。是西湖西子，晴抹雨妆时。便相将无情秋思，向菰蒲深处落红衣。醺醺里，半篙香梦，月转星移。

蓦山溪 花港观鱼

春波浮绿，小隐桃溪路。烟雨正林塘，

翠不碍、锦鳞来去。芹香藻膩，偏爱鲤鱼肥，檐影下，柳阴中，逐浪吹萍絮。

宫沟泉滑，怕有题红句。钩饵已忘机，都付与、人间儿女。濠梁兴在，鸥鹭笑人痴。三湘梦，五湖心，云水苍茫处。

齐天乐 南屏晚钟

赤阑桥畔斜阳外，临江暮山凝紫。戏鼓才停，渔榔乍歇，一片芙蓉秋水。馀霞散绮。正银钥停关，画船催舣。鱼板敲残，数声初入万松里。

坡翁诗梦未老，翠微楼上月，曾共谁倚。御苑烟花，宫斜露草，几度西风弹指。黄昏尽也，有眠月闲僧，醉香游子。鹧岭啼猿，唤人吟思起。

黄莺儿 柳浪闻莺

六波烟黛浮空远，南陌嚶嚶，乔木初迁，纱窗无眠，画阑凭晓。看并宿暗黄深，织雾金梭小。那人携酒听时，料把春来，诗梦惊觉。

飞绕。翠接断桥云，绿漾新堤草。数声娇啭，婉婉如愁，调簧弄歌尖巧。随燕啁软尘低，蝶妥游丝袅。最怜舞絮飞花，唤却东风老。

渡江云 三潭印月

三神山路杳，六鳌驾浪，幻境□西湖。

水连天四远，翠台如鼎，簇簇小浮图。烟沈雾迥，怪屋楼、飞入清虚。秋夜长，一轮蟾素，渐渐出云衢。

遥看寒光金镜，皓彩明珰，正人间三五。总输与、鸥眠葑蓼，鹭立菰蒲。笙歌唤醒鱼龙睡，向贝阙、争取明珠。清梦断，西风醉宿冰壶。

婆罗门引 两峰插云

髻鬟对耸，万松扶玉上青冥。西风共倚，烟南水北，石荒苔老，三十六梯平。爱翠尖如削，天外亭亭。

高寒梦惊。是何夕堕双星。无限苍厓紫岫，谁拊棱层。薜萝深处，算少年、游屐几番登。河汉近、疑在蓬瀛。

右十景，先辈寄之歌咏者多矣。霅川周公谨以所作木兰花示予，约同赋，因成，时景定癸亥岁也。

引 令

明月引 和白雪赵宗薄自度曲

雨馀芳草碧萧萧。暗春潮。荡双桡。紫凤青鸾，旧梦带文箫。绰约佩环风不定，云欲堕，六铢香，天外飘。

相思为谁兰恨销。渺湘魂、无处招。素纨犹在，真真意、还倩谁描。舞镜空圆，羞对月明宵。镜里心心心里月，君去矣，旧东风，新画桥。

糖多令 吴江道上赠郑可大

何处是秋风。月明霜露中。算凄凉、未到梧桐。曾向垂虹桥上看，有几树、水边枫。
客路怕相逢。酒浓愁更浓。数归期、犹是初冬。欲寄相思无好句，聊折赠、雁来红。

江城子

东风吹恨上眉弯。燕初还。杏花残。帘里春深，帘外雨声寒。拾翠芳期孤负却，空脉脉，倚阑干。

流苏香重玉连环。饶屏山。宝筝闲。泪薄绡绡，零露湿红兰。瘦却舞腰浑可事，银蹀躞，半阑珊。

思佳客 用晏小山韵

一曲清歌酒一钟。舞裙摇曳石榴红。宝筝弦矗冰蚕缕，珠箔香飘水麝风。

娇娅姹，笑相逢。合欢罗带两心同。彩云不觉归来晚，月转觚棱夜气中。

又

压鬓钗横翠凤头。玉柔春腻粉香流。红酣醉靥花含笑，碧翦颦眉柳弄愁。

偏婀娜，太温柔。水情云意两绸缪。佯羞不顾双飞蝶，独背秋千傍画楼。

又

锦幄沈沈宝篆残。惜春无语凭阑干。庭前芳草空惆怅，帘外飞花自往还。

金屋静，玉箫闲。一尊芳酒驻红颜。东风落尽荼蘼雪，满院清香夜不寒。

又

玉辔青骢去不归。锦中频织断肠诗。窗凭绣日莺声婉，帘卷香云雁影回。

金缕扇，碧罗衣。蝶魂飞度画阑西。花开花落春多少，独有层楼双燕知。

又

曾约双琼品凤箫。玉台光映玉娇娆。银花烛冷飞罗暗，宝屑香融曲篆销。

帘影乱，漏声迢。佩云清入楚天遥。题红未托相思约，明月空归第五桥。

惜分飞

钏阁桃腮香玉溜。困倚银床倦绣。双燕归来后。相思叶底寻红豆。

碧唾春衫还在否，重理弓弯舞袖。锦藉芙蓉皱。翠腰羞对垂杨瘦。

长相思

风萧萧。雨骚骚。风雨萧骚梧叶飘。潇潇湘江畔楼。

云迢迢。水遥遥。云水迢迢天尽头。相

思心上秋。

祝英台近

待春来，春又到，花底自徘徊。春浅花迟，携酒为春催。可堪碧小红微，黄轻紫艳，东风外、妆点池台。

且衔杯。无奈年少心情，看花能几回。春自年年，花自为春开。是他春为花愁，花因春瘦，花残后、人未归来。

恋绣衾

绡桃红浅柳褪黄。燕初来、宫漏渐长。任日转、花梢也，倚兰屏、犹未试妆。

秦鸾旧曲无心理，忆年时、相傍采桑。听绿树、娇莺啭，一声声、都是断肠。

南歌子 茉莉

素质盈盈瘦，娇姿淡淡妆。曲勾阑畔倚秋娘。一撮风流都在、晚西凉。

彩线串层玉，金篝络细香。半钩新月浸牙床。犹记东华年少、那门相。

恋绣衾

银鸳金凤画暗销。晓帘栊、新翠渐交。算多少、相思恨，被东风、吹上柳梢。

罗窗夜夜梨花瘦，奈月明、香梦易消。
便拟倩、题红叶，趁落花、流过谢桥。

谒金门

春欲去。无计得留春住。纵著天涯浑柳絮。
春归还有路。

恨煞多情杜宇。愁煞无情风雨。春自悠悠人自苦。
莺花谁是主。

菩萨蛮

杏花枝上莺声嫩。凤屏倦倚人初困。金猊莫添香。
香浓情转伤。

云沈归雁杳。绿涨江南草。独倚夕阳楼。
双帆何处舟。

青玉案 采莲女

凉亭背倚斜阳树。过几阵、菰蒲雨。自棹轻舟穿柳去。
绿裙红袂，与花相似，撑入花深处。

妾家住在鸳鸯浦。妾貌如花被花妒。折得花归娇厮觑。
花心多怨，妾心多恨，胜似莲心苦。

恋绣衾

多情无语敛黛眉。寄相思、偏仗柳枝。

待折向、尊前唱，奈东风、吹做絮飞。

归来醉抱琵琶睡，正酒醒、香尽漏移。
无赖是、梨花梦，被月明、偏照帐儿。

南歌子

懒傍青鸾镜，慵簪翠凤翘。玉屏春重宝
香销。因甚不忺梳洗、怕登楼。

载酒垂杨浦，停桡杜若洲。伤春情绪寄
箜篌。流水残阳芳草、伴人愁。

醉桃源

东风开到坼桐花。游蜂初报衙。兽环微
掩是谁家。琐窗金绣纱。

环佩小，领巾斜。绿云双髻鸦。佯羞无
限托琵琶。笑拈萱草芽。

清平乐

凤城春浅。寒压花梢颤。有约不来梁上
燕。十二绣帘空卷。

去年共倚秋千。今年独倚阑干。误了海
棠时候，不成直待花残。

谒金门

春又晚。枝上绿深红浅。燕语呢喃明似
翦。采香人渐远。

草色池塘碧软。丝竹谁家坊院。拂拂和风初著扇。蜂情愁不展。

浣溪沙

杨柳烟深五凤楼。绣帘风扬玉梭球。夜寒谁伴锦香篝。

残月有情圆晓梦，落花无语诉春愁。宝笙偷按小梁州。

鹧鸪天

谁向瑶台品凤箫。碧虚浮动桂花秋。风从帘幕吹香远，人在阑干待月高。

金粟地，蕊珠楼。佩云襟雾玉逍遥。仙娥已有玄霜约，便好骑鲸上九霄。

谒金门

风不定。吹漾一帘波影。归燕无期春正永。海棠眠未醒。

箏雁别来谁整。好梦不堪重省。闲看鸳鸯交素颈。凭兰襟袖冷。

朝中措

欲晴又雨雨还晴。时节又清明。红杏墙头燕语，碧桃枝上莺声。

轻衫短帽，扁舟小棹，几度旗亭。斗草

踏青天气，买花载酒心情。

小重山

岸柳黄深绿渐饶。林塘初雨过，涨蒲萄。
秋千亭榭彩旗交。莺声里，春在杏花梢。

慵整翠云翘。眉尖愁两点，倩谁描。斜
阳芳草暗魂销。东风远，犹凭赤阑桥。

霜天晓角

玄霜绛雪。散作秋林缬。昨夜西风吹过，
最好是、睡时节。

香绝。高处折。中秋还有月。此际人间
天上，是两个、广寒阙。

糖多令 桂边偶成

明月可中庭。萧萧络纬声。画阑秋、千
树吹香。玉宇无尘凉似水，销不尽、许多清。

欲醉醉还醒。欲吟吟未成。捻金英、三
嗅微馨。应有乘鸾天上女，随风露、下青冥。

柳梢青 和逃禅四首

藓迹苔痕。香浮砚席，影蘸吟尊。雪正
商量，同云淡淡，微月昏昏。

孤山往事谁论。但招得、逋仙断魂。客
里相逢，数枝驿路，千树江村。

又

沁月凝霜。精神好处，曾悟花光。带雪煎茶，和冰酿酒，聊润枯肠。

看花小立疏廊。道是雪、如何恁香。几度巡檐，一枝清瘦，疑在蓬窗。

又

菊谢东篱。问梅开未，先问南枝。两蕊三花，松边傍石，竹外临溪。

尊前暗忆年时。算笛里、关情是伊。何逊风流，林逋标致，一二联诗。

又

片片花飞。风前疏树，雪后残枝。划地多情，带将明月，来伴书帏。

岁寒心事谁知。向篱落、微斜半欹。添得闲愁，酒将阑处，吟未成时。

思佳客 和俞菊坡海棠韵

簇簇红云冷欲凝。东风特地唤花醒。数枝夜色当银烛，一段春娇入画屏。

如有恨，似多情。柳边莺语十分明。柳边莺语如何说，莫笑梅花太瘦生。

糖多令 秋暮有感

休去采芙蓉。秋江烟水空。带斜阳、一片征鸿。欲顿闲愁无顿处，都著在两眉峰。

心事寄题红。画桥流水东。断肠人、无

奈秋浓。回首层楼归去懒，早新月、挂梧桐。

寿 词

瑞龙吟 寿吴丞相

双溪墅。重见种玉锄云，采花研露。遥知绿野芳浓，锦堂燕子，迎门共舞。

近前语。还问去年山馆，旧经行处。西风鸿水边上，惊千里苑，梅英乍吐。

几度月昏霜晓，望驰天北，驿传湘渚。冷艳暗香春寒，划地清苦。看看翠幄，青子江头路。才收尽、蛮烟瘴雨，初回轻暑。便忆南园趣。唤人况有，多情杜宇。此计非迟暮。都付与、和羹功成归去。海榴院落，长逢重午。

渡江云 寿蔡泉使

桐花寒食近，青门紫陌，不禁绿杨烟。正长眉仙客，来向人间，听鹤语溪泉。清和天气，为栽培、种玉心田。莺昼长，一尊芳酒，容与看芝山。

庭闲。东风榆荚，夜雨苔痕，满地欲流钱。爱墙阴、成蹊桃李，春自无言。殷勤晓鹊凭檐喜，丹凤下、红药阶前。兰砌晓，香飘舞袖斓斑。

八声甘州 寿蔡泉宪

两台帘对卷，燕芹香、风花近清明。望

春涨柳际，流红水布，暖谷天晴。谁信闲襟似水，时忆语溪耕。襟抱番江阔，云远波平。

静昼轻挥玉麈，见春扉草绿，暮冶烟青。问清华姓字，几度录虬屏。看西湖、一汀鸳鹭，正晓风、残月两三星。早归来，赴花鱼宴，宫树闻莺。

三犯渡江云

旧平声，今改入声，为竹友谢少保寿

风流三径远，此君淡薄，谁与伴清足。岁寒人自得，傍石锄云，闲里种苍玉。琅玕翠立，爱细雨、疏烟初沐。春昼长，秋声不断，洗红尘凡俗。

高独。虚心共许，淡节相期，几人闲棋局。堪爱处，月明琴院，雪晴书屋。心盟更许青松结，笑四时、梅矾兰菊。庭砌晓，东风旋添新绿。

过秦楼 寿建安使君谢右司

谷雨收寒，茶烟扬晓，又是牡丹时候。浮龟碧水，听鹤丹山，彩屋幔亭依旧。和气缥缈人间，满谷红云，德星呈秀。向东风种就，一亭兰茁，玉香初茂。

遥想曲度娇莺，舞低轻燕，二十四帘芳昼。清溪九曲，上巳风光，觞咏似山阴否。翠阁凝清，正宜瀹茗银罍，熨香金斗。看双鸾飞下，长生殿里，赐蔷薇酒。

醉蓬莱 寿越帅谢恕斋

正槐龙欲老，影动朱门，薰风帘卷。竹外人清，听秋声将转。梦草池塘，种兰庭砌，爽气生葵扇。香染黄扉，律调翠简，赏音清宴。

因念南阳，碧幢烟静，纶玉宣频，轡丝催遣。带锡犀虹，宠下甘泉殿。笑指蓬莱，画舸东去，向五云葱茜。骑竹欢迎，贺家湖上，绿香红茜。

法曲献仙音 寿云谷谢秘撰

风箏晴暄，昼桐阴早，燕阁新香时度。沁月楼台，带山城郭，西湖翠娇红妩。甚爱此闲中趣，寻盟旧鸥鹭。

共容与。倚阑干、静看飞絮。吟啸里，帘卷暖烟霏雨。向一碧玻璃，几东风、呼棹来去。秀玉芳兰，伴丝簧、庭院笑语。渐梅霖清润，喜近槐扉初暑。

八声甘州 代蔡泉使寿丁丞相

帘垂鴟尾阁，桂花风、天香满黄扉。向郁罗霄汉，朝回金阙，心运璇玑。一点元台初度，八表共清辉。紫塞烟尘静，捷羽东飞。

此际钱塘江上，爱月仍夜色，潮正秋期。想波仙冰妹，同日宴瑶池。报龙楼、玉音宣

劝，赐紫金、杯泛日中葵。庆千秋，醉长生酒，歌太平诗。

兰陵王 辛酉代寿壑翁丞相母夫人

楚天碧。秋晚尘清禁陌。朝鸡静，班退晓墀，回马金门漏犹滴。千官佩如织。来作黄扉寿客。黑头相，玉虹紫貂，亲奉春慈拜南极。

丛萱燕堂北。正霭护犀帷，香泛蛟额。瑶池女伴驻鸾翼。拥歌袖笼翠，舞鞞铺锦，屏开家庆怎画得。想人在仙宅。

今夕。是何夕。正月满槐厅，凉透樨席。黄花满地弄寒色。喜蛩雨初霁，雁风又息。龙楼宣劝，万岁里、宴太液。

木兰花慢 丙辰寿叶制相

江南春信早，问谁是、百花魁。过揽桂褰蓉，纫兰采菊，独许寒梅。阳和渐回涧底，向水西、先放一枝开。潇洒纤琼瘦玉，化工月翦云裁。

诗催。付与雪襟怀。消得暗香来。算知心惟有，青松瘦竹，白石苍苔。年年上林胜赏，捻清芳、蘸入紫金杯。须信和羹未晚，岁寒聊自徘徊。

摸鱼儿 寿叶制相

过重阳、晚香犹耐，江城风露初峭。梅

花已索巡檐笑，春入数枝红小。寒恁早。正帘卷苍云，和气生芝草。金虬篆袅。喜人乐丰年，波澄瀚海，星斗焕牙纛。

家山近，游宴十洲三岛。石桥诗思频绕。朱颜白发神仙样，谁信玉关人老。春渐好。望阊阖天低，咫尺瞻黄道。祥云缥缈。看柳色沙堤，莺声禁埰，鸣佩凤池晓。

汉宫春

寿乡帅范尚书。郡有苍云堂，因古柏得名

帘卷苍云，爱初翔凤尾，忽驾虬枝。青青岁寒自保，越样清奇。参天溜雨，带疏苔、密藓芳蕤。天赋与，凌霜傲雪，臞然山泽风姿。

他年栋梁共许，记雪山巫峡，曾赋新诗。庭前可人翠幄，葱茜烟霏。高标劲节，有青松、绿竹心知。来试倚，摩挲黛色，一尊相祝齐眉。

又 庚午岁寿谷翁保相

春满芝田，正鹤飞空霭，龟引清涟。祥云满谷缥缈，非雾非烟。莺花燕柳，占年年、三月长安。天气好，新声暖响，东风十二雕阑。

葱茜兽炉香袅，映金貂玉佩，绿鬓朱颜。何妨买花载酒，日日湖边。烟光万顷，恁清闲、才是神仙。芳昼永，珠帘静卷，悠然相对南山。

风入松 寿恕斋谢待制

西清人住水云乡。心静日偏长。闲中自乐壶天趣，笑红尘、谁是羲皇。叠嶂双溪争似，西湖雨色晴光。

碧龟巢处藕花香。波影浸书床。庭前一种红兰树，薰风又、吹长瑶芳。竹外椿前舞彩，柳边槐底鸣珰。

西湖明月引 寿云谷谢右司

朝回花底晓星明。瑞烟凝。暖风轻。修褰涴裙，时节又闻莺。绰约岸桃堤柳近，波万顷，碧琉璃，镜样平。

仙翁佩襟秋水清。渺莲舟，浮翠瀛。御楼香近，东风里、吹下青冥。鲛绡围红，春在牡丹屏。日正迟迟人正酒，画帘外，一声声，卖放生。

临江仙 寿千八兄

门外湖光清似玉，雨桐烟柳扶疏。爱闲吾亦爱吾庐。炉香心在在，杯酒乐如如。

有子专城才四十，诸孙颗颗明珠。传家衣钵只诗书。一坡存菊意，千岁学松臞。

少年游 寿云谷谢右司

光风怀抱玉精神。不染世间尘。香暖衣

簫，歌題彩扇，清似晉時人。

柳邊小駐朝天馬，一笑領佳賓。帘卷湖
山，花圍尊俎，同醉碧桃春。

鷓鴣天 壽表兄陳可大

四壁圖書靜不嘩。里湖深处隱人家。斑
衣自斗百家彩，烏帽親裁一幅紗。

新釀酒，旋烹茶。半溪霜月正梅花。前
庭手種紅蘭樹，看到春風第二芽。

霜天曉角 壽疏清陳別駕

月樹風枝。孤山兩字詩。來到十洲三島，
香得更、十分奇。

陽和迟自迟。冰霜欺怎欺。且伴岁寒人
醉，有移种、玉堂时。

瑞鶴仙

燕歸帘半卷。正漏約琮筵，笙調玉琯。
蛾眉畫來淺。甚春衫懶試，夜燈慵翦。香溫
夢暖。訴芳心、芭蕉未展。渺雙波、望極江
空，二十四橋凭遍。

葱茜。銀屏彩鳳，霧帳金蟬，旧家坊院。
烟花弄晚。芳草恨，斷魂远。对东风无语，
綠阴深处，時見飛紅數片。算多情、尚有黃
鸝，向人睨睨。

垂杨

银屏梦觉。渐浅黄嫩绿，一声莺小。细雨轻尘，建章初闭东风悄。依然千树长安道。翠云锁、玉窗深窈。断桥人、空倚斜阳，带旧愁多少。

还是清明过了。任烟缕露条，碧纤青袅。恨隔天涯，几回惆怅苏堤晓。飞花满地谁为扫。甚薄幸、随波缥缈。纵啼鹃、不唤春归，人自老。

瑞龙吟

长安路。还是燕乳莺娇，度帘迁树。层楼十二阑干，绣帘半卷，相思处处。

漫凭伫。因念彩云初到，琐窗琼户。梨花犹怯春寒，翠羞粉怨，尊前解语。

空有章台烟柳，瘦纤仍似，宫腰飞舞。憔悴暗觉文园，双鬓非故。闲拈断叶，重托殷勤句。频回首、河桥素约，津亭归步。恨逐芳尘去。眩醉眼尽，游丝乱绪。肠结愁千缕。深院静，东风落红如雨。画屏梦绕，一篝香絮。

风流子

阑干休去倚，长亭外、烟草带愁归。正晓阴帘幕，绮罗清润，西风环佩，金玉参差。

深院悄，乱蝉嘶夏木，双燕别春泥。满地残花，蝶圆凉梦，半亭落叶，蛩感秋悲。

兰屏馀香在，销魂处、憔悴瘦不胜衣。谁念凤楼当日，星约云期。怅倦理鸾箏，朱弦空暗，强临鸳镜，锦带闲垂。别后两峰眉恨，千里心知。

又

残梦绕林塘。诗添瘦、瘦不似东阳。正流水荡红，暗通幽径，嫩篁翻翠，斜映回墙。对握宝箏低度曲，销蜡靥新簧。莺懒昼长，燕闲人倦，乍亲花簟，慵引壶觞。

帘栊深深地，歌尘静、芳草自碧空厢。十二画桥，一堤烟树成行。向杜鹃声里，绿杨庭院，共寻红豆，同结丁香。春已无多，只愁风雨相妨。

华胥引

涵空斜照，掠水轻岚，满天红叶。雁泊平芜，鳧依乱荻声唼唼。寂寞金井梧桐，渐辘轳伊轧。明月纱窗，夜寒孤枕应怯。

吟老西风，笑衰髯、顿疏如镊。锦笺勤重，频剔兰灯自阅。多谢征衫初寄，尚宝香熏篋。愁忆家山，梦魂飞度千叠。

意难忘

额粉宫黄。衬桃花扇底，歌送瑶觞。裙拖金缕细，衫唾碧花香。琼佩冷，玉肌凉。

罗袜步沧浪。漫共伊，心盟意约，眼觑眉相。
连环未结双双。似桃源误入，初嫁刘郎。
珑璁仙子髻，绰约道家妆。千种恨、九回肠。
云雨梦犹妨。误少年，红销翠减，虚度风光。

宴清都

听彻南楼彭。寒宵迥、玉壶冰漏迟度。
重温锦幄，低护青毡，曲通朱户。巡檐细嚼
寒梅，叹寂寞、孤山伴侣。更信有、铁石心
肠，广平几度曾赋。

寒深试拥羊裘，松醪自酌，谁伴吟苦。
摩挲醉眼，阑干笑拍，白鸥惊去。梁园胜赏
重约，渐玉树、琼花处处。怕柳条、未觉春
风，青青在否。

兰陵王

古堤直。隔水轻阴扬碧。东风路，还是
舞烟眠露，年年自春色。红尘遍京国。留滞
高阳醉客。斜阳外，千缕翠条，仿佛流莺度
金尺。

长亭半陈迹。记曾系征鞍，频护歌席。
匆匆江上又寒食。回首处应念，旧曾攀折，
依然离恨遍四驿。倦游尚南北。

恻恻。怨怀积。渐楚榭寒收，隋苑春寂。
眉颦不尽相思极。想人在何处，倚楼横笛。
闲情似絮，更那听，夜雨滴。

琐窗寒

禁烛飞烟，东风插柳，万家千户。梨花院落，数点弄晴纤雨。傍秋千、红云半湿，画帘燕子商春语。数十年南北，西湖倦客，曲江行旅。

日暮。花深处。对修竹弹棋，戏评格五。携尊共约，诗酒云朋月侣。念旧游、九陌香尘，倡条冶叶还在否。踏青归，醉宿兰舟，枕藉黄金俎。

隔浦莲近拍

铅霜初褪凤葆。碧旆侵云窈。万绿伤春远，林幽乐、多禽鸟。斜阳堤畔草。游鱼闹。暗水流萍沼。翠钿小。

凉亭醉倚，接羅巾、任敺倒。月明庭树，夜半鹊飞惊晓。隔岸苹乡梦渐到。吹觉。一襟风露尘表。

早梅芳

柳初妍，花渐好。可恨行期到。落梅香尽，澹月朦胧影微照。风帘银烛暗，露幕金花小。纵离歌缓唱，残角又霜晓。

琐窗前，秦吉了。促上长安道。扬鞭西去，几点稀星尚云表。去程疑是梦，宿酒昏情抱。凤楼空，琼箫声渐杳。

又

凤钗横，鸾带绕。独步鸳鸯沼。阑干斜倚，自打精神对花笑。贴衣琼佩冷，衬袜金莲小。卷香茵缥缈，舞袖稳纤妙。

梦初成，欢未了。明日青门道。离云别雨，脉脉无情画堂晓。柳边骄马去，翠阁空凝眺。渐春风、绿愁江上草。

四园竹

昏昏暝色，乱叶拥云扉。渚兰风润，庭桂露凉，香动秋帏。独向闲亭步月，阑干瘦倚，此情惟有天知。

纵如其。黄花时节归来，因循已误心期。欲写相思寄与，愁拂鸾笺，粉泪盈盈先满纸。正寂寞，楼南雁过稀。

侧犯

晚凉倦浴，素妆薄试铅华靓。凝定。似一朵芙蓉泛清镜。轻纨笑自捻，扑蝶鸳鸯径。娇懒。金凤骀、斜欹翠蝉影。

冰肌玉骨，衬体红绡莹。还暗省。记青青、双鬓旧潘令。梦想鸾筝，后堂深静。何日西风，碧梧金井。

齐天乐

客愁都在斜阳外，凭阑桂香吹晚。乱叶

蝉哀，寒汀鹭泊，离绪并刀难翦。牙屏半掩。渐尘扑冰纨，浪收云簟。露入征衣，满襟秋思付诗卷。

还思前度问酒，凤楼人共倚，归兴无限。雁影亭皋，蛩声院落，双阙明河光转。田园梦远。叹篱菊初黄，涧菹堪荐。拄笏西风，四山烟翠敛。

荔枝香近

杜宇声声频唤，春渐去。暗碧柳色依依，湖上迷青雾。残香净洗红兰，昨夜朱铅雨。金泥帐底，双虬自沈乳。

天际，渐迤邐片帆南浦。一笑蔷薇，别后酒杯慵举。江上琵琶，莫遣东风误鹦鹉。泪拥通宵蜡炬。

又

脸霞香销粉薄，泪偷泫。缓缓金兽，沈水微薰，入帘绿树春阴，糝径红英风卷。芳草怨碧，王孙渐远。

锦屏梦回，恍觉云雨散。玉瑟无心理，懒醉琼花宴。宝钗翠滑，一缕青丝为君翦。别情谁更排遣。

水龙吟

晓莺啼醒春愁，粉香独步千红地。庭闲散缟，林空翦雪，鸥惊鹤避。妒月魂凄，行云梦冷，温柔乡闭。渐黄昏院落，清明时候，

东风里、无情泪。

织翠玲珑叶底。倚阑人、玉龙休吹。残妆微洗，芳心微露，昭阳睡起。恨结连环，舞停双佩，水晶如意。倩蜂媒、聘取琼花，细与向、尊前比。

六丑

自清明过了，渐柳底、莺梭慵掷。万红御风，飘飘如附翼。锦绣陈迹。障地香尘暗，乱蜂似雨，漫冶游南国。兰襟缥缈辞湘泽。马迹郊原，燕泥巷陌。伤春为花深惜。叹芳菲薄幸，容易疏隔。

庭闲人寂。空余芳草碧。梦里惊春去，如瞬息。长安市上狂客。为桃源解佩，醉浓欢极。无心整、雾襟烟帻。惊回处，断雨残云倦倚，画阑干侧。相思恨、暗度流汐。更杜鹃、院落黄昏近，谁禁受得。

塞垣春

草碧铺横野。带暝色、归鞍卸。烟葭露苇，满汀鸥鹭，人在图画，渐一声雁过南楼也。更细雨、时飘洒。念徽容、都销瘦，漫将纨素描写。

临镜理残妆，依然是、京兆柔雅。落叶感秋声，啼蛩叹凉夜。对黄花共说憔悴，相思梦、顿醒西窗下。两腕玉挑脱，素纤慳半把。

扫花游

蕙风扬暖，渐草色分吴，柳阴迷楚。寸心似缕。看窥帘燕妥，妒花蝶舞。翦翦愁红，万点轻飘泪雨。怕春去。问杜宇唤春，归去何处。

后期重细许。倩落絮飞烟，障春归路。长亭别俎。对歌尘舞地，暗伤蛮素。算得相思，比著伤春又苦。正凭伫。听斜阳、断桥箫鼓。

夜飞鹊

秋江际天阔，风雨凄其。云阴未放晴晖。归鸦乱叶更萧索，砧声几处寒衣。沙头酒初熟，尽篱边朱槿，竹外青旗。潮期尚晚，怕轻离、故故迟迟。

何似醉中先别，容易为分襟，独抱琴归。回首征帆缥缈，津亭寂寞，衰草烟迷。虹收霁色，渐落霞孤鹜飞齐。更何时，重与论文渭北，翦烛窗西。

满庭芳

槐影连阴，竹光转露，小荷新绿浮圆。簟纹如浪，绡帐碧笼烟。回合溪桥一曲，初雨过、流水溅溅。阑干外，沙鸥野鸟，飞过钓鱼船。

浮生，同幻境，眼空四海，迹寄三椽。
但随天、休问我后谁前。要识渊明琴趣，真
真意、都在无弦。薰风里，纶巾羽扇，一枕
北窗眠。

花犯

报南枝、东风试暖，萧萧甚情味。乱琼
雕缀。幻姑射精神，玉蕊佳丽。寿阳宴罢妆
台倚。眉颦羞鹊喜。念误却、何郎归去，清
香空翠被。

溪松径竹素知心，青青岁寒友，甘同憔悴。
渐画角，严城上、雁霜惊坠。烟江暮、
佩环未解，愁不到、独醒人梦里。但恨绕、
六桥明月，孤山云畔水。

大酺

雾幕西山，珠帘卷，浓霭凄迷华屋。蒲
萄新绿涨，正桃花烟浪，乱红翻触。绣阁留
寒，罗衣怯润，慵理凤楼丝竹。东风垂杨恨，
锁朱门深静，粉香初熟。念缓酌灯前，醉吟
孤枕，顿成清独。

伤心春去速。叹美景虚掷如飞毂。漫孤
负、秋千台榭，拾翠心期，误芳菲、怨眉愁
目。冷透金篝湿，空展转、画屏山曲。梦不
到、华胥国。闲倚雕槛，试采青青梅菽。海
棠尚堪对烛。

霜叶飞

碧天如水，新蟾挂、修眉初画云表。半江枫叶自黄昏，深院砧声悄。渐凉蝶、残花梦晓。西风篱落寒蛩小。背画阑依依，有数点、流萤乱扑，扇底微照。

凝望渺漠平芜，蒹葭烟远，过雁还带愁到。拚教日日醉斜阳，但素琴横抱。记旧谱、归耕未了。金徽谁度凄凉调。算多少悲秋恨，恨比秋多，比秋犹少。

法曲献仙音

油幕收尘，素纨招月，一枕苹香微度。枕玉牙床，浣冰金斛，薰风夜凉窗户。渐睡醒、明河暗，芭蕉几声雨。

对谁语。念徽容已成憔悴，心期误。归计欲成又阻。寂寞燕楼空，想弓弯、眉黛慵妩。泪墨愁笺，纵回文、难写情素。便山遥水邈，几度梦魂飞去。

渡江云

青青江上草，片帆浪暖，初泊渡头沙。翠筇便瘦倚，问酒垂杨，影里那人家。东风未许，漫媚妩、轻试铅华。飘佩环、玉波秋莹，双髻绿堆鸦。

空嗟。赤阑桥畔，暗约琴心，傍秋千影

下。夜渐分、西窗愁对，烟月笼纱。离情暗逐春潮去，南浦恨、风苇烟葭。肠断处，门前一树桃花。

应天长

流莺唤梦，芳草带愁，东风料峭寒色。又见杏浆饧粥，家家禁烟食。江湖几年卷客。曾惯识、凄凉岑寂。苦吟瘦，萧索诗肠，空愧郊籍。

春事正溪山，柳雾花尘，深映翠萝壁。更谢多情双燕，归来旧庭宅。情丝乱游巷陌。怅容易、万红陈迹。酒旗直，绿水桥边，犹记曾识。

玉楼春

东风跃马长安道。一树櫻桃花谢了。别来千里梦频归，醉里五更愁不到。

江南两岸无名草。雨遍莓苔生嫩葆。玉楼人远绿腰闲，帘幕深沈双燕老。

又

粉销香减红兰泪。总是文君初别意。春风织就闷情怀，夜月砌成愁况未。

迢迢归梦频东里。堪恨洛阳花渐已。斜阳日日自相思，三十六陂芳草地。

又

万花丛底曾抬目。澹雅梳妆娇已足。夜

来鹦鹉梦中人，春去琵琶江上曲。

双鸾碧重钗头玉。裙曳湘罗浮浅绿。东风一醉买蛾眉，为拚明珠三万斛。

又

西园斗结秋千了。日漾游丝烟外袅。小桥杨柳色初浓，别院海棠花正好。

粉墙低度莺声巧。薄薄轻衫宜短帽。便拚日日醉芳菲，未必春风留玉貌。

又

柳丝挽得秋光住。肠断驿亭离别处。斜阳一片水边楼，红叶满天江上路。

来鸿去雁知何数。欲问归期朝复暮。晚风亭院倚阑干，两岸芦花飞雪絮。

伤情怨

南枝春意正小。篱菊都荒了。帐底孤灯，夜来还独照。

沙洲烟翠渺渺。谢塞鸿、频带书到。笑拈梅花，今年开较早。

品令

玉壶尘静。蟾光透、一帘疏影。偏爱水月楼台近。画阑独倚，风度寒香阵。

犹记曲江烟水恨。叹凄凉谁问。夜深纱觥霜痕印。嚼花拚醉，枝上春无尽。

木兰花

长江浩渺山明秀。宛转西风惊客袖。相逢才系柳边舟，相别又倾花下酒。

怪得新来诗骨瘦。都在秋娘相识后。一天明月照相思，芦荻汀洲霜满首。

秋蕊香

晚酌宜城酒暖。玉软嫩红潮面。醉中窈窕度娇眼。不识愁深恨浅。

绣窗一缕香绒线。系双燕。海棠满地夕阳远。明月笙歌别院。

菩萨蛮

银城远枕清江曲。汀洲老尽蒹葭绿。君上木兰舟。妾愁双凤楼。

角声何处发。月浸溪桥雪。独自倚阑看。风飘襟袖寒。

丑奴儿

岁寒时节千林表，独耐风霜。妒粉欺黄。澹澹衣裳薄薄妆。

西湖十二阑干曲，倚遍寒香。白鹭横塘。一片孤山几夕阳。

感皇恩

体态玉精神，惺惚言语。一点灵犀动人处。绣香罗帕，为待别时亲付。要人长记得，相思苦。

彩鸾独跨，蓝桥归路。憔悴东风自蛮素。桃叶杨花，又向空江欲度。任洛阳城里，春无数。

宴桃源

闲倚琐窗工绣。春困两眉频皱。独自下香街，攀折画桥烟柳。晴昼。晴昼。偏称玉楼歌酒。

又

何处春风归路。金屋空藏樊素。零乱海棠花，愁梦欲随春去。情绪。情绪。粉溅两行冰箸。

月中行

鬓云斜插映山红。春重澹香融。自携纨扇出帘栊。意欲扑飞虫。

蔷薇架下偏宜酒，纤纤手、自引金钟。倦歌佯醉倚东风。愁在落花中。

渔家傲

日转花梢春已昼。双蛾曲理遥山秀。百草偏输羞不斗。随人后。无情自折金丝柳。

秋水盈盈娇欲溜。六么倦舞弓弯袖。偷摘青梅推病酒。徘徊久。一双燕子归时候。

又

自别春风情意恻。秦筝不理香尘积。去跃青骢游上国。归未得。何如莫向尊前识。

薄幸高阳花酒客。迷云恋雨青楼侧。金屋空闲双凤席。离怀适。银台烛泪成行滴。

定风波

慵拂妆台懒画眉。此情惟有落花知。流水悠悠春脉脉，闲倚绣屏，犹自立多时。

有约莫教莺解语，多愁却妒燕于飞。一笑蔷薇孤旧约，载酒寻欢，因甚懒支持。

蝶恋花

谢了梨花寒食后。翦翦轻寒，晓色侵书牖。寂寞幽斋惟酌酒。柔条恨结东风手。

浅黛娇黄春色透。薄雾轻烟，远映苏堤秀。目断章台愁举首。故人应似青青旧。

又

墙外秋千花影后。环兽金悬，暗绿笼朱

牖。为怯轻寒犹殢酒。同心共结怀纤手。
粉袖盈盈香泪透。蹙损双眉，懒画遥山
秀。柔弱风条低拂首。渭城歌舞春如旧。

又

寂寞长亭人别后。一把垂丝，乱拂闲轩
牖。三月春光浓似酒。传杯莫放纤纤手。
金缕依依红日透。舞彻东风，不减蛮腰
秀。扑鬓杨花如白首。少年张绪心如旧。

又

落尽樱桃春去后。舞絮飞绵，扑簌穿帘
牖。惜别情怀愁对酒。翠条折赠劳亲手。
绣幕深沈寒尚透。雨雨晴晴，妆点西湖
秀。怅望章台愁转首。画阑十二东风旧

又

楼上钟残人渐定。庭户沈沈，月落梧桐
井。闷倚琐窗灯炯炯。兽香闲伴银屏冷。
淅沥西风吹雁影。一曲胡笳，别后谁堪
听。誓海盟山虚话柄。凭书问著无言应。

红罗袄

别来书渐少，家无梦徒归。念去燕来鸿，
愁随秋到，旧盟新约，心与天知。

楚江上、木落林稀。西风尚隔心期。水
阔草离离。更皓月照影自伤悲。

少年游

兰屏香暖，松醪味滑，湖蟹荐香橙。雁

宇秋高，凤台人远，明月自吹笙。

轻寒翦翦生襟袖，银漏渐催更。暗忆年时，桂风庭院，笑并玉肩行。

又

斜阳冉冉水边楼。珠箔水晶钩。拍点红牙，箫吹紫玉，低按小梁州。

双鸾已误青楼约，谁伴月中游。倦蝶残花，寒蛩落叶，长是替人愁。

又

画楼深映小屏山。帘幕护轻寒。比翼香囊，合欢罗帕，都做薄情看。

如今已误梨花约，何处滞归鞍。待约青鸾，彩云同去，飞梦到长安。

又

翠罗裙解缕金丝。罗扇掩芳姿。柳色凝寒，花情殢雨，生怕踏青迟。

碧纱窗外莺声嫩，春在海棠枝。别后相思，许多憔悴，惟有落红知。

还京乐

彩鸾去，适怨清和，锦瑟谁共理。奈春光渐老，万金难买，榆钱空费。岸草烟无际。落花满地芳尘委。翠袖里，红粉溅溅，东风吹泪。

任鸳帏底。宝香寒、金兽慵熏绣被，依依离别意味，琼钗暗画心期。倩啼鹃、为催行李。黯销魂，但梦逐巫山，情牵渭水。待

得归来后，灯前深诉憔悴。

解连环

寸心谁托。望潇湘暮碧，水遥云邈。自
绣带、同翦合欢，奈鸳枕梦单，凤帏寒薄。
澹月梨花，别后伴、情怀萧索。念伤春渐懒，
病酒未忺，两愁无药。

魂销翠兰紫若。任钗沈鬓影，香沁眉角。
怅画阁、尘满妆台，但玉佩依然，宝箏闲却。
旧约无凭，误共赏、西园桃萼。正天涯、数
声杜宇，断肠院落。

绮寮怨

满院荼蘼开尽，杜鹃啼梦醒。记晓月、
绿水桥边，东风又、折柳旗亭。蒙茸轻烟草
色，疏帘净、乱织罗带青，对一尊、别酒初
斟，征衫上、点滴香泪盈。

几度恨沈断云，飞鸾何处，连环尚结双
琼。一曲琵琶，湓江上、惯曾听。依依翠屏
香冷，听夜雨、动离情。春深小楼，无心对
锦瑟、空涕零。

玲珑四犯

金屋春深，似灼灼娉婷，真真娇艳。洗
净铅华，依旧曲眉丰脸。犹记舞歇凉州，渐
缥缈、碧云撩乱。自玉环、宝镜偷换。别后

甚时重见。

鸾帟凤席鸳鸯荐。但空馀、惠芳兰茜。天涯柳色青青恨，不入东风眼。惆怅二十四桥，任落絮、飞花乱点。奈翠屏、一枕云雨梦，谁惊散。

丹凤吟

暗柳烟深何处，翡翠帘栊，鸳鸯楼阁。芹泥融润，飞燕竞穿珠幕。秋千倦倚，还思年少，袜步尘轻，衫裁罗薄。陡顿芳心暗老，强理新妆，离思都占眉角。

过了几番花信，晓来划地寒意恶。可煞东风，甚把夭桃艳杏，故故凌铄。伤春憔悴，泪矗粉腮香落。挑脱金宽双玉腕，怕人猜偷握。渐芳草，恨画阑、休傍著。

忆旧游

又眉峰碧聚，记得邮亭，人别中宵。翦烛西窗下，听林梢叶堕，雾漠烟潇。彩鸾梦逐云去，环佩入扶摇。但镜裂鸳衾，钗分燕股，粉腻香销。

迢迢。旧游处，向柳下维舟，花底扬镳。更忆西风里，采芙蓉江上，双桨频招。怨红一叶应到，明月赤阑桥。渐泪浥琼腮，胭脂澹薄羞嫩桃。

拜星月慢

漏阁闲签，琴窗倦谱，露湿宵萤欲暗。

雁咽凉声，寂寞芙蓉院。画檐外，树色惊霜渐改，澹碧云疏星烂。旧约桐阴，问何时重见。

倚银屏、更忆秋娘面。想凌波、共立河桥畔。重念酒污罗襦，渐金篝香散。翦孤灯、伴宿西风馆。黄花梦、对发凄凉叹。但怅望、一水家山，被红尘隔断。

倒犯

百尺凤皇楼，碧天暮云初扫。冰华散缟。双鸾驾镜悬空窈。婆娑桂影，香满西风阑干悄。渐玉魄金辉，飞度千山表。饵玄霜、醉琼醪。

身在九霄，独步丹梯，飘飘轻雾鸾。缥缈广寒殿，觉世山河小。爱十二、琼楼好。算谁知、消息盈虚道。任地久天长，今古无私照。但仙娥不老。

解语花

鳌峰溯碧，贝阙缘云，桂魄寒光射。凤檐鸳瓦。星河际、缥缈绣帘高下。笙箫奏雅。爱雪柳、蛾儿笑把。琼佩摇、珠翠盈盈，迤逦飘兰麝。

陆地金莲照夜。富绮罗妆艳，春态容冶。笼纱鞍帕。香尘过、禁陌宝车骄马。游人静也。东风里、万红初谢。沈醉归、残角霜天，渐落梅声罢。

过秦楼

倦听蛩砧，初抛纨扇，隔浦乱钟催晚。湘蒲簟冷，楚竹帘稀，窗下乍闻裁翦。倦柳梳烟，枯莲蘸水，芙蓉翠深红浅。对半床灯火，虚堂凄寂，近书思遍。

夜漏永、玉宇尘收，银河光烂。梦断楚天空远。婆娑月树，缥缈仙香，身在广寒宫殿。无奈离愁乱织，藉酒销磨，倩花排遣。渐江空霜晓，黄芦漠漠，一声来雁。

又

翠约苹香，绿转槐荫，隔水晚蝉声断。壶冰避暖，钏玉敲凉，倦暑懒拈歌扇。云浪缥缈鱼鳞，新月开弦，落星沈箭。恨经年阔，柔笺空寄，梦随天远。

憔悴损、臂薄烟绡，腰宽霞缕，锦瑟暗尘侵染。韩香犹在，秦镜空圆，薄幸旧盟俱变。虚蠹春华，为谁容改芳徽，魂飞娇倩。凭危楼望断，江外青山乱点。

解蹀躞

岸柳飘残黄叶，尚学纤腰舞。谢他终日，亭前伴羁旅。无奈历历寒蝉，为谁唤老西风，伴人吟苦。

闷无绪。记得芙蓉江上，萧娘旧相遇。如今憔悴，黄花惯风雨。把酒东望家山，醉来一枕闲窗，梦随秋去。

蕙兰芳引

虹雨乍收，楚天霁、乱飞秋鹭。渐草色衰残，墙外土花暗绿。故山鹤怨，流水自、菊篱茅屋。日暮诗吟就，澹墨闲题修竹。

更忆飘蓬，霜终风葛，几度凉燠。叹归去来兮，何日甬东一曲。黄芦满望，白云在目。但月明长夜，伴人清独。

六么令

授衣时节，犹未定寒燠。长空雨收云霁，湛碧秋容沐。还是鲈肥蟹美，橡栗村村熟。不堪追逐。龙山梦远，惆怅田园自黄菊。

醉中还念倦旅，觞景伤心目。羞破帽、把茱萸，更忆尊前玉。愁立梧桐影下，月转回廊曲。归期将卜。西风吹雁，懒寄斜封但相嘱。

红林擒近

飞絮迷芳意，落梅销暗香。皓鹤唳空碧，白鸥避寒塘。妨它踏青斗草，便放晓日东窗。先自懒弄晨妆。谁奈靓笙簧。

望帘寻酒市，看钓认渔乡。控持紫燕，芹泥未上雕梁。想梁园谢馆，群花较晚，但陪玉树频举觞。

又

三万六千顷，玉壶天地寒。庾岭封的皪，

淇园折琅玕。漠漠梨花烂漫，纷纷柳絮飞残。
直疑潢潦惊翻，斜风溯狂澜。

对此频胜赏，一醉饱清欢。呼童翦韭，
和冰先荐春盘。怕东风吹散，留尊待月，倚
阑莫惜今夜看。

满路花

离歌泣断云，别舞愁飞雪。凤皇台上望，
琼箫绝。钗分玉燕，寸寸回肠折。碧空归雁
阔。犹有疏梅，岁寒独伴高节。

蛟绡罗帕，泪洒胭脂血。悠悠江上水，
天连接。朱楼遍倚，万里空情切。此恨凭谁
说。天若有情，料天须有区别。

又

寒轻菊未残，春小梅初破。兽炉闲拨尽，
松明火。青毡锦幄，四壁新妆裹。重暖香篝，
绣被拥银屏，彩鸾空伴云卧。

相思何处，梦入蓝桥左。归期还细数，
愁眉锁。薄情孤雁，不向楼西过。故人应怪
我。怪我无书，有书还倩谁呵。

氏州第一

闲倚江楼，凉生半臂，天高过雁来小。
紫茱波寒，青芜烟澹，南浦云帆缥缈。潮带
离愁，去冉冉，夕阳空照。寂寞东篱，白衣人
远，渐黄花老。

见说西湖鸥鹭少。孤山路、醉魂飞绕。

荻蟹初肥，莼鲈更美，尽酒怀诗抱。待南枝、春信早。巡檐对梅花索笑。月落乌啼，渐霜天、钟残梦晓。

尉迟杯

长亭路。望渭北、漠漠春天树。殷勤别酒重斟，明日相思何处。晴丝扬暖，芳草外、斜阳自南浦。望孤帆、影接天涯，一江潮带愁去。

回首杜若汀洲，叹泛梗飘萍，乍散还聚。满径残红春归后，犹自有、杨花乱舞。怅金徽、梁尘暗锁，算谁是、知音堪共语。尽天涯、梦断东风，彩云鸾凤无侣。

塞翁吟

睡起鸾钗亸，金约鬓影胧。檐佩冷，玉丁东。镜里对芙蓉。秦筝倦理梁尘暗，惆悵燕子楼空。山万叠，水千重。一叶漫题红。

匆匆。从别后，残云断雨，馀香在、鲛绡帐中。更懊恨、灯花无准，写幽愫、锦织回文，小字斜封。无人为托，欲倩宾鸿。立尽西风。

绕佛阁

暮烟半敛。云护澹月，斜照楼馆。春夜偏短，一床耿耿，孤灯晃帟幔。玉壶漏满。

天外渐觉，归雁声远。离思凄婉。重怀执手，东风翠苹岸。

料想凤楼人，倦绣回文停彩线。憔悴泪积，香销娇粉面。叹暗老年光，隙驹流箭。梦中空见。漫惹起相思，芳意迷乱。锦笺重向纱窗展。

庆春宫

孤鹜披霞，归鞍卸日，晚香菊自寒城。虚馆灯闲，征衫尘浣，夜深何处砧声。乱蛩催怨，月明里、依稀数星。云山迢递，犹误归期，方寸遍萦。

秋风燕送鸿迎。最怜堤柳，白露先零。倦倚楼高，恨随天远，桂风和梦俱清。故人千里，记翦烛、西窗赋成。相如憔悴，宋玉凄凉，酒恨花情。

满江红

目断江横，相思字、难凭雁足。从别后、倦歌慵绣，悄无拘束。烟柳翠迷星眼恨，露桃红沁霞腮肉。傍琐窗、终日对文枰，翻新局。

频暗把，归期卜。芳草恨，阑干曲。谢多情海燕，伴愁华屋。明月自圆双蝶梦，彩云空伴孤鸾宿。任画帘、不卷玉钩闲，扬花扑。

丁香结

尘拥妆台，翠闲歌扇，金井碧梧风陨。
听豆虫声小，伴寂寞、冷逼莓墙苍润。料凄凉宋玉。悲秋恨、此际怎忍。莲塘风露，渐入粉艳，红衣落尽。

勾引。记舞歇弓弯，几度柳围花阵。酒薄愁浓，霞腮泪渍，月眉香晕。空对秦镜尚缺，暗结回肠寸。念纤腰柔弱，都为相如瘦损。

西河

形胜地。西陵往事重记。溶溶王气满东南，英雄闲起。凤游何处古台空，长江缥缈无际。

石头城上试倚。吴襟楚带如系。乌衣巷陌几斜阳，燕闲旧垒。后庭玉树委歌尘，凄凉遗恨流水。

买花问酒锦绣市。醉新亭、芳草千里。梦醒觉非今世。对三山、半落青天，数点白鹭，飞来西风里。

一寸金

吾爱吾庐，甬水东南半村郭。试倚楼极目，千山拱翠，舟横沙觫，江迷城脚。水满苹风作。阑干外、夕阳半落。荒烟暝、几点

昏鸦，野色青芜自空廓。

浩叹飘蓬，春光几度，依依柳边泊。念水行云宿，栖迟羁旅，鸥盟鹭伴，归来重约。满室凝尘澹，无心处，宦情最薄。何时遂、钓笠耕蓑，静观天地乐。

瑞鹤仙

故庐元负郭。爱树色参差，湖光渺漠。楼危万山落。俯阑干十二，簷檐飞角。花娇柳弱。映轻黄，浅黛依约。与沙鸥、共结新盟，伴我醉眠醒酌。

萧散云根石上，淪茗松泉，注书芸阁。莺窥燕幕。檐外竹、圃中药。念耕烟钓雪，已成活计，一任风波自恶。但无心、万事由天，梦中更乐。

浪淘沙慢

暮烟愁，鸦归古树，雁过空堞。南浦牙樯渐发。阳关歌尽半阕。便恨入回肠千万结。长亭柳、寸寸攀折。望日下长安近，莫遣鳞鸿成间绝。

凄切。去帆浪远江阔。怅顿解连环，西窗下，对烛频哽咽。叹百岁光阴，几度离别。翠销粉竭。信乍圆易散，彩云明月。浙水吴山重重叠。流苏帐、阳台梦歇。暗尘锁、孤鸾秦镜缺。羞人问、怕说相思，正满院杨花，落尽东风雪。

西平乐慢

泛梗飘萍，入山登陆，迢递雾迴烟赊。
漠漠蒹葭，依依杨柳，天涯总是愁遮。叹寂寞
尘埃满眼，梦逐孤云缥缈，春潮带雨，鸥
迎远渚，雁别平沙。寒食梨花素约，肠断处，
对景暗伤嗟。

晚钟烟寺，晨鸡月店，征褐萧疏，破帽
敲斜。忆几度、微吟马上，长啸舟中，惯踏
新丰巷陌，旧酒犹香，憔悴东风自岁华。重
忆少年，樱桃渐熟，松粉初黄，短楫欢呼，
日日江南，烟村八九人家。

南乡子

归雁转西楼。薄幸音书日日收。旧恨却
凭红叶去，嗖溜。春水多情日夜流。

杨柳曲江头。烟里青青恨不休。九十韶
光风雨半，回眸。一片花飞一片愁。

望江南

娇滴滴，聪隽在秋波。六幅香裙拖细縠，
一钩尘袜翦轻罗。春意动人多。

临宝鉴，石黛拂修蛾。燕子楼头蝴蝶梦，
桃花扇底竹枝歌。杨柳月婆娑。

又

烟漠漠，湖外绿杨堤。满地落花春雨后，

一帘飞絮夕阳西。梁燕落香泥。

流水恨，和泪入桃蹊。鸂鶒洲边鸂鶒恨，
杜鹃枝上杜鹃啼。归思越凄凄。

浣溪沙

自别萧郎锦帐寒。凤楼日日望平安。杏
花枝上露才干。

眉皱但嫌钿翠堕，臂销惟觉钏金宽。薄
情杨柳殢征鞍。

又

一枕华胥梦不成。碧筒香润玉醪倾。日
长花影过池亭。

雪藕臂寒鹦较怯，采菱歌发鹭频惊。白
苹洲止雨初晴。

又

约臂金圆隐绶绦。枕痕斜印曲花藤。玉
肌娇软莹如冰。

护日帘栊迷晓梦，舞风琼佩弄秋声。倦
妆鸾鉴不忺凭。

又

宝镜奁开素月空。晚妆慵结绣芙蓉。殢
人娇语更怱怱。

倦浴金莲轻衬步，捧笙玉笋半当胸。枕
痕又露一丝红。

又

双倚妆楼宝髻垂。佩环依约下瑶池。鬓

边斜插碧蝉儿。

不嫁东风苏小恨，未圆明月柳娘悲。舞
休愁叠缕金衣。

又

斗鸭阑干燕子飞。一堤春水漾晴晖。女
郎何处踏青归。

生色鞋儿销凤稳，碧罗衫子唾花微。后
期应待牡丹时。

又

六幅蒲帆晓渡平。一江星斗渐西倾。离
家才是两三程。

浦外野花如唤客，
树头春鸟自呼名。五云深处锦官城。

又

柳底征鞍花底车。两行香泪湿红襦。别
来莺燕已春馀。

梳洗楼台愁独倚，笙歌庭院醉谁扶。卷
帘闲看玉储胥。

又

十二珠帘绣带垂。柳烟迷暗楚江涯。自
携玉笛凭丹梯。

写恨鸾笺凝粉泪，踏青鸳袜溅金泥。落
红深处乱莺啼。

又

睡起朦腾小篆香。素纨轻度玉肌凉。竹
深荷净少炎光。

雨过乱蝉嘶古柳，日斜双鹭立闲塘。更

将心事自商量。

点绛唇

眉叶频愁，泪痕红透兰襟润。雁声将近。
须带平安信。

独倚江楼，落叶风成阵。情怀闷。蝶随
蜂趁。满地黄花恨。

又

别后长亭，翠芜寂寞分襟地。雁书空寄。
归梦频东里。

一曲秋风，写尽渊明意。凝情际。雨襟
烟袂。都是黄花泪。

又

分袂情怀，快风一箭轻帆举。暮烟云浦。
芳草斜阳路。

轮与闲鸥，朝暮潮来去。空凝伫。小桥
樊素。金屋春深处。

又

莺语愁春，海棠风里胭脂雨。酒杯慵举。
闲扑亭前絮。

漠漠斜阳，截断愁来路。凭阑伫。满怀
离苦。分付楼南鼓。

夜游宫

愁压眉峰成敛。几回皱、落花钿点。镜
里芳容自羞见。又黄昏，听南楼，度更箭。

月引桐阴转。珠帘动、影摇花乱。雁过
西风楚天远。待归来，把愁眉，印郎面。

又

窄索楼儿傍水。渐秋到、渔村橘里。薄
幸江南倦游子。恣轻狂，恋高阳，歌酒市。

独自帘儿底。香罗带、翠钿金坠。为恼
情怀怕拈起。对西风，搵啼红，印窗纸。

诉衷情

绿云凤髻不忺盘。情味胜思酸。晓色露
桃烟杏，空照脸霞丹。

花渐老，径苔闾。锦斓斑。怨红一叶，
流水东风，好去人间。

又

嫩寒侵帐弄微霜。客泪不成行。料得黄
花憔悴，何日赋归装。

楼独倚，漏声长。暗情伤。凄凉况味，
一半悲秋，一半思乡。

一落索

澹澹双蛾疏秀。为谁频皱。落花何处不
春愁，料不是、因花瘦。

锦字香笺封久。鳞鸿稀有。舞腰销减不
禁愁，怕一似、章台柳。

又

欲寄相思情苦。倩流红去。满怀写不尽

离愁，都化作、无情雨。

渺渺暮云春树。澹烟横素。夕阳西下杜
鹃啼，怨截断、春归处。

迎春乐

垂杨影下黄金屋。东风渐、粉香熟。恨
当年、有约骖鸾速。误一枕、红云宿。

带眼宽移腰似束。怪何事、褪红销绿。
背面立秋千，羞人问、连环玉。

又

江湖十载疏狂迹。红尘里、倦游客。驻
雕鞍、问柳东风陌。花底帽、任敧侧。

斗酒百篇呼太白。傲人世、醉中一息。
何日归赋来，水之南、云之北。

又

依依一树多情柳。都未识行人手。对青
青、共结同心就。更共饮、旗亭酒。

褥上芙蓉铺软绣。香不散、彩云春透。
今岁又相逢，是燕子、归来后。

虞美人

春衫薄薄寒犹恋。芳草连天远。嫩红和
露入桃腮。柳外东边楼阁、燕飞来。

霓裳一曲凭谁按。错□□重看。金虬闲
暖麝檀煤。银烛替人垂泪、共心灰。

又

夕阳楼上都凭遍。柳下风吹面。强拈罗

袖倚重门。懒傍玉台鸾镜、暗尘昏。

离情脉脉如飞絮。此恨凭谁语。一天明月一江云。云外月明、应照凤楼人。

又

疏林远带寒山小。月落霜天晓。棹歌初发浦烟中。自叹疏狂踪迹、似萍蓬。

江边衰柳迷津堠。归兴浓于酒。断烟流水自寒塘。十里蒹葭、鸥鹭两三双。

又

彩云别后房栊悄。愁立西风晓。倚阑无语对黄花。惆怅玉郎应在、楚江涯。

钿筝空贮芳尘满。寂寞朱弦断。夜来一点帐前灯。频吐银花双烬、照罗屏。

又

玉奁香细流苏暖。寒日花梢短。翠罗尘暗缕金销。□□东□华屋、自藏娇。

当时携手鸳鸯径。一笑蔷薇影。如今眉黛镇愁封。欲问归期消息、望宾鸿。

醉桃源

金闺平帖被青青。宝街球路绲。晓风吹枕泪成冰。梅梢霜露零。

金鸭暖，宝熏腾。晴窗黏冻蝇。梦魂空趁断云行。江山千里程。

又

青青杨柳拂堤沙。溪头沽酒家。吟成醉

笔走龙蛇。春风双鬓华。

歌楚女，舞吴娃。轻烟笼翠霞。倦春娇
困宝钗斜。绿垂云髻鸦。

凤来朝

百媚春风面。凤箫催、绿么舞遍。玉鸾
钗、半溜乌云乱。悄疑是、梦中见。

曲叹弓弯袖敛。绣芙蓉、香尘未断。买
一笑、千金拚。共醉倚、画屏暖。

垂丝约

鬓蝉似羽。轻纨低映娇妩。凭阑看花，
仰蜂黏絮。春未许。宝箏闲玉柱。东风暮。

武陵溪上路。娉婷婀娜，刘郎依约曾遇。
鸳俦凤侣。重记相逢处。云隔阳台雨。花解
语。旧梦还记否。

芳草渡

芳草渡。渐迤邐分飞，鸳俦凤侣。洒一
枝香泪，梨花寂寞春雨。惜别情思苦。匆匆
深盟诉。翠浪远，六幅蒲帆，缥缈东去。

还顾。夕阳冉冉，恨逐潮回南浦路。漫
空念、归来燕子，双栖旧庭户。市桥细柳，
尚不减、少年张绪。渐瘦损，懒照秦鸾对舞。

全宋词 陈允平

琴调相思引

金谷园林锦绣香。踏青挑菜又相将。凤台人远，离思入三湘。

花著雨添红粉重，柳随风曳碧丝长。薄情鸾燕，春去怎商量。

陈 慥

无愁可解

国工范日新作越调解愁，洛阳刘几伯寿闻而悦之，戏作俚语之词，天下传咏，以谓几于达者。龙丘子犹笑之。此虽免乎愁，犹有所解也。若夫游于自然而托于不得已，人乐亦乐，人愁亦愁，彼且恶乎解哉。乃反其词，作无愁可解云：

光景百年，看便一世。生来不识愁味。问愁何处来，更开解个甚底。万事从来风过耳。何用不著心里。你唤做、展却眉头，便是达者，也则恐未。

此理。本不通言，何曾道、欢游胜加名利。道即浑是错，不道如何即是。这里元无我与你。甚唤做、物情之外。若须待醉了、方开解时，问无酒、怎生醉。

陈造

诉衷情 西湖

今朝人自藕州来。花意尚迟回。几时画船同载,云锦照樽罍。

铃斋外,已全开。是谁催。诗仙住处,和气回春,羯鼓如雷。

蝶恋花 范参政游石湖作命次韵

山立翠屏开几面。画舸经行,蒲葦□□岸。想过溪门帆影转。湖光忽作浮天远。

诗卷来时春畹晚。愁把钓游,佳处寻思遍。不许冷官人所贱。拘缠自叹冰蚕茧。

洞仙歌 赵史君送红梅

蝶狂风闹,不到凝香地。谁见飞琼巧梳洗。厌孤标冷艳,不入时宜,银烛底,酒沁冰肌未睡。

东君怜索寞,分寄寒斋,闹耐残醒嗅芳蕊。费西湖东阁,多少诗愁,援彩笔、重与江梅品第。算肯容、丹杏接仙游,又却要蕊宫,侍香扶

醉。

水调歌头 千叶红梅送史君

胜日探梅去 ,邂逅得奇观。南枝的皪 ,
〔陡〕觉品俗又香慳。曾是瑶妃清瘦 ,帝与金丹
换骨 ,酒韵上韶颜。百叠侈罗袂 ,小立耐春寒。

凝香地 ,古仙伯 ,玉尘闲。烦公持并三友 ,
秀色更堪餐。定笑芙蓉骚客 ,认作东风桃杏 ,
醉眼自相谩。想见落诗笔 ,字字漱龙兰。

菩萨蛮

十月十三日 ,宝应宰招饮 ,弟子常盼酒所指屏间
画梅乞词

冰花的皪冰蟾下。松烟竹雾溪桥夜。斜
倚小峰峦。依依同岁寒。

生绡明粉墨。浅笑犹倾国。恰似野桥看。
飘零只等闲。

虞美人 呈赵帅

凝香仙伯莺花主。雅意怜羁旅。略分春
色便浓欢。街吏何妨日日、报平安。

诗人一醉龙公妒。恰限今朝雨。关门独
酌强伸眉。也胜栖栖腰铺、守风时。

鹧鸪天

闲去街头赏大花。翠帷珠幰护豪华。西
真宴罢群仙醉 ,千尺黄云错紫霞。

团粉黛 ,闹箫笳。使星躔处驻灵槎。定知
今夜游仙梦 ,不落西京姚魏家。

又

遍赏扬州百种花。因循忘却鬓苍华。客
闲惯刻分题烛 ,坐久还生醉眼霞。

催掺鼓 ,趁鸣笳。未应回首问归槎。清明
寒食风烟地 ,判到今春不著家。

又

醉阅东风百种花。醉来长悔误随车。须
知绿幕黄帘底 ,别有春藏姚魏家。

空想像 ,剩惊嗟。梦云从此漫天涯。二年
得趁花前约 ,潘鬓缘愁恐更华。

江神子 席上史君令谢芷索词作

歌筵当日小蓬瀛。晚妆明。识芳卿。挽
袖新词 ,曾博遏云声。又侍仙翁灯夕饮 ,红雾
底 ,沸箫笙。

催人刻烛待诗成。捧雕觥。媚盈盈。不
道醉魂 ,入夜已懵腾。墨浣香罗回盼处 ,和笑
道 ,太狂生。

陈知柔

人月圆

鬓缘心事随时改 , 依旧在天涯。多情惟有 , 篱边黄菊 , 到处能华。

陈 著

宝鼎现 寿京尹曾留远侍郎渊子

玉宸凝眷。要得培□，神皋根本。天赋与、经纶好手，门外红尘谈笑遣。任草色、遍空庭交翠，月往风来自便。但纸帐、时供小憩，长理灯窗公案。

五行俱下流光电。笔如神、毫发都见。是则是、霜严雪劲。到底春风生意满。唤得应、雨和晴恰好，旗舞旂艘百万。更社鼠城狐扫影，雁鹜惊人避箭。

最是满腹精神，担负处、浑身皆胆。又谁知、条理元在，规模里面。天下事、又何难辩。待副苍生愿。渺宇宙、多少关心，留取功名久远。

真珠帘 寿孙古岩

纶巾古貌尘寰表。风流处、别是英雄才调。胸次著乾坤，触影皆诗料。金碧楼台新筑就，傍翠麓、旋添花草。仙棹。更逍遥来访，十洲三岛。

遮眼富贵人多，算如公有子，人间应少。

看膝下功名，共月林清皎。象简绯袍亲侍策，
且胜赏、先春独笑。都道。馆中书就养，云
翹偕老。

大酺 寿江东运使陆云西集撰

把雪冰心，钩韶手，飞上青云时早。红
尘难染著，十年前曾坐，凤池鳌岛。晕锦锵
环，重金压带，相去能争多少。从容何心问，
到如今都领，绣春花草。算耐处光阴，淡中
滋味，世人那晓。

笺天新有稿。要归去、盘礴山阴道。便
整顿、随琴霜鹤，带石秋兰，约松乔、倚风
清啸。争奈俞音杳。明月棹、又还停了。但
珍重、经纶料。时来须做，休管急流人笑。
功名尽迟尽好。

又 寿沿江大制使观文马裕斋同知

问大江东，长淮上，缘分如何修到。轻
裘还熟局，第三番又是，五年春了。菜饭工
夫，露香心事，惟靠天公分晓。林泉琴书梦，
算飞笺觅去，不知多少。奈雅意难酬，又还
留住，口衔新诏。

都无他嗜好。玉麟静、公事供谈笑。满
眼是、风花飘忽，惟有长松，雪霜里、插天
苍老。休忆家山好。安乐处、便成蓬岛。正
春雨、秧畴饱。边城如画，处处绿杨芳草。
青溪不妨寄傲。

又 寿王修斋枢密

自有乾坤，扶人极，宗主须还人物。今

为何时节，满红尘富贵，絮花飘忽。抵障狂澜，提携正印，一柱天擎突兀。平生分明处，是从容处□，不差毫发。把朝市山林，一般看了，无边风月。

深衣清到骨。紫枢府、谁信曾簪笏。炊脱粟、黄鸡白酒，补菊栽梅，碧溪绕、竹篱茅屋。无限轻描貌。都说道、诏书催发。想回首、招黄鹄。微微自笑，惟有赤松衣钵。相陪对门石佛。

沁园春

单景山雪中以学佛自夸，因次韵戏抑之

潇洒书斋，香清缕直，灯冷晕圆。忽惊窗鸣瓦，霰如筛下，裁冰翦玉，片似花鲜。深怕妨梅，也愁折竹，才作还休亦偶然。更深也，漫题窗记瑞，诗思绵绵。

闻君礼佛日千。浪说道繁华不值钱。想鸳衾底下，都将命乞，蒲龕里畔，未必心安。兜率天宫，清凉境界，总是由心不是缘。雪山上，自有人坐了，不到君边。

又 丁未春补游西湖

出禁城西，湖光自别，唤醒两瞳。有画桥几处，通人南北，绿堤十里，分水西东。问柳旗亭，簇山梵所，空翠烟飞半淡浓。偏奇处，看笙歌千舫，泛绮罗宫。

从容。莫问城中。是则是繁华九市通。奈一番雨过，沾衣泥黑，三竿日上，扑面尘红。那壁喧嚣，这边清丽，咫尺中间迥不同。

休归去，便舫舟荷外，梦月眠风。

又 寿吴竹溪

潇洒纶巾，风流野服，红尘外身。向南窗听雨，澜翻墨客，北亭恋月，笔走诗神。倚竹听琴，逢花倒榼，更得放晴游冠春。清闲好，算东洲人物，难得如君。

华堂瑞气如云。西风到帘帷才一分。喜星桥鹊语，佳传依旧，缙山鹤舞，仙样翻新。箫玉香中，烛花影里，听取捧觞低祝人。千千岁，看功名事业，都在儿孙。

又 寿六二叔父德光

月旦评中，有如公者，更谁与俦。看纷纷仁意，春风和气，堂堂义事，砥柱中流。己重物轻，身穷道泰，却占人间第一筹。回头笑，彼纷纷名利，过影浮沤。

夷犹。庭户清幽。算此境神仙别一洲。但烧香挂画，呼童扫地，对山揖水，共客登楼。付与儿孙，只将方寸，此外无求百不忧。宜多寿，自今开八帙，到八千秋。

又 □竹窗纸枕屏

小枕屏儿，面儿素净，吾自爱之。向春晴欲晓，低斜半展，夜寒如水，屈曲深围。消得题诗，不须作画，潇洒风流未易涯。人间世，但此身安处，是十分奇。

笑他富贵家儿。这长物何为著意□。便绮罗六扇，何如玉洁，丹青万状，都是钱痴。假托伊来，遮阑便了，免得惊风侵梦时。何须泥，要物常随我，不物之随。

又 寿应菴芷参政儼

运在东南，温厚气钟，吾菴芷翁。羨繁窗学问，迂斋正印，玉堂词翰，攻愧流风。制胜枢庭，参谋政府，一片平心扶大中。黄扉近，却翻然东顾，归宴方蓬。

潘舆日奉从容。全胜□貂蝉趋汉宫。如名山镇静，出云相望，大川渟蓄，有水皆宗。吾道胚腴，诸贤命脉，阴受春风和气浓。宜多寿，与瑶图同庆，绿竹歌公。

又 寿竹窗兄

吾竹窗兄，吾能评者，只将竹看。是丹山佳气，胚腴茂直，嵩溪润脉，滋养清坚。雪虐霜凌，风饕雨恶，撼顿侵期今几年。元无损，这虚心实节，却自依然。

人间。输此君贤。可曾向红尘里著鞭。称翩翩侣凤，舞依翡翠，昂昂雏鹤，立倚琅玕。动处非情，静中自韵，全得生来潇洒天。须长在，在月窗窗北，石涧东边。

又 寿陈菊坡枢密卓

吾菊坡兄，细观花□，元来一般。是贺山佳气，胚腴长茂，鄞江润脉，滋养清妍。移傍云霄，浓沾雨露，曾亚百花头上班。谁知道，待芬香透了，收敛东边。

笑他红紫纷然。算眼底何曾长久看。这秋芳自韵，不争春艳，霜很难老，偏耐风寒。占得清名，尊为寿客，晚节谁能如此全。千千岁，把黄金正色，照映人间。

水龙吟 寿江阌姚橘洲学士希得

玉麟堂上神仙，算来便合归廊庙。天教且住，堂堂裘带，舒舒旗纛。一笑谈中，遍江淮上，太平花草。待金瓯揭了，黄扉坐处，祇依此、规模好。

恰似虹流节后，庆生申、佳期还到。乾坤开泰，君臣相遇，机缘恁巧。谁信苍生，举头凝望，锋车催召。向芜湖，更有无言桃李，愿春风早。

又 寿婺州守赵岩起右撰孟傅

玉鳌头上蓬莱，十分好处饶松壑。无边风月，阴阴乔木，重重华萼。秋水门庭，淡交簪履，随宜斟酌。向西风回首，双旌缥缈，从天下、招琴鹤。

是则阳春有脚。被金华、洞天留著。相传好语，新来初见，分明鼓角。田里相安，袴襦歌了，却来持橐。称年年，橘绿橙黄时节，与松乔约。

瑞鹤仙 寿赵德修检讨必普

云无心出岫。游戏间、声名掀揭宇宙。红尘事看透。任高官惟有，鹤随诗瘦。溪山如绣。小轩亭、篝新话旧。想时时，梦到山林，但未有归时候。

知否。分明世界，多少经纶，莫轻回首。平生抱负。金銮殿，有新奏。便相扶君相，

从头做去，他又谁能出手。看明年、此日传宣，赐酴醾酒。

摸鱼儿

随湖南安抚赵德修自长沙回至澧港，值其生日
碧油幢、一开藩后，便思量早归去。工夫著紧新城好，风月万家笙鼓。游宴处。要管领春光，补种花无数。何须更驻。只画了潇湘，扁舟径发，挥手谢南楚。

江帆卸、撑入清溪绿树。家山三两程路。安排小马随猿鹤，勾引诗朋酒侣。潇洒处。是则是初心，只恐难留驻。忙须著句。把泉石烟霞，平章一遍，回首凤纶舞。

洞仙歌 次韵花蕊夫人

冰肌玉骨，自清凉无汗。云影鬅髻翠山远。颤金莲缓步，手托珠帘，风微透，扇底荷花香满。

归檐双飞燕，流盼消凝，微带羞红上娇面。又还黄昏近，一片闲情，天涯去、云也遮阑不断。回首处、沈思梦时曾，对十二屏山，怕拈秦阮。

又 次韵苏子瞻

冰肌玉骨，自清凉无汗，午梦醒来盼娇满。扇轻拈又放，浅炷兰薰，微笑处、吹著烟丝散乱。

凉亭还独步，曾是凭阑，携手心盟指云

汉。碧云斜阳外，信有如今，音书杳、寸肠千转。漫伫立、无言对荷花，看转眼秋风，翠移红换。

念奴娇 咏牡丹

洛阳地脉，是谁人、缩到海涯天角。绿树成阴芳雾底，得见当年台阁。园杏贵客，海棠姬侍，拥入青油幕。人间那有，风流天上标格。

如困如懒如羞，夜来应梦入，西瑶仙宅。为你闲风轻过去，□□不教妨却。娇不能行，笑还无语，惟把香狼藉。花花听取，年年无负春约。

又 献再一兄成室大任

轻衫短旆，几年来、游遍江南江北。扰扰浮生争富贵，多碧楼台满目。厦屋千间，夜床八尺，此理谁能烛。翩然归去，家山是事都足。

笑指旧隐逍遥，分猿鹤地，云顶栽花竹。乘兴生涯随处好，卜市心□新筑。山色窥帘，杏阴依户，门外从尘俗。朱颜雪鬓，清闲十二分福。

又 夏夜流萤照窗

暑天向晚，最相宜、一簇凉生新竹。潇洒轩窗还此景，此景真非凡俗。猿鹤相随，烟霞自在，与我交情熟。人生如梦，个中堪把心卜。

休叹乌兔如飞，功名富贵，有分终须足。

不管他非非是是，不管他荣和辱。净几明窗，
残编断简，且恁闲劳碌。流萤过去，文章如在
吾目。

又 寿姚橘州

紧头上立，问如何、犹向清溪盘礴。应为春
防须熟局，且借轻裘弹压。野聚晴炊，烟波暖
唱，尽出江南北。从容归袞，三年功满棋枰。

真个福比南山，谁无富贵，无此团圞乐。锦瑟
瑶琴清对处，青紫诸郎参错。楚楚孙枝，温温
媚玉，帘幕欢声拍。抠衣小子，寿公也趁龟鹤。

满江红 丁未九月望赏月

落枕鸿声，龙山梦、蓦然惊觉。还堪喜、木樨
香底，鹊声翻晓。弄雨未成霜意懒，望寒先怯山
容老。最难逢、无一点西风，惊乌帽。

竹叶酒，倾杯小。橙蜆脍，银盆好。称良辰欢
宴，及今年少。须信从来黄菊寿，未应便放青霜
恼。但看花、日日是重阳，金尊倒。

又 寿庆元西倅孙元实

越水稽山，清明气、钟为人极。影纓早、□中
学问，从头施設。不受尘来霜壁立，常生意处春
流活。与世间、别是一规模，师夔契。

仙岛上，分风月。苍梧下，怀冰雪。更

双亲犹是，朱颜时节。勋业要从青鬓上，乾坤如许丹山折。看凤衔、芝诏下层霄，朝金阙。

又 寿小叔母

修茂堂深，芳尘满、沈烟一朵。帘半卷，好风催晓，晴光才破。新润顿教萱草鬯，轻寒未放酴醾过。称鱼轩、容与寿如山，群仙贺。

琴帙底，声调和。庭阶下，儿孙大。喜新来咿喔，又还添个。总是人生如意处，休将时事关眉锁。趁莺花、时节绮罗筵，年年作。

烛影摇红 寿元实通判母

风月堂中，画屏不动香猊吐。珠翘环拥蕊宫仙，双鬓青如许。相对童颜寿侣。看庭前、绯袍拜舞。十洲三岛，柳探春时，梅欺雪处。

甲子花周，自从今日重新数。碧瑶杯重翠涛深，笑领飞琼语。此去华筵喜聚。听传宣、云间紫府。万分如意，凤诏便蕃，香轩容与。

水调歌头 寿颐斋兄安世

风骨最魁岸，宇宙更宽平。□人皆道，天上南极寿星精。随意后园花木，满眼家山松竹，尽可适平生。门外底须问，好占菊轩

清。

听乡评，义方训，莫如兄。元方既玉就□，更要季方成。不使尘劳顿挫，他日功名入手，当不负椿庭。不见谏议，教子有余荣。

又 寿陈菊坡枢密卓

身到紫枢府，一蹴凤池间。何妨到头富贵，却自恋家山。多少名缰利锁，尘满霜髯雪鬓，役役不知还。桃李竞春事，坡菊自清闲。

绿杨边，门径小，似僧关。吟情饮兴相将，二十载优闲。无限功名事业，分付儿孙纵靶，青镜尽朱颜。一语劝公酒，天下达尊三。

千秋岁 寿从母夫冯

燕前莺底。一日春犹在。香雾晓，祥云霁。烟交槐影重，风约花尘卸。当此际。桃源不是人间世。

彩袖环庭砌。华裾纷珂佩。欢声洽，童颜醉。金丹功已到，绿发生须再。箫鼓沸。飞琼来祝千千岁。

踏莎行 寿季父吉甫

杏苑长春，椿姿耐老。画堂琴幌融融调。生涯分付宁馨儿，西园手种闲花草。

露浴明河，风浮素颢。桂花著蕊今年早。

佳占端的在孙枝，明年寿席吮呕笑。

鹊桥仙 次韵舅氏竺九成试黜

云南钟秀，间生人望。底事未成美况。
当知大器大成时，更莫叹、贤关难上。

前程分定，算来无妄。命达时终不放。
且须寄语甲科人，断不下、一筹中榜。

一翦梅 寿吴景年祀

记得儿时识景年。翕忽光阴，二十余年。
梅边聚首又三年。结得因缘。五百来年。

把酒君前欲问年。笑指松椿，当是同年。
愿从今后八千年。长似今年。长似今年。

惜分飞 吴氏馆寄内童氏

筑垒愁城书一纸。雁雁儿将不起。好去
西风里。到家分付眉颦底。

落日阑干羞独倚。十里江山万里。容易
成憔悴。惟归来是归来是。

西江月 寿季父吉甫六十

宝瑟屏金深处，斑衣箫玉香中。人生二
美古难逢。杏苑今朝喜共。

一霎豆花新雨，半帘梧叶清风。年年此
景绿尊同。笑指南山称颂。

又 寿吴景年

箫玉和鸣云里，彩衣娱舞风前。好从龟鹤问长年。看取蟠桃结遍。

事业都随分定，儿孙也靠心传。隐耕窗下腹便便。相去神仙不远。

又 答族侄圭惠扇

当此朱炎火日，恨无玉骨冰肌。问来思欲动凉飏。宝箴荷君相遗。

如铁又添颜甲，报琼难续声诗。愿言长在奉扬时。似恁团圞到底。

小重山 次韵定海赵簿咏梅

松是交朋竹是邻。横枝临水瘦，月黄昏。冲寒香入岭头云。清到底，人共一般清。

好句更无痕。门前无俗客，不须扃。暂将骚致答花神。从此去，题动玉堂春。

柳梢青

晚凉到季父处观荷，花心已敛，遂赋此

淡淡新妆，盈盈娇态，谁道荷花。料想香肌，不禁畏日，翠盖儿遮。

我来胜赏高歌。故敛着、芳心为何。莫是伊花，恨余来晚，欲媚晨霞。

又 寿吴竹溪内

缥缈瑶城。客情春小，本分寒轻。霞佩云裾，步联西母，笑倚飞琼。

那堪四美都并。喜气与、祥云共生。自在风流，融融箫玉，楚楚兰馨。

霜天晓角

丙寅十一月七日夜江行，纪今春风雪中送云西先生陆景西处，伤感不已

江寒雁咽。短棹还催发。曾是玉堂仙伯，相别处、满蓬雪。

此别，那堪说。溯风空泪血。惟有梅花依旧，香不断、夜来月。

卜算子 次韵舅氏竺九成试黜

一自梦卢头，应学乘裴蹇。元是都门向上人，大用何嫌晚。

三岁事非遥，三捷功非远。管取微生共此荣，联步云程稳。

又 寿竹窗兄

雨逗一分寒，未放晴光透。绮席春风自十分，畅饮长春酒。

花气渐薰帘，佳致归诗手。的是诗中陆地仙，左挹浮丘袖。

又 嘲二十八兄

风急雁声高，露冷蛩吟切。枕剩衾寒不耐烦，长是伤离别。

望得眼儿穿，巴得心头热。且喜重阳节又来，黄菊花先发。

减字木兰花

嘉熙元年七月，如浦城。二十三日，□永康界
赵店宿，为喜雨作

浮萍踪迹。又作南东□□客。不奈秋阳。
一似朱明赫赫光。

惊雷叱雨。料是阿香怜逆旅。好个凉天。
称我前程步步便。

又 丁未泊丈亭

夜帆初上。准拟今朝过越上。及到今朝。
却被西风挫一潮。

丈亭一处。要得纵观赢得住。行止皆天。
谁道人生客路难。

如梦令 西湖道中

家在明山南住。身在明山西路。回首碧
云端，自笑不如飞鹭。飞去。飞去。飞入明
山深处。

又 舟泊咸池

晚泊江湾平处。楚楚苹花自舞。风翦雨
丝轻，江上潮生船去。看取。看取。湿橹不
惊鸥鹭。

捣练子 晓起

花影乱，晓窗明。莺弄春笙柳外声。和

梦卷帘飞絮入，牡丹无语正盈盈。

鹧鸪天 和黄虚谷石榴韵

看了山中薛荔衣。手将安石种分移。花
鲜绚日猩红妒，叶密乘风翠羽飞。

新结子，绿垂枝。老来眼底转多宜。牙
齿不入甜时样，醋醋何妨荐酒卮。

念奴娇 代人寿外舅

翠云弄晓，芰荷香、微透凉飏帘箔。彩
袂蹁跹欢舞处，勾引衔桃双鹤。骤马风前，
奔鲸浪里，独有壶天乐。如何不醉，放教杯
量宽著。

消得寿八千春，百分才一，更童颜如渥。
听取飞琼含笑道，堪学孩儿书额。舄令骖鳧，
瑶仙跨凤，喜聚家人醪。心香遥上，也随风
过蓬弱。

摸鱼儿 寿虚谷

竹洲西、有人如玉，南柯一觉归早。青
山绿水亭轩旧，犹有未荒花草。谁信道。又
自爱湖光，买屋三间小。都无长好。但凤跃
雄文，蝇书小楷，转老转奇妙。

人间世，如许年高是少。浮生惟有闲好。
回头翻讶礲溪叟，轻把一丝抛了。凉新到。
记当日天香，露浴如今老。瑶卮寿晓。称酒

到眉间，醺醺醉也，儿女满前笑。

庆春泽 丙申卿人釀赏凤花

翔凤阑干，啼鹃院宇，相逢似梦才醒。
谁道无情，飞红舞翠欢迎。青春绿发花前饮，
醉自歌、记那时曾。到如今，心事凄凉，怕
说芳盟。

追思艮岳归来后，稳依山护得，雨翮风
翎。燕燕莺莺，从他巧舌饶声。翩翩一种天
然艳，笑向人、不与春争。羡花花，好岁寒
交，有卧云亭。

又

春困时光，风流昨梦，逢花便自醒醒。
回首宣和，宫莺掖燕相迎。归来只恋春山好，
到上林、枉是亲曾。又谁知，自有蟠松，相
与论盟。

阑干可是妨飞去，怕惊尘浣却，翠羽红
翎。舞态亭亭，浑疑暗折韶声。恁人眼处还
看破，道凤来、难与真争。醉扶归，但见啼
鹃，怨夕阳亭。

水龙吟 代寿贾秋壑

蓬莱风月神仙，却来平地为霖雨。乾坤
清了，如今多是，退行一步。寸寸归心，轻
轩娱侍，竹溪花圃。奈君王眷眷，苍生恋恋，
那肯放、钱塘渡。

天也知公此意，问升平、要抽身去。把

些夏潦，和些秋哨，轻轻缀住。一转移来，元勋力量，他谁堪付。待汾阳、了却中书，别又商量出处。

真珠帘 代寿秋壑母

鱼轩富贵人间少。那堪更、有子雍容廊庙。袞绣当斑衣，转色难心小。手把乾坤重整顿，略□□、微生一笑。分晓。是慈闱心事，如今著到。

帘幕早是寒生，又橙黄近也，菊花香了。已劝九霞觞，春意浓于酒。玉带金鱼欢舞处，更捷骑、红尘峡□。知否。这花添锦上，年年重九。

宝鼎现 寿范著林

著林仙叟，梦境炊得，才香还觉。回首渺，觚棱何处，云与商量浮计小。矮矮屋、半弓来闲地，也著三花两草。沸眼底、鞭风笠雨，不满茶边一笑。

寿骨奇耸神清峭。散人装、游戏尘表。帘昼永、长留雅伴，吟唾宽飞潇洒料。最好是、瑟和琴同调。眉里相看耐老。更绿草、孙枝可意，谱得家传较早。

争指画额儿儿，欢祝处、荷薰吹晓。记兰汤初试，当日风光又到。拚醪饮、任金尊倒。醉把羲娥傲。算万事、都是空花，雪柏霜松镇好。

又 四时怀古春词

问今何日，旧也曾尾，东风鹧鸪。回首念，家山桃李，归去来兮闻早赋。梦境里、尽何妨疏散，时趁莺晴信步。是则是、清闲自好，一点心犹怀古。

记得平世痴儿女。自灯宵、游了三五。还次第、湖边去也，寒食清明炊未住。是处处、是丹青图画，随意狂歌醉舞。奈暮被、烟花浪手，一掷残阳孤注。

须信乐极悲来，谁道是、曾歌琼树。夕阳亭遗婉，翻得江涛似许。忍望著、□天津路。最是鹃啼苦。算世事、消把春看，还有落花飞絮。

真珠帘 寿元春兄八十策

如梅在壑清标格。襟怀好、又是融融春拍。鸳梦早惊飞，惯一窗岑寂。谱曲裁诗心自在，任雪月、风花需索。奇特。问生涯却道，浮云如得。

回首门外黄尘，算何如、稳占溪光山色。八百岁为期，却十分才一。弟自高歌儿自舞，簇小小、榴花筵席。真率。镇无妨欢醉，年年今日。

又 四时怀古夏词

青云玉树南薰扇。京华地、别是潇湘图展。茉莉芰荷香，拍满笙箫院。雪藕盈盈歌袅处，早已带、秋声凄怨。堪叹。把时光轻靠，冰山一片。

从古幻境如轮，问铜驼、应是多番曾见。
谁把笛吹凉，总是腔新换。水枕风船空入梦，
但极目、波流云远。消黯。更华林蝉咽，系
人肠断。

又 寿内六十

闲居是念随云散。琴帘底、却自平生心
满。百二十年期，笑道今才半。一味藿盐清
得瘦，婉婉似、梅花香晚。相伴。老霜松宁
耐，溪山寒惯。

探借十日前春，小杯盘、也做寿筵模范。
绕膝舞斑衣，有酒从他劝。但任真来浑是处，
梦不到、笙歌瑶燕。双健。任劳人播尽，风
流眉案。

金盏子 四时怀古秋词

眼底时光，奈老来、如何奈得秋何。黄
叶最多情，天分付、凉意一声先做。是处著
露莎蛩，也酸吟相和。新雁想，飞到故都徘
徊，未忍轻过。

往事是堪唾。红枣信、烽折尽任他。湖
山桂香自好，笙歌舫、沈沈醉也谁拖。可怜
瘦月凄凉，把兴亡看破。如今□，但留下满
城□，西风悲些。

玉漏迟 四时怀古冬词

故都冬亦好。风光可是，人间曾有。问
雪楼台，肉阵不教寒透。妙手搀春弄巧，唤

得应、千花如绣。灯市酒。笙歌镇似，元宵时候。

见说是事都新，但破冻潮声，去来依旧。老梦无情，不到六桥风柳。回首孤山好景，倩人问、梅花安否。应自瘦。雪霜可能僝僽。

沁园春 次韵弟茝雪中见寄

天盖西倾，地轴东翻，两年以来。那关中形势，已归勃勃，江南人马，都是回回。咄咄书空，栖栖问路，岁晚山空风雪催。如何得，与浑家踏遍，雪顶岩隈。

谁知有客敲推。把世变心烦都说开。道岩霜不杀，不成葭苇，沍寒惯耐，方是松梅。万事过前，一场梦里，分付茅柴三两杯。犹痴望，有太平时节，游戏春台。

又

旗盖运迁，衣冠事乖，岂非命来。自黄梁枕觉，分明看破，翠蓬舟近，及早抽回。谁料山深，也同鼎沸，步步危机忙里催。愁无奈，过青山万叠，碧水千隈。

此愁何计能推。算何日天教眉锁开。记六桥花舫，晴边访柳，孤山草酌，雪后评梅。回首西湖，伤心前事，覆水如何收上杯。东风好，问如今吹入，谁处楼台。

又 次韵刘改之

人生功名，在醉梦中，早须掉头。自南宫一劄，尘泥偶脱，前程双毂，日月如流。蕙帐真盟，菜羹余味，江上归舟谁得留。谁

知道，有邵平瓜圃，何日封侯。

天天又不人由。奈危世山林也有忧。况青冈不助，晋家风鹤，黑云直卷，吴分星牛。分寸残生，万千魔障，他事如今都罢休。关心处，是离离禾黍，故国宗周。

又 次韵侄演自遣

无价韶华，一笑相酬，青钱似苔。奈东风轻劣，催红雨去，西园次第，放绿阴回。老后时光，眉间心事，恰似怕酸人著梅。须知道，有谁能百岁，日日开怀。

从教世变轮推。也莫问人间春去来。看渊明归了，有形谁役，少陵醉里，无闷堪排。贫贱何妨，风流自别，不是沈沈浊世杯。层霄上，与大鹏盘礴，下视浮埃。

又 和元春兄自寿

人生几何，如何不自，珍重此生。向蠹残字上，甘心抛掷，蜗尖争处，著意丁宁。箭过时光，剑炊世界，谁带经锄谁笔耕。分明似，满一锅汤沸，无处清□。

输兄。炼得闲成。□无辱无忧无惧惊。但菜羹粝饭，不求他味，芒鞋竹杖，足畅幽情。八十年来，万千看破，胸次春风秋月明。梅花帐，称困眠醒起，无打门声。

又 示诸儿

信书成痴，捱到如今，无生可谋。奈浑家梦饭，谷难虚贷，长年断肉，菜亦慳搜。风雨潇潇，江山落落，死又还生春复秋。八十岁，是这般多活，堪吊堪羞。

休休。盍自回头。要铁汉须从穷处求。
那袁安闭户，恬然僵卧，少陵任妇，长是贫愁。
一等清风，千年佳话，蚁蚋看他金谷楼。
是是是，笑出门天阔，一片云浮。

水龙吟 牡丹有感

好花天也多悭，放迟留做残春主。丰肌弱骨，晴娇无奈，新妆相妒。翠幕高张，玉阑低护，怕惊风雨。记年时、多少诗朋酒伴，逢花醉、簪花舞。

那料无情光景，到如今、水流云去。残枝剩叶，依依如梦，不堪相觑。心事谁知，杜鹃饶舌，自能分诉。日西斜，烟草凄凄，望断洛阳何处。

又

百花开遍园林，又春归也谁为主。深黄浅紫，娇红腻白，他谁能妒。似不胜情，醉归花月，梦回云雨。又丰肌、恰被东风摇动，盈盈底、霓裳舞。

世事纷纷无据。与杨花、飞来飞去。当年斗大，知他多少，蜂窥蝶觑。金谷春移，玉华人散，此愁难诉。漫寻思，承诏沈香亭上，倚阑干处。

又 次韵黄蘧轩虚谷咏凤花

杜鹃啼正忙时，半风半雨春悭霁。酴醾未过，樱甜初熟，梅酸微试。一种红芳，九苞真色，舞窗翻砌。自仙樊去后，无人题凤，阑干外、成孤媚。

谁信阳春妙手，锦云机、新番裁制。东君冷看，如何描摸，天然艳美。浑欲乘风，又如羞日，做双飞体。伫骖鸾，称得花前弄玉，与吟箫婿。

瑞鹤仙 寿王之朝

对南山翠峭。几百年、银青门第转好。梅花弄春小。向重帘暖处，华筵开早。斑衣簇绕。舞香云、哄堂颂祷。稳生涯、都自心田，自有老天堪靠。

应道。□□□□，乐事难逢，可轻过了。鲈肥蟹健，桑落酒、酿来妙。称瑶卮争劝，襟怀宽放，一点尘嚣不到。但从今、家庆年年，醉乡里笑。

洞仙歌 寿卢竹溪

清溪带竹，竹外山光抱。新筑浑如图画了。称闲心、管领昨夜天风，吹送□，端的琅音恰到。

谁知青云上，鸾凤翱翔，曾把功名试多少。到如今梦觉，佩著飞霞，浑家问、玉芝瑶草。试冷看、重门外如何，恁得似，壶中羽衣尘表。

贺新郎 次韵戴时芳

北马飞江过。画图中、花城柳郭，万摧

千挫。羌管直惊猿鹤梦，愁得千山翠锁。有多少、风餐雨卧。回首西湖空溅泪，醉沈沈、轻掷金瓯破。平地浪，如何簸。

君家志气从来大。舞蓝袍、牵丝幕外，肯饶他个。谁料腥埃妨阔步，孤瘦依然故我。待天有情时须可。且占雪溪清绝处，看精神、全是梅花做。嫌暖饱，耐寒饿。

念奴娇 留范景山处有感

晓村深处，记当年、轻被东风吹别。重得相看春雨屋，心事从头细说。深院灯寒，流苏帐暖，曾梦梅花月。如今何在，消凝分付啼鴂。

亭馆飞入腥烟，残香惟有，数朵酴醾雪。旧燕寻巢来又去，也觉双飞声咽。泛梗生涯，空花世界，且做杯中活。可人兰玉，风光还有时节。

又 次韵弟茝

百年光景，算山中、多占人间分数。一片清风梅是主，弹压粗花俗树。小小鱼池，深深莺谷，曲曲香云路。堪诗堪画，是天分付闲处。

闻要跨鹤西游，家林自好，且何妨留驻。趁取酴醾新煮酒，烧笋煎花为具。万事皆空，千金一刻，底用闲愁苦。无情杜宇，笑他催我归去。

又 端午酒边

雨帘高卷，见榴花、应怪风流人老。是

则年年佳节在，无奈闲心悄悄。巧扇风轻，香罗雪湿，梦里曾看了。如今溪上，欢盟分付年少。

遍是眉好相宜，呼儿扶著，把菖蒲迎笑。说道浮生饶百岁，能有时光多少。幸自清贫，何妨乐趣，谱入瑶琴调。杯杯酒满，这般滋味谁晓。

绮罗香 咏柳外闻蝉三章

障暑稠阴，梳凉细缕，□□□□□□。露腋玲珑，多少闹中幽趣。断又续、可是无情，□相送、短长亭路。记春风、曾著莺啼，便娇那得袅如许。

知音人自暗省，凝睇青云影里，黄昏犹伫。一部笙簧，消得翠腰供舞。堪对景、翻入新妆，鬓影低、衬教眉妩。试回头、旧日章台，怕听声咽处。

又

袅入风腔，清含露脉，声在丝丝烟碧。破暑吹凉，天付弄娇双腋。似恋恋、舞翠纤腰，断还续、忍相离拆。最欢时、微雨初晴，夕阳犹湿淡云隔。

新来多少怆感，心怕无情过马，攀条惊著。梦里妆台，休说听来曾昨。凝伫漫、番节笙音，暗自将、玉阑轻拍。问谁能、唤起陶潜，醉翁同赋却。

又

霁晓楼台，斜阳渡口，凉腋新声初到。

占断清阴，随意自成宫调。看取次、颤引薰风，想无奈、露餐清饱。有时如、柔袅篆丝，忽如笙咽转娇妙。

谁知忧怨极处，轻把宫妆蜕了，飞吟枝杪。耳畔如今，凄感又添多少。愁绪正、萦绕妆台，怎更禁、被他相恼。送残音、立尽黄昏，月明深院悄。

满江红 次吕居仁韵

梦里京华，忽听得、庭花遗曲。到醒来、愁满东风山屋。春事已非结绮，晓班无分随群玉。想天涯、沦落杜秋娘，攒眉绿。

谁能顾，荒芜菊。谁能问，平安竹。任时光流转，都成虚辱。无可奈何天地隘，只饶走得溪山足。但逢人、相问麦青青，何时熟。

烛影摇红 寿族叔父衡之八十铨

吾菊山翁，鹤骖来自蓬云界。平铺心地有天知，楚生兰茝。膝下青衫舞拜。更参差、斑衣戏队。清闲无事，门外从他，惊尘飞隘。

寿八千年，百分才一朱颜耐。何妨长主翠嵩春，酒约诗盟在。家庆堂前欢会。领霞卮、醺红浅带。是人说道，真吕先生，风流潇洒。

又 寿内子

潇洒琴帘，月灯归后新谐好。青云香里

共清风，消得金花诰。争奈天颠地倒。好光阴、都惊散了。更听人说，七七年时，多多烦恼。

捱到如今，信知空挂闲怀抱。天于贫处最饶人，顰也翻成笑。牢闭柴门自好。对梅花、杯盘草草。满前儿女，耐后夫妻，藁盐偕老。

又 寿声仲

双杏堂深，山明水秀潏洄著。稳铺心事做平生，不买顰眉错。是则苍髯白发。笑微微、朱颜自渥。一团春意，半隐风流，他谁能学。

六十年华，又从今起新花甲。葵榴初艳芰荷香，争赴开筵约。家庆真堪恣乐。碧瑶杯、须拚满酌。瑟琴声里，弟劝兄酬，儿歌孙拍。

声声慢 次韵黄子羽咏凤花

珍丛凤舞，曾是宣和，春风送归禁幄。翠浅红深，婉婉步空金落。腥尘未飞动处，是先知、早辞华萼。好在□，四并难多少，怨怀无托。

猛拍阑干谁会，浮世事、悠悠白云黄鹤。有酒当花，休得是今非昨。花犹百年宁耐，算人生、能几欢乐。又匆匆，醉梦里、春去不觉。

祝英台近 次韵前人咏盘莲

小盆池，新压藕，翠盖已擎雨。巧弄红

妆，明艳便能许。自怜华发萧萧，风流无分，醉时眼、何妨偷觑。

黯然伫。回首今是何时，逢花笑还语。梦里西湖，双落泪如缕。斜阳十里烟芜，六桥风浪，有谁掉、采莲舟去。

江城子 中秋早雨晚晴

中秋佳月最端圆。老痴顽。见多番。杯酒相延，今夕不应慳。残雨如何妨乐事，声淅淅，点斑斑。

天应有意故遮阑。拍人间。等闲看。好处时光，须用著些难。直待黄昏风卷霁，金滟滟，玉团团。

又 重阳酒边

人生难满百年心。得分阴。胜千金。吹帽风流，时节又相寻。回首赐萸休说梦，真率具，自山林。

逢迎一笑且开襟。酒频斟。量犹禁。相劝相期，长健似如今。醉也从他儿女手，争把菊，满头簪。

又 七夕风雨

纷纷都说会双星。鹊桥成。凤骖迎。风雨凄凉，何故锁苍冥。儿女空愁谁解意，须道我，试来听。

人间天上不同情。最无凭。是柔盟。应怪痴人，虚妄做浮生。正值楼台多簇燕，教没兴，不开晴。

又 元宵书怀

笼街弹压上元灯。满瑶城。簇珠星。老矣如今，谁记旧来曾。眼底相逢惟有月，空对面，若为情。

残生消不尽鬣茎。瘦棱棱。困腾腾。扶起眉间，杯酒酹寒檠。也为风光陪一笑，心下事，梦中惊。

又 重午书怀

年年端午又今朝。鬓萧萧。思摇摇。应是南风，湘浦正波涛。千古独醒魂在否，无处问，有谁招。

何人帘幕倚兰皋。看飞桡。夺高标。饶把笙歌，供笑醉陶陶。孤坐小窗香一篆，弦绿绮，鼓离骚。

青玉案 次韵戴时芳

钱塘江上潮来去。花落花开六桥路。三竺三茅钟晓暮。当年梦境，如今故国，不忍回头处。

他谁做得愁如许。平地波涛挟风雨。往事凄凄都有据。月堂笑里，夕亭话后，自是无人悟。

又

青山流水迢迢去。总是东风往回路。送得春来春又暮。莺如何诉。燕如何语。只有春知处。

时光渐渐春如许。何用怜春怕红雨。到

处空飞无实据。花开也好，花飞也好，此意须双悟。

渔家傲 次前人

浪麦风微花雾扫。痕沙水浅溪桥小。属玉双双飞杳杳。山宽绕。新晴绣得春分晓。

独立无言心事渺。曾将宇宙思量了。世变何涯人已老。休烦恼。林泉况味终须好。

又

山弄夕辉眉淡扫。溪分新水支流小。醉梦风光凝望杳。云树绕。杜鹃怨处谁能晓。

浮世悠悠波渺渺。蜗争何事何时了。天为无情方不老。休苦恼。随缘诗酒清闲好。

踏莎行 中秋

豆雨空晴，桂花风静。碧虚飞上圆明镜。谁能唤起秃翁吟，只应笑得嫦娥醒。

可奈良宵，不堪残境。强拚一醉偷光景。夜凉渐搅雪霜心，昏眵犹认山河影。

卖花声 立春酒边

残梦腾腾。好鸟一声呼醒。小窗明、萧萧鬓影。当年头上，惯曾簪幡胜。到如今、有谁怀省。

东风著面，却自依然相认。哄痴儿、忺声弄景。盘蔬杯酒，强教人欢领。也微酣、

带些春兴。

鹊桥仙 次韵元春兄

兄年八十，弟今年几，亦是七旬有九。
人生取数已为多，更休问、前程无有。

家贫是苦，算来又好，见得平生操守。
杯茶盏水也风流，莫负了、桂时菊候。

蝶恋花 次韵黄子羽重午

世变无情风挟雨。长夜漫漫，何日开晴
午。白发萧疏惊岁序。儿嬉漫说重重午。

粒啄偷生如转黍。过计何须，负郭多南
亩。曾著宫衣沾雨露。如今掩袂悲湘浦。

虞美人 次韵人咏菊

故园处处都荒雨。寂寞蜗书户。人间春
事杏桃花。独有诗人依旧、菊为家。

老来犹解高叉手。遥上花前寿。华颠无
分插花枝。乞取霜根风月、送将归。

浪淘沙 与前人

有约泛溪篷。游画图中。沙鸥引入翠重
重。认取抱琴人住处，水浅山浓。

一笑两衰翁。莫惜从容。瓮醅灰芋雪泥
菰。直到梅花飞过也，桃李春风。

又 留城

记得去年时。采菊东篱。眉间一笑捧花枝。说道愿如花不老，交劝双卮。

又是菊花期。客况谁知。便无风雨也凄凄。白发夫妻时节酒，堪几参差。

又 立春日卖春困

窗影弄晴红。欢笑成丛。一声春困到衰翁。回首太平儿戏事，雨过云空。

人世暗尘中。如梦方浓。也须留取自惺惚。试问若教都困了，谁管春风。

又 示吴应奎

迟饭甑炊红。青剪蔬丛。鸡声邻里狎田翁。兵后故人能有几，岁晚江空。

谁信淡交中。依旧情浓。白头青眼转惺惚。相见莫教轻别去，负月孤风。

又 次韵示弟观

春事紫和红。蜂蝶争丛。消磨多少看花翁。不用借他炊黍枕，何梦非空。

茅屋菜畦中。村瓮醅浓。醉时啼鸟唤惺惚。不道白头添一岁，舞月歌风。

又

年事夕阳红。霜满髯丛。摩挲苍藓石婆翁。在京口夹冈。能见几人曾百岁，一笑书空。

回首棣华中。消得春浓。平生心事两惺惚。杖屨相从须放密，山月溪风。

糖多令 九月留城书怀

雁阵晓来霜。鸦村夕照黄。满人间、风景凄凉。幸有菊窗堪一醉，争又滞、水云乡。

沽酒也三行。邀风与较量。便明朝、吹送归航。趁得老盆新熟信，日日是、我重阳。

又 次前韵范纯甫留饮

蟹熟晕橙霜。蛆浮染菊黄。淡交情、都没炎凉。说道白头难会面，留一日、醉中乡。

世事与轮行。时光逐寸量。任人间、涛海风航。拜了老庞归去也，高著枕、卧南阳。

又 城归泊湖山

倦枕寄渔乡。篷低被怯霜。月窥人、多少思量。自是欲眠眠不稳，禁听得、雁声双。

和梦早催行。归来梅竹窗。小柴门、分破闲忙。翻笑白云飞不定，谙得静、憩诗床。

行香子 次韵元春兄

吾辈么麽。休叹蹉跎。得闲时、且逐时过。人间名利，都是浮华。但退如进，失如得，少如多。

难信生来，从发尖磨。到如今、方见霜涯。算天亦自，无奈吾何。是饥能忍，寒能耐，老能歌。

恋绣衾 寿内子

梅窗归坐几岁寒。老生涯、寂寞自便。
最喜得、双双健，与粗茶、淡饭结缘。

眉前把酒深深劝，这时光、惟有靠天。
看许大、痴儿女，且随宜、笑到百年。

西江月 书怀

老去坐来睡重，病多吟得诗慳。有时忽
自拍阑干。一点心随天远。

柳絮飞从何处，莺声啼破空山。春风依
旧满人间。不奈双鬓闲管。

又 寿王之朝

华胄银青气脉，仙风斑白须眉。儿孙玉
雪满庭帙。家庆人间难比。

浮世事等云过，平生心有天知。举杯相
约小春时。岁岁梅花里醉。

卜算子 寿族弟藻夫妇八十

月下百年缘，天上双星样。九秩齐开自
是稀，清健那堪两。

红叶景翻新，黄菊香宜晚。笑拥眉开祝
寿声，满劝鸳鸯盏。

又 用前韵弟藻次日又设酒

喜气满清门，庆集还新样。卜醉筵开意

转浓，昨日今朝两。

愧我一年多，见汝双欢晚。自觉人生此会稀，有酒宁论盏。

南乡子 中秋无月

流景去难縻。浮世危如拍浪埼。才遇中秋聊对月，佳期。最怕清明未可涯。

人月本相依。果是今朝恰背违。孤负楼台多少醉，堪悲。何忍滂沱与毕离。

宝鼎现 代邑士送韩君美经历

望京门外，怕见催发，东风行马。清到底、冰壶满了，欲借留来无计也。祖劝酒、看依依情恋，都在眉尖眼下。任万户、诗旗曲帐，有笔应难描写。

是则龟组随瓜卸。好规模、分付来者。才泛绿、依红小暇，移讲芹宫时促驾。又指点、秀宁城来脉，疏瀹春流似画。更巧为、溪山著句，留作千年佳话。

最念一邑酸寒，风雨暗、真几成假。向麝牙交处，还得儒珍旧价。便父母、又如何做，但结心香社。愿阔步、直上云霄，犹□回头奉化。

沁园春 代人送阎戎

莲叶山前，戎帐宏开，轰然最称。羨铺

心如水，肯教尘涴，为民乞雨，唤得天应。
紫逻□锋，绿林扫影，夜户都开无犬声。三
乡里，笑嬉嬉度日，歌舞清平。

溪头载月舟□，□□帐花旗忍送行。算
浮云自在，初无著相，薰风正好，却问归程。
折柳依依，憩棠□□，□□□春无尽情。趋
朝去，看青冥玉钺，金辔红缨。

喜迁莺 代邑士送梁宰观赴昆山同知

南庐佳号。是自许孔明，经纶才调。对
柳鸣琴，凭花制锦，小试一同谈笑。怎知画
帘难驻，忽又星輿催召。但识得、耀碑潭水
月，交光相照。

驿道。春正好。簇帐擎杯，听取殷勤祷。
略鲙松鲈，便膺芝凤，陵溯紫清津要。当家
得时行志，回首旧封文庙。疏化雨，障狂澜
不尽，生生芹藻。

西江月 送公棠戎

钱影何曾过眼，笔头那肯亏心。系门瘦
马影沈沈。夜柝不惊春枕。

一去轻如蕉梦，三乡都是棠阴。等闲换
取印黄金。催上云程新任。

水龙吟

代寿徐宰 以后缺 以上强村丛书本本堂词

陈祖安

如梦令 湖光亭

月直金波潋潋。此去水仙不远。霜重夜
风清，骨冷□□□□。谁见。谁见。醉眼参横
斗转。

程 秘

前筵勾曲

百世基图，光胙圣神之主；九天雨露，恩浓帝王之州。上奉台颜，后部献曲。

醉蓬莱

望皇都清晓，瑞日祥烟，洞开阊阖。一朵红云，映重瞳日月。万岁山高，九霞杯暖，正想宸游洽。绝塞庭琛，重闾天笑，年年仙阙。

韶凤徘徊，蒲鱼演漾，镐酒恩浓，龙蟠建业。玉琢麟符，分付人中杰。奠国安民，持将祝寿，乐作君臣悦。看取头厅，押班称贺，明年天节。

后筵勾曲

天容不老，千龄已祝于尧年；地限无边，四海均闻于舜乐。至和一鼓，万象皆春。上侑清欢，后部献曲。

程大昌

念奴娇 呈苏季真提举

冰容玉格 ,笑桃杏 ,非是闺帏装束。待要舒华那更管 ,朔气凝波僵木。五鬣山松 ,万年宫树 ,仅仅存余绿。一枝寄赠 ,教渠知道春复。

宁解车马成蹊 ,高标宜雪月 ,仍便溪谷。纵有知闻 ,谁辩得、驾野凌寒秉烛。尽更荒闲 ,终难掩抑 ,风里香千斛。林垆兴尽 ,此时鼎味翻足。

浣溪沙 五首

乾处缁尘湿处泥。天嫌世路净无时。皓然岩谷总凝脂。

清夜月明人访戴 ,玉山顶上玉舟移。一蓑渔画更能奇。

又

兽炭香红漫应时。遮寒姝丽自成围。销金暖帐四边垂。

报道黑风飞柳絮 ,齐翻白雪侑羔卮。那家斟唱□□词。

又

剪水飞花也大奇。熬波出素料同机。会心一笑撒盐诗。

谁拥醴醕夸岁瑞 ,恨无坚白怨朝曦。闭门高卧有人饥。

又

始待空冬岁不华。还教呈瑞怨贫家。若为高下总无嗟。

日照华檐晴后雨 ,风吹飞絮腊前花。天公何事不由他。

又

水递迢迢到日边。清甘夸说与茶便。谁知绝品了非泉。

旋挹天花融湔液 ,净无土脉污芳鲜。乞君风腋作飞仙。

万年欢 硕人生日

岁岁梅花 ,向寿尊画阁 ,长报春起。恰似今朝 ,分外香肥萼韡。杂佩珊珊就列 ,映蓝袂、宝薰擎跽。道这回、屋舍团栾 ,四时风月桃李。

回头处、无限思。看秋前药裹 ,而今鼎匕。须把康强 ,收作玳筵欢喜。况是鬓云全绿 ,顶珈笄、笑陪星履。新年动、定拥新祺 ,有孙来捧醪醴。

汉宫春 生日词

万六千年 ,是仙椿日月 ,两度阳春。根柯

不随物化 ,那有新陈。戏夸悠久 ,借时光、惊觉
时人。道历管 ,阶蓂万换 ,悠然唤作逡巡。

老我百无贪羨 ,羨天芳寿种 ,掩冉三辰。
谢他流年甲子 ,已是重轮。人间春狭 ,只九旬、
斗柄标寅。更拟问 ,椿枝倚数 ,十分取一为真。

好事近 生日词

日绎五千言 ,未说年龄可续。且得襟期萧
散 ,远氛嚣宠辱。

鬓须白尽秀眉生 ,来伴老眸绿。人道雪霜
林里 ,有翠松鲜竹。

减字木兰花 内子生日

距春五日。吉语搀先来饮席。易卦占新。
八八周轮又再轮。

开年定好。定把笙歌更药裹。旧怕无孙。
今已蓝袍拥绣荪。

卜算子 园丁献海棠

春产不贪春 ,为厌春花泛。睡到深秋梦始
回 ,素影翻春艳。

意赏逐时新 ,旧事谁能占。解转春光入酒
杯 ,萸菊谁云欠。

感皇恩

七十在前头 ,难言未老。只是中间有些

好。鬓云虽瘦 ,未有一根华皓。都缘心地静 ,
无忧恼。

此际生朝 ,梅花献笑。似向天边得新报。
孙枝秀雅 ,已挂恩袍春草。定从欢喜处 ,添年
考。

又

池馆足名花 ,四时薦馥。就里梅春春到
速。周遭松竹 ,任是雪霜长绿。总堪供寿乐 ,
翻新曲。

别向心田 ,有般奇木。依约灵椿共标目。
八千换历、才当一番春复。莫辞春起处 ,酩浮
玉。

万年欢 硕人生日

富寿康宁 ,要三般齐足 ,方是有福。献个
新词 ,不是越夸揆祝。七十古稀今独。花钗
底、髻云堆绿。那堪更、眼力过人 ,彩丝穿透珠
曲。

星辰履阶庭玉。对这般景趣 ,乐胜笙筑。
更愿孙枝衮衮 ,诜诜续续。解把诗书勤读。新
丹桂、会生旧竹。十年外 ,又颂生朝 ,恁时别换
腔局。

韵令 硕人生日

是男是女 ,都有官称。孙儿仕也登。时新
衣着 ,不待经营。寒时火柜 ,春里花亭。星辰
上履 ,我只唤卿卿。

寿开八秩 ,两鬓全青。颜红步武轻。定知
前面 ,大有年龄。芝兰玉树 ,更愿充庭。为询
王母 ,桃颗几时赧。

折丹桂 端复受官 并序

通奉尝欲为先硕人篆帔 ,命为诗语 ,某献语曰 :
“诗礼为家庆 ,貂蝉七叶余。庭闱称寿处 ,童稚亦金
鱼。”通奉喜 ,自为小篆 ,缀珠其上。今此小孙端复以
近制奏官 ,感记旧事 ,为词以歌之 ,曼往为弟侄一笑。

童年未晓君恩重。教得能趋拱。重亲带
笑酌天杯 ,听祝语、殷勤捧。

青衫得挂尤光宠。桂是蟾宫种。诗书浓
处便生枝 ,但只要、频浇壅。

水调歌头 并序

水晶宫之名 ,天下知之 ,而此邦图志 ,元不能主名
其所。某尝思之 ,苕霅水清可鉴 ,邑屋之影入焉。而
薨栋丹堊 ,悉能透现本象 ,有如水玉。故善为言者 ,得
以袞撮其美而曰 ,此其宫盖水晶为之 ,如骚人之谓宝
阙珠宫 ,正其类也。则岂容一地独擅此名也。兹承词
见及 ,无以为报 ,辄取此意 ,稍加櫟括 ,用来况水调歌
头为腔 ,辄以奉呈。若遂有取 ,可补地志之阙 ,不但持
杯一笑也。

绿净贯闾闾 ,夹岸是楼台。楼台分影倒
卧 ,千丈郁崔嵬。此是化人奇变 ,能使山巅水
底 ,对出两蓬莱。溪浒有仙观 ,苕霅信佳哉。

水晶宫 ,谁著语 ,半嘲诙。世间那有 ,如许
磊砢栋梁材。每遇天容全碧 ,仍更苹风不动 ,
相与夜深来。饮子以明月 ,净洗旧尘埃。

临江仙 和正卿弟生日词三首

遥认圯簪相应 ,为传珠贯累累。紫荆同本但殊枝。直须投老日 ,常似有亲时。

子姓亦闻多慧性 ,贪书不是痴儿。朝家世世重诗书。一登龙虎榜 ,许并凤凰池。

又

抗步碧潭潋潋 ,五畺青髻累累。何年乔木倚筇枝。搜寻同队者 ,追说钓游时。

今日昂藏称壮子 ,向来襁褓婴儿。年周甲子又重书。岂容藏老丑 ,照白有清池。

又

夹路传呼杳杳 ,垂腰印绶累累。万般荣贵出丹枝。遥知心乐处 ,椿畔桂当时。

酒到芳春偏弄色 ,轻黄泛滟鹅儿。大为行乐使堪书。醉来花下卧 ,便是习家池。

好事近 硕人生日

绿鬓又红颜 ,谁道年周甲子。两婿□□蓝绶 ,那一儿何虑。

只今卜筑水晶宫 ,归安好名义。金紫珈笄偕老 ,备长生福贵。

又

白屋到横金 ,已是蟠桃结子。更向仕途贪恋 ,是痴人呆虑。

水晶宫里饭莼鲈 ,中菰第一义。留得鬓须

迟白 ,是本来真贵。

浣溪沙 钱万大卿。前一夜有月 ,此日不得用乐作

物本无情人有情。百般禽味百般声。有人闻鹊不闻莺。

我盞通神君信否 ,酒才著盞月随生。大家吸月当箫笙。

万年欢

秋后花窠 ,放两枝三朵 ,来通芳信。诗眼惊观 ,谓是春光倒运。便即移尊就赏 ,更不惜、黄封赤印。何期道 ,青女专时 ,露华忽变霜阵。

诗翁笑、但休问。那阳和有脚 ,駸駸日进。待得灰飞 ,梅畹果先骋俊。次后连天红紫 ,向东风、万般娇韵。恁时节。玉勒狔鞍 ,郊原莫论远近。

感皇恩 生日示妹

身寿又康强 ,谢天将并。耳目聪明行步壮。登高挥翰 ,不用瞠眉扶杖。华堂偕老处 ,儿孙王。

只恨萍蓬 ,他乡浮荡。回首故山便惆怅。今年生日 ,忽似还家模样。当缘风絮韞 ,来麋唱。

又 代妹答

画舸白苹洲 ,如归故里。老幼欢迎僮婢

喜。较量心事 , 岁岁春风弧矢。今年称寿处 , 尤欢美。

嫁得黔娄 , 苦耽书史。文字流传曾贵纸。便同黼黻 , 何似实头龟紫。天公闻此语 , 应怜许。

又

某蒙惠和鄙作 , 谨再次韵。为闻对班在近 , 故有祝语。平生梦多验 , 此之心声 , 比梦又差有实也。

变化属朝班 , 鲲鹏相并。健翼垂云风用壮。扶摇得势 , 不藉仙人仙杖。旁观生意气 , 犹神玉。

此去汉庭 , 春光骀荡。亲见子虚不惆怅。鸾肩捷上 , 自有唐家格样。三台旬月里 , 堪歌唱。

又 中外三人受封

中外受郊恩 , 三封纶告。依并小君出称号。锦犀光艳 , 不比香薰脂膏。况从鸣瑟里 , 添花草。

更愿天公 , 别施洪造。水长船高愈新好。恁时舞带 , 一任巧装百宝。曲终珠满地 , 从人扫。

又

措大做生朝 , 无他珍异。填个曲儿为鼓吹。古来龙马 , 曾献河图真数。羲黄缘得此 , 齐元气。

我向如今 , 职名升赐。地在天宫正东序。当初真本 , 到此或容披觑。这回错综处。堪详

叙。

又 生朝

七十有三番 ,挂弧门首。此事从来信希有。新来仕路 ,夸说一般高手。肯从清要地 ,抛簪绶。

何许分花 ,伊谁送酒。得开口时且开口。无烦无恼 ,也没期程奔走。但能安此乐。夷然寿。

又 淑人生日词

锦告侈脂封 ,煌煌家宝。偕老之人已华皓。绿云拥鬓 ,更没一根入老。但从和晬看 ,年堪考。

叶是松苗 ,松为叶脑。禀得松神大都好。人人戴白 ,独我青青常保。只将平易处 ,为蓬岛。

又 娄通判生日词

一岁一生朝 ,一番老相。无欲无营亦无望。看经写字 ,且做闲中气象。闭门人阒静 ,心清旷。

骨肉团栾 ,一杯相向。野蔌家肴竞来饷。真情直话 ,不用逢迎俯仰。从他人笑道 ,不时样。

好事近 会娄彦发

桃柳旧根株 ,春到红蔫绿茁。一似老年垂白 ,带少容鬢发。

浮家泛宅在他乡 ,难得会瓜葛。幸对此番

乐饮 ,任宵分明发。

又 生日

盥水结冰花 ,老眼於今重见。一似琢成水玉 ,向冻盆游泛。

天公作事有何难 ,要花花便现。且把重春留住 ,变苍黎容面。

又

腊月做生朝 ,只有南枝梅玉。此外后生桃李 ,未舒英吐馥。

后园别自出神奇 ,现双松双竹。报道前堂琴瑟 ,俱长生厚福。

又 同日即事

岁岁做生朝 ,只是儿孙捧酒。今岁丝纶茶药 ,有使人双授。

圣君作事与天通 ,道有便真有。老去不能宣力 ,只民编分寿。

又

我里比侨居 ,不欠山青水绿。只恨风冲雁序 ,使分飞隈澳。

只今一苇视苕溪 ,见天伦雍睦。此去春浓絮起 ,应翻成新曲。

又 生朝纪梦

自涉希寿来 ,疑道无多岁月。昨夜风吹好梦 ,报前途康吉。

石桥坚壮跨黄河 ,不用资舟楫。管取身心安泰 ,阅椿龄千百。

减字木兰花

桑弧标吉。做了生朝逾七十。子又生孙。
阶砌芝兰欲满门。

今年定好。春腊之交诞婴少。玉烛气中。
寿富康宁四序同。

念奴娇

彝卿国录不间僻远 ,特为一来。则既幸佳词叙
旧 ,谦褻交厚 ,不容虚辱 ,次韵为谢

海角怀人 ,长误喜、簌簌敲帘风竹。命驾
翩然 ,谁信道、不怕溪山回曲。榻拂凝尘 ,香笼
清宴 ,麈柄从挥玉。好音闻耳 ,慰心何啻跽足。

犹记一桂专秋 ,创开殊选 ,倒峡余词力。
往事茫茫十换岁 ,却共天涯醺醺。已分成翁 ,
翘观赐带 ,上拥通仙录。休贪泉石 ,贤台闻用
金筑。

南歌子

景仁知府郎中见示月词 ,特从险韵出奇丽 ,得拭
目则已夜 ,不暇尽和。取最后两阕 ,试追元韵。地窄 ,
但能小举袖 ,不容敷舒也

每月冰轮转 ,常疑桂影摇。封姨特地借今
宵。万水一规光景、湛寒瑶。圆处应无恨 ,君
胡不自聊。谁家隐隐度晴箫。莫是素娥仙玉、
会丛霄。

又

才出沧溟底 ,旋明紫岫腰。玉光漫漫涌层潮。上有乘流海贾、卧吹箫。更上云台望 ,翻牵旅思遥。我生何许著簪瓢。却向天涯起舞、影萧萧。

又

韵致撩诗客 ,风流出酒家。长绳为驻日车斜。且向春香玉色、占生涯。细按歌珠串 ,从敲宝髻鸦。花应笑我鬓双华。偏向西阶吹馥、侑流霞。

点绛唇 庚戌生日

春草池塘 ,茸茸短碧通芳信。更饶华润。不解膏霜鬓。

池上诗翁 ,别带超遥韵。阳和进。香苞翠晕。物物皆沾分。

万年欢 丙午生日

老钝迂疏 ,尽世间乐事 ,不忤不戾。痴向韦编 ,根究卦爻来处。浑沌包中天地。谢东家、从头指示。便和那、八八机关 ,并将匙钥分付。

行年数、六十四。把一年一卦 ,恰好相似。妙道生生 ,既济还存未济。身愿河图比似。每演九后 ,重从一始。待人间、甲子何其 ,剩书亥字为戏。

水调歌头 上巳日领客往洛阳桥

坐上羽觞醕 ,水际洧衣褰。适兹胜赏 ,风轻云薄有情天。不用船舷悲唱 ,真俯阑干小海 ,乐事可忘年。莫向歌珠里 ,却叹鬓霜鲜。

送朝潮 ,迎夕汐 ,思茫然。知他楔饮 ,此地过了几千千。既有相催春夏 ,自解转成今古 ,谁后更谁前。堪笑兴怀客 ,不似咏归川。

又

红树迎风舞 ,仿佛采衣褰。云容应为 ,虞侍分付。

西江月 茶词

岁贡来从玉垒，天恩拜赐金奩。春风一朵紫云鲜。明月轻浮盏面。

想见清都绛阙，雍容多少神仙。归来满袖玉炉烟。愿侍年年天宴。

鹧鸪天 汤词

饮罢天厨碧玉觞。仙韵九奏少停章。何人采得扶桑椹，捣就蓝桥碧绀霜。

凡骨变，骤清凉。何须仙露与琼浆。君恩珍重浑如许，祝取天皇似玉皇。

水调歌头

昏发乌江，朝至湖阴，月正午，舟中作

玉女扫天净，雍观掠江宽。问君何事底急，夜半挟舟还。三岛眠龙惊觉，万顷明琼碾破，凉月照东南。碧气正吞吐，满挹漱膺肝。

烟篷上，乘云象，噉天关。人间已梦，我独危坐玩漫汗。螭殿黄昏未锁，鹤氅翩跹蜚下，共吸酒壶乾。兴罢吹笙去，风露五更寒。

又

壬子五月二十三日，流杯玉泉，雨忽大作，连赋水调二章，一书于壁，一怀以归

电阙驱神骏，铁捶起痴蛟。木鸣山裂盛夏，白昼野魑号。急上瑶庭深处，为问龙君何怒，抉破古天河。日华开绚采，雨意属诗豪。

与君来，蜚玉佩，斩觚瓢。纤流沈羽，借我万斛沸银涛。醉拍满缸香雪，写竭一池浓墨，逸气正飘飘。何事谪仙子，归去续松醪。

又

日毂金钲赤，雪窦水晶寒。支机石下翻浪，喷薄出层关。半夜雌龙惊走，明日灵蛇张甲，蜚上石盘桓。多谢山君护，未放醉翁闲。

安得醉，风泚泚，露珊珊。翠云老子，邀我瑶佩驾红鸾。一勺流觞何有，万石横缸如注，虹气饮溪乾。忽梦坐银井，长啸俯清湍。

又 登甘露寺多景楼望淮有感

天地本无际，南北竟谁分。楼前多景，中原一恨杳难论。却似长江万里，忽有孤山两点，点破水晶盆。为借鞭霆力，驱去附昆仑。

望淮阴，兵冶处，俨然存。看来天意，止欠士雅与刘琨。三拊当时顽石，唤醒隆中一老，细与酌芳尊。孟夏正须雨，一洗北尘昏。

又 戊戌自寿

渤澥东南界，西北倚昆仑。当时推步，

但知宇内有乾坤。午夜风轮微转，驾我浮空泛景，一息过天垠。俯视人间世，渺渺聚沕尘。

挽天吴，摩海若，吐还吞。宁用计年，八十阳九又三阴。要自白榆星外，直至黑流沙底，山与泽俱平。不论初末度，一色界如银。

六州歌头 送辛稼轩

向来抵掌，未必总谈空。难遍举，质三事，试从公。记当年，赋得一丘一壑，天鸢阔，渊鱼静，莫击磬，但酌酒，尽从容。一水西来他日，会从公、曳杖其中。问前回归去，已笑白发成蓬。不识如今，几西风。

蒙庄多事，论虱豕，推羊蚁，未辞终。又骤说，鱼得计，孰能通。叹如云罔罟，龙伯啖，眇难穷。凡三惑，谁使我，释然融。岂是匏瓜者，把行藏、悉付鸿濛。且从头检校，想见迎公。湖上千松。

满江红 龚抚干示闰中秋

黄鹤楼前，江百尺、波横光溢。问老子、当年高兴，何人知得。最爱洞庭天际水，分明表里玻璃色。恐今宵、未必似前番，天应惜。

都莫问，鸿钟勒。也休羨，壶天谪。忆故人霜下，乱滩横笛。便好骑鲸游汗漫，古来蟾影何曾没。更明年、重约再来时，乘槎

客。

又 登石头城，归已月生

颇恨登临，浪自作、骚人愁语。石城上、何须苦说，死袁生褚。当日卧龙商略处，秦淮王气真何许。与君来、萧瑟北风寒，黄云暮。

枕钟阜，湖玄武。生此虎，真蹲踞。看四山环合，休临江渚。可笑唐人无意度，却言此虎凌波去。君且住、明月为人来，潮生浦。

沁园春

别陈总帅（按调名原误作八声甘州，此从汲古阁本洛水词）

玉局仙人，轻帆万里，送入三吴。怪一舟如叶，元无浊物，依然姑射，满载冰壶。昔日文君，千言成诵，不识如今记得无。新来也，喜都将分付，一颗骊珠。

向来田赋蠲输。散多少、春风巴与渝。算公家粗了，莼鲈而已，何妨西子，白发江湖。印铸黄金，时来须佩，毕竟人生万卷书。离情处，正秦淮岁晚，雪意模糊。

步虚词 寿张门司

休怪频年司钥，仙官长守仙宫。东风未肯到凡红。先舞云韶彩凤。

都是一团和气，故教上苑春浓。群仙拍手

手过江东。高唱紫芝新颂。

沁园春 寿王运使

公有仙姿，苍松野鹤，落落昂昂。论法主长生，仍须极贵，云台绛阙，都许尚羊。更忆当年，而今时候，一念功名下帝旁。天分付，使人间草木，尽有春香。

人知相法奇庞。又那识、阴功事更长。算毗陵荒政，江东风采，忠文典则，凛凛生光。再岁秦淮，觚棱入梦，帷幄从来在庙堂。公归去，好平心献替，人望时康。

又 寿李通判

那用招秋，休言推暑，风自薰兮。问谁解当初，识公来处，月明碧落，旆卷青霓。千丈长松，起人生意，冻芋寒瓜空满畦。还堪怪，怪诸公衮衮，我尚凭泥。

须教一举崔嵬。算人世、功名各有梯。更何须炼鼎，玄霜绛雪，只烦煮茗，水饼冰齏。紫府多仙，招来满座，公自长生角亢齐。何曾也，有玉麟行地，老凤梧栖。

又 谢刘小山频寄所作

君有新词，何妨为我，时遣奚奴。看此山大小，风流晋宋，眼中馀子，苦自侏儒。九曲清溪，千枝杨柳，还记新条更有无。春将好，欲从君商略，君意何如。

佳人玉佩琼琚。更胸中、浇灌有诗书。把古人行处，从头检点，今人说底，却不须渠。更上石头，重登钟阜，画作金陵考古图。

频相见，怕薰风早晚，便隔天隅。

又 庚午三月望日赋椿堂牡丹

消得雕栏，也不枉教，车马如狂。怪元和一事，韩公子者，归来刷去，玉毁昆冈。为解花嘲，朝来试看，采佩殷霞浥露香。君休怪，算只缘太艳，俗障难降。

诗人未易平章。向百卉、雕零独后装。看洪炉大器，从来成晚，只须这著，也做花王。况是月坡，花围一尺，压尽纷纷琐细芳。还堪笑，笑龙钟老凤，方入都堂。

又 读史记有感

试课阳坡，春后添栽，多少杉松。正桃坞昼浓，云溪风软，从容延叩，太史丞公。底事越人，见垣一壁，比过秦关遽失瞳。江神吏，灵能脱罟，不发卫平蒙。

休言唐举无功。更休笑、丘轲自厄穷。算汨罗醒处，元来醉里，真敖假孟，毕竟谁封。太史亡言，床头酿熟，人在晴岚杳霭中。新堤路，喜樛枝鳞角，夭矫苍龙。

锦堂春 留春

最是元来，苦无风雨。只恁匆匆归去。看游丝、都不恨，恨秦淮新涨，向人东注。

醉里仙人，惜春曾赋。却不解、留春且住。问何人、留得住。怕小山更有，碧芜春句。

壶中天 寿丘枢密

日躔东井，正轮囷桂影，十分光洁。火令方中符国运。天与非常英杰。莘莘平生，眼空宇宙，绿发千寻雪。笑谈一镇，单于底事心慑。

晚岁佛地功深，人间富贵，五湖烟水阔。谁遣心期事左，须酬满、麒麟勋业。又也何妨，长生仙箓，已在黄金阙。中原恢拓，要公归任调燮。

烛影摇红 元宵

青旂摇风，朱帘漏月黄昏早。蓬山万叠忽蜚来，上有千灯照。和气祥烟缭绕。映琼楼、五云缥缈。青裙缟袂，乱吹繁弦，九衢欢笑。

元是琴堂，十分管领春光到。手移星宿下人寰，招客来仙岛。信道邦人见少。仿佛似、皇都春好。明年只恐，鳌山扈从，随班清晓。

谒金门 用赵帐干韵

烟漠漠。醉里看春都错。过了清明迟一著。牡丹重约摸。

晓日渐明檐角。天与芳辰难却。驻得韶华元有药。桃源谁共约。

水龙吟 寿李尚书

道家弱水蓬莱，鲸波万里谁知得。人间自有，南昌居士，仙风道骨。诗似白星，貌如聃老，风尘挺出。向谪仙家里，滕王阁畔，飘玉佩、下丹阙。

黄发四朝元老，又谁知、重生绿发。手提一笔，活人多少，三千功绩。已冠文昌，人人瞻望，玉枢躔逼。对新凉、酒颊微红，宛是一星南极。

喜迁莺 别陈新恩

少年意气，脑燕兵胡羯，虜王区脱。眼底朦胧，腹中空洞，不著曹刘元白。闻道殊科八中，也要彩卢连掷。收拾尽，到如今但有，寸心如铁。

天付，真奇特。口静神充，双眼胡僧碧。楚国离骚，唐朝词学，未信芳尘□歇。结取佳人香佩，截断儿曹绮舌。归去也，且斓斑戏彩，好春长日。

又 寿李文昌

评君谁似，似长松千丈，离奇多节。骨瘦棱棱，文高荦荦，今日□来仙阙。走卒识公容貌，酋虏问公官阙。更史馆，一编书多少，频添勋业。

伟绝。今岁别。新绿名孙，又见枝生叶。底事七旬，双瞳如水，毕竟桂花方发。赐第

彤墀秋早，又一瑶枢光洁。故人也，念相逢谁似，凤池同列。

又 寿薛尚书

一天风露，喜初行弹压，人间残暑。金母此时，云辇先降，又见枢星光吐。人道鸿蒙逢日，可是东方明处。更天上、走王人络绎，仪鸾琼醕。

听语。更希举。试把皇朝、盛事都来数。当日鳌头，皇扉侍母，绿发方瞳□□。更有飞凫王季，往往文星再聚。浑休问，但回班千岁，貂蝉成谱。

又 寿薛枢密

去年玉燕，记曾期今岁，瑶光入度。今日都人，从头屈指，尽是黑头公辅。争道一朝语合，谁信千龄际遇。更积雨。晓来晴，洗出琉璃秋宇。

笑语。知何许。旆卷青霓，来自钧天所。道骨仙风，安排顿著，须是人间紫府。要识云台高绝，更有凤池深处。从今数。看千秋万岁，永承明主。

柳梢青 寿薛尚书

官已尚书，人犹寒素，仙有名言。谓是若人，法当至贵，仍主修年。

唐人四字鲜妍。堪照映、画堂彩烟。更对新凉，一声芝曲，万斛金船。

又 和齐仙留春

嫩绿成堆。朝来红紫，都在莓苔。方见

春来，又闻春去，暗里谁催。

人生易老何哉。春去矣、秋风又来。何似云溪，长春日月，无去无归。

酹江月 丙子自寿

平生有意，把六经膏泽，人人沾受。白被子明康节辈，浪说乘除先后。遇合一时，英雄千古，谁是高强手。蹉跎岁晚，临风浩然搔首。

今但入梦青山，云谿深处，烟月生怀袖。宿有十年萧散愿，此段功缘须就。因忆坡公，仇池有约，莫误归时候。今朝对酒，歌此与君为寿。

贺新郎 寿李端明

袖手云溪畔。看人间、纷纷饥乌腐鼠，触蛮交战。便得金鱼垂玉带，多少雌黄点勘。算此语、必非河汉。直自弹冠班八座。更青春、数到期颐算。一段玉，无纤玷。

公难学处尤堪羨。全似□、泠泠秋水，体清形健。袞处从来高一著，那肯随人脚转。要须是、常见乾坤清晏。天意未教公猛去，要都俞、了却从公便。歌寿斝，朱帘卷。

宝鼎现 寿李端明

绿杨欲舞，红杏微笑，春工渐侈。试俚

指、自从嘉定，数到宝庆□□里。无一岁、不书年大有，问元功谁變理。□□□、于变雍熙，如此自当千岁。

况是端笏蓬莱陞。但看雍容、玉立山峙。炼五色、补天无迹，扶日天衢光四被。安清祐、填群心声色，恬然如谈笑耳。更八荒、民生奠枕，此著又当千岁。

又况善述先猷，严武备、不开边鄙。阴功遍南北，千岁未多畴祉。且说总是三千岁。此际方岐嶷。听今日、处处笙歌，何止南楼十二。

念奴娇 忆先庐春山之胜

归来一笑，尚看看趁得，人间寒食。阿寿牵衣仍问我，双鬓新来添白。忍见庭前，去年芳草，依旧青青色。西湖雨后，绿波两岸平拍。

天教断送流年，三之一矣，又是成疏隔。燕子春寒浑未到，谁说江南消息。玉树熏香，冰桃翻浪，好个山间景物。这回归去，松风深处横笛。

又 初见海棠花

嫣然一笑，向烛花光下，经年才见。欲语还羞如有恨，方得东君一盼。天意无情，更教微雨，香泪流丹脸。今朝霁色，笙歌初沸庭院。

因是思入东屏，当年手植，遍桃源低岸。失脚东来春七度，辜负芳丛无限。问讯园丁，

宁如归去，细与从头看。东风独立，白云遮断双眼。

倾杯 丁亥自寿

銮殿秋深，玉堂宵永，千门人静。问天上、西风几度，金盘光满，露浓银井。碧云飞下双鸾影。迢迢笙歌近笑语，群仙隐隐。更前问讯。堕在红尘今省。

渐曙色、晓风清迥。更积霭沈阴、都卷尽。向窗前、引镜看来，尚喜精神炯炯。便折简、浮丘共酌，奈天也、未教酩酊。来岁却笑群仙，月寒空冷。

醉蓬莱 寿王司直

算千葩百卉，谁伴东风，早春时候。唯有江梅，在人间长久。雪后霜前，冲涉多少，尚精神如旧。岁岁年年，酴酥饮了，便为公寿。

更向尊前席上，细看人与梅花，棱棱争瘦。桃李漫山，都落芳尘后。和气满身，参调玉弦，表天然孤秀。来岁今朝，星闾雾阁，一卮春酒。

又 丙申自寿

记蟾宫桂子，撒向人间，如今时候。
□□□□，□□□□□。白下长干，乱滩横笛，想昔游依旧。大海一沤，千年一息，谁称彭寿。

开遍门前丹蕊，渐西风入东篱，酿成仙酒。□□□□，□□□□□。卓笔鸡笼，悬天宝盖，占断宣徽秀。来岁清苔，公家事了，斑衣蓝绶。

西江月 壬辰自寿

天上初秋桂子，庭前八月丹花。一年一度见仙槎。秋色分明如画。

愿把阴功一脉，灯灯相续无涯。降祥作善岂其差。永作渔樵嘉话。

又 癸巳自寿

底事中秋无月，元来留待今宵。群仙拍手度仙桥。惊起眠龙夭矫。

天上灵槎一度，人间八月江潮。西兴渡口几魂消。又见潮生月上。

满庭芳

雪登前岭。自己酉江右雪行弥月，四十七年，无此乐也，今再见之

未岁嘉平，初旬日四，雪中归自崇唐。山林湖海，一气接苍茫。踏尽玉龙千丈，更一望、龙尾天长。须臾上，高峰四顾，迢迢过前冈。

群山，如玉削，松林百万，尽傅琼霜。浑疑是天际，一鹤翱翔。人道玉皇三六，欲一叩、风力方刚。明朝好，金乌衔烛，八表散祥光。

又 戊戌上元喜霁，访开桃洞

去腊飞花，今春未已，迤邐将度元宵。
俄然甲子，青帝下新条。净扫一天沈霭，红
轮满、大地山河。从今好，便当听取，万国
起歌谣。

有人，当此际，锄云深坞，剪月中阿。
已占断春风，自种仙桃。更扶疏桂影直，从
岩底、上拂云梢。仍为我，长摩苍石，无负
此清波。

又 戊戌自寿

人道苍姬，燠多寒少，故教千岁绵绵。
算来春夏，一气本无偏。底事今年玉历，秋
未朔、风露冷然。君知否，山深地僻，自是
早霜天。

如今，当此去，十分亲切，面问婵娟。
何须看仙槎，海上重还。好在金英玉屑，□
为我、满泛金船。仍传语，横江秀石，□永
锁三川。

减字木兰花

不应双睫。看尽人间花与雪。曾是当时。
一朵红云拥日飞。

如今正好。万绿千红深处坐。也使春工。
唤作天池五月风。

程东湾

沁园春 二月廿七

毓德婺虚 ,联辉魁宿 ,天启儒英。正仲春
冀阶 ,三留叶秀 ,晓来蓬矢 ,六挂门荣。星昴诞
萧 ,神嵩降甫 ,怎似今朝记始生。当此际 ,有满
城和气 ,万井欢声。

龚黄政事勋名。镜里文书吏胆惊。况百
年经界 ,于今修复 ,四贤道学 ,至此彰明。月对
艳阳 ,日逢初度 ,紫诏行催觐玉京。黄堂上、寿
觞称处 ,介福邦民。

程 垓

满江红 忆别

门掩垂杨，宝香度、翠帘重叠。春寒在，罗衣初试，素肌犹怯。薄霭笼花天欲暮，小风送角声初咽。但独褰、幽幌悄无言，伤初别。

衣上雨，眉间月。滴不尽，颦空切。羨栖梁归燕，入帘双蝶。愁绪多于花絮乱，柔肠过似丁香结。问甚时、重理锦囊书，从头说。

又

水远山明，秋容淡、不禁摇落。况正是、楼台高处，晚凉犹薄。月在衣裳风在袖，冰生枕簟香生幕。算四时、佳处是清秋，须行乐。

东篱下，西窗角。寻旧菊，催新酌。笑广平何事，对秋萧索。摇叶声声深院宇，折荷寸寸闲池阁。待归来、闲把木犀花，重熏却。

最高楼

旧时心事，说著两眉羞。长记得、凭肩

游。绡裙罗袜桃花岸，薄衫轻扇杏花楼。几番行，几番醉，几番留。

也谁料、春风吹已断。又谁料、朝云飞亦散。天易老，恨难酬。蜂儿不解知人苦，燕儿不解说人愁。旧情怀，消不尽，几时休。

南 浦

金鸭懒熏香，向晚来春醒，一枕无绪。浓绿涨瑶窗，东风外、吹尽乱红飞絮。无言伫立，断肠惟有流莺语。碧云欲暮。空惆怅，韶华一时虚度。

追思旧日心情，记题叶西楼，吹花南浦。老去觉欢疏，伤春恨，都付断云残雨。黄昏院落，问谁犹在凭阑处。可堪杜宇。空只解声声，催他春去。

摊破江城子

娟娟霜月又侵门。对黄昏。怯黄昏。愁把梅花，独自泛清尊。酒又难禁花又恼，漏声远，一更更，总断魂。

断魂。断魂。不堪闻。被半温。香半温。睡也睡也，睡不稳、谁与温存。只有床前、红烛伴啼痕。一夜无眠连晓角，人瘦也，比梅花，瘦几分。

木兰花慢

倩娇莺婉燕，说不尽、此时情。正小院

春阑，芳园昼锁，人去花零。凭高试回望眼，
奈遥山远水隔重云。谁遣风狂雨横，便教无
计留春。

谁知雁杳与鸿冥。自难寄丁宁。纵柳院
颦深，桃门笑在，知属何人。衣篝几回忘了，
奈残香、犹有旧时熏。空使风头卷絮，为他
飘荡花城。

八声甘州

问东君、既解遣花开，不合放花飞。念
春风枝上，一分花减，一半春归。忍见千红
万翠，容易涨桃溪。花自随流水，无计追随。

不忍凭高南望，记旧时行处，芳意菲菲。
叹年来春减，花与故人非。总使梁园赋在，
奈长卿、老去亦何为。空搔首，乱云堆里，
立尽斜晖。

洞庭春色

锦字亲裁，泪巾偷裹，细说旧时。记笑
桃门巷，妆窥宝靥，弄花庭前，香湿罗衣。
几度相随游冶去，任月细风尖犹未归。多少
事，有垂杨眼见，红烛心知。

如今事都过也，但赢得、双鬓成丝。叹
半妆红豆，相思有分，两分青镜，重合难期。
惆怅一春飞絮，梦悠扬教人分付谁。销魂处，
又梨花雨暗，半掩重扉。

四代好

翠幕东风早。兰窗梦，又被莺声惊觉。起来空对，平阶弱絮，满庭芳草。厌厌未忺怀抱。记柳外、人家曾到。凭画阑、那更春好花好，酒好人好。

春好尚恐阑珊，花好又怕，飘零难保。直饶酒好□□未抵意中人好。相逢尽拚醉倒。况人与、才情未老。又岂关、春去春来，花愁花恼。

水龙吟

夜来风雨匆匆，故园定是花无几。愁多愁极，等闲孤负，一年芳意。柳困花慵，杏青梅小，对人容易。算好春长在，好花长见，元只是、人憔悴。

回首池南旧事。恨星星、不堪重记。如今但有，看花老眼，伤时清泪。不怕逢花瘦，只愁怕、老来风味。待繁红乱处，留云借月，也须拚醉。

玉漏迟

一春浑不见，那堪又是，花飞时节。忍对危栏数曲，暮云千叠。门外星星柳眼，看还似、当时风月。愁万结。凭谁为我，殷勤低说。

不是惯却春心，奈新燕传情，旧莺饶舌。
冷篆余香，莫放等闲消歇。纵使繁红褪尽，
犹有、酴醾堪折。魂梦切。如今不奈，飞来
蝴蝶。

折红英

桃花暖。杨花乱。可怜朱户春强半。长
记忆。探芳日。笑凭郎肩，殢红偎碧。惜惜
惜。

春宵短。离肠断。泪痕长向东风满。凭
青翼。问消息。花谢春归，几时来得。忆忆
忆。

上平西 惜春

爱春归，忧春去，为春忙。旋点检、雨
障云妨。遮红护绿，翠帟罗幕任高张。海棠
明月杏花天，更惜浓芳。

唤莺吟，招蝶拍，迎柳舞，倩桃妆。尽
唤起、万籁笙簧。一觴一咏，尽教陶写绣心
肠。笑他人世漫嬉游，拥翠偎香。

瑶阶草

空山子规叫，月破黄昏冷。帘幕风轻，
绿暗红又尽。自从别后，粉销香腻，一春成
病。那堪昼闲日永。

恨难整。起来无语，绿萍破处池光净。

闷理残妆，照花独自怜瘦影。睡来又怕，饮来越醉。醒来却闷。看谁似我孤令。

碧牡丹

睡起情无著。晓雨尽，春寒弱。酒盏飘零，几日顿疏行乐。试数花枝，问此情何若。为谁开，为谁落。

正愁却。不是花情薄。花元笑人萧索。旧观千红，至今冷梦难托。燕麦春风，更几人惊觉。对花羞，为花恶。

满庭芳 时在临安晚秋登临

南月惊乌，西风破雁，又是秋满平湖。采莲人尽，寒色战菰蒲。旧信江南好景，一万里、轻觅莼鲈。谁知道，吴侬未识，蜀客已情孤。

凭高，增怅望，湘云尽处，都是平芜。问故乡何日，重见吾庐。纵有荷纫芰制，终不似、菊短篱疏。归情远，三更雨梦，依旧绕庭梧。

念奴娇

秋风秋雨，正黄昏、供断一窗愁绝。带减衣宽谁念我，难忍重城离别。转枕褰帷，挑灯整被，总是相思切。知他别后，负人多少风月。

不是怨极愁浓，只愁重见了，相思难说。
料得新来魂梦里，不管飞来蝴蝶。排闷人间，
寄愁天上，终有归时节。如今无奈，乱云依
旧千叠。

雪狮儿

断云低晚，轻烟带暝，风惊罗幕。数点
梅花，香倚雪窗摇落。红炉对谖。正酒面、
琼酥初削。云屏暖，不知门外，月寒风恶。

迤逦慵云半掠。笑盈盈、闲弄宝箏弦索。
暖极生春，已向横波先觉。花娇柳弱。渐倚
醉、要人楼著。低告托。早把被香熏却。

摸鱼儿

掩凄凉、黄昏庭院，角声何处呜咽。矮
窗曲屋风灯冷，还是苦寒时节。凝伫切。念
翠被熏笼，夜夜成虚设。倚阑愁绝。听凤竹
声中，犀影帐外，簌簌酿寒轻雪。

伤心处，却忆当年轻别。梅花满院初发。
吹香弄蕊无人见，惟有暮云千叠。情未彻。
又谁料而今，好梦分胡越。不堪重说。但记
得当初。重门锁处，犹有夜深月。

闺怨无闷

天与多才，不合更与，殢柳怜花情分。
甚总为才情，恼人方寸。早是春残花褪。也

不料、一春都成病。自失笑，因甚腰围半减，珠泪频搵。

难省。也怨天、也自恨。怎免千般思忖。倩人说与，又却不忍。拚了一生愁闷。又只恐、愁多无人问。到这里，天也怜人，看他稳也不稳。

孤雁儿

在家不觉穷冬好。向客里、方知道。故园梅花正开时，记得清尊频倒。高烧红蜡，暖熏罗幌，一任花枝恼。

如今客里伤怀抱。忍双鬓、随花老。小窗独自对黄昏，只有月华飞到。假饶真个，雁书频寄，何似归来早。

又 有尼从人而复出者，戏用张子野事赋此

双鬓乍绾横波溜。记当日、香心透。谁教容易逐鸡飞，输却春风先手。天公元也，管人憔悴，放出花枝瘦。

几宵和月来相就。问何事、春山斗。只应深院锁婵娟，枉却娇花时候。何时为我，小梯横阁，试约黄昏后。

意难忘

花拥鸳房。记驼肩髻小，约鬓眉长。轻身翻燕舞，低语转莺簧。相见处，便难忘。肯亲度瑶觞。向夜阑，歌翻郢曲，带换韩香。

别来音信难将。似云收楚峡，雨散巫阳。

相逢情有在，不语意难量。些个事，断人肠。
怎禁得恹惶。待与伊、移根换叶，试又何妨。

一丛花

伤春时候一凭阑。何况别离难。东风只解催人去，也不道、莺老花残。青笺未约，红绡忍泪，无计锁征鞍。

宝钗瑶钿一时闲。此恨苦天慳。如今直恁抛人去，也不念、人瘦衣宽。归来忍见，重楼淡月，依旧五更寒。

蓦山溪

老来风味，是事都无可，只爱小书舟，剩围着、琅玕几个。呼风约月，随分乐生涯，不羨富，不忧贫，不怕乌蟾堕。

三杯径醉，转觉乾坤大。醉后百篇诗，尽从他、龙吟鹤和。升沈万事，还与本来天，青云上，白云间，一任安排我。

满江红

菴屋为舟，身便是、烟波钓客。况人间元似，泛家浮宅。秋晚雨声篷背稳，夜深月影窗棂白。□满船诗酒满船书，随意索。

也不怕，云涛隔。也不怕，风帆侧。但独醒还睡，自歌还拍。卧后从教鳅鳝舞，醉来一任乾坤窄。恐有时、撑向大江头，占风

色。

小桃红

不恨残花妥。不恨残春破。只恨流光，
一年一度，又催新火。纵青天白日系长绳，
也留春得麽。

花院重教锁。春事从教过。烧笋园林，
尝梅台榭，有何不可。已安排、珍簟小胡床，
待日长闲坐。

芭蕉雨

雨过凉生藕叶。晚庭消尽暑，浑无热。
枕簟不胜香滑。争奈宝帐情生，金尊意惬。

玉人何处梦蝶。思一见冰雪。须写个帖
儿、丁宁说。试问道、肯来麽，今夜小院无
人，重楼有月。

红娘子

小小闲窗底。曲曲深屏里。一枕新凉，
半床明月，留人欢意。奈梅花引里唤人行，
苦随他无计。

几点清觞泪。数曲乌丝纸。见少离多，
心长分短，如何得是。到如今、留下许多愁，
枉教人憔悴。

醉落魄 赋石榴花

夏围初结。绿深深处红千叠。杜鹃过尽芳菲歇。只道无春，满意春犹愜。折来一点如猩血。透明冠子轻盈帖。芳心蹙破情尤切。不管花残，犹自拣双叶。

一翦梅

旧日心期不易招。重来孤负，几个良宵。寻常不见尽相邀。见了知他，许大无聊。

昨夜梅花插翠翘。影落清溪，应也魂消。假饶真个住山腰。那个金章，换得渔樵。

又

小会幽欢整及时。花也相宜。人也相宜。宝香未断烛光低。莫厌杯迟。莫恨欢迟。

夜渐深深漏渐稀。风已侵衣。露已沾衣。一杯重劝莫相违。何似休归。何自同归。

眼儿媚 陆校：按此调亦系朝中措，作眼儿媚误

一枝烟雨瘦东墙。真个断人肠。不为天寒日暮，谁怜水远山长。

相思月底，相思竹外，犹自禁当。只恐玉楼贪梦，输他一夜清香。

浪淘沙

山尽两溪头。水合天浮。行人莫赋大江愁。且是芙蓉城下水，还送归舟。

鱼雁两悠悠。烟断云收。谁教此水却西流。载我相思千点泪，还与青楼。

雨中花令

闻说海棠开尽了。怎生得、夜来一笑。颦绿枝头，落红点里，问有愁多少。

小园闭门春悄悄。禁不得、瘦腰如袅。豆蔻浓时，酴醾香处，试把菱花照。

又

旧日爱花心未了。紧消得、花时一笑。几日春寒，连宵雨闷，不道幽欢少。

记得去年深院悄。□梁畔，一枝香袅说与西楼，后来明月，莫把菱花照。

又

卷地芳春都过了。花不语、对人含笑。花与人期，人怜花病，瘦似人多少。

闻道重门深悄悄。愁不尽、露啼烟袅。断得相思，除非明月，不把花枝照。

凤栖梧 客临安，连日愁霖，旅枕无寐，起作

九月江南烟雨里。客枕凄凉，到晓浑无

寐。起上小楼观海气。昏昏半约渔樵市。
断雁西边家万里。料得秋来，笑我归无
计。剑在床头书在几。未甘分付黄花泪。

又

有客钱塘江上住。十日斋居，九日愁风
雨。断送一春弹指去。荷花又绕南山渡。
湖上幽寻君已许。消息不来，望得行云
暮。芳草梦魂应记取。不成忘却池塘句。

又

门外飞花风约住。消息江南，已酿黄梅
雨。蜀客望乡归不去。当时不合催南渡。
忧国丹心曾独许。纵吐长虹，不奈斜阳
暮。莫道春光难揽取。少陵辨得寻花句。

又 南窗偶题

薄薄窗油清似镜。两面疏帘，四壁文书
静。小篆焚香消日永。新来识得闲中性。
人爱人嫌都莫问。絮自沾泥，不怕东风
紧。只有诗狂消不尽。夜来题破窗花影。

又 送子廉侄南下

九月重湖寒意早。目断黄云，冉冉连衰
草。惨别临江愁满抱。酒尊时事都相恼。
闻道吴天消息好。鸳鸯西池，咫尺君应
到。若见故人相问劳。为言未分书舟老。

愁倚阑 三荣道上赋

山无数，雨萧萧。路迢迢。不似芙蓉城

下去，柳如腰。

梦随春絮飘飘。知他在、第几朱桥。说与杜鹃休唤，怕魂销。

渔家傲 彭门道中早起

野店无人霜似水。清灯照影寒侵被。门外行人催客起。因个事。老来方有思家泪。

寄问梅花开也未。爱花只有归来是。想见小乔歌舞地。浑含喜。天涯不念人憔悴。

又

独木小舟烟雨湿。燕儿乱点春江碧。江上青山随意觅。人寂寂。落花芳草催寒食。

昨夜青楼今日客。吹愁不得东风力。细拾残红书怨泣。流水急。不知那个传消息。

临江仙 合江放舟

送我南来舟一叶，谁教催动鸣榔。高城不见水茫茫。云湾才几曲，折尽九回肠。

买酒浇愁愁不尽，江烟也共凄凉。和天瘦了也何妨。只愁今夜雨，更做泪千行。

又

浓绿锁窗闲院静，照人明月团团。夜长幽梦见伊难。瘦从香脸薄，愁到翠眉残。

只道花时容易见，如今花尽春阑。画楼依旧五更寒。可怜红绣被，空记合时欢。

朝中措

矮窗西畔翠荷香。人在小池塘。何事未拈棋局，却来闲倚胡床。

金盆弄水，玉钗弹鬓，妆懒何妨。莫道困来不饮，今宵却恨天凉。

又 茶词

华筵饮散撤芳尊。人影乱纷纷。且约玉骢留住，细将团凤平分。

一瓯看取，招回酒兴，爽彻诗魂。歌罢清风两腋，归来明月千门。

又 汤词

龙团分罢觉芳滋。歌彻碧云词。翠袖且留纤玉，沈香载捧冰垆。

一声清唱，半瓯轻啜，愁绪如丝。记取临分余味，图教归后相思。

又 咏三十九数

真游六六洞中仙。骑鹤下三天。休道日斜岁暮，行年方是韶华相逢一笑，此心不动，须待明年。要得安排稳当，除非四十相连。

又

片花飞后水东流。无计挽春留。香小谁栽杜若，梦回依旧扬州。

破瓜年在，娇花艳冶，舞柳纤柔。莫道刘郎霜鬓，才情未放春休。

醉落魄 别少城，舟宿黄龙

风催雨促。今番不似前欢足。早来最苦
离情毒。唱我新词，掩著面儿哭。

临行只怕人行远。殷勤更写多情曲。相
逢已是腰如束。从此知他，还减几分玉。

酷相思

月挂霜林寒欲坠。正门外、催人起。奈
离别、如今真个是。欲住也、留无计。欲去
也、来无计。

马上离魂衣上泪。各自个、供憔悴。问
江路、梅花开也未。春到也、须频寄。人到也、
须频寄。

生查子

溪光曲曲村，花影重重树。风物小桃源，
春事还如许。

情知送客来，又作寻芳去。可惜一春诗，
总为闲愁赋。

又

长记别郎时，月淡梅花影。梅影又横窗，
不见江南信。

无心换夕香，有分怜朝镜。不怕瘦棱棱，
只怕梅开尽。

忆王孙

萧萧梅雨断人行。门掩残春绿荫生。翠
被寒灯枕自横。梦初惊。窗外啼鹃催五更。

卜算子

枕簟暑风消，帘幕秋风动。月到夜来愁
处明，只照团衾凤。

去意杳无凭，别语愁难送。一纸鱼笺枕
底香，且做新来梦。

又

独自上层楼，楼外青山远。望到斜阳欲
尽时，不见西飞雁。

独自下层楼，楼下蛩声怨。待到黄昏月
上时，依旧柔肠断。

又

几日赏花天，月淡荼蘼小。写尽相思唤
不来，又是花飞了。

春在怕愁多，春去怜欢少。一夜安排梦
不成，月堕西窗晓。

霜天晓角

几夜锁窗揭。素蟾光似雪。恰恨照人敲
枕，纱厨爽、簟纹滑。

迤逦篆香裊。好坏谁共说。若是知人风

味，来分取、半床月。

又

玉清冰样洁。几夜相思切。谁料浓云遮
拥，同心带、甚时结。

匆匆休惜别。还有来时节。记取江阴归
路，须共踏、夜深月。

乌夜啼

杨柳拖烟漠漠，梨花浸月溶溶。吹香院
落春还尽，憔悴立东风。

只道芳时易见，谁知密约难通。芳园绕
遍无人问，独自拾残红。

又 醉枕不能寐

白酒欺人易醉，黄花笑我多愁。一年只
有秋光好，独自却悲秋。

风急常吹梦去，月迟多为人留。半黄橙
子和诗卷，空自伴床头。

又

绿外深深柳巷红，间曲曲花楼。一春想见
贪游冶，不道有人愁。

三月东风易老，几宵明月难留。酴醾白
尽窗前也，还肯醉来否。

瑞鹧鸪 瑞香

东风冷落旧梅台。犹喜山花拂面开。绀
色染衣春意静，水沈熏骨晚风来。

柔条不学丁香结，矮树仍参茉莉栽。安得方盆载幽植，道人随处作香材。

又 春日南园

门前杨柳绿成阴。翠坞笼香径自深。迟日暖熏芳草眼，好风轻撼落花心。

无多春恨莺难语，最晚朝眠蝶易寻。惟有狂醒不相贷，酿成憔悴到如今。

青玉案 用贺方回韵

宝林岩畔凌云路。记藉草、寻梅去。咏绿书红知几度。行云归后，碧云遮断，寂寞人何处。

一声长笛江天暮。别后谁吟倚楼句。匀面照溪心已许。欲凭锦字，写人愁去，生怕梨花雨。

好事近 资中道上无双堠感怀作

别梦记春前，春尽苦无归日。想见鹊声庭院，误几回消息。

万重离恨万重山，无处说思忆。只有路傍双堠，也随人孤只。

又 待月不至

天淡一帘秋，明月几时来得。何事桂底香近，把清光邀勒。

人间明晦总由天，何必问通塞。且为人如月好，醉莫分南北。

又

烟尽戍楼空，又是一帘佳月。何事山城留滞，负好花时节。

烧灯剪彩没心情，应有翠娥说。欲借好风吹恨，奈乱云愁叠。

又

急雨闹冰荷，销尽一襟烦暑。趁取晚凉幽会，近翠阴浓处。

风梢危滴撼珠玑，洒面得新句。莫怪玉壶倾尽，待月明归去。

点绛唇

梅雨收黄，暑风依旧闲庭院。露荷轻颤。只有香浮面。

挂起西窗，月澹无人见。幽情远。随钗低扇。好个凉方便。

如梦令

风入藕花翻动。夜气与香俱纵。月又带风来，凉意一襟谁共。情重。情重。可惜短宵无梦。

清平乐

山城桃李。催促春无几。日日为花须早起。犹□惜花无计。

阿谁留得春风。长教绕绿围红。莫遣十分芳意，输他万点愁容。

又 酬王静父红木犀词

秋香谁买。散入琉璃界。点缀小红全不碍。还却铅华余债。夜来月底相期。一枝未觉香迟。恰似青绡帐底，绛罗初试裙儿。

又 咏雪

疏疏整整。风急花无定。红烛照筵寒欲凝。时见筛帘玉影。

夜深明月笼纱。醉归凉面香斜。犹有惜梅心在，满庭误作吹花。

又

绿深红少。柳外横桥小。双燕不知幽梦好。惊起碧窗春晓。

起来萱鬓多时。玉台金镜慵移。多少春愁未说，却来闲数花枝。

望秦川 早春感怀

柳弱眠初醒，梅残舞尚痴。春阴将冷傍帘帏。又是东风和恨、向人归。

乐事灯前记，愁肠酒后知。老来无计遣芳时。只有闲情随分、品花枝。

又

竹粉翻新箨，荷花拭靓妆。断云侵晚度横塘。小扇斜钗依约、傍牙床。

蘸蜜分红荔，倾筒泻碧香。醉时风雨醒

时凉。明月多情依旧、过西厢。

又

翠黛随妆浅，铢衣称体香。好风偏与十分凉。却扇含情独自、绕池塘。

碧藕丝丝嫩，红榴叶叶双。牵丝摘叶为谁忙。情到厌厌拚醉、又何妨。

天仙子

惨惨霜林冬欲尽。又是溪梅寒弄影。矮窗曲屋夜烧香，人已静。灯垂烬。点滴芭蕉和雨听。

约个归期犹未定。一夜梦魂终不稳。知他勾得许多情，真个闷。无人问。说与画楼应不信。

望江南 夜泊龙桥滩前遇雨作

篷上雨，篷底有人愁。身在汉江东畔去，不知家在锦江头。烟水两悠悠。

吾老矣，心事几时休。沈水熨香年似日，薄云垂帐夏如秋。安得小书舟

南歌子

雨燕翻新幕，风鹃绕旧枝。画堂春尽日迟迟。又是一番平绿、涨西池。

病起尊难尽，腰宽带易垂。不堪村落子规啼。问道行人一去、几时归。

又 杨光辅又寄示寻春

淡霭笼青琐，轻寒薄翠绡。有人憔悴带
宽腰。又见东风、不忍见柔条。

闷酒尊难寻，闲香篆易销。夜来溪雪已
平桥。溪上梅魂凭仗、一相招。

又 早春

梅坞飞香定，兰窗翠色齐。水边沙际又
春归。领略东风、能有几人知。

爱月眠须晚，寻花去未迟。谁家庭院更
芳菲。费尽才情、休负一春诗。

又

荷盖倾新绿，榴巾蹙旧红。水亭烟榭晚
凉中。又是一钩新月、静房栊。

丝藕清如雪，厨纱薄似空。好维今夜与
谁同。唤取玉人来共、一帘风。

又

野水寻溪路，青山踏晚春。偶来相值却
钟情。一树琼瑶洗尽、客衣襟。

曲沼通诗梦，幽窗净俗尘。何时散发伴
檐裙。后夜相思生怕、月愁人。

南乡子

几日诉离尊。歌尽阳关不忍分。此度天
涯真个去，销魂。相送黄花落叶村。

斜日又黄昏。萧寺无人半掩门。今夜粉
香明月泪，休论。只要罗巾记旧痕。

浪淘沙

才合又轻离。心事多违。小窗灯影记亲移。可奈酒酣花困处，不省人归。

山翠又如眉。肠断幽期。相思有梦阿谁知。莫遣重来风絮乱，不似当时。

又

老去懒寻花。独自生涯。几枝疏影浸窗纱。昨夜月来人不睡，看尽横斜。

门外欲啼鸦。香意凌霞。从渠千树绕人家。世上一枝元也足，不要随他。

摊破南乡子

休赋惜春诗。留春住、说与人知。一年已负东风瘦，说愁说恨，数期数刻，只望归时。

莫怪杜鹃啼。真个也、唤得人归。归来休恨花开了，梁间燕子，且教知道，人也双飞。

祝英台 晚春

坠红轻，浓绿润，深院又春晚。睡起厌厌，无语小妆懒。可堪三月风光，五更魂梦，又都被、杜鹃催趲。

怎消遣。人道愁与春归，春归愁未断。闲倚银屏，羞怕泪痕满。断肠沈水重熏，瑶

琴闲理，奈依旧、夜寒人远。

虞美人

轻红短白东城路。忆得分襟处。柳丝无赖舞春柔。不系离人、只解系离愁。

如今花谢春将老。柳下无人到。月明门外子规啼。唤得人愁、争似唤人归。

长相思

对重阳。感重阳。身在西风天一方。年年人断肠。

景凄凉。客凄凉。纵有黄花只异乡。晚云连梦长。

又

酒孤斟。客孤吟。戏马台荒露草深。英雄何处寻。

爱登临。莫登临。定是愁来关客心。暮天烟水沈。

又

风敲窗。雨敲窗。窗外芭蕉云作幢。声声愁对床。

剔银缸。点银缸。梦采芙蓉隔一江。几时蝴蝶双。

鹊桥仙 秋日寄怀

角声吹月，风声落枕，梦与柔肠俱断。

谁教当日太情浓，扬不下、新愁一段。

黄花了，梅花开未，曾约那时相见。
莫教容易负幽期，怕真个、孤他泪眼。

醉落魄

晚凉时节。翠梧风定蝉声歇。有人睡起
香浮颊。倚著阑干，笑拣青荷叶。

如今往事愁难说。曲池依旧闲风月。田
田翠盖香罗叠。留得露痕，都是泪珠结。

减字木兰花

双双相并。一点红边偏照映。玉剪云裁。
不比浮花共蒂开。

几回心曲。选胜摘来情自足。插向云鬟。
要与仙郎比并看。

谒金门 杏花

春悄悄。红到一枝先巧。酒入半腮微带
卯。粉寒香未饱。

芳意枝头偏闹。困尽蜂须莺爪。拟倩玉
纤和露拗。情多愁易搅。

又 荼蘼

花簇簇。触眼万条垂玉。小院春深窗锁
绿。水沈风断续。

明月又侵楼曲。羞向枕囊拘束。只待夜
深清影足。醉来花底宿。

又 陪苏子重诸友饮东山

乌帽侧。行遍杏花春色。野意青青分陇麦。人家烟水隔。

春事莫催行客。弹指青梅堪摘。醉倚暮天江拍拍。雨晴沙路白。

又 病起

花半湿。一霎晚云笼密。天气未佳风又急。小庭愁独立。

酒病起来无力。懊恼篆烟锁碧。一饷春情无处觅。小屏山数尺。

又

春夜雨。催润柳塘花坞。小院深深门几许。画帘香一缕。

独立晚庭凝伫。细把花枝闲数。燕子不来天欲暮。说愁无处所。

又

风阵阵。吹落杨花无定。酒病厌厌三月尽。花檀红自隐。

新绿轩窗清润。月影又移墙影。手捻青梅无处问。一春长闷损。

又

浓睡醒。惊对一帘秋影。桐叶乍零风不定。半窗疏雨影。

愁与年光不尽。老入星星双鬓。只拟上楼寻远信。雁遥烟水暝。

蝶恋花

日下船篷人未起。一个燕儿，说尽伤春意。江上残花能有几。风催雨促成容易。

湖海客心千万里。著力东风，推得人行未。相次桃花三月水。菱歌谁伴西湖醉。

又

满路梅英飞雪粉。临水人家，先得春光嫩。楼底杏花楼外影。墙东柳线墙西恨。

撷翠揉红何处问。暖入眉峰，已作伤春困。归路月痕弯一寸。芳心只为东风损。

又 春风一夕浩荡，晓来柳色一新

寒意勒花春未足。只有东风，不管春拘束。杨柳满城吹又绿。可人青眼还相属。

小叶星星眠未熟。看尽行人，唱彻阳关曲。心事一春何计续。芳条未展眉先蹙。

又 自东江乘晴过蟆颐渚园小饮

晴带溪光春自媚。绕翠萦青，来约东风醉。云补断山疏复缀。雨回绿野清还丽。

拄杖不妨舒客意。临水人家，问有花开未。江左风流今有几。逢春不要人憔悴。

又

翠幕成阴帘拂地。池馆无人，四面生凉意。荷气竹香俱细细。分明著莫清风袂。

玉枕如冰笙似水。才舫横钗，早被莺呼起。今夜月明人未睡。只消三四分来醉。

又

画阁红炉屏四向。梅拥寒香，次第侵帷
帐。烛影半低花影幌。修眉正在花枝傍。
殢粉偎香羞一饷。未识春风，已觉春情
荡。醉里不知霜月上。归来已踏梅花浪。

又

楼角吹花烟月堕。的皪韶妍，又向梅心
破。钗上彩幡看一个。赏心已觉春生坐。
莫恨年华风雨过。人日嬉游，次第连灯
火。翠幄高张金盏大。已拚醉袖随香躲。

又

小院菊残烟雨细。天气凄凉，恼得人憔
悴。被暖橙香羞早起。玉钗一任慵云坠。
楼上珠帘钩也未。数尺遥山，供尽伤高
意。伫立不禁残酒味。绣罗依旧和香睡。

又 月下有感

小院秋光浓欲滴。独自钩帘，细数归鸿
翼。鸿断天高无处觅。矮窗催暝蛩催织。
凉月去人才数尺。短发萧骚，醉傍西风
立。愁眼望天收不得。露华衣上三更湿。

又

晴日溪山春可数。水绕池塘，知有人家
住。寻日寻花花不语。旧时春恨还如许。
苦恨东风无意绪。只解催花，不解催人
去。日晚荒烟迷古戍。断魂正在梅花浦。

菩萨蛮

和风暖日西郊路。游人又踏青山去。何处碧云衫。映溪才两三。

疏松分翠黛。故作羞春态。回首杏烟消。月明归渡桥。

又

春回绿野烟光薄。低花矮柳田家乐。陇麦又青青。喧蜂闲趁人。

野翁忘近远。怪识刘郎面。断却小桥溪。怕人溪外知。

又 访江东外家作

画桥拍拍春江绿。行人正在春江曲。花润接平川。有人花底眠。

东风元自好。只怕催花老。安得万垂杨。系教春日长。

又

平芜冉冉连云绿。斜阳衬雨明溪足。小鸭睡晴沙。翠烘三两花。

春光闲婉婉。尽日无人见。试著小屏山。图归云际看。

又 正月三日西山即事

山头翠树调莺舌。山腰野菜飞黄蝶。来为等闲休。去成多少愁。

小庭花木改。犹有啼痕在。别后不曾看。怕花和泪残。

又

罗衫乍试寒犹怯。妒花风雨连三月。灯
冷闭门时。有愁谁得知。

此情真个苦。只为当时语。莫道絮沾泥。
絮飞魂亦飞。

又

夜来花底莺饶舌。把人心事分明说。许
大好因缘。只成容易传。

春阑无好计。唯有归来是。从此玉台前。
晓妆休太妍。

又

小窗荫绿清无暑。篆香终日萦兰炷。冰
簟涨寒涛。清风一枕高。

有人团扇却。门掩庭花落。少待月侵床。
教他魂梦凉。

又 回文

暑庭消尽风鸣树。树鸣风尽消庭暑。横
枕一声莺。莺声一枕横。

扇纨低粉面。面粉低纨扇。凉月淡侵床。
床侵淡月凉。

又

东风有意留人住。熏风无意催人去。去
住两茫然。相逢成短缘。

平生花柳笑。过后关心少。今日奈情何。
为伊饶恨多。

又

去年恰好双星节。鹊桥未渡人离别。不

恨障云生。恨他真个行。

天涯消息近。不见乘鸾影。楼外鹧鸪声。
几回和梦惊。

又

浅寒带暝和烟下。轻阴挟雨随风洒。翠
幕护重帘。篆香销半爇。

平生风雨夜。怕近芭蕉下。今夕定愁多。
萧萧声奈何。

又

客窗曾剪灯花弄。谁教来去如春梦。冷
落旧梅台。小桃相次开。

人间春易老。只有山中好。闲却槿花篱。
莫教溪外知。

又

晓烟笼日浮山翠。春风著水回川媚。远
近碧重重。人家山色中。

野花香自度。似识幽人处。安得著三间。
与山终日闲。

又

扶犁野老田东睡。插花山女田西醉。醉
眼眩东西。看看桃满溪。

耕桑山下足。纨绔人间俗。莫管旧东风。
从教吹软红。

木兰花

疏枝半作窥窗老。又是一年春意早。风

低小院得香迟，月傍女墙和影好。

去年若被离情恼。今日逢花休草草。后
时花紫尽从他，且趁先春拚醉倒。

鹧鸪天

昨夜思量直到明。拂明心绪更愁人。风
披露叶高低怨，冷雨寒烟各自轻。

休赖酒，莫求神。为谁教尔许多情。如
今早被思量损，好更当时做弄成。

入 塞

好思量。正秋风、半夜长。奈银缸一点，
耿耿背西窗。衾又凉。枕又凉。

露华凄凄月半床。照得人、真个断肠。
窗前谁浸木犀黄。花也香。梦也香。

桃源忆故人

粉霜拂拂凝香砌。酝酿梅花天气。月上
小窗如水。冷浸人无寐。

平生可惯闲憔悴。担负新愁不起。消遣
夜长无计。只倚熏香睡。

愁倚阑

春犹浅，柳初芽。杏初花。杨柳杏花交
影处，有人家。

玉窗明暖烘霞。小屏上、水远山斜。昨夜酒多春睡重，莫惊他。

乌夜啼

静院槐风绿涨，小窗梅雨黄垂。欲看春事留连处，惟有夜寒知。

魂梦长闲消午醉，扫花共坐风凉。归来窗北有胡床。兴在羲皇以上。

忆秦娥

青门深。海棠开尽春阴阴。春阴阴。万重云水，一寸归心。

玉楼深锁烟消沈。知他何日同登临。同登临。待收红泪，细说如今。

又

情脉脉。半黄橙子和香擘。和香擘。分明记得，袖香熏窄。

别来人远关山隔。见梅不忍和花摘。和花摘。有书无雁，寄谁归得。

又

愁无语。黄昏庭院黄梅雨。黄梅雨。新愁一寸，旧愁千缕。

杜鹃叫断空山苦。相思欲计人何许。人何许。一重云断，一重山阻。

西江月

众绿初围夏荫，老红犹驻春妆。画帘燕子日偏长。静看新雏来往。

□□□□□□，□□□□□□。□□□□
□□□□。□□□□□□。

又

□□□□□□，□□□□□□。□□□□
□□□□。□□□□□□。

汲井漫随兰炷，心情半怯罗衣。粉香消尽无人觑，只门外、子规啼。

乌夜啼

墙外雨肥梅子，阶前水绕荷花。阴阴庭户熏风满，水纹簟、怯菱芽。

春尽难凭燕语，日长惟有蜂衙。沈香火冷珠帘暮，个人在、碧窗纱。案调名原作西江月，陆校：按此调是乌夜啼。

浣溪纱 病中有以兰花相供者，戏书

天女殷勤著意多。散花犹记病维摩。肯来丈室问云何。

腰佩摘来烦玉笋，鬓香分处想秋波。不知真个有情么。

又

遥想当年出凤雏。王□风有未全疏。只

今朱绂为谁纆。

芳草池塘春梦后，粉香帘幕晓晴初。一簪华发要人梳。

又

翠葆扶疏傍药阑。乱红飘洒满书单。清明时节又看看。

小雨勒成春尾恨，东风偏作夜来寒。琴心老尽不须弹。

又

薄日移影午暑空。一杯何事便潮红。扇纨挥尽却疏慵。

早睡情怀冰枕外，夜来消息雨荷中。不须留烛眩房栊。

又

闲倚前荣小扇车。晚妆无力殢云鸦。凝情香落一庭花。

笑挽清风归玉枕，懒随缺月傍窗纱。羞红两脸上娇霞。

鹧鸪天

木落江空又一秋。天寒几日不登楼。红绡帐里橙犹在，青琐窗深菊未收。

新画阁，小书舟。篆烟熏得晚香留。只因贪伴开炉酒，恼得红儿一夜讴。

又 寄少城

泪湿芙蓉城上花。片飞何事苦参差。锁

深不奈莺无语，巢稳争如燕有家。

情未老，鬓先华。可怜各自淡生涯。桃花不解知人意，犹自沾泥也学他。

一落索

门外莺寒杨柳。正减欢疏酒。春阴早是做人愁，更何况、花飞后。

莫倚东风消瘦。有酴醾入手。尽偎香玉醉何妨，任花落、愁依旧。

又 歌者索词，名之一东

小小腰身相称。更著人心性。一声歌起绣帘阴，都遏住、行云影。

闻道玉郎家近。被春风勾引。从今莫怪一东看，自压尽、人间韵。

破阵子

小小红泥院宇，深深翠色屏帏。簇定熏炉酥酒软，门外东风寒不知。恰疑三月时。

钗影半欹绿子，歌声轻度红儿。醉里不愁更漏断，更要梅花看几枝。起来霜月低。

一剪梅 冬至

斗转参横一夜霜。玉律声中，又报新阳。起来无绪赋行藏。只喜人间，一线添长。

帘幕垂垂月半廊。节物心情，都付椒觞。

年华渐晚鬓毛苍。身外功名，休苦思量。

木兰花 二江得书作

别时已有重来愿。谁料情多天不管。分明咫尺是青楼，抵死浓云遮得遍。

寄声只倚西飞雁。雁落书回空是怨。领愁归去有谁知，水又茫茫山又断。

生查子 春日闺情

兰帷夜色高，绣被春寒拥。何事玉楼人，屡踏杨花梦。

分明相见陈，不道幽情重。乞个好因缘，莫待来生种。

程公许

念奴娇

中秋玩月，忆山谷“共倒金荷家万里，难得尊前相属”之句，怅然有怀，借韵作一首。

晓凉散策，恨西风不贷，一池残绿。谁与冰轮拗玉斧，恰好今宵圆足。树杪翻光，莎庭转影，零乱昆山玉。盪胸清露，闲须浇下醺醑。

休问湖海飘零，老人心事，似倚岩枯木。万里亲知应健否，脉脉此情谁属。世虑难平，天高难问，倚遍阑干曲。不妨随寓，买园催种松竹。

沁园春 用履斋多景楼韵

万里飘萍，送江入海，过古润州。正羁怀无奈，凭高纵览，濛濛烟雨，簇簇渔舟。南北区分，江山形胜，忧愤令人扶上楼。沈凝久，任斜飞雪片，急洒貂裘。

英风追想孙刘。似黑白两奩棋未收。把烟霞饶与，坡仙米老，丹青难觅，摩诘营邱。斗野号风，海门残照，长与人间管领愁。凭

谁问，借天河一挽，洗甲兵休。

水调歌头 和吴秀岩韵

驼褐倚禅榻，丝鬓扬茶烟。谁知老子方寸，历历著千年。试问汗青馀几，一笑腰黄萦梦，我自乐天全。出处两无累，赢取日高眠。

八千里，西望眼，段霞边。弁苍苔碧，随分风月不论钱。执手还成轻别，何日归来投社，玉海得同编。经世付时杰，觅个钓鱼船。

程过

昭君怨

试问愁来何处。门外山无重数。芳草不知人。翠连云。

欲看不忍重看。心事只堪肠断。肠断宿孤村。雨昏昏。

满江红 梅

春欲来时，长是与、江梅花约。又还向、竹林疏处，一枝开却。对酒渐惊身老大，看花应念人离索。但十分、沈醉祝东君，长如昨。

芳草渡，孤舟泊。山敛黛，天垂幕。黯销魂、无奈暮云残角。便好折来和雪戴，莫教酒醒随风落。待殷勤、留此记相思，谁堪托。

程和仲

沁园春 寿竹林亭长

呼伯雅来 ,满进松精 ,致寿于公。况富矣锦囊 ,吟边得句 ,森然武库 ,书里称雄。亭长新封 ,亩宫雅趣 ,一笑侯王名位穹。闲官守 ,任平章批抹 ,明月清风。

年年申庆桑蓬。幸至节今 ,晨恰又逢。想霭霭其祥 ,瑞云闾兆 ,绵绵之算 ,线日增红。一段文章 ,三千功行 ,名在长生宝篆中。人间窄 ,待骖鸾驾鹤 ,上祝融峰。

程霁岩

水龙吟 寿吴尉 七月初一

夏秋晦朔之间 ,伊谁为作交承主。颺[昂]仙伯 ,挺生此日 ,宾凉饒暑。绛县老人 ,问将甲子 ,恰今岁数。举香山宴会 ,才先一载 ,愚深幸、获叨预。

何以寿君初度。愿朱颜、年年如许。棘栖鸾凤 ,瑞浮鸂鶒 ,争如燕处。双桂渐香 ,灵椿好在 ,福全九五。向画堂深处 ,不妨重按 ,旧时歌舞。

满庭芳 寿徐佑卿 七月初五

一叶鸣秋 ,五莸纪瑞 ,申月还庆生申。巍巍郎宿 ,辉映寿星明。一段精神玉立 ,秋潭白、足副徽称。长生箓 ,只在公丹府 ,何待祝修龄。

粉垣 ,才过了 ,便持荷橐 ,光近枫宸。况金瓯将启 ,庆满槐庭。朝旆行行入侍 ,彩衣映、衮冕辉新。从今去 ,相门出相 ,未数汉韦平。

程节斋

清平乐 寿伯母

吾家三母。先后相为寿。管领诸郎尽明秀。都是婺女星宿。

华筵今日居先。适逾甲子周天。敬以庄椿为祝 ,举觞我愿年年。

木兰花 寿丈母

瑶池开宴后 ,问甚处、赋蟠桃。有砌底芝兰 ,涧边萍藻 ,淑德方高。闺中秀、林下气 ,是寻常空委蓬蒿。相映鱼轩黄绶 ,行膺鸾锦金罗。

自惭半子误恩多。所祝意如何。愿台星旁映 ,寿星齐照 ,乐自陶陶。芝田阆风何在 ,但从今、岁岁此高歌。敬上一卮为寿 ,神仙九酝香醪。

沁园春 贺新冠

髭彼两髦 ,未几见兮 ,突而弁兮。记昔年犀玉 ,奇资秀质 ,今朝簪佩 ,丰颊修眉。满面春

风 ,一团和气 ,发露胸中书与诗。人都羡 ,是君家驹子 ,天上麟儿。

画堂人物熙熙。会簪履雍容举庆宜。看筮日礼宾 ,陈钟列俎 ,三加致祝 ,一献成仪。绿鬓貂蝉 ,朱颜豸角 ,早有君臣庆会期。荣冠带 ,看绶悬若若 ,印佩累累。

水调歌头 括坡诗

秋色正潇洒 ,佳气夜充闾。人传好语 ,君家门左正垂弧。毕万从来有后 ,释氏果然抱送 ,丹穴凤生雏。未作汤饼客 ,先写弄璋书。

参军妇 ,贤相敌 ,古来无。钟奇毓秀 ,应是积善庆之余。想见珠庭玉角 ,表表出群英物 ,我已预知渠。他日容相顾 ,啼看定何如。

沁园春 庆舍弟生子

自古人言 ,庆在子孙 ,端有由来。看长庚孕李 ,昴星佐汉 ,福从人召 ,瑞自天开。曾忆当年 ,乃翁熊梦 ,岂在区区春祀禴。只凭个、仁心积累 ,厚德栽培。

天工信巧安排。试说与君当一笑哉。记年时此际 ,嗷嗷万口 ,俾之粒食 ,活及婴孩。岁始星周 ,事还好在 ,故遣麒麟出此胎。何须问 ,是兴宗必矣 ,业广基恢。

又 寿许宰二月初一

三百篇诗 ,三十六篇 ,以祈寿言。惟上天所佑 ,锡之君子 ,中心岂弟 ,盖有仁存。允矣我

公 ,韦平世胄 ,学问于兹有本原。临民处 ,看精神秋彻 ,气宇春温。

由来淑景中分。第一日桑弧挂左门。是赋受不凡 ,仁而宜寿 ,笑渠谄子 ,徒费辞繁。命匪在天 ,算非由数 ,我只把公心地论。从今去 ,管亟登槐棘 ,福遍乾坤。

木兰花慢 八月初四

西风吹昨梦 ,直飞上、广寒宫。见绛节霓旌 ,常娥延伫 ,玉立双童。殷勤桂枝分付 ,却为言、当日有仙翁。谪堕人间几载 ,祇今恰挂桑蓬。

佳音未返碧楼空。青鸟耗难通。闻洞府已成 ,南州占断 ,皓月光风。前期十日佳席 ,倩一言、为写此清衷。三岛十洲佳致 ,奈何携近尘笼。

水调歌 题角抵人障

养气兼养勇 ,岂不丈夫哉。何人刚欲斗力 ,漫向此间来。莫论施身文绣 ,看取兼人胆谅 ,胸次尽嵬嵬。独步登坛后 ,诸子尽舆台。

笑渠侬 ,身赍育 ,伎婴孩。虚娇自恃 ,未识金德木鸡才。始也旁观退听 ,少则直前交臂 ,智与力俱摧。世有赏音者 ,为唱凯歌回。

又 题弩社头筹簇

都尉部千弩 ,旧事汉材官。连拳一臂三

石 ,夜半破阴山。曾使中有扞足 ,造次摧坚挫
锐 ,分白辱宠涓。省括一机耳 ,人未识黄间。

锦为标 ,虽有戏 ,技为难。疾飞两箭 ,兄弟
齐夺姓名还。虎帐有筹第一 ,龙榜预占双捷 ,
底事足荣观。未数蹶张辈 ,容易立朝端。

程邻

西江月

阶下宝鞍罗帕，门前绛[蜡]（腊）纱笼。留连佳客怅匆匆。赖有新团小凤。琼碎黄金碾里，乳浮紫玉瓯中。归来袈袂袖生风。齿颊余甘入梦。

程梅斋

西江月 赠造浮桥匠者簇

刻木工夫最巧，輿梁底事尤精。玉虹饮水映波明。彼此往来利济。

真个作家手段，从今名播寰瀛。人从鳌背获安行。镇作城南景致。

全宋词 程师孟

程师孟

渔家傲

折柳赠君君且住。

程 武

念奴娇 题马嵬图

蜀江城远，想连云危栈，接天穷处。惆怅烟尘回首地，双阙觚棱犹故。龙扈星联，羽林风肃，未放鸾骖去。不堪掩面，泪沾宸袖如雨。

底事当日昭阳，吹羌鸣羯，浣却霓裳舞。三十六宫春满眼，曾把色嗔香妒。芳草埋情，飞花陨怨，翻被蛾眉误。画图惊见，黯然魂断今古。

清平乐

曳云摇玉。裙蹙秋绡幅。学得琵琶依约熟。贪按雁沙新曲。

曲终满院春闲。清颦移上眉山。心事怕人猜破，折花背插云鬟。

小重山

香减鲛绡添泪痕。彩云长是恨，等闲心。玉笙犹忆夜深闻。湘水杳，寂寞隔巫云。

全宋词 程 武

翠被冷重熏。做成归梦了，却销魂。垂
杨浓处著朱门。依然是，风雨掩黄昏。

程先

锁窗寒

雨洗红尘 ,云迷翠麓 ,小车难去。凄凉感慨 ,未有今年春暮。想曲江水边丽人 ,影沈香歇谁为主。但兔葵燕麦 ,风前摇荡 ,径花成土。

空被多情苦。庆会难逢 ,少年几许。纷纷沸鼎 ,负了青阳百五。待何时、重享太平 ,典衣赏酒相尔汝。算兰亭、有此欢娱 ,又却悲今古。

程正同

贺新郎 寿县宰

久矣无循吏。自当年、弘宽去后，风流谁继。律令喜为鹰击勇，无复柔桑驯雉。何幸见、真儒小试。手种海棠三百本，有几多、遗爱人须记。潘岳县，未为贵。

文章政事通枫陛。看傅岩、霖雨岁旱，要须均施。玉色温其山似立，气稟新秋清厉。便好据、经纶要地。却笑庞才非百里，骤天衢、自合还天骥。卮酒祝，八千岁。

沁园春 为友人寿

富敌陶猗，才卑贾马，气吞曹刘。更妓娱安石，东山名胜，樽盈文举，北海风流。事冷千年，身兼八子，豪举伊谁与匹俦。应还笑，为天将降任，未欲东周。

优游。宁久淹留。管蓬矢桑弧志早酬。有棠棣联芳，庭萱不老，砌兰擢秀，蟾桂传秋。要颂椿龄，若将柏叶，婢膝奴颜应合羞。直须是，功名期会，同跨鳌头。

满庭芳 答友人

五柳先生，宦情无几，赋成归去来兮。吾归何所，任运且随时。曾向高人问道，清妙处、已悟希夷。谁能羨，胸中芥子，容易纳须弥。

竹林，新职事，神交狂客，志慕天随。但能乐天知命，夫复何疑。多谢故人念我，平安报、不必纲维。饮君酒，愿君同寿，此外本无为。

思越人 题挟弹人簇

曾把隋珠抵鹊来。拓弓花下不虚开。醉馀戏把行人弹，堪笑齐王谩筑台。

穿兔手，落雕材。狭斜衢路共徘徊。流星一点高飞处，笑坐金鞍歌落梅。

朝中措 题集闲教头簇

少年不入利名场。花柳作家乡。一片由甲口觜，几多耍俏心肠。

周郎学识，秦郎风度，柳七文章。聊借生绡一幅，与君写尽行藏。

程 准

水调歌头

船系钓台下，身寄碧云端。胸中千古风月，笔下助波澜。唤起羊裘仙魄，来伴蝉冠清影，星阁倚栏干。上想中兴事，名节重于山。

濯沧浪，开玉鉴，照朱颜。平生多少英气，直欲斩楼兰。尽道诗书元帅，好作经纶上衮，勋业秉华丹。霄汉展鸾翼，雷雨震龙蟠。

楚娘

生查子 题壁间

去年梅雪天 , 千里人归远。今岁雪梅天 ,
千里人追怨。

铁石作心肠 , 铁石刚犹软。江海比君恩 ,
江海深犹浅。

储 泳

齐天乐

东风一夜吹寒食，枝头片红犹恋。宿酒初醒，新吟未稳，凭久栏杆留暖。将春买断。恨苔径榆阶，翠钱难贯。陌上秋千，相逢谁认旧时伴。

轻衫粉痕褪了，丝缘余梦在，良宵偏短。柳线经烟，莺梭织雾，一片旧愁新怨。慵拈象管。待寄与深情，难凭双燕。不似杨花，解随人去远。

西江月 题邯郸吕仙翁祠堂

壁断何人旧字，炉寒隔岁残香。洞天人去海茫茫。玩世仙翁已往。

西日长安道远，春风赵国台荒。行人谁不悟黄粮。依旧红尘陌上。

褚生

百字令

半堤花雨。对芳辰消遣 ,无奈情绪。春色尚堪描画在 ,万紫千红尘土。鹃促归期 ,莺收佞舌 ,燕作留人语。绕栏红药 ,韶华留此孤主。

真个恨杀东风 ,几番过了 ,不似今番苦。乐事赏心磨灭尽 ,忽见飞书传羽。湖水湖烟 ,峰南峰北 ,总是堪伤处。新塘杨柳 ,小腰犹自歌舞。

祝英台近

倚危栏 ,斜日暮。萋萋甚情绪。稚柳娇黄 ,全未禁风雨。春江万里云涛 ,扁舟飞渡。那更听、塞鸿无数。

叹离阻。有恨落天涯 ,谁念孤旅。满目风尘 ,冉冉如飞雾。是何人惹愁来 ,那人何处。怎知道、愁来不去。

春娘

阮郎归 并序

妾本金陵人也。因父受官于上国 ,妾生于长安 ,长于洛东。是年十五也。时守香闺 ,惯闻欢乐 ,岂识干戈。一旦胡虏兵升四海 ,干戟山川 ,妾不幸生于此。时 ,凌霄失寄于乔松 ,兔丝徒忘于巨木。兄嫂愚浊 ,使妾徒陷于虏庭 ,无由得脱。鹤胫虽长不可截 ,凫胫虽短不可续 ,此分定也。请过往君子览之勿笑。妾身许良人下归 ,杳无音信。长安既失 ,未知存亡 ,一命孤苦。夜寝一梦难成 ,愁眉易锁难开。镇日恹恹 ,离情默默。秦晋未通 ,良人陡失 ,妾之不幸。今过旧都 ,故书于壁 ,希颜过此请览。言不尽意 ,意不尽言 ,复书阮郎归一阕于后 :

胡虏中原乱似麻。此景依稀似永嘉。丁
珠片玉落泥沙。何时返翠华。呈祥鸾凤失仙
槎。因循离恨加。前生应是负偿他。思量无
岸崖。

崔敦礼

柳梢青 寿词

惊世文章 ,门户照人 ,外家衣钵。多谢温存 ,相期宅相 ,此恩难说。

今朝祝寿樽前 ,共拜舞、诸孙下列。但愿从今 ,一年强似 ,一年时节。

西江月 寿词

暖日江南梅柳 ,春风堂上笙歌。满斟醺醺笑声哗。再拜千年寿嘏。

清健非缘服玉 ,红颜不是苍霞。仙姿福禄自无涯。要看沧溟绿野。

鹧鸪天 时夫人寿

本是瑶台月里仙。笑麾鸾鹤住人间。蟠桃一熟三千岁 ,剩对春风日月闲。

缟绶结 ,彩衣斑。孙枝相应傍门栏。年年同上长生酒 ,得见沧溟几度干。

又

王母瑶池景物鲜。蟠桃华实不知年。天

教把定春风笑 ,来作人间长寿仙。

披蕊笈 ,诵云篇。朝朝香火篆炉烟。只将
清静为真乐 ,合住春秋岁八千。

念奴娇 和徐尉

吴松江畔 ,对烟波浩渺 ,相忘鸥鸟。日日
篮舆湖上路 ,十里珠帘惊笑。高下楼台 ,浅深
溪坞 ,著此香山老。辋川图上 ,好风吹梦曾到。

不用金谷繁华 ,碧城修竹 ,自比封君号。
万壑千岩天付与 ,一洗寒酸郊岛。霖雨方思 ,
烟尘未扫 ,合挽三江倒。功成名遂 ,却来依旧
华表。

水调歌头 垂虹桥亭词

倚棹太湖畔 ,踏月上垂虹。银涛万顷无
际 ,渺渺欲浮空。为问瀛洲何在 ,我欲骑鲸归
去 ,挥手谢尘笼。未得世缘了 ,佳处且从容。

饮湖光 ,披晓月 ,抹春风。平生豪气安用 ,
江海兴无穷。身在冰壶千里 ,独倚朱栏一
啸 ,惊起睡中龙。此乐岂多得 ,归去莫匆匆。

江城子 送凌静之

吴王台上雨初晴。远烟横。柳如云。门
外西风 ,催踏马蹄尘。声断阳关人去□ ,遮落
日 ,向西秦。

不教容易纵归程。语酸辛。黯消魂。且

全宋词 崔敦礼

共一尊 相属莫辞频。后夜月明千里隔 君忆
我 我思君。

崔敦诗

六 州

商秋吉，嘉会协中辛。涓路寝，修禋祀，
圣德昭清。端志虑，罄竭斋精。锦绣排天仗，
羽卫缤纷。朝太室、返中宸。被袞接神明。
时平天时俱清晏，兼丰年和气，品物达芳馨。

瞻炳座，春容娱燕三灵。奠瑶爵，荐量
币，清思呦冥冥。望昆仑。嘉祥塞姻氲。诚
殚礼洽庆休成。润泽被生民。端门肆眚，听
庭称贺，俱将景福万寿、祝双亲。

十二时

勋华并、天胙昌期。圣德茂重离。英明
经远，濬哲昭微。宝俭更深慈。观万国、累
洽重熙。对明时。报礼秩神祇。玉帛奏华夷。
雍肃显相，百辟各钦祇。奄嘉虞英璧奠华滋。

神安坐、景气澄虚。极光焰、烛长丽。
展诗应律，万舞透迟。三献洽皇仪。垂露寝
庆祐来宜。礼无违。鸣鸾临帝阙，飞凤下天
倪。清和寰宇，霈泽一朝驰。醇化无为。万
祀巩洪基。

崔木

最高楼

蹇驴缓跨 ,迢递至京城。当此际 ,正芳春。
芹泥融暖飞雏燕 ,柳条摇曳韵鹂庚。更那堪 ,
迟日暖 ,晓风轻。

算费尽、主人歌与酒 ,更费尽、青楼纂与
箏。多少事 ,绊牵情。愧我品题无雅句 ,喜君
歌咏有新声。愿从今 ,鱼比目 ,凤和鸣。

虞美人

春来秋往何时了。心事知多少。深深庭
院悄无人。独自行来独坐、若为情。

双旌声势虽云贵。终是谁存济。今宵已
幸得人言。拟待劳烦神女、下巫山。

崔若砺

失调名

愁殢有兵尊 ,老怕能言李。

崔与之

水调歌头 题剑阁

万里云间戍，立马剑门关，乱山极目无际，直北是长安。人苦百年涂炭，鬼哭三边锋镝，天道久应还。手写留屯奏，炯炯寸心丹。

对青灯，搔白发，漏声残。老来勋业未就，妨却一身闲。梅岭绿阴青子，蒲涧清泉白石，怪我旧盟寒。烽火平安夜，归梦到家山。

贺新郎 寿转运使赵公汝燧

雨过云容扫。使星明、德星高揭，福星旁照。槐屋犹暄梅正熟，最是清和景好。望金节、云间缥缈。和气如春清似水，漾恩波、沾渥天南道。晨鹊噪，有佳报。

天家黄纸除书到。便归来、升华天下，安边养浩。好是六逢初度日，碧落笙歌会早。遍西郡、欢声多少。人道菊坡新酝美，把一觴、满酌歌难老。瓜样大，安期枣。

崔中

沁园春

自己阳生，正是中虚，静极动时。默地雷微震，冲开玉户，天心朗彻，放下帘帟。真火冲融，灵泉复凑，不昧谷神何险危。自然妙，若三川龙跃，九万鹏飞。

中中二土成圭。意眷恋浓如母护儿。这恍惚真容，不空不色，窈冥妙象，无识无知。命住丹田，全真体道，奋志精修休自迟。收功了，把三才全理，一贯全归。

翠微翁

水调歌头 贺赵可父 七月初六

蓂莢才开六 , 宝历已当千。人间收尽繁
溽 , 凉意入琴弦。尽道荐衡交剡 , 更值生申时
节 , 喜色动闾阎。终夜望银汉 , 文宿贯台躔。

定燕秦 , 封晋魏 , 信当然。处处红莲开幕 ,
曹掾岂能淹。见说玉堂飞诏 , 已许金闺通籍 ,
蓬岛伴神仙 , 来岁寿卮酒 , 应醉御炉烟。

戴复古

满江红 赤壁怀古

赤壁矶头，一番过、一番怀古。想当时、周郎年少，气吞区宇。万骑临江貔虎噪，千艘列炬鱼龙怒。卷长波、一鼓困曹瞒，今如许。

江上渡，江边路。形胜地，兴亡处。览遗踪，胜读史书言语。几度东风吹世换，千年往事随潮去。问道傍、杨柳为谁春，摇金缕。

水调歌头 送竹隐知郢州

鹏鹗上云汉，虎豹守天关。一官游戏，笑向古郢试朱幡。天下封疆几郡，尽得公为太守，奉诏仰天宽。万物一吐气，千里贺平安。

雪楼高，三百尺，玉栏干。政成无事，时复把酒对江山。问讯莫愁安在，见说风流宋玉，犹有屋三间。请和阳春曲，留与世人看。

沁园春

一曲狂歌，有百馀言，说尽一生。费十年灯火，读书读史，四方奔走，求利求名。蹭蹬归来，闭门独坐，赢得穷吟诗句清。夫诗者，皆吾侬平日，愁叹之声。

空馀豪气峥嵘。安得良田二顷耕。向临邛涤器，可怜司马，成都卖卜，谁识君平。分则宜然，吾何敢怨，蝼蚁逍遥戴粒行。开怀抱，有青梅荐酒，绿树啼莺。

贺新郎 为真玉堂寿

说与黄花道。九秋深、三光五岳，气钟英表。金马玉堂真学士，蕴藉诗书奥妙。一是、经纶才调。斟酌古今来活国，算忠言、说论知多少。又入奏，金门晓。

朝回问寝披萱草。对高堂长说，一片君恩难报。更待痴儿千载遇，膝下十分荣耀。趁绿鬓、朱颜不老。整顿乾坤济时了，奉板舆、拜国夫人号。可谓忠，可谓孝。

又 寄丰真州

忆把金罍酒。叹别来、光阴荏苒，江湖宿留。世事不堪频着眼，赢得两眉长皱。但东望、故人翘首。木落山空天远大，送飞鸿、北去伤怀久。天下事，公知否。

钱塘风月西湖柳。渡江来、百年机会，从前未有。唤起东山丘壑梦，莫惜风霜老手。

要整顿、封疆如旧。早晚枢庭开幕府，是英雄、尽为公奔走。看金印，大如斗。

又 丰真州建江淮伟观楼

百尺连云起。试登临、江山人物，一时俱伟。旁挹金陵龙虎势，京岷诸峰对峙。隐隐接、扬州歌吹。雪浪舞从三峡下，乍逢迎、海若谈秋水。形胜地，有如此。

使君一世经纶志。把风斤月斧，来此等闲游戏。见说楼成无多日，大手一何容易。笑天下、纷纷血指。酝酿春风与和气，举长江、变作香醪美。人共乐，醉桃李。

水调歌头 题李季允侍郎鄂州吞云楼

轮奂半天上，胜概压南楼。筹边独坐，岂欲登览快双眸。浪说胸吞云梦，直把气吞残虏，西北望神州。百载一机会，人事恨悠悠。

骑黄鹤，赋鹦鹉，谩风流。岳王祠畔，杨柳烟锁古今愁。整顿乾坤手段，指授英雄方略，雅志若为酬。杯酒不在手，双鬓恐惊秋。

满庭芳 楚州上巳万柳池应监丞领客

三日春光，群贤胜践，山阴何似山阳。鹅池墨妙，曲水记流觞。自许风流丘壑，何人共、击楫长江。新亭上，山河有异，举目恨堂堂。

使君，经世志，十年边上，两鬓风霜。
问池边杨柳，因甚凄凉。万树重新种了，株
株在、桃李花傍。仍须待，剩栽兰芷，为国
洗河湟。

又

赤壁矶头，临皋亭下，扁舟两度经过。
江山如画，风月奈愁何。三国英雄安在，而
今但、一目烟波。风流处，竹楼无恙，相对
有东坡。

登临，还自笑，狂游四海，一向忘家。
算天寒路远，早早归呵。明日片帆东下，沧
洲上、千里芦花。真堪爱，买鱼沽酒，到处
听吴歌。

醉落魄 九日吴胜之运使黄鹤山登高

龙山行乐。何如今日登黄鹤。风光政要
人酬酢。欲赋归来，莫是渊明错。

江山登览长如昨。飞鸿影里秋光薄。此
怀只有黄花觉。牢裹乌纱，一任西风作。

柳梢青 岳阳楼

袖剑飞吟。洞庭青草。秋水深深。万顷
波光，岳阳楼上，一快披襟。

不须携酒登临。问有酒、何人共斟。变
尽人间，君山一点，自古如今。

锦帐春 淮东陈提举清明奉母夫人游徐仙翁庵

处处逢花，家家插柳。政寒食、清明时候。奉板舆行乐，使星随后。人间稀有。

出郭寻仙，绣衣春昼。马上列、两行红袖。对韶华一笑，劝国夫人酒。百千长寿。

行香子 永州为魏深甫寿

万石崔嵬，二水涟漪。此江山、天下之奇。太平气象，百姓熙熙。有文章公，经纶手，把州麾。

满斟寿酒，笑捻梅枝。管年年、长见花时。佳人休唱，浅近歌词。读浯溪颂，愚谷记，澹岩诗。

鹊桥仙

新荷池沼，绿槐庭院。檐外雨声初断。喧喧两部乱蛙鸣，怎得似、啼莺睍睍。

风光流转。客游汗漫。莫问鬓丝长短。即时杯酒醉时歌，算省得、闲愁一半。

木兰花慢

莺啼啼不尽，任燕语、语难通。这一点闲愁，十年不断，恼乱春风。重来故人不见，但依然、杨柳小楼东。记得同题粉壁，而今

壁破无踪。

兰皋新涨绿溶溶。流恨落花红。念著破春衫，当时送别，灯下裁缝。相思谩然自苦，算云烟、过眼总成空。落日楚天无际，凭栏目送飞鸿。

洞仙歌

卖花〔担〕上，菊蕊金初破。说着重阳怎虚过。看画城簇簇，酒肆歌楼，奈没个巧处，安排着我。

家乡煞远哩，抵死思量，枉把眉头万千锁。一笑且开怀，小阁团栾，旋簇着、几般蔬果。把三杯两盏记时光，问有甚曲儿，好唱一个。

西江月

宿酒才醒又醉，春霄欲雨还晴。柳边花底听莺声。白发莫教临镜。

过隙光阴易去，浮云富贵难凭。但将一笑对公卿。我是无名百姓。

又

三过武昌台下，却逢三度重阳。菊花祇作旧时黄。白雪堆人头上。

昨日将军亭馆，今朝陶令壶觞。醉来东望海茫茫。家近蓬莱方丈。

贺新郎 兄弟争涂田而讼，歌此词主和议

蜗角争多少。是英雄、割据乾坤，到头休了。一片泥涂荒草地，尽是鱼龙故道。新堤上、风涛难保。沧海桑田何时变，怕桑田、未变人先老。休为此，生烦恼。

讼庭不许频频到。这官坊、翻来覆去，有何分晓。无诤人中为第一，长讼元非吉兆。但有恨、平章不早。尊酒唤回和气在，看从来、兄弟依然好。把前事，付一笑。

沁园春

请赋林堂，林堂未成，吾何赋哉。想胸中丘壑，山中风月，亭台几所，花木千栽。应接光阴，品题胜概，须待堂成我再来。听分付，是经行去处，莫放苍苔。

吾曹不堕尘埃。要胸次长随笑口开。任江湖浪迹，鸥盟雁序，功名到手，凤阁鸾台。它日相寻，有逾此约，酌水浮君三百杯。闻斯语，有冠山突兀，袍岭崔嵬。

鹧鸪天 题赵次山鱼乐堂

圉圉洋洋各自由。或行或舞或沈浮。观鱼未必知鱼乐，政恐清波照白头。

休结网，莫垂钩。机心一露使鱼愁。终知不是池中物，掉尾江湖汗漫游。

减字木〔兰〕花 寄钦州刘叔治史君

羊城旧路。檀板一声惊客去。不拟重来。
白发飘飘上越台。

故人居处。曲巷深深通竹所。问讯桃花。
欲访刘郎不在家。

又 寄五羊钟子洪

天台狂客。醉里不知秋鬓白。应接风光。
忆在江亭醉几场。

吴姬劝酒。唱得廉颇能饭否。西雨东晴。
人道无情又有情。

又

阻风中酒。流落江湖成白首。历尽艰关。
赢得虚名在世间。

浩然归去。忆着石屏茅屋趣。想见山村。
树有交柯犊有孙。

浣溪沙

病起无聊倚绣床。玉容清瘦懒梳妆。水
沈灯冷橘花香。

说个话儿方有味，吃些酒子又何妨。一
声啼鴂断人肠。

清平乐 嘲人

醉狂痴作。误信青楼约。酒醒梅花吹画

角。翻得一场寂寞。

相如谩赋凌云。琴台不遇文君。江上琵琶旧曲，只堪分付商人。

临江仙 代作

误入风尘门户，驱来花月楼台。樽前几度得徘徊。可怜容易别，不见牡丹开。

莫恨银瓶酒尽，但将妾泪添杯。江头恰限北风回。再三相祝去，千万寄书来。

鹊桥仙 周子俊过南昌，问讯宋吉甫、黄存之昆仲

西山岩壑，东湖亭馆，尽是经行旧路。别时方见有荷花，还又见、梅花岁暮。

宋家兄弟，黄家兄弟，一一烦君传语。相忘不寄一行书，元自有、不相忘处。

祝英台近 别李择之诸丈后途中寄此

泛杭川，临尘水。几日共游戏。歌笑开怀，酒醒又还醉。奈何一旦分携，连宵风雨，剪不断、客愁千里。

水云际。遥望一片飞鸿，苦是失群地。满眼春风，管甚闲桃李。此行归老家山，相逢难又，但一味、相思而已。

大江西上曲 寄李实夫提刑，时郊后两相皆乞归

大江西上，郁孤台八境，人间图画。地

涌千峰摇翠浪，两派玉虹如泻。弹压江山，品题风月，四海今王谢。风流人物，如公一世雄也。

一片忧国丹心，弹丝吹笛，未必能陶写。西北风尘方溷洞，宰相闲归绿野。月斧争鸣，风斤运巧，不用修亭榭。紫枢黄阁，要公整顿天下。

满江红

庐陵厉元范史君梦中得柳眉抹翠一联，仆为续作此词歌之

太守风流，何人似、金华仙伯。试看取、珠篇玉句，银钩铁画。叶叶柳眉齐抹翠，梢梢花脸争匀白。比池塘、春草梦来诗，尤奇绝。

胸中有，蛾眉月。笔头带，蓬□雪。笑归来万里，不登金阙。鹿瑞堂前冬日暖，螺山江上春波阔。但伤时、一念不能休，添华发。

望江南

壶山宋谦父寄新刊雅词，内有壶山好三十阕，自说平生。仆谓犹有说未尽处，为续四曲

壶山好，博古又通今。结屋三间藏万卷，挥毫一字直千金。四海有知音。

门外路，咫尺是湖阴。万柳堤边行处乐，百花洲上醉时吟。不负一生心。

又

壶山好，胆气不妨粗。手奋空拳成活计，
眼穿故纸下功夫。处世未全疏。

生涯事，近日果何如。背锦奚奴能检典，
画眉老妇出交租。且喜有赢余。

又

壶山好，文字满胸中。诗律变成长庆体，
歌词渐有稼轩风。最会说穷通。

中年后，虽老未成翁。儿大相传书种在，
客来不放酒尊空。相对醉颜红。

又

壶山好，也解忆狂夫。转首便成千里别，
经年不寄一行书。浑似不相疏。

催归曲，一唱一愁予。有剑卖来酤酒吃，
无钱归去买山居。安处即吾庐。

又

仆既为宋壶山说其自说未尽处，壶山必有答语，
仆自嘲三解

石屏老，家住海东云。本是寻常田舍子，
如何呼唤作诗人。无益费精神。

千首富，不救一生贫。贾岛形模元自瘦，
杜陵言语不妨村。谁解学西昆。

又

石屏老，长忆少年游。自谓虎头须食肉，
谁知猿臂不封侯。身世一虚舟。

平生事，说着也堪羞。四海九州双脚底，
千愁万恨两眉头。白发早归休。

又

石屏老，悔不住山林。注定一生知有命，
老来万事付无心。巧语不如瘖。

贫亦乐，莫负好光阴。但愿有头生白发，
何忧无地觅黄金。遇酒且须斟。

清平乐 兴国军呈李司直

今朝欲去。忽有留人处。说与江头杨柳
树。系我扁舟且住。

十分酒兴诗肠。难禁冷落秋光。借取春
风一笑，狂夫到老犹狂。

醉太平

长亭短亭。春风酒醒。无端惹起离情。
有黄鹂数声。

芙蓉绣茵。江山画屏。梦中昨夜分明。
悔先行一程。

满庭芳 元夕上邵武王守子文

草木生春，楼台不夜，团团月上云霄，
太平官府，民物共逍遥。指点江梅一笑，几
番负、雨秀风娇。今年好，花边把酒，歌舞
醉元宵。

风流，贤太守，青云志气，玉树丰标。
是神仙班里，旧日王乔。出奉板舆行乐，金
莲照、十里笙箫。收灯后，看看丹诏，催入

圣明朝。

渔父 四首

渔父饮，不须钱。柳枝斜贯锦鳞鲜。换
酒却归船。

二

渔父醉，钓竿闲。柳下呼儿牢系船。高
眠风月天。

三

渔父醒，荻花洲。三千六百钓鱼钩。从
头下复休。

四

渔父笑，笑何人。古来豪杰尽成尘。江
山秋复春。

沁园春 送姚雪篷之贬所

访衡山之顶，雪鸿渺渺，湘江之上，梅
竹娟娟。寄语波臣，传言鸥鹭，稳护渠侬书
画船。

戴复古妻

祝英台近

惜多才，怜薄命，无计可留汝。揉碎花笺，忍写断肠句。道傍杨柳依依，千丝万缕，抵不住、一分愁绪。

如何诉。便教缘尽今生，此身已轻许。捉月盟言，不是梦中语。后回君若重来，不相忘处，把杯酒、浇奴坟土。

戴 平 之

鹧鸪天

笑擘黄柑酒半醒。玉壶金斗夜生冰。开
窗尽见千山雪，雪未消时月正明。

兰烬短，麝煤轻。画楼钟鼓已三更。倚
阑谁唱清真曲，人与梅花一样清。

戴山隐

满江红 风前断笛

醉倚江楼 ,长空外、行云遥驻。甚凄凉孤
吹 ,含商引羽。薄夜冷侵沙浦雁 ,老龙吟彻寒
潭雨。暮凉飏、一阵卷潮来 ,惊飞去。

重欲听 ,知何处。谁为我 ,胡床据。谩寻
寻觅觅 ,凝情如许。旧日山阳空有恨 ,杏花明
月今谁赋。恐凭阑、人有爱梅心 ,空愁伫。

戴 翼

水调歌头 寿陈仓使

某共审：瑞启福星，祥开诞月。江左两三年兵火，暂烦一出于虚危；部内几万户生灵，喜遇再来之父子。欢均列郡，喜溢崇台。某忝出师门，幸依化治。忻逢华旦，上南丰一瓣之香；敬缉斐章，祝东道千龄之算。退惭下俚，上渎清都。敢冀熏慈，俯垂采览。

嵩岳周王佐，昴宿汉宗臣。从来间世英杰，出则致升平。况我皇华直指，元是福星出现，来此活生灵。五百岁初度，十一郡欢忻。

挽西江，苏涸辙，洗尘埃。笑谈顷刻间宜，宇宙变为春。泽满赣川无限，福与崆峒齐耸，颂咏几多人。潋滟一卮寿，愿早秉洪钧。

又 寿彭守

某共审：某官，瑞启福星，祥开诞月。横浦十万家生齿，焚一瓣香；章江五十里附庸，上千岁寿。万诚芜句，申庆椒觞。仰冀熏慈，俯垂采览。

渤海卖刀剑，河汉洗戎兵。千金六月一雨，万陇稼云横。时节可人如许，天意开祥有在，申月岳生申。五百岁初度，千万户欢

声。

栋梁材，霖雨手，庙堂身。日边褒玺已到，岂久试鱼城。快上承明步武，展尽玉堂事业，再使旧毡青。公寿更天远，鼻祖等长生。

邓肃

瑞鹧鸪

北书一纸惨天容。花柳春风不敢秾。未
学宣尼歌凤德 ,姑从阮籍哭途穷。此身已落千
山外 ,旧事回思一梦中。何日中兴烦吉甫 ,洗
开阴翳放晴空。

临江仙 登泗州岭九首

带雨梨花看上马 ,问人底事匆匆。于飞有
愿恨难从。大鹏抟九万 ,鹦鹉锁金笼。
忽忽便为千里隔 ,危岑已接高穹。回头那
忍问前踪。家留烟雨外 ,人在斗牛中。

右一

百尺危楼初过雨 ,清风凜作轻寒。一声渔
笛在云端。黄昏帘幕卷 ,新月半阑干。
青翼不来音信断 ,云窗杳隔三山。何当携
手便骖鸾。今宵同胜景 ,玉笋不留残。

右二

春雪一瓯扶醉玉 ,翩翩两腋生风。柳腰无
力殢云踪。陈郎投辖意 ,分袂忍匆匆。

白玉琢杯龙麝泛 瀼瀼天酒争浓。何妨一
饮上青骢。晴空行夜月 缓辔水晶宫。

右三

剑水泠泠行碧玉 扁舟一叶吹风。玉人招
手画桥东。浩歌随月去 春在小楼中。

帘幕低垂围笃耨 雕觞笑捧春葱。谩将雨
意作云浓。单于吹未彻 门外响玲珑。

右四

雨过荼蘼春欲放 轻寒约住余芳。南园今
日被朝阳。琼葩开万点 尘世满天香。

百卉丛中红紫乱 玉肌自笑孤光。清风翦
翦过纱窗。余酲空一洗 不数寿阳妆。

右五

独宿禅房清梦断 鸡声唤起晨钟。出门晓
月耿寒空。小池凝翡翠 竹外跨飞虹。

梅坞不知何处了 傍篱临水重重。啸歌都
在冷香中。人间那有此 天上广寒宫。

右六

夜饮不知更漏永 余酣困染朝阳。庭前莺
燕乱丝簧。醉眠犹未起 花影满晴窗。

帘外报言天色好 水沈已染罗裳。檀郎欲
起趁春狂。佳人嗔不语 劈面喷丁香。

右七

夜静黄云承宝袜 九疑人到羊家。蕊宫仙
曲送流霞。东陵分玉井 远胜隔荷花。

绰约旗亭沾一笑 众惊食枣如瓜。画桥烟
柳忽翻鸦。醉鬟倾绿醕 参月共横斜。

右八

楼北楼南青不断 晴空总是春容。先来无处问郎踪。那堪风不定 雨尽一窗红。

初恨水中徒捉月 而今水月俱空。谩将雨意伴云浓。临风千点泪 不到渐江东。

右九

浣溪沙 八首

雨入空阶滴夜长。月行云外借孤光。独将心事步长廊。

深锁重门飞不去 巫山何日梦襄王。一床衾枕冷凄香。

其二

傍竹柴门俯碧流。见人无语眼横秋。鸣机轧轧弄纤柔。

定有回文传窦子 何时银汉渡牵牛。归来风雨夜飕飕。

其三

宿雨潜回海宇春。晓风徐散日边云。熙熙人意一番新。

破睡海棠能媚客 舞风垂柳似招人。春衫归去马蹄轻。

其四

阑外彤云已满空。帘旌不动石榴红。谁将秋色到楼中。

玛瑙一泓浮翠玉 ,瓠犀终日凛天风。炎洲
人到广寒宫。

其五

高会横山酒八仙。烟云不减九华妍。暖
风琼树倚楼前。

妙唱一声尘暗落 ,靓妆四座玉相连。骅骝
何日共翩翩。

其六

二八佳人宴九仙。华堂清静斗春妍。琼
枝相倚妙无前。

良夜黄云来缥缈 ,东风碧酒意留连。花间
蝶梦想翩翩。

其七

半醉依人落珥簪。天香不数海南沈。时
倾秋水话春心。

已觉吹箫归碧落 ,从今褰饮笑山阴。金杯
休惜十分深。

其八

海畔山如碧玉簪。天涯消息叹鱼沈。赖
逢倾国洗愁心。

莫为世情生旅况 ,且因乐事惜光阴。明朝
红雨已春深。

菩萨蛮 十首

隔窗瑟瑟闻飞雪。洞房半醉回春色。银
烛照更长。罗屏围夜香。

玉山幽梦晓。明日天涯杳。倚户黯芙蓉。
涓涓秋露浓。

又

萋萋欲遍池塘草。轻寒却怕春光老。微
雨湿昏黄。梨花啼晚妆。

低垂帘四面。沈水环深院。太白困鸳鸯。
天风吹梦长。

又

飞红欲带春风去。柳丝却织春风住。去
住任春风。只愁尊俎空。

今朝鞭马去。又得高阳侣。半醉踏花归。
霜蹄骄欲飞。

又

帘旌不动薰余热。高堂谁送能言雪。一
笑下人间。天风袭坐寒。

歌声云外去。句句苏仙语。曲罢一尊空。
飘然欲驭风。

又

廉纤细雨连天远。纱窗不隔斜风冷。花
柳自生春。无聊空闭门。

双双携手处。回首烟汀暮。嬉笑在高楼。
知人牢落否。

又

垂杨袅袅腰肢软。寒溪练练琉璃浅。短
艇卧吹风。生涯一叶中。

五湖须径去。何用若耶女。烟雨暝沙汀。
花香唤酒醒。

又

腰肢欲趁杨花去。歌声能遏行云住。杯酒醉东风。羁愁一洗空。

谪仙清饮露。意在飞琼侣。未醉即求归。新词句欲飞。

又

归心谩逐飞云去。欢情却为芳菲住。翠袖拥香风。宁辞玉笋空。

主人承湛露。元是皋夔侣。早晚定遄归。商霖四海飞。

又 和李状元

骑鲸好向云端去。踏花偶为狂朋住。笑语凛生风。眼高四海空。

羊裘冲雨露。我是渔樵侣。已趁白鸥归。长江自在飞。

又

一心唯欲南园去。东山著意留难住。曾惯识追风。马群今已空。

金盘盛玉露。情绝鸳鸯侣。破贼凯还归。冲天看一飞。

南歌子 四首

竹影窥灯暗，泉声语夜长。小窗无梦到高唐。独引三杯长啸、步修廊。月午衣衫冷，莲开风露香。阑干西角下银潢。我欲乘槎天上、泛寒光。

右一

皓月明腮雪 ,冷风乱鬓云。高楼帘幕夜生春。半醉依人秋水、欲斜倾。晓雨双溪涨 ,归舟一叶轻。杳无青翼寄殷勤。目断烟波渔火、又黄昏。

右二

云绕风前鬓 ,春开槛里妆。凤屏清昼蔼龙香。浅画娥眉新样、远山长。比翼曾同梦 ,双鱼隔异乡。玉楼依旧暗垂杨。楼下落花流水、自斜阳。

右三

驿畔争埽草 ,车前自喂牛。凤城一别几经秋。身在天涯海角、忍回头。旅梦惊残月 ,劳生寄小舟。都人应也望宸游。早晚葱葱佳气、满皇州。

右四

诉衷情 送李状元三首

乘鸾缥缈过三山。游戏下人间。金尊不辞频倒 ,春色上朱颜。

依暖玉 ,掠风鬟。语关关。惟愁漏短 ,雨散云飞 ,骑月空还。

其二

龙头一语定闽山。黄色上眉间。诏书促归金阙 ,玉带侍天颜。

拢象板 , 弹宫鬢。唱阳关。从容禁闼 , 若
念林泉 , 应寄书还。

其三

从来云雨过巫山。只托梦魂间。何如醉
逢倾国 , 春到一瓢颜。

歌窈窕 , 舞双鬟。掩云关。重城五鼓 , 月
下西楼 , 不忍轻还。

长相思令 三首

一重山。两重山。山远天高烟水寒。相
思枫叶丹。

菊花开 , 菊花残。雁已西飞人未还。一帘
风月闲。

又

一重溪。两重溪。溪转山回路欲迷。朱
阑出翠微。

梅花飞。雪花飞。醉卧幽亭不掩扉。冷
香寻梦归。

又

红花飞。白花飞。郎与春风同别离。春
归郎不归。

雨霏霏。雪霏霏。又是黄昏独掩扉。孤
灯隔翠帷。

西江月 二首

腊雪犹埋石嶽 , 春风已入梅梢。冷香随马

上琼瑶。不与时人同到。

拍手恐惊星斗 ,高歌已在烟霄。醉呼玉女
解金貂。笑问何如蓬岛。

右一

风荐荷香翦翦 ,月行竹影徐徐。微闻环佩
过庭除。恐是阳台行雨。

玉笋轻笼乐句 ,流莺夜转诗余。酒酣风劲
露凝珠。我欲骖鸾归去。

右二

生查子

执手两潸然 ,情极都无语。去马更匆匆 ,
一息迷回顾。

孤馆得村醪 ,一醉空离绪。酒醒却无人 ,
帘外三更雨。

感皇恩

翠竹谩连云 ,天风不到。帘幕重重自热
恼。冷香忽至 ,爱惜当同芝草。井花浮碧玉 ,
炎威扫。

酒渴想东邻 ,忧心如捣。纳履生疑谩悔
懊。未容沈李 ,相对尊前倾倒。报君惟短句 ,
琼琤好。

一翦梅 题泛碧斋

雨过春山翠欲浮。影落寒溪碧玉流。片帆乘兴挂东风,夹岸花香拥去舟。尊酒时追李郭游。醉卧烟波万事休。梦回风定斗杓寒,渔笛一声天地秋。

蝶恋花 代送李状元

执手长亭无一语。泪眼汪汪,滴下阳关句。牵马欲行还复住。春风吹断梨花雨。
海角三千千叠路。归侍玉皇,那复回头顾。旌旆已因风月驻。何妨醉过清明去。

江城子

酒阑携手过回廊。夜初凉。月如霜。笑问木樨,何日吐天香。待插一枝归斗帐,和云雨,殢襄王。

如今满目雨新黄。绕高堂。自芬芳。不见堂中,携手旧鸳鸯。已对秋光成感慨,更夜永,漏声长。

邓 有 功

点绛唇

卷上珠帘，晚来一阵东风恶。客怀萧索。
看尽残花落。

自把银瓶。买酒成孤酌。伤漂泊。知音
难托。闷倚阑干角。

过秦楼

燕蹴飞红，莺迁新绿，几阵晚来风急。
谢家池馆，金谷园林，还又把春虚掷。年时
恨雨愁云，物换星移，有谁曾忆。把一尊试
酹，落花芳草，总成尘迹。

频自笑、流浪孤萍，沾泥弱絮，有底困
春无力。银屏香暖，宝簟波寒，又负月明今
夕。往事梦里，沈思惟有罗襟，泪痕犹湿。
奈垂杨万缕，不系西风白日。

邓 剡

念奴娇 驿中言别

水天空阔，恨东风、不惜、世间英物。蜀鸟吴花残照里，忍见荒城颓壁。铜雀春情，金人秋泪，此恨凭谁雪。堂堂剑气，斗牛空认奇杰。

那信江海馀生，南行万里，不放扁舟发。正为鸥盟留醉眼，细看涛生云灭。睨柱吞羸，回旗走懿，千古冲冠发。伴人无寐，秦淮应是孤月。

满江红

广斋谓柳山和王夫人满江红韵，惜未见之，为赋一阕

王母仙桃，亲曾醉、九重春色。谁信道、鹿衔花去，浪翻鳌阙。眉锁娇娥山宛转，髻梳堕马云欹侧。恨风沙、吹透汉宫衣，馀香歇。

霓裳散，庭花灭。昭阳燕，应难说。想春深铜雀，梦残啼血。空有琵琶传出塞，更无环佩鸣归月。又争知、有客夜悲歌，壶敲

缺。

浪淘沙

疏雨洗天晴。枕簟凉生。井梧一叶做秋声。谁念客身轻似叶，千里飘零。

梦断古台城。月淡潮平。便携酒访新亭。不见当时王谢宅，烟草青青。

唐多令

雨过水明霞。潮回岸带沙。叶声寒、飞透窗纱。堪恨西风吹世换，更吹我、落天涯。

寂寞古豪华。乌衣日又斜。说兴亡、燕入谁家。惟有南来无数雁，和明月、宿芦花。

烛影摇红 雪楼得次子，行台时治金陵

郢雪歌高，天教鹤子参鸣和。薰风旌节瑞华□，光动垂弧左。早是烟楼撞破。更明珠、重添一颗。镜容中夜，摩顶依然，石麟天堕。

未羡眉山，两峰儿子中峰我。推贤世世珥金貂，何况阴功大。欲写弄獐书贺。愧无功、难消玉果。摩挲老眼，曾识英雄，试啼则个。

霜天晓角 寿文文溪，时守清江

蛮烟塞雪。天老梅花骨。还著锦衣游戏，

清江上、管风月。

木兰归海北。竹梧侵户碧。三十六峰苍玉。驾白鹿、友仙客。

木兰花慢 寿周耐轩府尹

步凉飈绿野，□钟鼓、□园林。有骑竹更生，扶藜未老，歌舞棠阴。金鞭半横玉带，烨神人、风度五云深。大耐自应鹤骨，活人总是天心。

寿蒲香晚尚堪斟。梧竹对潇森。早问道燕城，衣裁绣袂，台筑黄金。天瓢正消几滴，化中原、焦土作甘霖。却伴赤松未晚，碧桃花下横琴。

摸鱼儿 寺周耐轩府尹，是岁起义仓

问庐陵、米作何价。棠阴又绿今夏。活人手段依然在，独乐园中司马。初度也。算几处篝香，手额你多谢。风亭月榭。尽隐橘观棋，折荷筒酒，花竹秀而野。

阶庭树，满目鱼鱼雅雅。千金难买清暇。纷纷征榷尘如梦，谁有似公闲者。天怎舍。趁绿鬓朱颜，须入凌烟画。海天不夜。管岁岁安期，采蒲为寿，高宴碧桃下。

促拍丑奴儿 寿孟万户

睡起怯春寒。海棠花、开未开间。莫言

春色三分二，朱颜绿鬓，栽花种竹，谁似君闲。

侯印旧家毡。早天边、飞诏催还。从今岁岁称觞处，人如玉雪，花如锦绣，福寿如山。

八声甘州 寿胡存斋

笑钗符、恰正带宜男。还将寿花簪。早风薰竹醉，松凉鹤健，午坐存庵。三十六峰玉立，隔麈听玄谈。何似人难老，三十才三。

闻得天边好语，第一流人物，偏重江南。满玻璃春绿，十载爱棠甘。青青鬓、尽堪图画，趁紫岩、年纪作枢参。却归宴、瑶池未晚，荷日红酣。

好事近 寿刘须溪

桃脸破初寒，笑问刘郎前度。为说正元朝上，缥缈午桥午。

百年方半日来多，且醉且吟去。须信剑南万首，胜侯封万户。

摸鱼儿 杨教之齐安任

笑平生、布帆无恙，堂堂稳送君去。江声悲壮崖殷血，曾是英雄行处。今亦古。甚一点东风，天不周郎与。城幡夜竖。几铜爵春残，战沙秋冷，华发遽如许。

东坡老，千载风流两赋。馀音不绝如缕。
临皋一笑三生梦，还认岷峨乡语。挥玉麈。
尽不碍灯前，痛饮檐花雨。雪堂在否。管驾
鹤归来，为君细赏，蝴蝶上阶句。

疏影 笋薄之平江

瑶尊蘸翠。短长亭送别，风恋晴袂。腊
树迎春，一路清寒，能消几日羁思。霜华不
惜阳关柳，悄莫系、行人嘶骑。对梅花、一
笑分携，胜约别来相寄。

人物仙蓬妙韵，瑞鸾敛迅翼，聊憩香枳。
见说使君，好语先传，付与芙蓉清致。客来
欲问荆州事，但细语、岳阳楼记。梦故人、
剪烛西窗，已隔洞庭烟水。

丁 察 院

万年欢 寿两国夫人胡氏

葛井丹明，西来金母，霓旌云旆。移下瑶池，竹外一壶秋水。菊□香留宿醉。看后夜、冰轮满桂。貂蝉映、虹玉称觞，遂初堂上佳会。

娇孙彩衣聚戏。指明年八十，儿额先记。要比庄椿，八数更加千倍。好是皇恩锡类。许东殿、首舆扶至。君臣庆、齐侍慈颜，万年欢对尧世。

丁持正

碧桃春

几年辛苦捣元霜。一朝琼粉香。云英缥渺曳仙裳。相将骑凤凰。

钿帝乐 酌天浆。千年颜色芳。从兹归去白云乡。碧桃春昼长。

丁 黼

满江红 寿江古心母

某惶恐端拜申禀某官（称呼）。某兹者共审庆集慈闱，时临诞节。鹊巢载咏，知功行之弥深；鹤发双垂，真古今之希有。某阻升堂而展拜，敢载酒以称觞。寿算南山，更辑康宁之福；辞同下俚，聊申祝颂之忱。尚冀台慈，俯赐鉴矚。”

梅腊宾春，瑞烟满、华堂馥郁。还又祝、屏垂彩帟，觞称醺醑。南浦西山开寿域，朱帘画栋调新曲。庆彩衣、龙节侍兹萱，春长绿。

双鹤发，齐眉福。一麟瑞，如冰玉。看国封重见，五霞凝轴。王母瑶池鸾凤驭，麻姑金鼎神仙篆。数从今、椿算到何时，蟠桃熟。

丁几仲

贺新郎 贺人妾生子

喜溢蟾宫梦。起推衣、平章窠桂，湿鸦飞动。果报佳音传络秀，丹穴雏生彩凤。想孔释、亲来抱送。不羡徐卿秋水澈，试闻声、识破真英种。培杞梓，待时用。

当年绛帐承新宠。问何如归来，碧荷香重。都是刘郎看承处，多少温柔从臾。会起我嘉宾钦竦。左氏公羊，从初所学，看家传、声誉今腾涌。拚醉舞，与谁共。

丁 默

齐天乐 重游番〔阳〕(易)

两株烟柳荒城外，依依暮帆曾驻。小扇障尘，轻舆贴岸，谁料重行吟处。流光暗度。怅兰溆春移，苇汀秋聚。可奈清愁，快呼艇子载将去。

中年怀抱易感，甚风花水叶，犹似孤旅。伴鹤幽期，随莺乐事，还是情乖意负。衣尘帽土。但杜镜堪羞，贺囊偏□。待报山灵，莫教云壑妒。

华胥引

论交眉语，惜别心啼，费情不少。蕙溆溱期，苹深汜约轻误了。几度金铸相思，又燕归鸿杳。谁料如今，被莺闲占春早。

频把愁勾，惜鸦云、娇红犹绕。浑拚如梦，争奈枕醒屏晓。欲寄芙蓉香半握，怕不禁秋恼。重是亲逢，片帆双度天杪。

齐天乐 庚戌元夕都下遇赵立之

倦云休雨风还作，交相醒花苏柳。字满

吟灰，痕添坐席，赢得新愁痴守。归期未有。
负小院移兰，故园尝韭。谩道春来，沈腰惟
觉似秋瘦。

烧灯时候是也，楚津留野艇，曾趁芳友。
问月赊晴，凭春买夜，明月添香解酒。□知
别久。怅帝陌论心，客尘侵首。戏鼓声中，
旧情犹在否。

丁 谓

凤栖梧

十二层楼春色早。三殿笙歌，九陌风光好。堤柳岸花连复道。玉梯相对开蓬岛。
莺啭乔林鱼在藻。太液微波，绿斗王孙草。南阙万人瞻羽葆。后天祝圣天难老。

又

朱阙玉城通阆苑。月桂星榆，春色无深浅。箫瑟篴笙仙客宴。蟠桃花满蓬莱殿。
九色明霞裁羽扇。云雾为车，鸾鹤骖雕辇。路指瑶池归去晚。壶中日月如天远。

丁羲叟

渔家傲

十里寒塘初过雨。采莲舟上谁家女。秋水接云迷远树。天光暮。船头忘了回来路。

却系兰舟深处住。歌声惊散鸳鸯侣。波上清风花上雾。无计去。月明肠断双栖去。

丁仙现

绛都春 上元

融和又报。乍瑞霭霁色，皇州春早。翠幌竞飞，玉勒争驰都门道。鳌山彩结蓬莱岛。向晚色、双龙衔照。绛绡楼上，彤芝盖底，仰瞻天表。

缥缈。风传帝乐，庆三殿共赏，群仙同到。迤逦御香，飘满人间闻嬉笑。须臾一点星球小。渐隐隐、鸣鞘声杳。游人月下归来，洞天未晓。

丁 寯

水龙吟

雁风吹裂云痕，小楼一线斜阳影。残蝉抱柳，寒蛩入户，淒音忍听。愁不禁秋，梦还惊客，青灯孤枕。未更深，早是梧桐泫露，那更度、兰宵永。

空叹银屏金井。醉乡醒、温柔乡冷。征尘倦扑，闲花谩舞，何心管领。葱指冰弦，蕙怀春锦，楚梅风韵。怅芙蓉城杳，蓝云依黯，锁巫峰暝。

法曲献仙音

蝉碧句花，雁红攒月。

失调名 寒梅

疏绮笼寒，浅云栖月。

六么令

清阴一架，颗颗蒲萄醉花碧。

丁 注

无 闷

风急还收，云冻又开，海阔无人剪水。
算六出工夫，怎教容易。刚被郢歌楚舞，镇
独向、尊前夸轻细。想谢庭诗咏，梁园赋赏，
未成欢计。

天意。是则是。便下得控持，柳梢梅蕊。
又争奈、看看渐回春意。好趁东君未觉，预
先把、园林都装缀。看是处、玉树琼枝，胜
却万红千翠。

东冈

百字令 戴平轩新居 ,子侄新婚

排云拓月 ,向天上移下 ,神仙华屋。画栋
飞檐千万落 ,黼黼城南乔木。出谷莺迁 ,趋庭
燕尔 ,袍绶登科绿。嫦娥分付 ,广寒今夜花烛。

遥想高越于门 ,烂盈百辆 ,夹道争车毂。
春满剡溪溪上路。一任瑶华飞六。輿奉潘慈 ,
楼高华萼 ,坐享齐眉福。庭槐列戟 ,公侯衮衮
相属。

董德元

柳梢青

满腹文章 ,满头霜雪 ,满面埃尘。直至如今 ,
别无收拾 ,只有清贫。

功名已是因循。最懊恨、张巡李巡。几个
明年 ,几番好运 ,只是瞒人。

董嗣杲

湘月

莲幽竹邃 ,旧池亭几处 ,多爱君子。醉玉吹香还认取 ,忙里得闲标致。心逐云帆 ,情随烟笛 ,高会知谁继。宵筵会启 ,蓦然身外浮世。

因见杜牧疏狂 ,前缘梦里 ,谩蹙双眉翠。香满屏山春满几 ,炉拥麝焦禽睡。月落梅空 ,霜浓窗掩 ,两耳风声起。艳歌终散 ,输他鹤帐清寐。

齐天乐

玉山曾醉凉州梦 ,图芳笈无今古。露颗虬藤 ,风枝蠹叶 ,遗墨何人收取。当时赠与。记轻别西湖 ,笑离南浦。万里奚囊 ,岂知随处助吟苦。

归来情寄谩远 ,旧寻犹在望 ,荒亭荒圃。绀蕾攒冰 ,苍阴弄月 ,休说堆盘马乳。云梯尚阻。袖一幅秋烟 ,扫空尘土。静想山窗 ,半乘寒架雨。

董武子

失调名

畴昔寻芳秘殿西。日压金铺，宫柳垂垂。

董 义

望江南

缥缈烟中渔父桨，坡陀山上使君衙。

又

六月凉窗凉衽袖，二苏辞翰照青冥。

董颖

薄媚 西子词

排遍第八

怒潮卷雪 ,巍岫布云 ,越襟吴带如斯。有客经游 ,月伴风随。值盛世。观此江山美。合放怀、何事却兴悲。不为回头 ,旧谷天涯。为想前君事。越王嫁祸献西施。吴即中深机。

阖庐死。有遗誓。句践必诛夷。吴未干戈出境 ,仓卒越兵 ,投怒夫差。鼎沸鲸鲵。越遭劲敌 ,可怜无计脱重围。归路茫然 ,城郭丘墟 ,飘泊稽山里。旅魂暗逐战尘飞。天日惨无辉。

排遍第九

自笑平生 ,英气凌云 ,凜然万里宣威。那知此际。熊虎涂穷 ,来伴麋鹿卑栖。既甘臣妾 ,犹不许 ,何为计。争若都燔宝器。尽诛吾妻子。径将死战决雄雌。天意恐怜之。

偶闻太宰 ,正擅权 ,贪赂市恩私。因将宝
玩献诚 ,虽脱霜戈 ,石室囚系。忧嗟又经时。
恨不如巢燕自由归。残月朦胧 ,寒雨萧萧 ,有
血都成泪。备尝险厄返邦畿。冤愤刻肝脾。

第十擷

种陈谋 ,谓吴兵正炽。越勇难施。破吴
策 ,唯妖姬。有倾城妙丽。名称西子。岁方
笄。算夫差惑此。须致颠危。范蠡微行 ,珠贝
为香饵。苕萝不钓钓深闺。吞饵果殊姿。

素肌纤弱 ,不胜罗绮。鸾镜畔、粉面淡匀 ,
梨花一朵琼壶里。嫣然意态娇春 ,寸眸剪水。
斜鬟松翠。人无双、宜名动君王 ,绣履容易。
来登玉陛。

入破第一

窈湘裙 ,摇汉佩。步步香风起。敛双蛾 ,
论时事。兰心巧会君意。殊珍异宝 ,犹自朝臣
未与。妾何人 ,被此隆恩 ,虽令效死。奉严旨。

隐约龙姿忻悦。重把甘言说。辞俊雅 ,质
娉婷 ,天教汝、众美兼备。闻吴重色 ,凭汝和
亲 ,应为靖边陲。将别金门 ,俄挥粉泪。靓妆
洗。

第二虚催

飞云驶。香车故国难回睇。芳心渐摇 ,迤

迺吴都繁丽。忠臣子胥 ,预知道为邦崇。谏言先启。愿勿容其至。周亡褒姒。商倾妲己。

吴王却嫌胥逆耳。才经眼、便深恩爱。东风暗绽娇蕊。彩鸾翻妒伊。得取次、于飞共戏。金屋看承 ,他宫尽废。

第三袞遍

华宴夕 ,灯摇醉。粉菡萏 ,笼蟾桂。扬翠袖 ,含风舞 ,轻妙处 ,惊鸿态。分明是。瑶台琼榭 ,阆苑蓬壶 ,景尽移此地。花绕仙步 ,莺随管吹。

宝帐暖留春 ,百和馥郁融鸳被。银漏永 ,楚云浓 ,三竿日、犹褪霞衣。宿醒轻腕 ,嗅宫花 ,双带系。合同心时。波下比目 ,深怜到底。

第四催拍

耳盈丝竹 ,眼摇珠翠。迷乐事。宫闱内。争知。渐国势凌夷。奸臣献佞 ,转恣奢侈 ,天谴岁屡饥。从此万姓离心解体。

越遣使。阴窥虚实 ,蚤夜营边备。兵未动 ,子胥存 ,虽堪伐、尚畏忠义。斯人既戮 ,又且严兵卷土 ,赴黄池观衅 ,种蠡方云可矣。

第五袞遍

机有神 ,征鼙一鼓 ,万马襟喉地。庭喋血 ,诛留守 ,怜屈服 ,敛兵还 ,危如此。当除祸本 ,

重结人心 ,争奈竟荒迷。战骨方埋 ,灵旗又指。
势连败。柔荑携泣。不忍相抛弃。身在
兮 ,心先死。宵奔兮 ,兵已前围。谋穷计尽 ,唳
鹤啼猿 ,闻处分外悲。丹穴纵近 ,谁容再归。

第六歇拍

哀诚屡吐 ,甬东分赐。垂暮日 ,置荒隅 ,心
知愧。宝钗红委。鸾存凤去 ,辜负恩怜 ,情不
似虞姬。尚望论功 ,荣还故里。

降令曰 ,吴亡赦汝 ,越与吴何异。吴正怨 ,
越方疑。从公论、合去妖类。蛾眉宛转 ,竟殒
蛟绡 ,香骨委尘泥。渺渺姑苏 ,荒芜鹿戏。

第七煞袞

王公子。青春更才美。风流慕连理。耶
溪一日 ,悠悠回首凝思。云鬟烟鬓 ,玉佩霞裾 ,
依约露妍姿。送目惊喜。俄迂玉趾。

同仙骑。洞府归去 ,帘栊窈窕戏鱼水。正
一点犀通 ,遽别恨何已。媚魄千载 ,教人属意。
况当时。金殿里。

卜算子 子平席上赋

春浅借和风 ,吹绿庭皋树。依约屏间出紫
云 ,入格风流处。

便做铁心肠 ,也为梅花语。欲去东君更挽
留 ,巧栈烟霞路。

满庭芳 元礼席上用少游韵

红斗风桃 ,绿肥烟草 ,杨柳春暗重门。五陵佳兴 ,酿酝付芳尊。窈窕笙箫丛里 ,金猊篆、雾绕云纷。勾情也 ,歌眉低翠 ,依约鹧鸪村。

人生须快意 ,十分春事 ,才破三分。况点检年时 ,胜客都存。更把余欢卜夜 ,从彻晓、蜡泪流痕。花阴昼 ,朱帘未卷 ,犹自醉昏昏。

都下妓

朝中措 改欧阳修词

屏山栏槛倚晴空。山色有无中。手种庭前桃李，别来几度春风。

文章宰相，挥毫万字，一饮千钟。行乐不须年少，尊前看取仙翁。

杜安道

西江月

晓镜初妆玉粉，轻风暗递幽香。闲随月影到寒塘。忘却人间天上。

雪意空惊春意，孤芳已断年芳。从教驿使为伊忙。乞个寿阳宫样。

杜安世

鹤冲天

清明天气。永日愁如醉。台榭绿阴浓，薰风细。燕子巢方就，盆池小，新荷蔽。恰是逍遥际。单夹衣裳，半枕软玉肌体。

石榴美艳，一撮红绡比。窗外数修篁，寒相倚。有个关心处，难相见、空凝睇。行坐深闺里。懒更妆梳，自知新来憔悴。

两同心

巍巍剑外，寒霜覆林枝。望衰柳、尚色依依。暮天静、雁阵高飞。入碧云际。江山秋色，遣客心悲。

蜀道崕嶮行迟。瞻京都迢递。听巴峡、数声猿啼。惟独个、未有归计。谩空怅望，每每无言，独对斜晖。

玉阑干

珠帘怕卷春残景。小雨牡丹零欲尽。庭轩悄悄燕高空，风飘絮、绿苔侵径。

欲将幽恨传愁信。想后期、无个凭定。
几回独睡不思量，还悠悠、梦里寻趁。

浣溪沙

模样偏宜掌上怜。云如双鬓玉如颜。身
材轻妙眼儿单。

幽会未成双怅望，深情欲诉两艰难。空
教魂梦到巫山。

又

横画工夫想未全。双双文彩羽仪鲜。和
鸣偕老是天然。

暮雨并深流细草，暖风交颈傍清涟。羡
他真个好因缘。

惜春令

春梦无凭犹懒起。银烛尽、画帘低垂。
小庭杨柳黄金翠，桃脸两三枝。

妆阁慵梳洗。闷无绪、玉箫抛掷。絮飘
纷纷人疏远，空对日迟迟。

又

今夕重阳秋意深。篱边散、嫩菊开金。
万里霜天林叶坠，萧索动离心。

臂上茱萸新。似旧年、堪赏光阴。百盏
香醪且酬身。牛山会难寻。

踏莎行

雨霁风光，春分天气。千花百草争明媚。
画梁新燕一双双，玉笼鹦鹉爱孤睡。

薜荔依墙，莓苔满地。青楼几处歌声丽。
蓦然旧事上心头，无言敛皱眉山翠。

又

夜雨朝晴，东风微冷。雕梁燕子闲相并。
后园次第数芳菲，千香百艳年年定。

步险楼高，人赊途迥。烟芜冉冉斜阳暝。
红笺写尽寄无因，想伊不信人成病。

又

嫩柳成阴，残花双舞。尘消院落新经雨。
洞房深掩日长天，珠帘时有沈烟度。

夜梦凄凉，晨妆薄注。香肌瘦尽宽金缕。
到头终是恶因缘，当初只被多情误。

又

闲院秋千，又还拆了。绿苔遍地青春老。
画楼日晚燕归巢，红稀翠盛梅初小。

窈窕身轻，怎禁烦恼。罗衣渐减怯风峭。
韶华好景想多才，厌厌只为书音少。

端正好

槛菊愁烟沾秋露。天微冷、双燕辞去。
月明空照别离苦。透素光、穿朱户。

夜来西风雕寒树。凭阑望、迢遥长路。

花笺写就此情绪。特寄传、知何处。

又

每逢春来长如病。玉容瘦、薄妆相称。
双欢未经成孤令。奈厚约、全无定。

众禽啾唧声愁听。相思事、多少春恨。
孤眠帐外银缸耿。透一点、炉烟暝。

又

露落风高桐叶坠。小庭院、秋凉佳气。
兰堂聚饮华筵启。罢令曲、呈珠缀。

晚天行云凝香袂。新声内、分明心意。
玉炉初喷檀烟起。敛愁在、双蛾翠。

又

野禽林栖啾唧语。闲庭院、残阳将暮。
兰堂静悄珠帘窳。想玉人、归何处。

喜鹊几回薄无据。愁都在、双眉头聚。
凄凉方感孤鸳侣。对夜永、成愁绪。

菩萨蛮

游丝欲堕还重上。春残日永人相望。花
共燕争飞。青梅细雨枝。

离愁终未解。忘了依前在。拟待不寻思。
刚眠梦见伊。

又

锦机织了相思字。天涯路远无由寄。寒
雁只衔芦。何曾解寄书。

缄封和血泪。目断西江水。拟欲托双鱼。
问君情有无。

丑奴儿

樱桃谢了梨花发，红白相催。燕子归来。
几处风帘绣户开。

人生乐事知多少，且酌金杯。管咽声哀。
慢引萧娘舞一回。

凤衔杯

人生不似月初圆。叹分飞、容易经年。
凄惨断云片雨、□□□。□□□、□□□。

金钗小，玉槽悭。想至今、谁为相怜。
多少旧欢往事、一潸然。空牵惹、病缠绵。

又

留花不住怨花飞。向南园、情绪依依。
可惜倚红斜白、一枝枝。经宿雨、暮江披。

凭朱槛，把金卮。对芳丛、惆怅多时。
何况旧欢新恨、阻心期。空满眼、是相思。

少年游

小轩深院是秋时。风叶堕高枝。疏帘静
永，薄帷清夜，暑退觉寒微。

凄凉天气离愁意，音书杳难期。多情成
病不须医。更憔悴、转寻思。

玉楼春

玉烛光明正旦好。斗柄东回春太早。岭寒犹锁去年梅，江暖新催今岁草。

蜀国熙熙冬令杪。更喜寿阳新梦觉。玉杯齐举乐音谐，遥想金阶天仗晓。

又

风解池冰蝉翅薄。庭树枝枯笼翠萼。背寒迎暖起犹慵，闲卷珠帘凭画阁。

晴景融融烟漠漠。天际行人乖信约。病容先怯见春来，长到恁时添瘦削。

又

晴景融融春色浅。落尽梅花千万片。小池冰解水纹生，消息未闻梁上燕。

楼倚轻寒风力软。目断孤云天自远。又还依旧去年时，寂寞病容人怪见。

又

三月牡丹呈艳态。壮观人间春世界。鲛绡玉槛作扃栊，淹雅洞中王母队。

不奈风吹兼日晒。国貌天香无物赛。直须共赏莫轻孤，回首万金何处买。

又

纶命忽从天上至。便绾兵权辞漕计。汉廷起草旧郎官，蜀部坐筹新将帅。

红旆碧幢春色里。娇马嘶风花片坠。送行今日短亭中，恼乱故人须尽醉。

又

春景抛人无处问。多谢石榴花又喷。茜罗揉出碎英繁，红蜡缕成香萼润。

血色新裙羞莫近。密叶柔条相间衬。雨余寂寞假山傍，乡国尚遥西海信。

又

三月初三春渐老。遍地残花风暗扫。命侬箫侣拥笙歌，临水泛觴游宴好。

浮利浮名何足道。丽景芳时须笑傲。今年不似去年欢，云海路长天杳杳。

河满子

细雨衰开红杏，新妆粉面鲜明。东君何事交来早，更无绿叶同荣。独倚青楼吟赏，目前无限轻盈。

命薄不倚栏杆，或占郊垌。清香繁艳真堪爱，枉教寂寞凋零。相次牡丹芍药，王孙谁道多情。

又

柳嫩不禁摇动，梅残尽任飘零。雨余天气来深院，向阳纤草重青。寂寞小桃初绽，两三枝上红英。

又见云中归雁，雍雍断续和鸣。年年依旧无情绪，镇长冷落银屏。不语闲寻往事，微风频动帘旌。

山亭柳

晚来风雨，万花飘落。叹韶光虚过。却芳草萋萋，映楼台、淡烟漠漠。纷纷絮飞院宇，燕子过朱阁。

玉容淡妆添寂寞。檀郎孤愿太情薄。数归期，绝信约。暗添春宵恨，平康恣迷欢乐。时时闷饮绿醕，甚转转、思量著。

合欢带

楼台高下玲珑。斗芳草绿阴浓。芍药孤栖香艳晚，见樱桃、万颗初红。巢喧乳燕，珠帘镂曳，满户香风。罩纱帟、象床屏枕，昼眠才似朦胧。

起来无语更兼慵。念分明、事成空。被你厌厌牵系我，怪纤腰、绣带宽松。春来早是，分飞两处，长恨西东。到如今、扇移明月，簟铺寒浪与谁同。

更漏子

雪肌轻，花脸薄。愁困不忺梳掠。眉翠袅，眼波长。偎人言语香。

看难厌，怜不足。苦恨别离何速。珠树远，彩鸾孤。今生重见无。

又

脸如花，花不笑。双脸胜花能笑。肌似

玉，玉非温。肌温胜玉温。

既相逢，情不重。何似当初休共。情既重，却分飞。争如不见伊。

又

镂金环，连玉珥。颗颗蚌蛤相缀。偎粉面，映莲腮。露浓花正开。

冷光凝，员影重。几度偷期摇动。山枕上，恐人知。摘嫌纤手迟。

喜迁莺

花不尽，柳无穷。应与我心同。觥船一棹百分空。何处不相逢。

朱弦悄。知音少。天若有情应老。劝君看取利名场。今古梦忙忙。

杜韦娘

暮春天气，莺老燕子忙如织。间嫩叶题诗哨梅小，乍遍水、新萍圆碧。初牡丹谢了，秋千搭起，垂杨暗锁深深陌。暖风轻，尽日闲把、榆钱乱掷。

恨寂寂。芳容衰减、顿敲玳枕困无力。为少年。狂荡恩情薄，尚未有、归来消息。想当初、凤侣鸳俦，唤作平生，更不轻离拆。倚朱扉，泪眼滴损、红绡数尺。

胡捣练

数枝半敛半开时，洞阁晓妆新注。宝香格艳姿天赋。甘被群芳妒。

狂风横雨且相饶，又恐有彩云迎去。牵破少年心情，无计为长主。

少年游

小楼归燕又黄昏。寂寞锁高门。轻风细雨，惜花天气，相次过春分。

画堂无绪，初燃绛蜡，罗帐掩余薰。多情不解怨王孙。任薄幸、一从君。

凤栖梧

整顿云鬟初睡起。庭院无风，尽日帘垂地。画阁巢新燕声喜。杨花狂散无拘系。

近来早是添憔悴。金缕衣宽，赛过宫腰细。苒苒光阴似流水。春残莺老人千里。

又

池上新秋帘幕卷。菡萏娇红，鉴里西施面。衰柳摇风尚柔软。眠沙鸂鶒临清浅。

新翻归翅云间燕。满地槐花，尽日蝉声乱。独倚阑干暮山远。一场寂寞无人见。

又

闲上江楼初雨过。满袖清风，微散谁知

我。莲脸佳人颜未破。沙洲两两鸳鸯卧。
时有渔歌相应和。叠秀危横，黛拨山千
朵。一片凄凉无计那。离愁还有些些个。

又

惆怅留春留不住。欲到清和，背我堂堂
去。飞絮落花和细雨。凄凉庭院流莺度。
更被闲愁相赚误。梦断高唐，回首桃源
路。一饷沈吟无意绪。分明往事今何处。

浪淘沙

后约无凭。往事堪惊。秋蛩永夜绕床鸣。
展转寻思求好梦，还又难成。

愁思若浮云。消尽重生。佳人何处独盈
盈。可惜一天无用月，照空为谁明。

又

又是春暮。落花飞絮。子规啼尽断肠声，
秋千庭院，红旗彩索，淡烟疏雨。

念念相思苦。黛眉长聚。碧池惊散睡鸳
鸯，当初容易分飞去。恨孤儿欢侣。

又

帘外微风。云雨回踪。银缸烬冷锦帏中。
枕上深盟，年少心事，陡顿成空。

岭外白头翁。到没由逢。一床鸳被叠香
红。明月满庭花似绣，闷不见虫虫。

更漏子

庭远途程。算万山千水，路入神京。暖

日春郊，绿柳红杏，香迳舞燕流莺。客馆悄悄闲庭，堪惹旧恨深。有多少驱驱，蓦岭涉水，枉费身心。

思想厚利高名。谩惹得忧烦，枉度浮生。幸有青松，白云深洞，清闲且乐升平。长是宦游羁思，别离泪满襟。望江乡踪迹，旧游题书，尚自分明。

行香子

黄金叶细，碧玉枝纤。初暖日、当乍晴天。向武昌溪畔，于彭泽门前。陶潜影，张绪态，两相牵。

数株堤面，几树桥边。嫩垂条、絮荡轻绵。系长江舴艋，拂深院秋千。寒食下，半和雨，半和烟。

巫山一段云

笑拟条风戏，装迟谷雨催。彩云飞下柳楼台。千朵一时开。

惜恐尘埃染，惊疑紫府来。有时香喷入人怀。魂断客徘徊。

生查子

关山魂梦长，寒雁音书少。两鬓可怜青，只为相思老。

归傍碧纱窗，说向人人道。真个别离难，

不似相逢好。

贺圣朝

东君造物无凝滞。芳容相替。杏花桃萼一时开，就中明媚。

绿丛金朵，枝长叶细。称花王相待。万般堪爱，暂时见了，断肠无计。

又

牡丹盛拆春将暮。群芳羞妒。几时流落在人间，半间仙露。

馨香艳冶，吟看醉赏，叹谁能留住。莫辞持烛夜深深，怨等闲风雨。

安公子

又是春将半。杏花零落闲庭院。天气有时阴淡淡，绿杨轻软。连画阁、绣帘半卷。招新燕。残黛敛、独倚阑干遍暗思前事，月下风流，狂踪无限。

惜恐莺花晚。更堪容易相抛远。离恨结成心上病，几时消散。空际有、断云片片。遥峰暖。闻杜宇、终日哀啼怨。暮烟芳草，写望迢迢，甚时重见。

苏幕遮

尽思量，还叵耐。因甚当初，故故相招买。早是幽欢多障碍。更遣分飞，脉脉如天

外。

有心怜，无计奈。两处厌厌，一点虚恩爱。独上高楼临暮霭。凭暖朱阑，这意无人会。

渔家傲

微雨初收月映云。巢栖燕子欲黄昏。花片不飞风力困。春色尽。蜡梅枝上樱□嫩。

谁撼金环锁深洞。薰余乍厌锦衾温。消减玉肌谁与问。朱明近。日长无事添闲闷。

又

疏雨才收淡泞天。微云绽处月婵娟。寒雁一声人正远。添幽怨。那堪往事思量遍。

谁道绸缪两意坚。水萍风絮不相缘。舞鉴鸾肠虚寸断。芳容变。好将憔悴教伊见。

又

每到春来长如病。玉容瘦与薄妆称。不惯被人抛掷。思当本。奈向后期全无定。

早是厌厌愁欲凝。花间众禽愁难听。天赋多情翻成恨。有谁问。画屏一点炉烟暝。

剔银灯

昨夜一场风雨。催促牡丹归去。孙武宫中，石崇楼下，多情怎生为主。真疑洛浦。云水算、杳无重数。

独倚阑干凝伫。香片乱沾尘土。争似当

初，不曾相见，免恁恼人肠肚。绿丛无语。
空留得、宝刀剪处。

又

夜永衾寒梦觉。翠屏共、绣帏灯照。就
枕思量，离多会少。孤负小欢轻笑。风流争
表。空惹尽、一生烦恼。

写遍香笺，分割鳞翼，路遥难到。泪眼
愁肠，朝朝暮暮，去便不知音耗。终须拚了。
别选个、如伊才调。

又

好事争如不遇。可惜许、多情相误。月
下风前，偷期窃会，共把衷肠分付。尤云殢
雨。正缱绻、朝朝暮暮。

无奈别离情绪。和酒病、双眉长聚。往
事凄凉，佳音迢递，似此因缘谁做。洞云深
处。暗回首、落花飞絮。

临江仙

太史占天云物好，初阳律合黄钟。日缠
南极北郊风。雪花先柳絮，飞舞透帘栊。

圣运时和兼岁稔，歌欢处处皆同。簪声
相庆晓光中。金炉红兽炭，一举寿杯空。

又

遍地残花庭院静，流莺对对相过。万条
风柳间婆娑。樱桃初弄色，萱草自成窠。

早是芳菲时节晚，追游期会无多。眉山
敛翠近秋波。日长初睡起，愁与病相和。

采明珠

雨乍收，小院尘消，云淡天高露冷。坐看月华生，射玉楼清莹。蟋蟀鸣金井。下帘帏、悄悄空阶，败叶坠风，惹动闲愁，千端万绪难整。

秋夜永。凉天迥。可不念光景。嗟薄命。疑倏忽少年，忍交孤令。

灯闪红窗影。步回廊、懒入香闺，暗落泪珠满面，谁人知我，为伊成病。

朝玉阶

春色欺人拂眼清。柳条绿丝软，雪花轻。黄金才钺掩银屏。阴沈深院静，语娇莺。

美人春困宝钗横。惜花芳态泪盈盈。风流何处最多情。千金一笑须信倾城。

又

帘卷春寒小雨天。牡丹花落尽，悄庭轩。高空双燕舞翩翩。无风轻絮坠，暗苔钱。

拟将幽怨写香笺。中心多少事，语难传。思量真个恶因缘。那堪长梦见，在伊边。

卜算子

深院花铺地。淡淡阴天气。水榭风亭朱明景，又别是、愁情味。

有情奈无计。漫惹成憔悴。欲把罗巾暗

传寄。细认取、斑点泪。

又

尊前一曲歌。歌里千重意，才欲歌时泪已流，恨应更、多于泪。

试问缘何事。不语如痴醉。我亦情多不忍闻，怕和我、成憔悴。

瑞鹧鸪

夜来风雨损余芳。数片衰红落槛傍。媚景背人容易去，半轩飞絮日空长。

从来不信相思切，及至如今倍感伤。独立黄昏绣帘外，可堪新月露圆光。

燕归梁

风摆红绦卷画帘。宝鉴慵拈。日高梳洗几时忺。金盆水，弄纤纤。

髻云松辘衣斜褪，和娇懒、瘦岩岩。离愁更被宿醒兼。空赢得，病厌厌。

菊花新

怎奈花残又莺老。槛里青梅数枝小。新荷长池沼。当晴昼、燕子声闹。

亭栏花绽颜色好。风雨催催等闲开了。酒醒暗思量，无个事、甚刚烦恼。

又

坐卧双眉镇长敛。绣户初开花满院。罗

帏翠屏空，风微动、玉炉烟飏。

儿夫心肠多薄幸，百计思、难为拘捡。
几回向伊言，交今后、更休抛闪。

鹊桥仙

别离情绪，多方开解，却免厌厌似醉。
楼高终日倚阑干，目断有、千山万水。

妖娆薄媚，不禁抛摆，渐觉肌肤瘦悴。
当初相见偶然间，不唤作、如今恁地。

又

日长天气，深深庭院，又是春愁滋味。
池边昨夜雨兼风，战红杏、余香乱坠。

阴阴亭榭，暖烟轻柳，万缕黄金窣地。
一双新燕却重来，但暗把、罗巾掩泪。

虞美人

红颜绿鬓催人老。世事何时了。君心天
意与年光。春花未遍已秋霜。为谁忙。

樽前正好闲风月。莫话生离别。直饶终
日踏红尘。浮名浮利枉劳神。更愁萦。

又

江亭春晚芳菲尽。行色青天近。画桥杨
柳也多情。暗抛飞絮惹前行。路尘清。

彤庭早晚瞻虞舜。遥听恩迁峻。二年歌
宴绮罗人。片云疏雨忍漂沦。泪沾巾。

又

炉香昼永龙烟白。风动金鸾额。画屏细展小山川。睡容初起枕痕圆。坠花钿。

楼高不及烟霄半。望尽相思眼。艳阳刚爱挫愁天。故生芳草碧云连。怨王孙。

凤栖梧

秋日楼台在空际。画角声沈，历历寒更起。深院黄昏人独自。想伊遥共伤前事。

懊恼当初无算计。些子欢娱，多少凄凉味。相去江山千万里。一回东望心如醉。

又

任在芦花最深处。浪静风恬，又泛轻舟去。去到滩头遇俦侣。散唱狂歌鱼未取。

不把身心干时务。一副纶竿，莫笑闲家具。待拟观光佐明主。将甚医他民病苦。

又

别浦迟留恋清浅。菱蔓荷花，尽日妨钩线。向晚澄江静如练。风送归帆飞似箭。

鸥鹭相将是家眷。坐对云山，一任炎凉变。定是寰区又清宴。不见龙骧波上战。

又

闲把浮生细思算。百岁光阴，梦里销除半。白首为郎休浩叹。偷安自喜身强健。

多少英贤裨圣旦。一个非才，深谢容疏懒。席上清歌珠一串。莫教欢会轻分散。

又

新月羞光影庭树。窗外芭蕉，数点黄昏雨。何事秋来无意绪。玉容寂寞双眉聚。
一点银缸扃绣户。莎砌寒蛩，历历啼声苦。孤枕夜长君信否。披衣颺坐魂飞去。

忆汉月

红杏一枝遥见。凝露粉愁香怨。吹开吹谢任春风，恨流莺、不能拘管。
曲池连夜雨，绿水上、碎红千片。直拟移来向深院。任凋零、不孤双眼。

诉衷情

烧残绛蜡泪成痕。街鼓报黄昏。碧云又阻来信，廊上月侵门。
愁永夜，拂香裯。待谁温。梦兰憔悴，掷果凄凉，两处消魂。

朝中措

养花天气近清明。丝雨酿寒轻。满眼春工如绣。消磨不尽离情。
行行又宿，小桃旧坞，芳草邮亭。唤起两眉新恨。绿杨深处啼莺。

菩萨蛮

花明月暗朦胧雾。此时欲往郎边去。划
袜下香阶。手携金缕鞋。

药兰东畔见。执手偎人颤。奴为出来难。
从君恣意怜。

丑奴儿

微风帘幕清明近，花落春残。樽酒留欢。
添尽罗衣怯夜寒。

愁颜恰似烧残烛，珠泪阑干。也欲高拚。
争奈相逢情万端。

蝶恋花

篱落繁枝千万片。犹似多情，似雪随风
转。昨夜笙歌容易散。酒醒添得愁无限。

楼上春云山四面。过尽征鸿，暮景烟深
浅。一饷凭阑人不见。红绡掩泪思量遍。

杜大中妾

临江仙

彩凤随鸦。

杜 东

喜迁莺 寿杨韩州 正月初五

生申华席。便占却新春，前头五日。椒
颂梅英，金幡彩缕，好个早春天色。使君以
仁得寿，和气融春无极。人总道，是阳春有
脚，恩浮南国。

应看，丹诏下，昨夜天边，初报春消息。
日转黄麾，风生绛伞，春殿龙颜咫尺。共庆
一堂嘉会，万宇同沾春泽。祝眉寿，便从今
细数，好春千亿。

杜 良 臣

三姝媚

花浮深岸树。迎新曦窗影，细触游尘。映叶青梅，记共折南枝，又及尝新。驻屐危亭，烟墅杳、风物撩人。虹外斜阳留晚，莺边落絮催春。

心事应辜桃叶，但自把新诗，遍写修筠。恨满芳洲，倩晚风吹梦，暗逐江云。慢捻轻拢，幽思切、清音谁闻。谩有鸳鸯结带，双垂绣巾。

杜 龙 沙

谒金门

阶露重。浥透寻花双凤。天色清明风不动。薄衫金络缝。

午枕高云斜纵。一觉风流春梦。起看翻翻帘影弄。夕阳归燕共。

踏莎行

波暖芹汀，风香兰圃。清尘几点茸茸雨。画船丝竹载梁州，彩旗绳板欢游女。

修禊初三，禁烟百五。年华恰到风流处。一生只当百回春，一回春到休轻负。

斗鸡回 夹钟商

莺啼人起，花露真珠洒。白苎衫，青骢马。绣阳相将，斗鸡寒食下。

回廊暝色悄，应是待、归来也。月渐高，门犹亚。闷剔银缸，漏声初入夜。

雨淋铃

窗影珑璁，画楼平晓，翳柳啼鸦。门巷渐有新烟，东风定、人扫桐花。峭寒斗减，看旅雁、争起蒹葭。溯断云，多少悲鸣，数行又下远汀沙。

应是故园桃李谢。送清江、一曲阑干下。染翰为赋春羁，嗟双鬓、客舍成华。绣鞭绮陌，强携酒、来觅吴娃。听扇底、凄惋新声，醉里翻念家。

杜 旂

酹江月 石头城

江山如此，是天开万古，东南王气。一自髯孙横短策，坐使英雄鹊起。玉树声消，金莲影散，多少伤心事。千年辽鹤，并疑城郭非是。

当日万骝云屯，潮生潮落处，石头孤峙。人笑褚渊今齿冷，只有袁公不死。斜日荒烟，神州何在，欲堕新亭泪。元龙老矣，世间何限余子。

摸鱼儿 湖上

放扁舟、万山环处，平铺碧浪千顷。仙人怜我征尘久，借与梦游清枕。风乍静。望两岸群峰，倒浸玻璃影。楼台相映。更日薄烟轻，荷花似醉，飞鸟堕寒镜。

中都内，罗绮千街万井。天教此地幽胜。仇池仙伯今何在，堤柳几眠还醒。君试问。□此意、只今更有何人领。功名未竟。待学取鸱夷，仍携西子，来动五湖兴。

蓦山溪 春

春风如客，可是繁华主。红紫未全开，
早绿遍、江南千树。一番新火，多少倦游人，
纤腰柳，不知愁，犹作风前舞。

小阑干外，两两幽禽语。问我不归家，
有佳人、天寒日暮。老来心事，唯只有春知，
江头路，带春来，更带春归去。

杜衍

鸡叫子 咏雨中荷花

翠盖佳人临水立。檀粉不匀香汗湿。一
阵风来碧浪翻，真珠零落难收拾。

杜 旃

满江红

半落半开花有恨，一晴一雨春无力。
.....别缆解时风度紧，离觞尽处花飞急。

段宏章

洞仙歌 茶蘼

一庭晴雪 ,了东风孤注。睡起浓香占窗
户。对翠蛟盘雨 ,白凤迎风 ,知谁见、愁与飞红
流处。

想飞琼弄玉 ,共驾苍烟 ,欲向人间挽春住。
清泪满檀心 ,如此江山 ,都付与、斜阳杜宇。是
曾约梅花带春来 ,又自共梨花 ,送春归去。

法常

渔父词

此事楞严常露布。梅华雪月交光处。一笑寥寥空万古。风瓠语。迥然银汉横天宇。
蝶梦南华方栩栩。斑斑谁跨丰千虎。而今忘却来时路。江山暮。天涯目送鸿飞去。

潘台寺僧

诉衷情

知伊夫婿上边回。懊恼碎情怀。络索钿
儿一对，筒子与金钗。

伊收取，莫疑猜。且开怀。自从别后，孤
帏冷落，独守书斋。

范成大

满江红 冬至

寒谷春生 ,熏叶气、玉筒吹谷。新阳后、便
占新岁 ,吉云清穆。休把心情关药裹 ,但逢节
序添诗轴。笑强颜、风物岂非痴 ,终非俗。

清昼永 ,佳眼熟。门外事 ,何时足。且团
栾同社 ,笑歌相属。著意调停云露酿 ,从头检
举梅花曲。纵不能、将醉作生涯 ,休拘束。

又

始生之日 ,丘宗卿使君携具来为寿 ,坐中赋词 ,次
韵谢之

竹里行厨 ,来问讯、诸侯宾老。春满座、弹
丝未遍 ,挥毫先了。云避仁风收雨脚 ,日随和
气薰林表。向尊前、来访白髯翁 ,衰何早。

志千里 ,功名兆。光万丈 ,文章耀。洗冰
壶胸次 ,月秋霜晓。应念一堂尘网暗 ,故将百
和香云绕。算赏心、清话古来多 ,如今少。

又

雨后携家游西糊 ,荷花盛开

柳外轻雷 ,催几阵、雨丝飞急。雷雨过、半
川荷气 ,粉融香浥。弄蕊攀条春一笑 ,从教水

溅罗衣湿。打梁州、箫鼓浪花中 跳鱼立。

山倒影 ,云千叠。横浩荡 ,舟如叶。有采菱清些 ,桃根双楫。忘却天涯漂泊地 ,尊前不放闲愁入。任碧筒、十丈卷金波 ,长鲸吸。

又

罨画溪山 ,行欲遍、风蒲还举。天渐远、水云初静 ,柁楼人语。月色波光看不定 ,玉虹横卧金鳞舞。算五湖、今夜只扁舟 ,追千古。

怀往事 ,渔樵侣。曾共醉 ,松江渚。算今年依旧 ,一杯沧浦。宇宙此身元是客 ,不须怅望家何许。但中秋、时节好溪山 ,皆吾土。

千秋岁 重到桃花坞

北城南埭。玉水方流汇。青樾里 ,红尘外。万桃春不老 ,双竹寒相对。回首处 ,满城明月曾同载。

分散西园盖。消减东阳带。人事改 ,花源在。神仙虽可学 ,功行无过醉。新酒好 ,就船况有鱼堪买。

浣溪沙 烛下海棠

倾坐东风百媚生。万红无语笑逢迎。照妆醒睡蜡烟轻。

采蛺横斜春不夜 ,绛霞浓淡月微明。梦中重到锦官城。

又

催下珠帘护绮丛。花枝红里烛枝红。烛

光花影夜葱龙。

锦地绣天香雾里 ,珠星璧月彩云中。人间
别有几春风。

又 新安驿席上留别

送尽残春更出游。风前踪迹似沙鸥。浅
斟低唱小淹留。

月见西楼清夜醉 ,雨添南浦绿波愁。有人
无计恋行舟。

又

歙浦钱塘一水通。闲云如幕碧重重。吴
山应在碧云东。

无力海棠风淡荡 ,半眠官柳日葱茏。眼前
春色为谁浓。

又 元夕后三日王文明席上

宝髻双双出绮丛。妆光梅影各春风。收
灯时候却相逢。

鱼子笺中词宛转 ,龙香拨上语玲珑。明朝
车马莫西东。

又

红锦障泥杏叶鞵。解鞍呼渡忆当年。马
骄不肯上航船。

茅店竹篱开席市。绛裙青袂斲姜田。临
平风物故依然。

又

白玉堂前绿绮疏。烛残歌罢困相扶。问
人春思肯浓无。

梦里粉香浮枕簟 ,觉来烟月满琴书。个依

情分更何如。

朝中措

丙午立春大雪 是岁十二月九日丑时立春

东风半夜度关山。和雪到阑干。怪见梅梢未暖，情知柳眼犹寒。

青丝菜甲，银泥饼饵，随分杯盘。已把宜春缕胜，更将长命题幡。

又

身闲身健是生涯。何况好年华。看了十分秋月，重阳更插黄花。

消磨景物，瓦盆社酿，石鼎山茶。饱吃红莲香饭，侬家便是仙家。

又

系船沽酒碧帘坊。酒满胜鹅黄。醉后西园入梦，东风柳色花香。

水浮天处，夕阳如锦，恰似鲈乡。中有忆人双泪，几时流到横塘。

又

海棠如雪殿春馀。禽弄晚晴初。倦客长惭杜宇，佳辰且醉提壶。

逍遥放浪，还他渔子，输与樵夫。一棹何时归去，扁舟终要江湖。

又

天容云意写秋光。木叶半青黄。珍重西风祛暑，轻衫早怯新凉。

故人情分 ,留连病客 ,孤负清觞。陌上千
愁易散 ,尊前一笑难忘。

蝶恋花

春涨一篙添水面。芳草鹅儿 ,绿满微风
岸。画舫夷犹湾百转。横塘塔近依前远。

江国多寒农事晚。村北村南 ,谷雨才耕
遍。秀麦连冈桑叶贱。看看尝面收新茧。

南柯子

槁项诗馀瘦 ,愁肠酒后柔。晚凉团扇欲知
秋。卧看明河银影、界天流。鹤警人初静 ,虫
吟夜更幽。佳辰祇合算花筹。除了一天风月、
更何求。

又

怅望梅花驿 ,凝情杜若洲。香云低处有高楼。
可惜高楼、不近木兰舟。緘素双鱼远 ,题
红片叶秋。欲凭江水寄离愁。江已东流、那肯
更西流。

又 七夕

银渚盈盈渡 ,金风缓缓吹。晚香浮动五云飞。
月姊妒人、颦尽一弯眉。短夜难留处 ,斜
河欲淡时。半愁半喜是佳期。一度相逢、添得
两相思。

水调歌头

细数十年事 ,十处过中秋。今年新梦 ,忽到黄鹤旧山头。老子个中不浅 ,此会天教重见 ,今古一南楼。星汉淡无色 ,玉镜独空浮。

敛秦烟 ,收楚雾 ,熨江流。关河离合、南北依旧照清愁。想见姮娥冷眼 ,应笑归来霜鬓 ,空敝黑貂裘。酹酒问蟾兔 ,肯去伴沧洲。

又 燕山九日作

万里汉家使 ,双节照清秋。旧京行遍 ,中夜呼禹济黄流。寥落桑榆西北 ,无限太行紫翠 ,相伴过芦沟。岁晚客多病 ,风露冷貂裘。

对重九 ,须烂醉 ,莫牢愁。黄花为我 ,一笑不管鬓霜羞。袖里天书咫尺 ,眼底关河百二 ,歌罢此生浮。惟有平安信 ,随雁到南州。

西江月

十月谁云春小 ,一年两见风娇。云英此夕度蓝桥。人意花枝都好。

百媚朝天淡粉 ,六铢步月生绡。人间霜叶满庭皋 ,别有东风不老。

又

北客开眉乐岁 ,东君著意华年。遮风藏雨晚云天。应怕杏梢红浅。

不惜灯前放夜 ,从教雪后留寒。水晶帘箔万花钿。听彻南楼晓箭。

鹊桥仙 七夕

双星良夜 ,耕慵织懒 ,应被群仙相妒。娟娟月姊满眉颦 ,更无奈、风姨吹雨。相逢草草 ,争如休见 ,重搅别离心绪。新欢不抵旧愁多 ,倒添了、新愁归去。

宜男草

篱菊滩芦被霜后。袅长风、万重高柳。天为谁、展尽湖光渺渺 ,应为我、扁舟入手。

橘中曾醉洞庭酒。辗云涛、挂帆南斗。追旧游、不减商山杳杳 ,犹有人、能相记否。

又

舍北烟霏舍南浪。雪倾篱、雨荒薇涨。问小桥、别后谁过 ,惟有迷鸟羈雌来往。

重寻山水问无恙。扫柴荆、土花尘网。留小桃、先试光风 ,从此芝草琅玕日长。

秦楼月

窗纱薄。日窗红幔催梳掠。催梳掠。新晴天气 ,画檐闻鹊。

海棠逗晓都开却。小云先在阑干角。阑干角。杨花满地 ,夜来风恶。

又

珠帘狭。卷帘春院花围合。花围合。昼

长人静 ,双双胡蝶。

花前苦殢金蕉叶。懵腾午睡扶头。扶头怯。闲愁无限 ,远山斜叠。

又

香罗薄。带围宽尽无人觉。无人觉。东风日暮 ,一帘花落。

西园空锁秋千索。帘垂帘卷闲池阁。闲池阁。黄昏香火 ,画楼吹角。

又

楼阴缺。阑干影卧东厢月。东厢月。一天风露 ,杏花如雪。

隔烟催漏金虬咽。罗帏暗淡灯花结。灯花结。片时春梦 ,江南天阔。

又

浮云集。轻雷隐隐初惊蛰。初惊蛰。鸲鹋鸣怒 ,绿杨风急。

玉炉烟重香罗浥。拂墙浓杏燕支湿。燕支湿。花梢缺处 ,画楼人立。

念奴娇

双峰叠障 ,过天风海雨 ,无边空碧。月姊年年应好在 ,玉阙琼宫愁寂。谁唤痴云 ,一杯未尽 ,夜气寒无色。碧城凝望 ,高楼缥缈西北。

肠断桂冷蟾孤 ,佳期如梦 ,又把阑干拍。雾鬓风鬟相借问 ,浮世几回今夕。圆缺晴阴 ,古今同恨 ,我更长为客。婵娟明夜 ,尊前谁念南陌。

又

十年旧事 ,醉京花蜀酒 ,万葩千萼。一棹归来吴下看 ,俯仰心情今昨。强倚雕阑 ,羞簪雪鬓 ,老恐花枝觉。揩摩愁眼 ,雾中相对依约。

闻道家宴团栾 ,光风转夜 ,月傍西楼落。打彻梁州春自远 ,不饮何时欢乐。沾惹天香 ,留连国艳 ,莫散灯前酌。袜尘生处 ,为君重赋河洛。

又

吴波浮动 ,看中流翻月 ,半江金碧。醉舞空明三万顷 ,不管姮娥愁寂。指点琼楼 ,凭虚有路 ,鲸背横东极。水云飘荡。阑干千丈无力。

家世回首沧洲 ,烟波渔钓 ,有鸱夷仙迹。一笑闲身游物外 ,来访扁舟消息。天上今宵 ,人间此地 ,我是风前客。涛生残夜 ,鱼龙惊听横笛。

又

水乡霜落 ,望西山一寸 ,修眉横碧。南浦潮生帆影去 ,日落天青江白。万里浮云 ,被风吹散 ,又被风吹积。尊前歌罢 ,满空凝淡寒色。

人世会少离多 ,都来名利 ,似蝇头蝉翼。赢得长亭车马路 ,千古羁愁如织。我辈情钟 ,匆匆相见 ,一笑真难得。明年谁健 ,梦魂飘荡南北。

又 和徐尉游石湖

湖山如画 ,系孤篷柳岸 ,莫惊鱼鸟。料峭春寒花未遍 ,先共疏梅索笑。一梦三年 ,松风

依旧 , 萝月何曾老。邻家相问 , 这回真个归到。

绿鬓新点吴霜 , 尊前强健 , 不怕衰翁号。
赖有风流车马客 , 来觅香云花岛。似我粗豪 ,
不通姓字 , 只要银瓶倒。 奔名逐利 , 乱帆谁在
天表。

惜分飞

易散浮云难再聚。遮莫相随百步。谁唤
行人去。石湖烟浪渔樵侣。

重别西楼肠断否。多少凄风苦雨。休梦
江南路。路长梦短无寻处。

梦玉人引

送行人去 , 犹追路、再相觅。天未交情 , 长
是合堂同席。从此尊前 , 便顿然少个 , 江南羁
客。不忍匆匆 , 少驻船梅驿。

酒斟虽满 , 尚少如、别泪万千滴。欲语吞
声 , 结心相对呜咽。灯火凄清 , 笙歌无颜色。
从别后 , 尽相忘 , 算也难忘今夕。

又

共登临处 , 飘风袂、倚空碧。雨卷云飞 , 长
有桂娥看客。箫鼓生春 , 遍锦城如画。雪山无
色。一梦才成 , 恍天涯南北。

舞余歌罢 , 料宣华、回首尽陈迹。万里秦
吴 , 有情应问消息。我欲归耕 , 如何重来得。
故人若望江南 , 且折梅花相忆。

如梦令

罨画屏中客住。水色山光无数。斜日满江声，何处撑来小渡。休去。休去。惊散一洲鸥鹭。

又

两两莺啼何许。寻遍绿阴浓处。天气润罗衣，病起却忺微暑。休雨。休雨。明日榴花端午。

菩萨蛮

小轩今日开窗了。揉蓝染碧缘阶草。檐佩可怜风。杏梢烟雨红。

飘零欢事少。鬓点吴霜早。天色不愁人。眼前无限春。

又

元夕立春原无题 据强村丛书本

雪林一夜收寒了。东风恰向灯前到。今夕是何年。新春新月圆。

绮丛香雾隔。犹记疏狂客。留取缕金幡。夜蛾相并看。

又

黄梅时节春萧索。越罗香润吴纱薄。丝雨日胧明。柳梢红未晴。

多愁多病后。不识曾中酒。愁病送春归。恰如中酒时。

临江仙

羽扇纶巾风袅袅 ,东厢月到蔷薇。新声谁
唤出罗帏。龙须将笛绕 ,雁字入箏飞。

陶写中年须个里 ,留连月扇云衣。周郎去
后赏音希。为君持酒听 ,那肯带春归。

又

万事灰心犹薄宦 ,尘埃未免劳形。故人相
见似河清。恰逢梅柳动 ,高兴逐春生。

卜昼匆匆还卜夜 ,仍须月堕河倾。明年我
去白鸥盟。金闺三玉树 ,好问紫霄程。

减字木兰花

玉烟浮动。银阙三山连海冻。翠袖阑干。
不怕楼高酒力寒。

双松冻折。忽忆衰翁容易别。想见鸥边。
压损年时小钓船。

又

折残金菊。枳子香时新酒熟。谁伴芳尊。
先问梅花借小春。

道人破戒。染酒题诗金凤带。愁病相关。
不似年时酒量宽。

又

波娇鬓袅。中隐堂前人意好。不奈春何。
拚却轻寒透薄罗。

翦梅新曲。欲断还联三叠促。围坐风流。

饶我尊前第一筹。

又

枕书睡熟。珍重月明相伴宿。宝鸭金寒。
香满围屏宛转山。

鸡人声杳。瑶井玉绳相对晓。黯淡窗纱。
却下风帘护烛花。

又

腊前三白。春到西园还见雪。红紫花迟。
借作东风万玉枝。

归田计决。麦饭熟时应快活。身在高楼。
心在山阴一叶舟。

鹧鸪天

休舞银貂小契丹。满堂宾客尽关山。从
今袅袅盈盈处,谁复端端正正看。

横泪易,写愁难。潇湘江上竹枝斑。碧云
日暮无书寄,寥落烟中一雁寒。

又

荡漾西湖采绿苹。扬鞭南埭袞红尘。桃
花暖日茸茸笑,杨柳光风浅浅颦。

章贡水,郁孤云。多情争似桂江春。崔徽
卷轴瑶姬梦,纵有相逢不是真。

又

嫩绿重重看得成。曲阑幽槛小红英。酴
醾架上蜂儿闹,杨柳行间燕子轻。

春婉娩,客飘零。残花浅酒片时清。一杯

且买明朝事 ,送了斜阳月又生。

又 雪梅

压蕊拈须粉作团。疏香辛苦颤朝寒。须知风月寻常见 ,不似层层带雪看。

春髻重 ,晓眉弯。一枝斜并缕金幡。酒红不解东风冻 ,惊怪钗头玉燕乾。

好事近

云幕暗千山 ,肠断玉楼金阙。应是高唐小妇 ,妒姮娥清绝。

夜凉不放酒杯寒 ,醉眼渐生缬。何待桂华相照 ,有人人如月。

又

昨夜报春来 ,的皪岭梅开雪。携手玉人同赏。比看谁奇绝。

阑干倚遍忆多情 ,怕角声呜咽。与折一枝斜戴。衬鬓云梳月。

卜算子

凉夜竹堂虚 ,小睡匆匆醒。银漏无声月上阶 ,满地阑干影。

何处最知秋 ,风在梧桐井。不惜骖鸾弄玉箫 ,露湿衣裳冷。

又

云压小桥深 ,月到重门静。冷蕊疏枝半不禁 ,更著横窗影。

回首故园春 ,往事难重省。半夜清香入梦来 ,从此熏炉冷。

三登乐

一碧鳞鳞 ,横万里、天垂吴楚。四无人、橹声自语。向浮云、西下处 ,水村烟树。何处系船 ,暮涛涨浦。

正江南、摇落后 ,好山无数。尽乘流、兴来便去。对青灯、独自叹 ,一生羁旅。敲枕梦寒 ,又还夜雨。

又

路转横塘 ,风卷地、水肥帆饱。眼双明、旷怀浩渺。问菟裘、无恙否 ,天教重到。木落雾收 ,故山更好。

过溪门、休荡桨 ,恐惊鱼鸟。算年来、识翁者少。喜山林、踪迹在 ,何曾如扫。归鬓任霜 ,醉红未老。

又

今夕何朝 ,披岫幌、云关重启。引冰壶、素空似洗。卷帘中、敲枕上 ,月星浮水。天镜夜明 ,半窗万里。

盼庭柯、都老大 ,树犹如此。六年前、转头未几。唤邻翁、来话旧 ,同簪新蚁。秉烛夜阑 ,又疑梦里。

又

方帽冲寒 ,重检校、旧时农圃。荒三径、不知何许。但姑苏台下 ,有苍然平楚。人笑此

翁 ,又来访古。

况五湖、元自有 ,扁舟祖武。记沧洲、白鸥
伴侣。叹年来、孤负了 ,一蓑烟雨。寂寞暮湖 ,
唤回棹去。

浪淘沙

黯淡养花天。小雨能愜。烟轻云薄有无
间。官柳丝丝都绿遍 ,犹有春寒。空翠湿征
鞍。马首千山。多情若是肯俱还。别有玉杯
承露冷 ,留共君看。

虞美人 寄人觅梅

霜余好探梅消息。日日溪桥侧。不如君
有似梅人。歌里工颦妍笑、两眉春。疏枝冷蕊
风情少。却称衰翁老。从教来作静中邻。冷淡
无言无笑、也无颦。

又

落梅时节冰轮满。何似中秋看。琼楼玉
宇一般明。只为姮娥、添了万枝灯。锦江城下
杯残后。还照鄞江酒。天东相见说天西。除
却衰翁和月、更谁知。

又

玉箫惊报同云重。仍怪金瓶冻。清明将
近雪花翻。不道海棠消瘦、柳丝寒。王孙沈醉
狔毡幕。谁怕罗衣薄。烛灯香雾两厌厌。仿
佛有人愁损、上眉尖。

又 红木犀

谁将击碎珊瑚玉。装上交枝粟。恰如娇小万琼妃。涂罢额黄、嫌怕污燕支。夜深未觉清香绝。风露溶溶月。满身花影弄凄凉。无限月和风露、一齐香。

醉落魄 元夕

春城胜绝。暮林风舞催花发。垂云卷尽添空阔。吹上新年 ,美满十分月。

红蕖影下勾丝抹。老来牵强随时节。无人知道心情别。惟有蛾儿 ,惊见鬓边雪。

白玉楼步虚词六首 并序

赵从善示余玉楼图 ,其前玉阶一道 ,横跨绿霄中。琪树垂珠网 ,夹阶两旁。绿霄之外 ,周以玉阑 ,阑外方是碧落。阶所接亦玉池 ,中间涌起玉楼三重 ,千门万户 ,无非连璐重壁。屋覆金瓦 ,屋山缀红牙垂珰。四檐黄帘皆卷 ,楼中帝座 ,依约可望。红云自东来 ,云中虚皇乘玉辂 ,驾两金龙。侍卫可见者 :灵官法服骑而夹侍二人 ,力士黄麾前导二人 ,仪剑四人 ,金围子四人 ,夹辂黄幡二人 ,五色戟带二人 ,珠幢二人 ,金龙旗四人 ,负纳陛而后从二人。云头下垂 ,将至玉阶 ,楼前仙官冠帔出迎 ,方下阶 ,双舞鹤行前。云驾之旁 ,又有红云二 :其一 ,仙官立幢节间 ,其二 ,女乐并奏。玉楼之后 ,又有小玉楼六 ,其制如前 ,宝光祥云 ,前后蔽亏 ,或隐或现。小案之前 ,独为金地 ,亦有仙官自金地下迎。傍小楼最高处 ,有飞桥直瑶台 ,仙人度桥登台以望。名数可纪者 ,大略如此。若其景趣高妙、碧落浮黎、青冥风露之境 ,则览者可以神会 ,不能述于笔端。

此画运思超绝 ,必梦游帝所者仿佛得之 ,非世间俗史意匠可到。明窗净几 ,尽卷展玩 ,恍然便觉身在九霄三景之上 ,奇事不可以不识。简斋有水府法驾导引歌词 ,乃倚其体 ,作步虚词六章 ,以遗从善。羽人有不俗者 ,使歌之于清风明月之下 ,虽未得仙 ,亦足以豪矣。

珠霄境 ,却似化人宫。梵气弥罗融万象 ,玉楼十二倚清空。一片宝光中。

又

浮黎路 ,依约太微间。云色宝阶千万丈 ,人间遥作白虹看。幢节度高寒。

又

罡风起 ,背负玉虚廷。九素烟中寒一色 ,扶阑四面是青冥。环拱万珠星。

又

流铃响 ,龙驭笳云来。夹道骞华笼彩仗 ,红云扶辂辗天街。迎驾鹤毵毹。

又

钧天奏 ,流韵满空明。琪树玲珑珠网碎 ,仙风吹作步虚声。相和八鸾鸣。

又

楼阑外 ,辇道插非烟。闲上郁萧台上看 ,空歌来自始青天。扬袂揖飞仙。

玉楼春

佳人无对甘幽独。竹雨松风相澡浴。山深翠袖自生寒 ,夜久玉肌元不粟。

却寻千树烟江曲。道骨仙风终绝俗。绛裙缟袂各朝元 ,只有散仙名萼绿。

霜天晓角

晚晴风歇。一夜春威折。脉脉花疏天淡 ,云来去、数枝雪。

胜绝。愁亦绝。此情谁共说。惟有两行低雁 ,知人倚、画楼月。

玉楼春

云横水绕芳尘陌。一万重花春拍拍。蓝桥仙路不崎岖 ,醉舞狂歌容倦客。真香解语人倾国。知是紫云谁敢觅。满蹊桃李不能言 ,分付仙家君莫惜。

醉落魄

马蹄尘扑。春风得意笙歌逐。款门不问谁家竹。只拣红妆 ,高处烧银烛。碧鸡坊里花如屋。燕王宫下花成谷。不须悔唱关山曲。只为海棠 ,也合来西蜀。

菩萨蛮

冰明玉润天然色。凄凉拚作西风客。不肯嫁东风。殷勤霜露中。

绿窗梳洗晚。笑把玻璃盏。斜日上妆台。

酒红和困来。

眼儿媚 萍乡道中乍晴 ,卧輿中 ,困甚 ,小憩柳塘

酣酣日脚紫烟浮。妍暖破轻裘。困人天色 ,醉人花气 ,午梦扶头。

春慵恰似春塘水 ,一片縠纹愁。溶溶泄泄 ,东风无力 ,欲皱还休。

惜分飞 南浦舟中与江西帅漕酌别 ,夜后忽大雪

画戟锦车皆雅故。箫鼓留连客住。南浦春波暮。难忘罗袜生尘处。

明日船旗应不驻。且唱断肠新句。卷尽珠帘雨。雪花一夜随人去。

菩萨蛮 湘东驿

客行忽到湘东驿。明朝真是潇湘客。晴碧万重云。几时逢故人。

江南如塞北。别后书难得。先自雁来稀。那堪春半时。

满江红 清江风帆甚快 ,作此 ,与客剧饮歌之

千古东流 ,声卷地、云涛如屋。横浩渺、檣竿十丈 ,不胜帆腹。夜雨翻江春浦涨 ,船头鼓急风初熟。似当年、呼禹乱黄川 ,飞梭速。

击楫誓 ,空惊俗。休拊髀 ,都生肉。任炎

天冰海 ,一杯相属。获笋菱芽新入馔 鹁弦凤
吹能翻曲。笑人间、何处似尊前 ,添银烛。

谒金门 宜春道中野塘春水可喜 ,有怀旧隐

塘水碧。仍带曲尘颜色。泥泥縠纹无气
力。东风如爱惜。

恰似越来溪侧。也有一双鸂鶒。只欠柳
丝千百尺。系船春弄笛。

秦楼月 寒食日湖南提举胡元高家席上闻琴

湘江碧。故人同作湘中客。湘中客。东
风回雁 ,杏花寒食。

温温月到蓝桥侧。醒心弦里春无极。春
无极。明朝残梦 ,马嘶南陌。

醉落魄

雪晴风作。松梢片片轻鸥落。玉楼天半
褰珠箔。一笛梅花 ,吹裂冻云幕。去年小猎漓
山脚。弓刀湿遍犹横槊。今年翻怕貂裘薄。
寒似去年 ,人比去年觉。

霜天晓角

少年豪纵。袍锦团花凤。曾是京城游子 ,
驰宝马、飞金鞚。

旧游浑似梦。鬓点吴霜重。多少燕情莺

意 ,都泻入、玻璃瓮。

菩萨蛮 寓直晚对内殿

彤楼鼓密催金钥。沈沈青琐重重幕。宣
唤晚朝天。五云笼暝烟。

风急东华路。暖扇遮微雨。香雾扑人衣。
上林乌满枝。

水调歌头 桂林九日作

万里汉都护。

又 成都九日作

万里桥边客。

又

淳熙己亥重九。与客自阊门泛舟 ,径横塘。宿雾
一白 ,垂垂欲雨。至彩云桥 ,氛翳豁然 ,晴日满空 ,风
景闲美 ,无不与人意会。四郊刈熟 ,露积如繚垣。田
家妇子着新衣 ,略有节物。挂帆溯越来溪 ,潦收渊澄 ,
如行玻璃地上。菱华虽瘦。尚可采。舫棹石湖 ,扳紫
荆 ,坐千岩 ,观下菊丛中 ,大金钱一种已烂熳秾香 ,正
午薰入酒杯 ,不待轰饮 ,已有醉意。其傍丹桂二亩 ,皆
盛开 ,多桠枝 ,芳气尤不可耐。携壶度石梁。登姑苏
后台 ,跻攀勇往 ,谢去巾舆筇杖 ,石棱草滑 ,皆若飞步。
山项正平 ,有坳堂藓石可列坐 ,相传为吴故宫闲台别
馆所在。其前湖光接松陵 ,独见孤塔之尖。少北 ,墨
点一螺为昆山。其后西山竞秀 ,萦青丛碧 ,与洞庭、林
屋相宾。大约目力逾百里 ,具登高临远之胜。始余使
虜 ,是日过燕山馆 ,赋水调 ,首句云 :“万里汉家使。”后
每自和。桂林云 :“万里汉都护。”成都云 :“万里桥边

全宋词 范成大

客。'明年 ,徘徊药市 ,颇叹倦游 ,不复再赋。但有诗云 : '年来厌把三边酒 ,此去休哦万里词。'今年幸甚 ,获归故园 ,偕邻曲二三子 ,酬酢佳节于乡山之上 ,乃复用旧韵。

万里吴船泊 ,归访菊篱秋。

醉落魄

栖乌飞绝。绛河绿雾星明灭。烧香曳簟眠清樾。花久影吹笙 ,满地淡黄月。好风碎竹声如雪。昭华三弄临风咽。鬓丝撩乱纶巾折。凉满北窗 ,休共软红说。

朝中措

长年心事寄林扃。尘鬓已星星。芳意不
如水远 ,归心欲与云平。

留连一醉 ,花残日永 ,雨后山明。从此量
船载酒 ,莫教闲却春情。

水龙吟 寿留守

仙翁家在丛霄 ,五云八景来尘表。黄扉紫
闼 ,化钧高妙 ,风霆挥扫。漠北寒烟 ,岭南和
气 ,笑谈都了。自玉麟归去 ,金牛再款 ,却回
首、人间少。

天与丹台旧籍 ,笑苍生、祝公难老。春葩
秋叶 ,暄寒易变 ,壶天长好。物外新闻 ,凤歌鸾
翥 ,龙蟠虎绕 ,想如心高会 ,寒霜夜永 ,尽横参
晓。

满江红

山绕西湖 ,曾同泛、一篙春绿。重会面、未温往事 ,先翻新曲。劲柏乔松霜雪后 ,知心惟有孤生竹。对荒园、犹解两高歌 ,空惊俗。

人更健 ,情逾熟。樱共柳 ,冰和玉。恐相逢如梦 ,夜阑添烛 ,别后书来空怅望 ,尊前酒到休拘束。笑簪瓢、未足已能狂 ,那堪足。

水调歌 人日

元日至人日 ,未有不阴时。新年叶气 ,无处人物不熙熙。万岁声从天下 ,一札恩随春到 ,光采动天鸡。寿域遍寰海 ,直过雪山西。

忆曾预 ,宣玉册 ,捧金卮。如今万里 ,魂梦空绕五云飞。想见大庭宫馆 ,重起三山楼观 ,观指赭黄衣。此会古无有 ,何止古来稀。

浣溪沙 江村道中

十里西畴熟稻香。槿花篱落竹丝长。垂垂山果挂青黄。

浓雾知秋晨气润 ,薄云遮日午阴凉。不须飞盖护戎装。

破阵子 袞

漂泊天隅佳节 ,追随花下群贤。只欠山阴

修禊帖 ,却比兰亭有管弦。舞裙香未湔。

泪竹斑中宿雨 ,折桐雪里蛮烟。唤起杜陵
饥客恨 ,人在长安曲水边。碧云千叠山。

鹧鸪天 席上作

楼观青红倚快晴。惊看陆地涌蓬瀛。南
园花影笙歌地 ,东岭松风鼓角声。山绕水 ,水
萦城。柳边沙外古今情。坐中更有挥毫客 ,一
段风流画不成。

酹江月

浮生有几 ,叹欢娱常少 ,忧愁相属。富贵
功名皆由命 ,何必区区仆仆。燕蝠尘中 ,鸡虫
影里 ,见了还追逐。山间林下 ,几人真个幽独。

谁似当日严君 ,故人龙袞 ,独抱羊裘宿。
试把渔竿都掉了 ,百种千般拘束。两岸烟林 ,
半溪山影 ,此处无荣辱。荒台遗像 ,至今嗟咏
不足。

水调歌头

万里筹边处 ,形胜压坤维。恍然旧观重
见 ,鸳瓦拂参旗。夜夜东山衔月 ,日日西山横
雪 ,白羽弄空晖。人语半霄碧 ,惊倒路傍儿。

分弓了 ,看剑罢 ,倚阑时。苍茫平楚无际 ,
千古锁烟霏。野旷岷嶓江动 ,天阔崑函云拥 ,
太白暝中低。老矣汉都护 ,却望玉关归。

木兰花慢 送郑伯昌

古人吾不见 ,君莫是、郑当时。更筑就山房 ,躬耕谷口 ,名动京师。诸公任他衮衮 ,与杜陵野老共襟期。有客至门先喜 ,得钱沽酒何疑。

昔年连辔柳边归。陈迹恍难追。况种桃道士 ,看花才子 ,回首皆非。相逢故人问讯 ,道刘郎去久无诗。把做一场春梦 ,觉来莫要寻思。

范纯仁

鹧鸪天 和持国

腊后春前暖律催。日和风软欲开梅。公
方结客寻佳景，我亦忘形趁酒杯。

添歌管，续尊罍。更阑烛短未能回。清
欢莫待相期约，乘兴来时便可来。

范端臣

念奴娇

寻常三五 ,问今夕何夕 ,婵娟都胜。天豁
云收崩浪净 ,深碧琉璃千顷。银汉无声 ,冰轮
直上 ,桂湿扶疏影。纶巾玉麈 ,庾楼无限清兴。

谁念江海飘零 ,不堪回首 ,惊鹊南枝冷。
万点苍山何处是 ,修竹吾庐三径。香雾云鬟 ,
清辉玉臂 ,醉了愁重醒。参横斗转 ,辘轳声断
金井。

又 上太守月词

玉楼绛气 ,卷霞绡云浪 ,飞空蟾魄。人世
江山惊照耀 ,烟霭鳌峰千尺。陆海蓬壶 ,银葩
星晕 ,点破琉璃碧。有人吟笑 ,紫荷香满晴陌。

况是东府君侯 ,西清别骑 ,樽俎开华席。
迤邐飞轮催杖履 ,入对青藜仙客。襦裤歌谣 ,
升平风露 ,拚取金莲侧。梅花吹动 ,满城依旧
春色。

范飞

满江红 寿东人

律转黄钟 ,尧蓂尚、零星一叶。人尽道、当年此日 ,诞生豪杰。我是君家门下士 ,三年屡献阳春雪。更此行、骑鹤上扬州 ,恩稠叠。

君有子 ,文章伯。君有女、夸才色。更风流酝藉 ,东床佳客。婿祝长生儿祝寿 ,玉杯举罢金杯接。愿年年、长醉腊前梅 ,梅梢月。

范宽之

失调名

谢娘梳子 ,贾妃莢佩。

范梦龙

临江仙 成都西园

试问前村深雪里，小梅未放云英。阳和
先到锦官城。南枝初破粉，东阁有余清。

人在高楼横怨管，寄将陇客新声。西园
下晚看飞琼。春风催结子，金鼎待调羹。

范晞文

意难忘

清泪如铅。叹咸阳送远 ,露冷铜仙。岩花
纷堕雪 ,津柳暗生烟。寒食后 ,暮江边。草色
更芊芊。四十年 ,留春意绪 ,不似今年。

山阴欲棹归船。暂停杯雨外 ,舞剑灯前。
重逢应未卜 ,此别转堪怜。凭急管 ,倩繁弦。
思苦调难传。望故乡 ,都将往事 ,付与啼鹃。

范学士

水调歌头

登临眺东渚 ,始觉太虚宽。海天相接 ,潮生万里一毫端。滔滔怒生雄势 ,宛胜玉龙戏水 ,尽出没波间。云浪番云脚 ,波卷水晶寒。

扫方涛 ,卷圆峤 ,大洋番。天垂银汉 ,壮观江北与江南。借问子胥何在 ,博望乘槎仙去 ,知是几时还。上界银河窄 ,流泻到人间。

范 炎

沁园春 庆杨平

襟韵何如，文雅风流，王谢辈人。问传家何物，多书插架，放怀无可，有酒盈樽。一咏一谈，悠然高致，似醉当年曲水春。还知否，壮胸中万卷，笔下千军。

门前我有佳宾。但明月、清风更此君。喜西庐息驾，心间胜日，东皇倚杖，目送行云。闻道君王，玉堂佳处，欲诏长杨奏赋孙。功名看，一枝丹桂，两树灵椿。

范致虚

满庭芳慢

紫禁寒轻，瑶津冰泮，丽月光射千门。
万年枝上，甘露惹祥氛。北阙华灯预赏，嬉
游盛、丝管纷纷。东风峭，雪残梅瘦，烟锁
凤城春。

风光何处好，彩山万仞，宝炬凌云。尽
欢陪舜乐，喜赞尧仁。天子千秋万岁，徵招
宴、宰府师臣。君恩重，年年此夜，长祝本
嘉辰。

范智闻

西江月 赠人博山

紫素全如玉琢，清音不假金妆。海沈时许试芬芳。仿佛云飞仙掌。

烟缕不愁凄断，宝钗还与商量。佳人特为翻香。图得氤氲重上。

范仲淹

苏幕遮 怀旧

碧云天，黄叶地。秋色连波，波上寒烟翠。山映斜阳天接水。芳草无情，更在斜阳外。

黯乡魂，追旅思。夜夜除非，好梦留人睡。明月楼高休独倚。酒入愁肠，化作相思泪。

渔家傲 秋思

塞下秋来风景异。衡阳雁去无留意。四面边声连角起。千嶂里。长烟落日孤城闭。

浊酒一杯家万里。燕然未勒归无计。羌管悠悠霜满地。人不寐。将军白发征夫泪。

御街行 秋日怀旧

纷纷堕叶飘香砌。夜寂静、寒声碎。真珠帘卷玉楼空，天淡银河垂地。年年今夜，月华如练，长是人千里。

愁肠已断无由醉。酒未到、先成泪。残

灯明灭枕头敲。谙尽孤眠滋味。都来此事，
眉间心上，无计相回避。

剔银灯 与欧阳公席上分题

昨夜因看蜀志。笑曹操、孙权、刘备。
用尽机关，徒劳心力，只得三分天地。屈指
细寻思，争如共、刘伶一醉。

人世都无百岁。少痴騃、老成尪悴。只
有中间，些子少年，忍把浮名牵系。一品与
千金，问白发、如何回避。

定风波 自前二府镇穰下营百花洲亲制

罗绮满城春欲暮。百花洲上寻芳去。浦
映□花花映浦。无尽处。恍然身入桃源路。

莫怪山翁聊逸豫。功名得丧归时数。莺
解新声蝶解舞。天赋与。争教我辈无欢绪。

范周

木兰花慢

美兰堂昼永，晏清暑、晚迎凉。控水槛风帘，千花竞拥，一朵偏双。银塘。尽倾醉眼，讶湘娥、倦倚两霓裳。依约凝情鉴里，并头宫面高妆。

莲房。露脸盈盈，无语处、恨何长。有翡翠怜红，鸳鸯妒影，俱断柔肠。凄凉。芰荷暮雨，褪娇红、换紫结秋房。堪把丹青对写，凤池归去携将。

宝鼎现

夕阳西下，暮靄红隘，香风罗绮。乘丽景、华灯争放，浓焰烧空连锦砌。睹皓月、浸严城如画，花影寒笼绛蕊。渐掩映、芙蓉万顷，迤邐齐开秋水。

太守无限行歌意。拥麾幢、光动珠翠。倾万井、歌台舞榭，瞻望朱轮骈鼓吹。控宝马、耀貔貅千骑。银烛交光数里。似乱簇、寒星万点，拥入蓬壶影里。

宴阁多才，环艳粉、瑶簪珠履。恐看看、

全宋词 范周

丹诏催奉，宸游燕侍。便趁早、占通宵醉。
缓引笙歌妓。任画角、吹老寒梅，月落西楼
十二。

范祖禹

虞主回京双调四曲

导引一曲

思齐文母，盛烈对皇天。演宝祚千年。
卿云复旦治功全。厌人世登仙。龙輿忽掩三
川。彩仗属车旋。维清象舞告英宣。入诗颂
歌弦。

六州一曲

太平功。拥佑帝尧聪。歌九德，偃五戎。
寰海被祥风。车书万里文轨同。自南北西东。
耕田凿井，戏垂髫华发，跻仁寿域变时雍。
大明方天中。弃养东朝苦匆匆。玉座如存，
永隔慈容。

恨难穷。崇庆空。飚轮仙驭无踪。超宇
宙，驾云龙。祔翟掩轩宫。柏城王气长郁葱。
温洛照寒崧。光灵在上，徽音流千古，昭如
日月丽层穹。太任家邦隆。彤史青编永垂鸿。
清庙笙镛。奏假钦崇。

十二时一曲

转招摇。厚陵回望，双阙起岩峣。晓日丽谯。金爵上干霄。风雨阁，夜宫闭，不重朝。奉鸾镳渐遥。玉京知何处，飞英衔恤，乱絮缠悲，春路迢迢。缥缈哀音，发龙笳凤箫。

光景同，惨淡度岩邑，指河桥。马萧萧。络绎星轺。拂天容卫，江海上寒潮。万国魂销。追昔御东朝。开钿扇，垂珠箔，侍瑄貂。宝香烧。散飘。开仁寿域，神孙高拱，昆仑渤澥，玉烛方调。一旦宫车晚，旋归沈寥。九载初，如梦次，功得琼瑶。

虞神歌一曲

驾玉龙。设初虞祭终。前旌举，天回洛水，路转崧峰。瞻寥廊，烟霏冲融。杳无踪。震地鼓吹悲雄。谁何羽卫重。拂云旗帜眩青红。来渐东。清尘洒道，修职百神恭。回首苍茫，雾雨吹风。掩泉宫。

□□□□□□□□寰畿入，山川改容。鼓钟临近次，千官望拜，涕泪衡从。人如堵，晨光葱茏。阙穹隆。驰道禁水相通。当年游幸空。皇仪事毕泣重瞳。哀未穷。巍巍馀烈；辉映简编中。亿万斯年，覆载同功。

虞主祔庙日中吕导引一曲

延和幄座，临御九年中。往事已成空。

皇基固覆盂四海，本自太任功。九虞初毕下
西宫。庙祏与天崇。周家盛，卜年卜世，万
祀永无穷。